


KHAWZAWL DISTRICT CHANCHIN

(Khawzawl District kum 5 tlin hriatrengna)



Prepared by

**Deputy Commissioner
Khawzawl District**



Date : 11th April, 2025

MESSAGE

Khawzawl District chuan August ni 12, 2024-ah kum nga hmel a lo hmu ve ta a. Kum nga hmel a hmuh denchhena Khawzawl District chhung khaw hrang hrang chanchin tarlanna lehkhabu siam a ni hi lawmawm ka ti hle a. He lehkhabu hian District chhunga khaw hrang hrang leh veng hrang hranga khawsate tan inpawh tawna tha lehzual a siam ka beisei a, sawrkarin in hmasawna ruhrel a siam kawngah leh thawhhona kawngah pawh he lehkhabu hi hmanraw tangkai tak a nih ka ring a ni.

Kan hriat angin Khawzawl District chu District naupang tak, District fuke kim ni tura hmalam pana kal mek rih a ni a, hmasawna zelna atana hmachhawp tihngai a la tam hle. Chutih rualin District chhunga chengte chu mi taima leh rinawm, Zo ze dik tak la chhawm nung tlat tute an ni a. An tih tawh lam chu an ti ve mai mai loin an bawh na hle tih hriatin tun dinhmunah eizawna atana thlai thenkhat Lakhuihthei, Tomato, Sapthei, Sawhthing leh Kiwi te chu Mizoramah a tharchhuak hnem District kan ni mek a, heng thei leh thlai te hi hmundanga thawncchuak nasa District kan ni ta reng mai. Hei hi chhawm nung zel turin District mipui, a bikin kut hnathawktute ka chah nghal bawh a ni.

Lehkhabu pangngai tak puah a, tichhuak tur hian beih fet a ngai thin a, thil awlai a ni lo. Chutih laia hun rei lote chhunga District hmel lanna leh hriatna tipung thei tur, thangtharte tan pawha lehkhabu hlu tak la ni zel tur hetiang lehkhabu tihchhuah a lo nih theihna chhan hi District chhung khaw hrang hranga VC, NGO leh khawtlang tana mi inpete thawhrimna vang liau liau a ni a, mahni khua leh veng chanchin ziaak rawn thawhtute chungah lawmthu ka sawi a ni.

A tawpna atan, Pathian venna leh kaihhruaina hnuaiah kan dam za zel ang a, kan District, Khawzwl District in hma a lo sawn zel theih nan kan hmazawn theuha tih tur awmte taimakna leh rinawmna nen thawk a, hmalam pan tlat a, theihtawp chhuah zel turin District mipuite ka chahin ka sawm vek a che u.



(K VANLALTHIANA)

THUHMAHRUAI

Khawzawl District area hi District dang anga zau tak a ni lo nain Mizote tana hmun pawimawh, pipu sulhnu leh Mizo lal ropui bikte lo khawsak tawhna thin a ni. He ram pala thlangtla hmasa zingah Meiteiho, Mirawngcho leh Hmarho khan heng lai ram hi an lo paltlang tawh tih tun thlenga he District chhunga an sulhnu la hmuh theih thenkhat atangin a hriat a. Kumpinu sawrkar in India ram a rawn awp a, Mizoramah pawh vai lo lianin an rawn awp ve ta zel a. british sawrkarin min beih hun, vailen laia Mizoram tana lo beitu Mizo lal zinga mi, lal huaissen Nikuala, Lalburha, Liankhama leh Kairuma te kha he District chhunga lo khawsate an ni. Khawzawl District hi Sailo lal leh Zahau lal ho ram luah thin a ni. Heng vangte hi a ni ang e, tun thlengin a chhunga chengte rilru a Mizo a, an rilru a thain an taima a, dikna an ngaina a ni. Hei hi kum 2018 a BPL dinhmun zir chianna Mizoram puma neih a nih khan a lo lang a. Sawrkar ina BPL dinhmun tehfung a siam hmangin dik takin hma an la a, kha mi tuma Mizorama BPL awm lohna khua nia tehfung hmanga inchhal ngam - Chawngtlai, Rabung, Riangtlei, Pamchung leh Tlangmawi te kha Khawzawl District chung khuate vek an ni.

Tunah hian Agriculture leh a kaihnawih hnuaia kut hnathawhtute hmalakna thenkhatah Mizorama District hmasawn ber zingah a tang leh mek a. District mipuite an taima tih hriatin Lakhuihthei, Tomato, Sapthei, Sawhthing leh Kiwi te chu Mizoramah a tharchhuak nasa ber District zingah a tel a. District Gross Domestic Product leh Per Capita Income thanna lamah pawh a hmasawn chak zingah a tel pha ve awm e. Khawzwl District hi a zo a, a boruak a nuam a, hmunhma tlawh chakawm tak tak, rei lova tourism industry la rawn than chhoh theihna tur hmunhma tha tak tak a nei a ni.

Khawzawl District chu kum 2019-a a taka a lo function atangin August ni 12, 2024-ah kum nga hmel a lo hmu ve ta. Hemi denchhen leh hriatreng nan District chhunga khua leh veng hrang hrangte chu an veng leh khaw chanchin ziaak tura ngen an ni a. Hei hi District chhunga khaw hrang hrang inhriatpawh lehzuall nan te, inunau lehzuall zel nan te leh hmasawna kawnga hmalak ho zeln atana tangkai zui tur a ni ang. Tichuan, Village Council hrang hrang ten hma lain mahni khaw/ veng chanchin an ziaak ta theuh va, mimal leh chhungkaw thil bik lang lai thlitfim erawh a awm a ni. Deputy Commissioner Office, Khawzawlah chung chu lo phuakhawm a ni ta a ni. Heng thuziak hrang hrang hi kum 2024 chhunga ziah an ni a, kum 2024 behchhana ziaak an ni tihna a ni. MP election 2024 leh chhan dang vangin kum 2024 chhungin chung chu tihchhuah hman erawh a ni ta lo. Amaherawhchu, kum 2024-2025 sawrkar kum chhunga tihchhuah tum a nih angin tunah hian peih a lo ni ta a. A lawmawm khawp mai. He lehkhabu khawrpum a nih theih nana tha leh zung thawhtute zawng zawng chungah Deputy Commissioner, Khawzawl District chuan thinlung leh tihtak zetin lawmthu a sawi a ni.

DC Office, Khawzawl

Date : 31st January 2025

Place : Khawzawl

A CHHUNGA THU AWMTE

1. Aduzawl chanchin	Phek No. 1
2. Arro chanchin	Phek No. 2 – 14
3. Biate chanchin	Phek No. 15 – 38
4. Chalrang chanchin	Phek No. 39 – 49
5. Chawngtlai chanchin	Phek No. 50 – 62
6. Chhawrtui chanchin	Phek No. 63 – 66
7. Dulte chanchin	Phek No. 67 – 68
8. Hmuncheng chanchin	Phek No. 69
9. Kawlkulh chanchin	Phek No. 70 – 75
10. Kawlkulh North chanchin	Phek No. 76 – 80
11. Khawhai chanchin	Phek No. 81 – 97
12. Khawzawl Arro veng chanchin	Phek No. 98 – 107
13. Khawzawl Darngawn veng chanchin	Phek No. 108 – 123
14. Khawzawl Dintar veng chanchin	Phek No. 124 – 132
15. Khawzawl Electric veng chanchin	Phek No. 133 – 134
16. Khawzawl Hermon veng chanchin	Phek No. 135 – 136
17. Khawzawl Kawnzar veng chanchin	Phek No. 137 – 138
18. Khawzawl Lungvar chanchin	Phek No. 139
19. Khawzawl Vengthar chanchin	Phek No. 140 – 144
20. Khawzawl Zaingen veng chanchin	Phek No. 145 – 162
21. Khawzawl Zuchhip veng chanchin	Phek No. 163 – 171
22. Khualen chanchin	Phek No. 172 – 176
23. Lungtan chanchin	Phek No. 177
24. Neihdawn chanchin	Phek No. 178 – 183
25. New Chalrang chanchin	Phek No. 184
26. Ngaizawl chanchin	Phek No. 185 – 195
27. Pamchung chanchin	Phek No. 196
28. Puilo chanchin	Phek No. 197
29. Rabung chanchin	Phek No. 198 – 205
30. Riangtlei chanchin	Phek No. 206 – 207
31. Sialhawk chanchin	Phek No. 208 – 217
32. Tlangmawi chanchin	Phek No. 218
33. Tlangpui chanchin	Phek No. 219
34. Tualpui chanchin	Phek No. 220
35. Tualte chanchin	Phek No. 221 – 222
36. Tuisen khaw chanchin	Phek No. 223 – 228
37. Ka Nutei leh Tuisen khua	Phek No. 229 – 232
38. Vangtlang chanchin	Phek No. 233
39. Vanchengpui chanchin	Phek No. 234 – 236
40. Vankal chanchin	Phek No. 237

AIDUZAWL CHANCHIN

Aiduzawl khua hi Mizoram thingtlang khaw hlun leh lar hmasa pawl a ni a, Sailo lal thut hmun a ni. Pemkhawm khua an nih loh avangin khaw inlungual tak an ni a, Mizo nih tinuamtu, tlawmngaihna meichher pawh vawiin thlengin tha taka chhawm nungtu khua an ni.

A hming put chhan: Tunhmain tuna Lalveng hmun rem zawlah te, Damvengah te leh Hall hmun zawlah te hian Aidu a tamin a awm khat deuh vek thin a. Chung Aidu awmna zawl awmna a nih avangin Aiduzawl khua tih a ni.

A awmna: Aiduzawl hi Mizoram hmarchhak Khawzawl District a awm a nia, Mizoram khawpui ber Aizawl atangin Km 197 a hla a ni. A khaw thenawmte chu, chhak lamah Rabung, Chhim lamah Vankal, Thlanglamah Pawlrang leh Hliappui, Hmar lamah Ngopa leh Lamzawl te an ni. Aiduzawl hi N 2342.005 Latitude leh E 90.836 Longitude ah a awm. A khua hi tlangpang hmun rem laia awm a nia, tlak deng a nih avangin zing ni chhuak a hmu meuh lo va, tlai lamah erawh chuan ni tlak thlengin ni a hmu thung. A khaw dung sei zawng hi km 1 vel a ni a, chhim leh hmar zawngin km 1 vel a ni baw. Tun dinhmunah in 70 a awm.

A ram chhung: Aiduzawl hi Rabung atanga Village Council in dang a ni a, Rabung ram atanga sahthlak then a nih avangin a ram chhung a zau lo. Chhak lam, chhim lam, leh hmar lamah te Rabung ram nen a inri a, khawthlang lamah Hliappui ram nen a inri thung. A ram zau zawng hi 909 Hectare vel a ni. Aiduzawl ram chhungah ram/mual hming nei hrang hrangte chu, Tlangsam, Chhim thal , Chungu dil, Lo darkhuang Dailuah , Zohmun , Lotang leh Lulam te a ni.

Lui awmte chu Tuimarul, Zotui, Phalte leh Darikhuai lui te an ni. Aiduzawl ram chhunga hmun hming nei chi hrang hrang a awm a, a then chu a larin Mizoram History a chuang phate pawh a awm a, thenkhat erawh Tualchhung mite chauhina hriatte pawh a awm baw. Chung hmun hming hrang hrangte chu, Meiteizo, Huai leh huai insahna, Seki lian, Pukpui, Mualkawi puk, Hlai putar, Rihnim, Sathak kawn, Tlangtiririai, Tlangfai, Tuisavawm, Khankawn, Vai camp tlang, Changalokawn, Ar lei, Chungu dil leh Lung inchhuang te an ni.

A mi chengte : Aiduzawl hi Mizo hlang awmna khua a ni a, Zo nun zemawi tlawmngaihna leh aia upa zahnte an la nunpui tha em em a ni. Tunah hian mihring 326 vel an awm a, chung zingah chuan kum tling Electoral Roll-a hming chuang 200 vel an awm. A mi cheng zawng zawng deuh thaw hi thingtlang lo neia eizawng an ni.

Aiduzawl khuaah hian zirna in UPS leh Primary School bakah Anganwadi Centre te a awm a, Kohhran hi UPC (MZ), UPC (NEI) Presbyterian Church te an awm. NGO hi YMA, MHIP, MUP leh GSA te awmin tha taka kalpui an ni. Khawtlang inrelbawlnaah Village Council member pathum awmin VC Secretary te nen roelna neih thin a ni. A mi chengte an hrisel tha a, Buh hmun leh Sawhthing hmun neih hi eizawna deuh ber a ni. Mimal in ni lo heng Building hi khuaah a awm - Community Hall, BNRGSK Building, MHIP Rûn, MUP Rûn, VO House, NGO Committee Room leh Biak In pathum te a ni.

ARRO CHANCHIN

Obida Lalthafala
Arro khua

A hmawr hawnna: Arro khaw chanchin leh lal chanchin hi ziaka chhinchhiah leh vawn that hmuh tur a vang hle mai a, Arro VCP hmasa ber Pu Lalhnuna'n kum 90 a nih kuma a ziah hi kan hmuh theih awm chhun chu a ni deuh mai. Arro khaw hming put chhan hi Chiang taka hriatna awm lo mah se, Hrangkhawl chi peng, Arro hnamte lo chen tawhna a nih avanga Arro tih hming hi pu ta a ngaih a ni. Arro ram hi Mizo lal ropui Lalburha ram chhunga awm a ni a. Kum 1906-ah Lalburha phalnain Lungdup (Kelkang) leh Chhungte atangin, Pu Neihmuka, Pu Thatchhunga, Pu Saisela, Pu Chimhuma, Pu Vainanga, Pu Tesena, Pu Kamhmunga, Pu Thangchhuma leh Pu Zuzema te hoin Arro ram Hmunulhah khua an rawn sat a, hetah hian chhungkaw sawmthum (30) vel an cheng zui ta a, hemi hnu hian Hmundamah an kai chho leh ta a ni. Arro ram lo luah tawhtu Lalburha khan fapa pali a nei a, chungte chu: Lalhuta (Khawzawl leh Darngawn lal), Rokima (Arro lal), Thangchungnunga lal) leh Chawnbika (Vanchengpui lal) te an ni.

Rokima rorelna hnuaia Arro khua: Arro lal Rokima hi kum 1911-ah Hmundamah lalna tlang a rawn chang niin a lang. A fa upa ber Lalkaii hi a lal hming chawia sak ni ngeiin a lang. Lalkaii hi kum 1966 khan kum 55 mi niin a thi a, chuta tanga chhut chuan a lal tan kum hi, 1911 bawr vel ni tura ngaih a ni. Rokima hi kum 1891-a piang a nih avangin a lal tan hian kum 20 mi chauh a la ni tihna a ni. Arroa Rokima a lal lai hian Mizo lal hmasate ang kha an ni tawh lo a, Mizoram chu British awpna hnuaiah a awm tawh a, Superintendent chu ram awptu ber niin, Mizoram chhunga lal zawng zawng chu a awpna hnuaia awm vek an ni bawk. Chutih laiin khawtlang inawpna leh enkawlina chu lal kutah a awm lian hle thung a. Lal hian khawnbawl upate nen ro an rel thin a. Lal fing leh remhria chuan an khua leh tuite tan an ngaihtuahna an seng nasa hle thin a ni.

Hmundama Rokima a indan tan hian lal upa atan Thanghuta leh Piangliana te a hruai nghal a. Hmundam atangin Khawhriamah an kai chho a, an kai kum tak erawh hriat a ni lo. Khawhriam atangin kum 1920 velah Arroah an kai phei leh a, Arro atang hian kum 1928 velah Hmundamah an let leh a. Hmundam atangin kum 1930 velah Khawhriamah an kai chho leh a, Khawhriam atang hian Arroah kum 1940 velah lal in va sak hmasak a ni a, Tuisen khuaa awm Pu Lawksena te chung, Pu Lalauva te chung leh Pu Chengchhuana te chung an lo va kai hmasa a. Kum 1941-ah Arroah hian a nawlpui chu an kai phei ta a ni. Hemi kum hi Arro khaw hmuna mei mit loa an awm ngheh tanna a ni.

Arro Hmundama an awm lai hian mipuiin Tuichangah ngawi an dawh a. An ngawi dawh chu a rak (sangha a tla duh) hle mai a, Thaichhawninu sum li te, sum nga te a tla thin a, sangha a tla tam a, khawtlangin sangha an insem dur dur thin a, sangha insem a zing malh malh hle. Khawtlanga ngawidawh a nih chuan ngawi tla hi hmeithaite nen lam insem tlan vek thin a ni. Arro awm hmasaka lehkha zir ho kha zir zelna a awm tak loh avangin hmun dangah an zir chhunzawm nual a. Heng lehkha zir hote hi an lo haw khawm a, Pastor Kaplunga hoin mipui an tihlim thin a. Pastor Saitawna hi a ke lo lâm a,

an lamna hla Chu, “Anin sawipum a den leh keinin sawipum kan den chu a ke lo a,” tih hla sain a ke lo lâm thin. Arroa an awm lai hian Missionary Sap Pu Menan Kristian an nih avangin a rawn tlawh a, Pathian thu a rawn sawi a ni.

Kum 1918 vel khan Kawihthuang hmunah Tuisen Bangla awmpui, Pu Seleta ho an awm ve a. Pu Tlangbawihate, Pu Saizema te, Pu Kuala leh a fa te, Pu Thangkhuma te, Pu Dohnawka te, Pu Dangtea te hi hemi hmunah awm kan hriat theih te chu an ni. Hemi hun lai vel hian Pu Tlangbawihate nu Pi Chawngi tar tak, kum 80 dawn lai mi a ni tawh a, pawn chhuak thei hmel pawh pu tawh lo chu khawmuin a chawi a nih rin a ni. Kangbur lui, Kawihthuang atang hian km 4 vela hla, ram ngaw dur takin a khuhah ani ang chu kal ngaihna awmin an hre lo. Mipuiin an zawn beidawn thak hnuah chakai khawrhin Kangbur luih an hmu a, lui tui chim chin leh chin lohah a ruang an chhar ta a ni.

Kum 1926-ah lal Rokima'n Pu Chawnnghina leh a hote, Khawrua Burmaa awmte chu Mel Venga awm turin a ko thla a, Kawihthuangah hian awm vein, chuta tang chuan an pem darh leh a. Pu Chawnnghina nau, Vanhnuailinga chuan Zuchhip Khualthangnghina Zahau khua a pan a. Pu Chawnnghina leh a hote chu Arro ram Phunchawngzawlah an chhuk thla thung. Heta an awm hian an hrisel lo hlawm hle a, Arpa pawh khuang duh loin Pu Manliana fapa chu a boral ta hial a, an awmna hmun chu chhuahsanin Pawih hmun kawnah an kai chho leh a. Chumi hnuah Pu Rokima khua Arroah hian lut lehin, lungruah takin an awm za ta zel a ni. Hemi hma hian Pu Kaihranga, Lalburha u Dothiauva fapa chu kum 1892-ah a lo awm tawh baw. Arro awm lai hian Zawlbuk pawh engemaw chen an nei a, Mizo dan pangngaiin tlangvalte an riak khawm thin a. Zawlbuk chuan rawih lam panin, riak tur an tlem tak telh telh avangin, an zawlbuk chu sawprawp zelin a chhiate thawm that lohin a awm hlen ta a ni.

Arro lal ram huam chin chu Chalthai kawn atangin Tuisen dung; Tuichang chhuah thlengin; Tuichang dung zawh thla zelin Kangbur lui a zuk chhun a; Kangbur lui chu zawhchho lehin Zabawnga lo kawn bul mual tlang chhip zawh thlain Chalthai kawn a pawh thla leh a ni.

Zirna lam: Lal Rokima hi lal rilru tha tak leh rorel thiam tak mai a ni a, naupang ngaina mi tak a ni baw a, naupang lo pawh hian an ngaina em em thin. Naupang a fiam dan pawh naupang a man a, Lera pa vai man chhimbuk thei chho lim muningaldang tham, an ti a. Chutia a tiha a mante chu a tham fiam a, naupang an tah loh chuan lal huana thei chi hrang hrang awm kha naupangho chu lawh a phalsak a, naupangho in an hlimpui hle thin. Lal Rokima hian zirna lam pawh a ngai pawimawh em em a, zirna in chu khaw hmasawna bul niin a ngai pawh a ni ang, Arro khuaah hian kum 1921-ah Primary School din a ni. Arro khuaa Primary School Head Teacher hmasate chu heng mite hi an ni:

1. Pu Hluanthanga (L)
2. Pu Liantawna (L)
3. Pu Haubawiha (L)
4. Pu Lalsiama

5. Pu Tlanchhuaha (Pu Haubawiha fapa). Ani hian khaw khawm thlengin Head Teacher hna hi a chelh. Ram a lo buai a, Arro khua a huhua India sawrkarin a man khawm a, Khawzawla awm luihtir an nih atang khan he Primary School hi a tawp zui ta a ni.

Kohhran lam : Pu Rokima hi ringtu tha tak niin tawngtai a ngaina a, a khua Arroah hian ringtute an zalenin Mizoram hmundanga lal thenkhatin ringtute an ngaih theih loh leh tiduhdah a, khua atanga an hnawh chhuah hial laiin, Arro khua hi ringtute'n tlan khawm nan an hmang thung a ni. Arroah hian engtik kumah nge Kohhran a din tih hi hriat ni lo mah se, kum 1910 leh 1914 inkar chhung hi chu a ni tih hriat a ni. Kum 1914 khan Arro khuain Biak In an nei tawh a. Hemi kuma Kohhran Biak In Presbytery in a pawmpui leh inkhawmpui in a nemngheh zingah Arro hi a tel a ni. Hemi kuma Presbytery khawmpuiah Arro in Kohhran upa 4 an dil. Kohhran upa hmasate chu :-

1. Khuangringvunga (Arro Khuanga)
2. Chimhuma
3. Neihmuka te an ni.

Arrokhuanga leh Neihmuka te hi kum 1915 March 25-a Presbytery in Kohhran upaah a nemnghet a, Upa Chimhuma hi October 1915-a Presbytery-ah nemnghet a ni leh ta a ni. Arro khaw per Hmunulh Mel Vengte chuan kum 1916-ah upa atan Thangthiauva an thlang ve leh a, Hmunulhah hian Chapel lung an phun avangin, Chapel kaiulte pawh a lo awm tawh a ni. (Pu Thangthiauva hi Upa Ranga, Darngawn kohhran dintu, Zuchhip veng a awm ta pa a ni). Arro khua atang hian Pathian rawngbawltu pawimawh tak takte an chhuak tawh a, chung mi hmasate chu:

- 1) Pastor Saitawna
- 2) Pastor Liandova
- 3) Pastor Kaplunga
- 4) Pastor C. Chalhanga, UPC
- 5) Major Thansiam, Salvation Army te an ni.

Kum 1924 Kohhran Assembly khan Arro bial a siam a, chutah chuan Pastor Kaplunga dah a ni. Arro Kohhran hi Pastor Kaplunga'n a awp thin a, a pension thlengin a awm ta a ni. Hetih lai hian harhna a lo thleng a, an hlim hle mai. Mahse, mipa leh hmeichhia in lam pawlh an remti ngai lo a, a laiah mau tlawn an kham a, mipa lamna leh hmeichhe lamna tur an siam hrang thin. Heng hun laia Arro Pastor bial hi a zau tham hle a, Pastor-in a bial chhung fang chhuak tur chuan fa chhang khat rawihna tham a ni ve. Thlang lamah Thinglian, chhak lamah Champhai, chhim lamah Biate, hmar lamah Kawlkulh te a ni.

Salvation Army hi Khawhriam an awm laiin din a ni a, a hotu hmasate chu: Pu Saizema leh Neihmuka te an ni. Kum 1950-ah UPC kohhran a lo ding ve leh a, a hotute chu Pastor C. Chalhanga te, Upa Aikima te leh Upa Tlangmura te an ni. Anni Kohhran rawn ding hlim hian tawngghriatloh an uar hle a, lam dan chi dang, pen thum lam an rawn ching chhuak a. Hlim takin an lam rual dual dual a, chutia an pen thum rual thap thap

lai chuan Pu Vanhlira chu pen khatin a lo pen chuang bik thin a, a hmututen an hlimpui viau thin niin an sawi.

Arro lal Rokima hi pa taima tak leh thawh rimna ngaisang tak chi a ni a, a hun lai hian Arro khua pawh hi ei barah chuan an intodelh hle thin a ni. Hnathawk nasa turin a khua leh tuite pawh a fuih thin a, thatchhia leh zawmthaw a ngai thei lo. Hnathawh hun laia dam loh vang ni loa thalai in awmte hi a zilhhau mai thin a ni.

Lal Rokima hian entlang (telescope) a nei a, favang chho lai vel hian lo thlir tlang atang hian Arro thlawhhma a thlir a, buh thliin a han chhem changa an thle nghial nghial chu hmuhdawm ti tak hian a thlir thin. Chutia buh hnah inchhawk a thlir pah chuan fiamthu, "Kha kha kha... an tlan liam dawn," a ti chul a, a khua leh tuite'n an hlimpui hle thin a ni.

Arro lal hian fa pasarih, mipa pali leh hmeichhia pathum a nei a, chung a fate leh an pian kum chu hetiang hi a ni. Lalkaii 1911, Lalliani 1916, Bialdiani 1921, Lalbuaia 1922, Lalngurliana 1926, Lalhlira 1928, Khawvelthanga 1936 te an ni. Kum 30 chung ro a rel a, kum 1941 -ah Lalbuaia'n a thlak a. Kum 1971 khan kum 80 mi niin Khawzawl Arro vengah a boral ta a ni.

Arro lal Lalbuaia : Lalbuaia hi Arro lal Rokima leh Khuanghnuni te aiawha lal turin a ti a. Kum 1941 ah a lal tan a, a lal hian kum 19 chauh a la ni. Kum 1944-ah Pu Paubawnga fanu Lalhmingliani (Nupuii) nen innein fapa panga leh fanu pali a nei a, chungte chu – Hrangliani, Romawia, Thangngura, Lalkhuma (L), Saipari, Rampaia, Lalhmingthanga (L), Thannguri (L), leh Zoramnglingliani, te an ni.

A pianphung leh mizia: Pu Lalbuaia hi pa sang thlerh thlawrh, feet 5 leh inchi 8 vela sang, dar pharh lam, Mizo paah chuan pa vantlang, vun rawngah pawh mi ngo leh hanga sawi tur ni lo tawng tam lo lam a ni a. Ama tawkah thahrui nei ve tak ni awmin sawi a ni. Zirna, thiamna a ngaisang a, taimak a ngai pawimawh a, intodelh a ngai hlu hle. Dikna duh mi a ni a, dan baka chetna reng reng a duh loin a do tlat thin. Mahni tanghma sial mi a ni lo a, hruaitu a nih lai pawhin theih tawka khawtlang leh ram tana thawk thin mi, tlawmngaih kawnga khawtlang entawn tlak, a hmaa mawhphurhna hlen tura thawk rim tak mi a ni.

Khawtlang leh kohhran rawngbawlna: Pu Lalbuaia hian a lal chhunga roreipui turin lal khawnbawl/lal upa Thanghuta te, Rokunga te, Lianngama te a nei a, Thirdeg Tlangbawihah leh a hnuah Tlangliana te a nei baw. Khaw chhiar atan zirtirtute hi a hmang mai thin. A hnu lamah Pastor Chalhanga'n engemaw chen khawchhiar hna kha a thawk baw. Lalbuaia rorelna hnuaiah hian buaina leh harsatna khua leh tuiah a awm ngai lo a, lungrual takin khawtlang tan an thawk ho thin a ni. A rorel hun chung hian Arro khua in ei leh barah malsawmna an dawng nasa a, tam an nei ngai lo. Taimak an inzirtir a, thatchhia leh hnathawk peih lo in awm mai mai an hriat chu an dam leh dam lohte an zawt a, lal leh upate'n an dam a nih chuan an zilhhau thin a ni. Chu vang chuan mi thatchhia Arro khuaah an awm ngai lo.

Pu Lalbuaia hian a rorel lai kum 1952-ah Arroah Middle English School an din a, lal chu School Board Chairman hmasa ber a ni. Zirtirtu lo thawk tawh hriat theihthe chu:-

1. Pu Lianchhuma, Ruallung khawchhuak.
2. Vengthawma.
3. Chalkaia, Tualte, Head Master-ah dah a ni.
4. R. Lalzama, Arro.
5. Hualsavunga, Tualte.
6. Zahlira, Darngawn.
7. R. Thangmawia, Chhinga Veng, Aizawl.
8. Mangthlahlova, Thingsul Tlangnuam.

Kum 1954-ah lal lalna chu tihtawp a lo ni ta a. Pu Lalbuaia hi VC inthlan tum thumnaah EITU Candidate niin Village Council Member atan thlan a ni a. Khawtlang tana ngaihtuahna seng thin, rorelna kawnga mi chung en a ni bawk a, VCP chanvo chelhin zo takin he mawhphurhna hi a hlen chhuak a ni. A nupui fanaute pawh hian a thu an awihin an zah thiam hle a, a nupui fanaute hi a hmangaih hle bawk. Hun a lo kal zel a, Zoram tana zalenna sual a lo nih takah khan, kum 1967-ah Pu Lalbuaia leh a fapa Romawia te chu sipaiin an man a, phai lamah Karimganj -ah te, Dibrugarh leh Goalpara jail-ah te tangin kum 3 dawn lai an tan hnuah kum 1969 leh 1970-ah an lo chhuak ve leh ta a. Tan in atanga a rawn chhuah leh pawh hian a fa tlum Zoramnginghiani chuan engemaw chen a ko ngam lo nghe nghe a ni.

Pu Lalbuaia khan a jail tang lo chhuah hnuah pawh ram leh khawtlang rawngbawlna lamah tha a thawh zui zel a, Merger Congress hun lai a ni a, Khawzawlah Congress party dintute zingah tel vein unit leh group hruaitu a ni chho thuai nghe nghe. Khawtlang mamawh hmunpui lama thlen tur pawhin hmatheh leh tha thawh berah a tang thin. Khawtlang leh pawlah theihtawpin a inhmang a, thahnemngai takin a thawk thin. Kohhran lamah chuan UPC kohhranah awmin a khaipa leh bul tumtu zinga mi niin kohhran upa a ni.

A hun hnuhnung lam: Kum 1972 vel atang khan thaw-hah natna neiin chak vak lo chungin Kohhran leh khawtlang rawng a bawl rei khawp mai a. Kum 1981 August thlaah khawsikin a bei na hle mai a, kar khat vel a dam loh hnuin ni 22 August, 1981-ah Khawzawl Arrö Vengah, kum 59 mi niin a boral ta a ni.

Rokima fa dangte: Rokima fanu pahnihna Lalliani hi Khawhriama an awm laia thi a ni a, Khawhriam khaw hmunah a thlan pawh hmuh theihin a la awm. A fanu pathumna Biakliani hi kum 1945-ah a thi a, heta tang hian lal thlan ro siam a ni a, Biakliani hi phum hmasak ber a ni. Lal thlan roah hian kum 1988-a thi, Lalngurliana phum hnuhnun ber a ni. Lalngurliana hi tlangval hmeltha veh vawh, vun ngo lam, sa inphut mawi tawk tak a ni. A hun laiin Mizoram hmun hrang hrang leh vai ram te pawh dai pawp zung zung mai mi, mi harhvang, thatho leh inzo tak mai a ni. Tum khat pawh Arroah hian kar an kam a, kar chuan sakei a kap hliam ta a, val upate'n zan lama chhui zui an remti lo a. A tuk zingah

val upa leh pasalthaten an chhui ta a. Kawrte ruam, hnahtthial hmun chhehrawpah Sakei mei chauh a lang a. Lal fapa Lalngurliana chuan, "Tlumpuiin a mei a thlah e," a ti a, a meiah chuan a phih tho lawp a, sakei pawhin a lo bei ngam lo a ni ang, a huk dum dum a. Lalngurliana chuan sakei zângah chuan a sahsak a, a zâng ti thlur hnih chu a sah chahsak a, sakei chu a che thei ta lo a. Silaiin anrawn kap a, an tihlum ta a ni. Sakei chu an han en Chiang a, kar chuan a kawng ruh a lo kap chhia a lo ni a, Sakei ruang chu hlangin an zawn haw ta a ni.

Arroah hian Sakei a tam a, Bawng a seh thin bakah mihring tan pawh a hlauhawm avangin Sakei hi hual leh kar kah nen chuan panga lai mai Arro khua hian an that hman. Tum khat pawh sakei hliam chu kawr thuk takah a lo baw a, Pu Zathata'n amah seh tuma a lo ang chu a silai kawm a zuk thun thawih mai a, a lu chu a khawih ta a. Lalngurliana chuan a meiah man zuiin, midangin an khawih zui a, an kap hlum ta a ni. Hei pawh hi a pumin an zawn haw a, a nung lai ding angin an dintir a, mipuiin an en luai luai mai a ni.

YMA leh pawl dangte: Kum 1947 khan Chalrang khua Pu Runa a lo kal a, "Indote a tawp ta baw a, ram dinhmun siam a ngai a, YMA te pawh din ve tur a ni," arawn ti a. YMA chu din a ni ve ta a, President hmasa ber chu Pu Pachhunga a ni a, Secretary atan Pu . Haubawiha (Zirtirtu)-te thlan an ni. Kum 1947 vek hian Arro khuaah politics lutin, Mizo Union Party din a ni a. Mizo Union President hmasa ber atan Pu Aikima, Vice President atan Pu Lalhnuna, Secretary-ah Pu Pachhunga, Asst. Secretary-ah Pu Biakthanga, Treasurer-ah Pu Saikhuma te thlan an ni. Hemi kum vek hian Signal pawl (signal corp) a ding baw a, hotu hmasate chu Pu Chalhliira, Pu Engzama leh Pu Runlinga te an ni. Zalen party hi a din kum tak sawi theih a ni lo na a, Union din hnu rei vak loa din a ni tih erawh rual u zawkte sawi atangin a hriat theih. Zalen pawl hruaitu hriat theih chhun chu Pu Tlangliana a ni a, a fapa hmingah *Dengrikhumkhumzalenthanga* a sa nghe nghe. Amah hi thirideng ani baw. Hun a lo kal zel a, kum 1958 a lo inher chhuak a, Arro khuaah chuan political party dang EITU (Eastern India Tribal Union) a lo ding ve leh a, heta hruaitu hriat theih chu Pu Tlangliana tho hi a ni. Kum 1962 April ni 20-ah Mizo National Front party a lo ding thar ve leh a, an hruaitute chu: President-ah Chawngzama, Vice President-ah Pu Zamvela, Secretary-ah Pu Runlinga, Asst. Secretary-ah Lalrawnliana, Treasurer-ah Pu Lalbuanga te an ni.

Kum 1960 velah Arro khuaah Games & Sports Association a ding ve leh a. Arro tuikhur bul zawl chu field atan sam fai a ni a. Kum 1965 khan Chawngtlaia Belpui Cup inchuhnaah an tel ve a, Khaw chhehvel: Tualte, Zuchhip, Khawzawl, Chawngtlaia leh khaw dang atangin team an chhuak hlawm a, team hrang hrang 38 lai an tel. Chung zingah chuan Arro tlangvalte chu a thiam ber niin belpui khap kua chu Arroah an hawn ta ruau mai a, khawtlangin an lawmpui nasa hle. Kum 1963 November-ah volunteer din a ni a, Commander atan Lalrawnliana, Pu Lalhnuna fapa thlan a ni a, a thachhang dawltu atan R. Kawlthuama leh Lalbuanga te ruat an ni.

Village Council: Kum 1954 August ni 16-ah Village Council inthlan hmasa ber neih a ni a, Mizo Union chakin heng hi chanvo an chelh dan a ni:

President	: Pu Lalhnuna
Vice President	: Pu Saikhuma
Secretary	: Pu Pachhunga
Member	: Pu Tlangbawiha Pu Hlunzika Pu Thanghuta Pu Thanghleia Pu Biakthanga

Heng thlan tlinte hi Returning Officer Pu Chalkaia, Headmaster ME School leh Captain Sawichhunga, Salvation Army Officer te'n chanvo an siam rempui a ni. Kum 1957-ah Village Council inthlan term hnihna a lo awm leh a, EITU party-in hnehna changin, heta thlan tlinte hian hetiang hian chanvo an insiam rem:

President	: Pu Tlanglana
Vice President	: Pu Tlanglura
Secretary	: Pu Rohnuna
Member	: Pu Chawrhawka Pu Daiuka

Hemi tuma VC thlante hi an hun hman zo loa thiah a ni a, inthlan that buatsaih niin, EITU party vekin hnehna chang lehin, hetiang hian VC body siam a ni:

President	: Pu Lalbuaia
Vice President	: Pu Tlanglura
Secretary	: Pu Rohnuna
Member	: Pu Daiuka Pu Kawngsayvpa (Pachhuanga) Pu Haukhuma (Mizo Union)

Kum 1964-a Village Council inthlanah Mizo Union chak ve lehin, hemi tuma thlan tlinte leh an chanvo chu hetiang hi a ni:

President	: Pu Chalkaia
Vice President	: Pu Lalhnuna
Secretary	: Pu Rithanga
Member	: Pu Manliana Pu Haukhuma

Hemi tuma VC atana thlan tlinte hi kum 1966-a Mizoramin zalenna suala ram pum a buai tak mai piah lamah, President leh mi thenkhat Champhaiah an pem zui a. Chu mai bakah mi thenkhat, man tawka Zoram tana Jail run thim hial an luh tak hlawm avangin, an aiawh turin heng mite hi khawtlang enkawl turin ruat chhuah an ni:

President : Pu K. Khawngghina
Secretary : Pu K. Runlinga
Tlangau : Rohnuna (Chawrhawka)

Kum 1968 a lo inher chhuak a, Arro leh a chheh vel khua eng emaw zat chu, an duhthlanna tel hauh lova Khawzawla khawm vek an ni. A huhoa khawm luihnaah hian Dargawn zat ve khawm luh hmasak niin, November ni 19-ah hruai luh an ni. Darngawn khawm bang leh Zaingen khaw chanve chu a tukah khawm luh leh an ni a. Ni 21 -ah Zaingen khaw zatve leh Arro khaw zatve chu khawm luh an ni ve leh a, November ni 22-ah Arro khua chu engemaw ti chhung atan hmun rauhsan, khaw ram mai ni turin chhuahsan a lo ni ta a ni.

Duh thlang thei ni se la, Arro khuaa mei a mih kha tuman an phal kher awm lo ve. Mahse, a khaw mite duhthlannain awmzia a nei lo a, duh dan sawi theiin tu mah siam an ni lo. Sappui mi ngo hmaah pawh zam lo, huaisen tak leh mipa taka lo do ngam, lal huaisen Lalburha hoa an lo sah chhuah Arro chhuahsan tura nunau han inphur liam nguah nguah mai chuan a hun laia suangtuahnaa zuk chen ngawt pawh lungchhiatthlak a tling. Sutpui phawi meuha patling han in-ar-kawh-chhuah mawp mai chu a runthlak tak meuh. Ramin dinhmun tha zawk a beiseina thinlung avanga mipui tawrhna chu, ram daia hun hmangte chan hrehawmna nen khaikhin rual ni lo mah se, sawi nep rual a ni lo, a lungchhiatthlak satliah lo a, rapthlak a tling tak meuh a ni.

Arro khua vul zel rawh se.

...ooOooo...

**ZORAMIN ZALENNA A SUAL HMA
LEH A HNU LAMA ARRO KHAW CHANCHIN THENKHAT**

Hrangnawna Khawlhling
Khawzawl Dinthar Veng

Arro khua hi khaw upa ve tak, khaw changkang hmasa pawl leh Kristian lo dinna hmasa niin, YMA pawh din hmasakna pawl tak a ni. Sakhuana lamah pawh Kristian dinna hmasa lam a nih vangin Pastor-ah Vanchhunga, Saitawna leh Kaplunga te bakah, zirna sikul lamah zirtirtu Pu Liandova, R. Tlanghmingthanga, (Ex Minister pa) leh mi dangte an lo awm tawh baw. Ram ni tla sêng loa rorethu British (UK) sorkar pawhin a tihtlawm zawh loh, Lalburha Sailo-ho hian Phunchawngzawlah te, Uitimah te lo awm tawhin, Lalburha'n a fapa Rokima tlang chang tura a tih hnuah Khawhriamah awmin chuta tangin Hmunzauah awm lehin Arroah an kai ta nia sawi a ni. Arroa an kai hun chiah hi chhui tum lam a ni lo baw a, heti chinah hian Arro kai thu hi chu duh tawh mai ila.

Kristian hmasate leh an hun tawng: Arro Kristian hmasate hian neksawrna leh endawngna te an tuar nasa a, inkhawm bangte chu kawng zawlah te lo dangin tlangval zu

ruite'n an lo tibuai fo thin ni tur a ni. Hetih lai vel hian Puma zai nena inkawp, tlanglam zai, zaipui rem deuh mai an uar lai tak a lo ni bawk nen, inkhawm bangte chu lo lam khumin an tibuai reng reng thin a ni awm e.

Pastor awm hmasa ber, Pastor Kaplunga'n Arro a chhuahsan hnuin Pastor Sena a lo awm leh a (Pastor Sena hi Pu Thanseia, Headmaster G. M. High School, Champhaia mi pa a ni). Pastor Sena chuan Kawlkulh atangin khaw chhehvel zawng zawng chu a bial ve leh ta a, chu chu tlangval zu in ho chuan tlanglam hla in:-

*Pastor Sencher, i bial fang rawh,
I beram no number bi a kim ta si lo;
Awn rawl kan hria e, Tlangrawn.*

tiin an phuah el a. Kristian nu leh paten an fanute inkhawm turin an ti a, chu chu tlangval an bialpate'n inkhawm phal loin an lo hruai hrang thin a, heti hian an phuah el khum a :-

*Kristian nula a kal sual e,
Mission Biak In thingte chhawl li liai hnuaiah;
A chawnban kan vuan a nuar lo e.*

Ringtu hmasate hian beihna an tawk ve hle tih a hriat a, dodalna nasa tak an tuar chung hian Rokima Arro Lal chuan kristianho thlavang hi a hauh tlat ve thung a. "A zin kualna apiangah chuan 'kristian leh kristian lo engmah en hranna a awm lo' tih hi a sawi uar hle thin," an ti. Chu chu hriain kristian apiangte chu Arro khuaah hian an pem thin a, chung kristian pem lut zingah chuan Colonel Lalrawnliana, Ex. MNA pute pawh hi Zataia, Khawhai lal hian lo haw lai thlipui leh ruahpui vanawn sur lai hian khua atangin a hnawt chhuak a, Rokima Arro lal khua an pan ta a, ani chuan huatna tel hauh loin a khuaa rawn pem lutte chu lawm em ema lo pawmin, in hmunte a lo pe vat thin a ni.

Harsatna hnuaia kun, mangangte tana belh ngam lal khua a nih vang pawh a ni ang, Arro khua chuan nasa taka hmasawnin, a than pawh a thang chak ta viau mai a. Chu hmasawnna chu hriain, Aizawl lam Kohhrân hruaitute pawhin Pastor thut hmunah an ruat ta reng a ni.

Zaipawl leh Missionary : Mizoram pum Kristiannain a lo fan takah chuan Mizoram pum pui Zaipawl intihsiakna buatsaih a ni a, chuta an intihsiakna hla chu Haleluiah Chorus hi a ni awm e. Hemi tuma Arro khua atanga intihsiaknaa telte chu:-

1. Pu Khiangbawia, Solfa vai leh bass a kawp.
2. Pi Lalringaii (Reve Darchhawna UPC, NEI nu), Soprano.
3. Pu Lalzuala (RKA (L) pa), Tenor.
4. Pi Lalbeli (Rev. Sangmuana pi), Contralto.

"Anni pali hian Mizoram pumpuiah pakhatna an la a ni," an ti.

Sawi hmaih hauh loh tur chu Presbyterian Kohhran atanga Chanchin tha hrila Arro khua atanga Missionary chhuak hmasa ber Pu R. Lalchhanhima, S/o Saptawna (Vala) chanchin hi a ni. Ani hi Indian Army AMC-ah tangin, a sipai tanna hmunah hian vai rama Dumka (Bihar, Santal) kan tih mai hote chu an rethei em em si a, leia rethei baw si, an Thlarau chhandam loh tur a hmuhin Isua Krista chanchin tha hrilh chu a bat a ni tih a rilruah a reh thei ta lo a. Indian Army atanga a chawlh hnuah, a thupui ber a nih si avangin a sawi bang thei lo a, chutah Pathian remruatna a lo thleng ta; Missionary-a a kal theihna tur hian pawisaa lo tanpuitu Chaltlanga mi Pi Mawii a tawng hlauh mai a, ani hian a chawm hmasa ber ta a ni. Jharkhan (Bihar)-ah school dinin, a school dinah hian Primary leh Middle School a awm tawh a ni. Pu R Lalchhanhima chu a thih pawhin, a hun laia Synod Moderator-in a vui ngat a. A vuina hunah Synod puipa, Department tina hotute theuh thu an vek baw a ni.

Young Mizo Association: Hun hmasa lamah Kristianna leh YMA hi inbahra ngul zema thang dun, Kristian Thalai Pawl pakhat ang hiala ngaih niin, zu in mi phei chu hruaitu O.B.-ah an duh ngai lo a, chu chu tun thleng hian kan la chhawm ta zel a ni. Kohhran a din hmasakna apiangah YMA pawh din hmasak a ni deuh zel a. Chuvang pawh chu a ni ang, Arro khuaah pawh khaw chhehvel aiin YMA a lo ding hmasa a. Arroa lo zinte hian pawl lo ding thar chu an hmuhin an khuaah an din ve ta zel a. Zuchhip khuaah hian Arro atanga Zuchhip khuaa va pem Rothuaman a din a. Arroah kum engemaw zah a din hnua a va din a ni. Chutiang zelin khaw chheh velah an din ta zel a ni.

Rokima Arro lalin Kristiante zalenna a lo pek zel vangin Chanchin tha hriltuten an tlawh zingin an pal ngun em em a. Chung mite sawi atang chuan Arro khaw thiltih thenkhat chu a lo darh zau ta zel a ni. Arro Khuanga tia hriat lar, ringtu hmasa, a hming chu Khuangrivunga a ni awm e. Mahse, Chanchin tha a hrilhna apiangah Arro Khuanga tiin an sawi thin. Lailak khuaa a pem hnu pawhin Arro Khuanga, Lailak an la ti zel a ni.

Zirna lam pawhin kristianna hi a zui zel a, kan hriat theih chinah chuan zirtirtu hmasa bcr chu Pu Hluanthanga a ni a kum 1921-ah Manipur atangin Arro khuaah a lo kal a, a fapa chu Upa Remsiam, Zirtirtu kha a ni. Chumi fapa leh chu Upa VL Para, Zuchhip veng hi a ni a, Upa Remsiam hi Arro khuaa piang tho a ni. Pu Hluanthanga hi Pu Liandova pastor a nih hma hian a lo thawk tawh baw. Heng zawnzawng hi kan Pathian hian amah ringtute a ensan lohzia tichiangtu a ni a. Sapho laka tlawm ve duh lo, Lalburha Sailo fapa Rokima Pathian tihna rah kan seng chho zel a ni ngei baw ang.

Lalburha chanchin thenkhat leh a fapa Rokima chanchin: Kum 1894 February thlaah Bawrsap A.W. Davis-an sipai 30 hruaiin Lushai Hills khawchhak lam khua a fang a, Tankhama khua tih loh chu a tlawh vek a. Lalburhan Tuichang kama awm a fapa Kaihranga a bel tih an han hria a. Bawrsap chuan silai 50 leh sial 5 chawi turin a tuk a. Hei hi a pektlak chuan ama puala khua siam phalsak a nih tur thuin an thlem a. Lalburha erawhin Bawrsap Davis chu a hmu duh lo mai ni lovin a chawi tura a tuk chu a pe duh lo. Lalburha hi Sapho pawh engah maha ngai lo lal huaisen a ni a, Pu Lalnunchanga'n a

sawi ang deuhin. Arro ram Phunchawngzawl a tih hi, a ri chiah Uitim ramah hian Lalburha hmun tlang chen nuam tak hi a awm a, hetah hian a tawm ru tlat a, sapho nen an inbiak laia a tawm rukna a nih vangin sa ui tanna hmun, Uitim tih ni ta awmin an sawi nghe nghe. Sap lal nena zu an in dunnaah pawh an han ruih deuh hnuah pheichuan Sap pa kha, "Sapa, ka vaibel hi han la kai teh," te a ti ni tur a ni, sap lal pawh chuan a la kai ve mai a ni awm e. Heta Lalburha'n vaibel la kaia a tirh Bawrsap A. Porteous a ni awm e, tichuan, remna sa ui chu kum 1896 February ni 26 khan a tanpui ta a ni.

Lalburha hian fapa Lalhuta Darngawn lal, Thangchungnunga Chhawrtui lal, Rokima Arro lal leh Chawnbika Vancheng lal te a nei a. 'Rorel tura a fate a kohkhawm chang hian Rokima, Arro lal a tel hma chuan rorel hi a tan duh ngai lo,' an ti thin. 'Rokima a thlen hmasak tum chuan midang an la kim chiah loh pawhin rorel chu tan tawh mai ang, an rawn thleng ve mai ang, ' a ti mai zel, " an ti baw. Pa ber Lalburha hian Rokima, Arro lal hi chu fing a ti bikin mi chhia leh hausa a thliar hrang ngai lo a, chuvang chu a ni ang e, Kristianho pawhin tlan khawm nan an hmanna chhan hi. Mahni mihringpui chung a thatna lantir hi lei malsawm dawnna hnar pakhat a tling a, chu chu Arro hian a taka tawngin, buhbalah pawh Pathian malsawmna an dawng reng mai a ni.

Lalburha a lo pian chhuaha naute entu apiang hian, 'In naute chu a va lal hmel ber bur ve, ' an tih zel avangin a hmingah pawh sa nghal mai ang, " an ti a, " 'Lalbura an ti a, ' an lamnaah chuan Lalburha tiin an lam ta mai a ni, " tiin upa hoin an sawi thin.

Khawzawla khawm luh hnu : Kan sawl tak ang khan Arro khua hmun nghak ho chu kum 1968 November ni 20-ah a khaw zatve vel Chu Khawzawlah khawm an ni a, a zatve dang chu December ni 1-ah an chho ve leh ta a ni. Khawzawla Darngawn khua an khawm luh hmasak zawk ni chu ni 28 November-ah a ni a, Darngawn khua leh Zaingen khua te pawh a chanve a chanvein an khawm lut baw a, a chhan chu a hruaitu tur sipai an indaih loh vang a ni. Khaw dang erawh an tam lem loh avangin a rualin khawm luh an ni thung.

Jail tang leh volunteer an tam avangin hmeithai an tam hle a, paho leh tlangval awm chhun chuan mahni in châk pawh pawh la hman loin hmeithai in châk lâk hmasak a tul si a, mipa awm chhun tan chuan ngaihtuah a tamin a hahthlak viau a ni. Hmeithai in sakna tur an lo thiar chungin mahni ta tur chak an la ve chauh a ni.

Arro khua hi zo tlang sang, boruak nuam tak, khaw rizap, ramngaw chawi vel a nih avangin a boruak a vawt nuam hle a. Khawzawl lah chu phai kuam khaw lum a lo ni a. Boruak inthlak chu an ngeih lo hlawm hle a. Khawm luhah hian upa kum 70 chung lam ngah ber an ni a. Khawzawl boruak lum an ngeih loh avangin thi zui ta an awm nual a ni.

Khawzawla khawm luh hnua VCP hmasa ber chu Vanthuama, Darngawn a ni a, a dawat chuan Lalrithanga VCP a ni leh. Khawzawla khawm luh an nih hian VC-te Jail-ah tangin Champhaiahte pem chho an awm baw a, VC tura thlan theih a nih baw si loh avangin, sawrkar thu ni loin khaw chung thuin ruat a ni ta a. President atan

Khawngghina, Secretary-ah K. Runlinga, Rohnuna (Chawra) tlangau. Hengho kaihhruaina hian Khawzawla khawm luh an ni ta a ni.

Khawzawla VC-te chu Lalrithanga, VCP, Kapzama vcp, Satinchhuma VCM, Laithuama VCM, Khawmpuia VCM te an ni. Khawzawl Dintar vengha Arro khaw chhuak VC hmasa ber chu K. Hrangnawna S/o Lalduma VCM, he thu ziaktu hi a ni.

Infiamna lam: Khawzawla Football Competition hmasa ber chu kum 1967 khan Pu Liankapa'n a nau Capt. Lalsipaia (L), Captain Ranjit Singh Punjabi pain Presbyterian Biak In tuala a kah hlum hriat reng nan, Lalsipaia Memorial tiin belpui a chhuah a, tuna Mualvawm field-ah hian football tournament chu khelh a ni. Favang lai, September thlaah buatsaih a ni a. Pu Liankapa hoin Arro veng pawh an chhuak a, team jersey pawh amahin a lei vek nghe nghe. Kawr leh kekawr chu a dum niin, kawr ban bul tlang chu a var a, a ipte chungah a varin 1 inch a hlaiin an bel a, kekawr hnung ipte a varin an bel baw a, chu chu Arro veng jersey chu a ni. Hemi tum hian pakhatna lawmman Arro ta a ni tihna a nih chu. Hei bakah hian Khawzawla khawkhawm luh zingah infiamna chi veng dang neih loh Arro khuain a ken luhte chu Volleyball leh a net, Badminton racket leh Carom-board-te a ni a. Khaw dang chuan a khelh dan pawh an hre mumal meuh lo a, Assam Rifle leh CPR vai sipai nen an inkhel thin a ni.

Khawzawl khawm zinga mi bikte : Heng mi hmingtha ho: Col. Lalrawnliana, Sgt. Satinkhara, Col. R. Dengthuama, Lalnghaka, Lalchawiliana te; sakhuana lamah Pastor Kaplunga, Pastor Liandova, Pastor Saitawna, Major R. Thansiamia, Pastor Chalhanga leh mi dangte bakah hian Arro tlangval, SI Zoramthara Khawlhiring leh Laliangsanga te chanchin tarlang ve leh ila.

Zoramthara Khawlhiring hi March ni 1 1975-ah Khawzawl Arro vengah a lo piang a, MA (Pol. Sc) Guwahati-a a zir zawh hnuah kum 2008-ah ASI leh SI ah a inziak tling ve ve a, kum 2008 October ni 1-ah SI chu zawmin NEPA Shillong-ah training-in thla sawm pathum a awm. India hmar chhak pum pui training-na hmun a ni a, Mizoram atangin MPS 13 leh SI 84 an kal a, vaihoin mizo nulate an auh nawmnah thin avangin Mizo nulate thlavang hauh tur pawha nulahoin an pun ber a ni. Vaiho mu laite kaithoa beng ngam a nih avangin hremna pawh a tawrh phah zeuh zeuh thu hmeichhe hoin an sawi. Sakawrdai OC a nih lai hian MLA pathum hruaia Zokhawthiang khua pana an kal laiin HPCD, Hmar helhoin an lo lambunnaah a naute pahnih nen kahhlum an ni a, Zokhawthiang (Kani) an tih thin dai bul lawka Tuivai kamah Zoram tan a nunna a hlan ta a ni. A thihna avang hian Mizoram mipui, amah lainattu tam takte thin a rimin Hmar helho chu thah vek emaw, tihtlawm emaw chu mipui tam tak duh dan a ni hial a, Zoramthara Khawlhiring leh a naute pahnih ruang vui dan tur leh hmuah dan tur chu central YMA-in a rel a. Sakawrdai leh Aizawl inkar khua zawng zawngin YMA huaihawtin an hmuah hnuah, Aizawl leh Khawzawl inkar khua YMA leh VC-te huaihawtin an lo hmuak vek baw a. Hetiang taka mitthi ruang hmuah leh hnam pum puiin a sun hi Pu Laldenga leh ani chiah hi an la ni mai thei e.

A danglam lehna chu SI Zoramthara Khawlhiring leh a naute thihna avang hian Mizoram sorkar hnathawka an duty laia thite reng reng chu cheng Nuai sawmin sorkarin a ral tawh dawn a, a hma chuan cheng nuai thum chauh a ni. Hei hi Arro khaw chhuak SI Zoramthara Khawlhiring leh a thiante thihna vang a ni ngei ang. Hei mai bakah hian, Mizoram Police-te an duty laia kahhlum emaw sahhlum or vihhlum, ral kuta an thih chuan Cheng nuai sawm pangain an ral zel tawh dawn bawk. Hei tak hi sorkar order-ah kum 2012 daih tawhah a lo awm reng a, sorkar khan hmang duh loin nuai thum chauh a lo pe thin. Chu chu duh loin SI Zoramthara pa, K, Hrangnawna Chuan High Court-ah Sorkar chu a hneh tak avangin kum 2018 atang chuan ral kuta Police thite reng reng chuan ralna cheng nuai sawm panga an la zel tawh dawn a ni. Hei pawh hi Arro khaw tlangval vang bawk a ni a. Heng ram tana thawktute hamthatna, ruahmanna awm sa reng, an lo dawn ngai si loh, Mizoram Police Officers Association (MPSOA) lehkhabuah leh High Court thu remnaah pawh ziah lan a nihna chhan hi Arro tlangval vang zel a ni. Khawzawl luh hnua Police SI inziak tling awm chhun a ni bawk. Ani hmaah hian Zosanga s/o Valkunga fapa SI-ah a awm tawh naa written exam paltlang loa interview-a lak a ni.

Khawzawla khawm luh zingah hian sawi hmaih hauh loh tur chu Honorary Captain, Lalinsanga hi a ni. Ani hi Assam Regiment-ah sipai lumuma tanin, sipaia a thlen theih tawp a thleng a, ani hi Khawzawla khawm luh zinga sipai lama kan chhuanvawr ber a ni. Anni bakah hian Medical Doctor Ayush bikah K. Lalrammawia S/o K. Tlanglawma hi a hmasa ber bawk. R. Lalhmingmawii MD Pathology d/o R. Laltanpuia (L) a pa Tlanglura (L), Vanlaltanpuii M.Sc Zoology MZU 4th position d/o Thangrumi a pa Tinsanga te pawh hi lam hmaih atan uiawm tur an ni ang.

Thu tlahlang: Arro khua hi kristian awmna hmasa niin Upa Rangkhuma pa Thangthiauva Khawlhiring hi Upa a ni a, kum engemaw zah a nih hnua Champhai Kahrawtah a pem a, chutah pawh chuan Upa ah thlan nawn leh a ni. Champhai atang hian Khawzawl Darngawn vengah pem thla lehin Kohhran a zu din leh a, Upa hmasa ber a ni leh bawk. Mizorama Nau hnuchham chawm hmasak ber chu Rev. Thanthuama, Salvation Army ten an chawm.

Arro khuain Mizoram buai avanga Arro chhuahsan a nih hnua Arro khua luah leh hmasatute chu Pu Ngunkhuaia Khawlhiring leh Pu Tawkthanga Hringngen te an ni a, anni pahnih hian kum 1972 March thla khan -

*Khua liai luai kan lenna khua liai luai,
Dar ngo lenna hmun hlui kan thian leh dawn e,
Ka ngai em tlang thiau a kan lenna,*

tiin Arro khua chu lung si tak leh phur takin an luah leh ta a ni. Khawkhawm hnua Arro khua hi Motor luh hmasakna a ni leh a. Motor lut hmasa ber hi Khawzawl RD Block BDO Motor (Gypsy) niin Motor-a rawn lut hi Khawzawla BDO hna chelh mek Pu Laltharmawia, MCS a ni.

BIATE CHANCHIN

HUN HMASA LAM HISTORY TLANGPUI

Hun hmasa lam : Biate khaw hmun hi lal hrang hrangin an lo awp tawh a. A hmun hi Mizo hnahthlâk hnam pêng pakhat 'Biate' hovin 1780 hma daih tawh khan an lo luah tawh a, kha tih lai kha chuan 'Zialung' khua an ti thîn. Anni hi khawchhak lam atanga khawthlang lama thlangtla hmasa hnam kha an ni a. Anni hi thlang tla zêlin 1780 vêl khan Hringchar (Silchar) phai vêlah an lût thla niin Rev. Liangkhaia'n a ziaak a ni.

Biate Hnam : Biate hnamho Biate hmuna an awm lai, Zialung khua a nih lai khan Mizo thawnthu ngaihnam tak mai a awm a, chu chu 'Zialung khaw chhan Hrangkhupa' tih kha a ni. He thawnthu leh Biate (Zialung) khua hi a inzawm tlat a, a lunglenthlâk dang dai hle.

Biate hnam sawi takah chuan tlêmin an chanchin hi han sawi zui ila. Anni hi tuna Mizoram ramri chhûnga lo lût hmasa ber nia hriat an ni a. A tîrah chuan pûkah te an chêng ve mai mai a, an chenna pûk hming chu Sinlung (chhinlung) pûk an ti a. He pûk hi Riangtlei leh Vângtlâng ram inkarah a awm nghe nghe a, chu chu Biate atang pawh hian hla lo tak a ni. Chumi hnuah Vângtlâng leh Riangtleiah te khaw thar siamin an awm leh a, chumi hnuah Biateah hian khua an din ta a ni.

Biate khaw hmuna an awm lai hi AD 1500 vêl nia rin a ni a, thangkhat lian teh meuh an awm ni ngei pawhin a lang. An awm rei thawkhat viau tih a lanna chu he lai vela hmun leh lui hming tam tak hi Biate tawng a ni tlat mai hi a ni. Entîrnan - *Râlvawng* tlâng te, *Hnîngtui* Lui te, *Raifan* lui te, *Mura* pûk te, *Perhkai* te, *Chhuanvawra khawthlir* tih te tûn thlengin a la awm a ni. Biateho chu Mizoram hmun hrang hrangah an pem kual nasa hle a, thlangtla zêlin tûnah hian N.C. Hills District, Assam-ah khuan Biate khua 18 lai a awm a, hei bakah hian Jaintia Hills District, Meghalaya-ah Biate khaw 22 zet a awm bawk a ni.

Sailo lal hnam : Sailo hnamho hi Sihsinga thlah kal zêl an ni vek a. Sihsinga fapa chu Râlnaa a ni a, Râlnaa fapa chu Chhuahlâwma a ni a, Chhuahlâwma fapa chu Zahmuaka a ni leh a, Zahmuaka fapa chu Thangura a ni a, Thangura fapa chu Thangmanga a ni. Thangmanga fapa chu Sailova a ni a, Sailova fapa chu Chungnunga a ni a, Chungnunga fapa chu Rohnaa a ni a, Rohnaa fapa chu Lallula a ni, Lallula fapa chu Vuttaia a ni. Vuttaia fapa chu Kairûma a ni a, Kairûma chu Biate hnamho thlangtlak hnuah Biatea lal leh hmasa ber a ni ta a ni.

Mizoram Lal zînga lal ber Kairûma : Bengal Administration report 1896-1897-ah hemi kum hian Kairuma chu sawrkar kuta a inpek thu a chuang a. Kum 1896-a sipaiin Tlaikung an hal a, chuta sipai outpost an dah fel khan sawrkar laka hel zui tlat chu a sawngsawhlawt tawh lo tih hriain Kairuma chu sawrkar kutah a inpe tih a hriat. Kairûma hi British sawrkâr sipai khan 1900 thâl tîr lam deuhah an man hlauh mai a, Jail-ah thla ruk lai a zu tâng hial a, a jail tâng chhuak chu a lalna hmun Hmunteah rei vak lo a awm a, Hmunte leh Phuihnama a khaw mi leh sa awmte chu Biate hnamho hmun hlui Zialungah a kaipui ta a ni. A kai hun hi a fapa Pathumna Lungdar lal ni ta Thangburha record-ah chuan "1901" tih a ni. Upaten an sawi dân hrang hrang thlirin 1900 kum tâwp lamah kai tanin 1901 ah an kai kim niin a lang. Kum 1901-ah Mizoram chhiarpui hmasa ber neih a ni a, chutah chuan Biateah In 334 a awm. Kha tih lai kha chuan in 300 chu khaw lian tak a ni

a, naupang zir laibuah pawh hun engemaw chen chu Mizoram khawpui lian zual pali zingah a tel pha a - Aizawl, Lunglei, Champhai, Biate tia zir thin a ni.

Biate lal hmasa ber Kairuma hi lal fing leh rorêl thiam tak a ni a, thu lai la tak mai niin fak pawh a hlawh hle. A thlanah pawh 'Ro a rêl sual ngai lo' tiin ziah a ni nghe nghe. Mizo lal ropui a ni a, kum 1893-1894 lai khan Mizoram hmar chan bialah a ropuiin hriat a hlawh hle tih a lanna chu khatih laia Political Officer A.W. Davies I.C.S chuan "Hmar chan lalte zinga ropui ber" a ti hial a ni (Gazetteer of the Lushai Hills). Mizo lalten 1904 kuma Silchar-a Viceroy Curzon an hmuah tumin, Viceroy chuan lalho ding tlar chu ti hian zawhna a zâwt a - "In zingah hian tu nge lal ber che u?" tiin. Chutah Lal Kairuma chuan "Kei mah" a ti a, tichuan, Mizo lal zinga Lal ber nihna chu awlsam takin a hauh ta a ni. A hnung zuia kal ve Avunga chuan, "Kan tlâwm zo ta vek mai le," a ti hial nghe nghe niin an sawi. Kairuma kha British sawrkâr pawhin an ngai nep lo hle a, a dam loh pawhin a enkawl tûrin doctor an tîr vang vang mai a ni.

Kairuma Certificate dawn : Kairuman a khua leh tui a enkawl dânah sawrkâr a lungawi tâwk hle tih leh a dah sâng hle a ni tih lanna chu British Emperor King George V lallukhum an khumtîr lâwmna Delhi hmuna an neihah Lalber King George V hmingin, chawimâwina certificate hial an pe a ni. A certificate-ah chuan hetiang hian a inziak -

By command of His Excellency the Viceroy and Governor-General in council, this certificate is presented in the name of His Most Gracious Majesty King George V, Emperor of India, on the occasion of His Imperial Majesty's Coronation, Durbar at Delhi to Kairuma, Lushai chief of Biate in recognition of the able manner in which he has administered the village committed to his charge. He certificate hlu tak mai hi December ni 12, 1911 khan Kairuma hnênah hlân a ni. He certificate hi Biate lal chhûngkuaten an chenna Muallvêngah an la kawl tha tlat a, en theihin tûn thlengin a la awm.

Kairuma fate leh an lalna : Kairuma hian fapa paruk neiin lalna a chantîr vek nghe nghe a. A fate leh an lalna hmunte chu a hnuaia mi ang hi a ni e.

Lalbika	- Khawbungah a laltir
Liangkanglova	- Sialhawkah a laltir
Thangburha	- Lungdarah a laltir
Laltawna	- Bungzungah a laltir
Lalthangchuanga	- A thih hnuin Biateah a lal
Lalbuanga	- Tukkalhah a laltir

Biate hmuna an awm hnu kum 1907-ah Biate atanga kilometre 5 vêla hlaa awm Râlvawngah an kai a. Râlvawng chu a lo hrisel hauh lo mai a, kum 3 chauh an awm hnuin 1909 ah tûna Biate hmunah hian an let leh ta a ni. Ralvawng an awm chhûng khan mi 70 lai an thi hman an ti. Tichuan, kum 1909 atang chuan khaw dang kai lovin vawiin thlengin Biate chu mei mit lovin luah a ni ta a ni.

Biate lal pahnihna - Lalthangchuanga : Titanic lawng pil kum 1912 khan Biate lal ropui Kairuma chu a thi ta a. A ai hi a fapa Lalthangchuangan a awh ta a. Ani hi Kairuma a thih hian kum 12 chauh a la ni a, rorêl tham a la nih loh avângin a nu Thangpuilali chuan a aiawhin kum 2 ro a rêl a, Lalthangchuanga kum 15 a nih chuan ro a rêl tan ta a. Biateah hian a lal rei hle a, kum 34 chhûng zet ro a rêl a ni.

Lalthangchuanga a lal lai hian Biate chu a ropui deuh deuh a. A hun chhûng hian thil thleng pawimawh a tam hle. Kum 1913 khan Abhor run a ni a, Biate tlangvâl 14 lai an kal ve nghe nghe a. Tin, a lal lai khan Biate tlangvâl thenkhat Silchar-ah tîrin thingpui tiak a zuk laktir a, chûng chu Biateah an chîng pung ta vak a, vawiinah chuan thingpui ngah khua an lo nih phah ta a ni. Kum 1938-a Tuichângrâl Presbytery a lo pian khan Biateah khawmpui ngah a ni. Khatih lai khan Presbytery khat kha a la zau hle a, mikhual pawh an kal tha thei hle. Chuti chung chuang, “Presbytery ngahna in hriat loh apiangin Biatein kan dawng zêl ang” a ti ngat a ni. Kum 1938-ah vek khan Zawlbuk chu thiah a lo ni ta bawk.

Khawvêl Indopui pakhatnaah (1914-1918) khan Mizo tlangvâl Feren (France) run tûrin Mizo tlangvâl 2000 teh meuh an kal a, kang zîngah khan Biate tlangvâl 20 lai an kal ve a ni. Kum 1919 khan Spanish flu hripui khawvêlah a lêng chiam a, vânduaithlâk takin Biateah pawh mi 90 lai an thi nghe nghe a, Indopui pakhatnaa zu kal tlangvâlthe erawhin an kai ve lo va, thlân laitu ber atân an tang ta hlah a ni.

Indopui pahnihnaah (1939-1945) khan Lushai Scout Corps ten Batallion Headquarters atân Biate an hmang a, kum 1944 thleng anni hi an awm zui ta a ni. A hun lai hian Young Lushai Association (1947 atangin YMA tih a ni ta) chu 1937-ah din a ni.

Biate Lal pathumna Lalngûra : Kum 1948-ah Lalthangchuanga chu kum 48 mi chauh niin a thi a. A ai hi a fapa Lalngura’n a awh ta a. Hetih lai tak hi Mizo lalte dinhmun khirh lai tak a ni. Mizo Union pâwl din niin mipuiin lalte rorêlna an duh lo va, bang tûra duhtu an pung chak hle a, an thawm pawh a na hle. Democracy rorêlna phutin Mizo Union pâwl chu an nuar a, a nuar ve duh lote chu an in an vawm a, an huante an tihchhiatsak a. An nuar hrem tûrin sipai an lo kal ta a, mi 13 laiin vuak an tuar a, lung lna khung tâkte pawh an nei a ni.

Biate Lal hnukung ber Laltluanga : Lalngura hi kum 1949 khan a boral ve leh a, kum khat leh thla khat chauh ro a rêl hman a ni. Ani hian fapa a nei lo va, fanu erawh pali a nei. Fapa a neih tâk loh avângin a nau Laltluanga chu a aiawhin a lal ve ta thung a ni. Laltluanga hi kum 1949 kumtâwp lamah lal tanin 1954-a Mizo lal bân a nih khan a lalna chu VC thlan hmasak berte kutah a hlân ve leh ta a ni. Laltluanga hian nula hmêltha tak mai, Khuanglêng lal fanu Lalbiakmâwii nupuiah a nei a. Ani hi vawiin thlengin a la dam a. A hriatna a la tha a, a la tei vak peih bawk a, a la kawmtlâk êm êm a ni. Laltluanga nên an inneih lai vêl mita hmutu an la dam nual a. Chûng zînga mite chuan a hmêl thatzia thu an hrilhfâk a ni. A hmêl hmu duh tân pawh Mualvênga an chenna inah he thu ziah mek thleng hian hmuh theihin a la awm reng a ni.

BIATE KHUA CHU

A awmna hmun : Biate khua hi Mizoram khaw chhak lama awm niin Khawzawl District ram valh chhûnga awm a ni a. Khawzawl district-ah hian a chhim lamah awmin khaw tâwp berah a awm. Biate hi khawchhak lamah South Khawbung, Dungtlang, Vânzau leh Bungzung ten an hual a, hmar lamah Sialhawk leh Rianglei ten an kîl bawk a, chhim lamah East Lungdar leh Lêng khuaten an kîl ve thung a ni. Biate atanga khaw hnai ber hi Sialhawk niin kilometre 9 chauha hla a ni a, East Lungdar khua hi Biate atanga khaw hnai ber dawttu niin kilometre 15-a hlaah a awm thung a. Biate hi 22°37’34” N leh 93°04’22” E ah awmin, sea levêl atanga tehin metre 1200 - 1500 inkara sângah a awm.

Biate hi tunhmain Mizorama khaw lian berte zînga mi lo ni tawh thîn mah se tûnah erawh Mizorama khaw lian zîngah a tel tawh lo a. In 550 vêl awmin a khaw dung seizawng hi kawngpuiah kilometre khat leh a chanve vêla sei a ni a, a vâng zawng hi kilometre chanve vêl a ni. Ram rem tak anga han sawi tûr ni lo mah se khaw hmun rem pangngai tak erawh a ni. Fur chhia tak takah pawh tu in mah leiminin a hnawh hlauhawmah an awm lo. Kairûma lalna hmun a nih avângin a ram hi a zau hle a, a khaw chhehvêl, a fapate a indantîrna khua ai chuan ram nei zau tak a ni.

Biate sik leh sa : Biate hi Mizoramah chuan a awmna tlâng a san vâng pawh a ni ang, hmun vawt pâwl tak mai a ni a. Thlasik khaw vawh zual lai phei chuan hmun thenkhatah vûr a tla vûr iarh thei hial a. Thlasik vawh zual lai tak takin 4°C atanga 15°C vêl a ni thîn. Nipui khaw lum hunah erawh 20°C atanga 30°C vêl a ni tlângpui. Global Warming avângin Mizoram leh khawvêl hmun dang tam tak ang bawkin a lum chak ve hle a. Kum 15 kal ta leh vawiin chu a boruak a inthlau ta hle a ni.

Heti chung hian chhunah khua lum ve hle thîn mah se, zanah chuan thawmhaw lum lam a inbel theih zêl a, khaw lum vânglai ber pawhin zan lam thlenga tawrh hrehawm khawpin a lum ngai meuh lo. Chhunah ruah a sur phei chuan zan lam boruak chu chawp leh chilhin a vawt ve nghal mai thîn. A sik leh sa a dai nuam a, Football Playground awmna leh a chhak lam pang ngatah phei chuan engtiklai pawhin thlîfîm a thaw heuh heuh reng a. Hmun khat lai phei chu ‘Puan Vawrh Tlâng’ tih a ni a, chutah chuan engtiklai pawha thlîfîm a thawt heuh heuh reng avângin chulai khamah puan vawm thlâk han tum ila, thliin a rawn chhem let leh zêl a, a vawmthlâk theih miah loh mai nia.

Tûn hma phei chuan a ram hi a vawh êm avâng leh zo êm avângin buh leh bal thar kawngah pawh harsatna an tawh phah hial thîn. Buh hi ram vawt takah a chin theih vak loh a, chin theih pawh lo ni se, a hlawk lo va, chuvângin hawp khawp tharchhuah a harsa thîn a ni.

A boruak a hrisel : Biate hi khaw hrisel tak mai a ni a. Tûnah pawh hian kum 80 chin chung lam hi mi 60 vêl an awm mek a, Biate khawlaia i kal chuan pitar putar, tiang hawla kal a, inzui dam dam i hmu fo ang; hei hian a entîr chu Biate hi khaw hrisel leh changkang tak a ni tih hi a ni. Khaw hrisel loah chuan kum upa lam an vâng pharh thîn. An awm a nih pawhin in lamah an tawmim viau zêl. Biateah erawh kum 90 chin chung lam pawh an awm nual mai a, tiang hawla la lêng peih, thian la kawm peih an ni nawk hlâwm mai. He thu ziah lai hian Biatea khuua chêng mêk zînga upa ber chu Pu Lalnghaka niin kum 98-na a hman mêk a ni. Tin, Biatein faina a kalpui hnuah ngat phei hi chuan hri a lêngte a nih ngawt loh chuan Biate Community Health Centre-a inêntîr an tlêm thîn hle a, damlo admit pawh pahni thum lek lek nih tum a tam a, Damlo admit tûr awm miah loh avânga damdawi In khar rih lawp lawp châng pawh damdawi In lama thawkten an nei fo a ni.

BIATE ZIA

Superiority Complex nei nasa khua : Biate hi sawi tawh angin Mizoram lal zawng zawng zînga ‘ka lal ber’ ti ngam ngat Kairûma khua a ni a, Mizoramah khawpui lian zual pali zînga tel pha a ni baw k a, hei vâng hian a khaw original takte chuan khaw dang tam takte aia mahni indah sanna ‘superiority complex’ hi an nei nasa a, awm pawh a awm viau a ni.

Hman lai chuan Biate hi khaw fai, khaw intodelh leh khaw lian a ni a, infiamna chi hrang hrang, a bîk takin inbuanah Mizoram puma chak ber nihna hauh pha Airawta te, AK

Sailûta te, Pu K. Lalkûnga te khua a ni a, Pathian thu lamah Pastor hmasa ber Pastor Fehtea te leh thuhrltu ropui Lalkherha te khua a lo ni bawk. Football-ah lah ni se, an khaw thenawmteah hneh loha bar an nei ngai meuh lo thîn bawk. Mizorama Harhna tum 4-na kum 1930-a lo thleng kha Biate atanga chhuak a ni bawk a, Mizoten khawhar hla tha kan neih tam tak hi Biatea sak lâh hmasak an ni. Hêngte avâng hian mahni indahsanna ‘self esteem’ an nei nasa a, a mak pawh a mak vak lo. He zia hi tûn thlengin engemaw chen an la chhawm reng a ni. Khaw dang, anmahni khaw tiat leh a aia lian hret thlengin dahsanna an nei lem lo a, an chhuk en deuh vek mah zawk fo. Tûnah erawh a ni lutuk ta lo.

‘Biate Ngat le’ rilru : Kum 1950 chho vêlah khan khaw hrang hrang atangin Aizawlah tlangvâlho chi seh phurin an kal nasa thîn a. Tlangvâl 20/30 rualte an inzui duah duah thîn. Khatih lai khan khaw lian deuh khua chu an intihuaiin khaw dang tlangvâl kha han dah neu deuh an tum ran thîn. Kawng chêp taka kea kal thîn kha an ni a, khaw lian leh ropui deuh tlangvâlthe kha chuan midang an tawhin kawng pawh an kian ve ngai meuh lo, khaw te zawk leh nêp deuh zawk tlangvâlthe erawh chuan kawng an kian thîn a ni an ti. Chi phura kawng zîmtea kal duah duah tlangvâlthe khan, “Nang khawi khua nge i nih?” tiin an khua an inzâwt tawn thîn a ni awm e. Biate tlangvâl chuan, “Biate” ti tha ve mai lo khan, “Biate ngat le,” an ti deuh kher thîn. Khaw lian dang atanga lo kal thenkhat pawh ‘ngat le’ tih han belh an awm ve tho bawk awm e. Tichuan, “Biate ngat le,” tih chu Biate khaw mite chuan anmahni an insawi dân a ni chho ta zêl a, vawiin thlenga la sawi pawh an awm zauh zauh awm e. A tam ber erawh chuan midang tâna chapo anga an lan theih deuh avângin ‘ngat le’ tih lai tak hi chu an belh tawh lem lo.

Hman lai tlangvâl, huai zawk leh chak zawk, chungnung zawk nih tum rêng rênga khawsate kha chuan, a ropuina leh a lenna changchawia an khaw hming an han chhal ngat thîn kha chu ‘hla do chham’ ang riak kha an ni ve a, a ropui dangdai ve thîn hle. Kha khan thalaite a tiphûr a, rual khûm tûrin nasa takin a fuih (motivate) tlat a ni. He an zia hian nasa takin khaw danga an awm pawhin nghawng a nei a. Biate khaw chhuak, khaw danga awmte pawh an awmna khua leh vêngah mahni indah hniam mai lovin thu nei pâwl leh rorêl pha ve pâwl zînga tel ngamna a siam a, chuvângin, an awmna vêngah pâwl hruaitu leh VC hial an nih phah nasa hle niin hriat a ni.

Mahni khua an ngai : Biate khaw mite tân hian Biate hi a nuam hle a. An inngainain an induhsak tlâng thîn hle. Khaw chhûnga an pawh lutuk loh leh an biak ngai lutuk lohte pawh khaw dangah chuan chhûng khat ang maiin an inên thuai zêl. Tin, kum tam tak khaw danga an awm hnu, vote pawh an neih hnu leh tu leh fate nêna an awm hnu daihah pawh an khua hi an ngai thei hle a, ‘Râlvawng tlâng’ te hi an thinlungah a lian reng mai a. Râlvawng tlâng hmu pha lova awm hi kum upa deuhthe phei chuan thih hreh takin an hreh a ni. Khaw danga kum 50 lai awm tawh si, khawi khua nge i nih an tiha mahni chen mêkna vêng/khua sawi ta mai lo va, “Biate” la ti tlat hi chhiar tham fê an la awm. Kum rei tak hnua chhiat that nikhuua khaw dang atanga lo haw, Biate ngaih vânga tap ta rawih rawih pawh an awm fo mai.

Kohhran leh Hlimna ngaisâng khua : Biateah chuan Kohhran a lal ber. NGO pâwl hrang hrangten committee leh hnatlâng an neih dân pawhin kohhranin hnatlâng a ko em? Committee a ko em tih emaw an zâwt Chiang hmasa phawt thîn. Engemaw palha a lo inthuah a nih hlah chuan NGO lam thil tum chu sawi ngai lova thulh sa a ni mai. Kohhran thu leh hla hi YMA pawhin a kalh ngai lo, ti tawl mai ila kan sawi sual tam awm lo ve.

Tin, Biatea kum sâwm chin chêng tawh chu Kohhran ngaihsak vak lo leh zu hmun sa hmuna tal thîn pawh ni se 'eng emaw hun lai' khan Biak Inah an lo lam kual zak zak tawh deuh vek. Biak Ina lam ngai miah lo tak tak chu chhiar tham lek an awm. Hlimna a lo thlenin lam mai an sam êm êm a, lamtual a khat rang thei hle.

Pâwl hruaitu zîngah Kohhran ngaihsak vak lo mi hi an duh lutuk lo va, a bîk takin YMA hruaitu leh VC member tûr ngat phei chu an duh fîr hle. Ruihtheih thil ti mi an awm ngai miah lo, ti ila kan daw lo tluk a ni ang. VC inthlan hmasa ber atanga vawiin thleng hian VCP zu in mi vawi khat mah an la nei lote hi mak tak a ni. Ruih theih thila buai hi an dah sâng lo va, Kohhran leh khawtlangah pawh an thlangtla thei lutuk lo. Ruihtheih thil ti mi hi mi fel tak tak leh a tlâwm ngai ngai an ni duh viau mai a. Chutihrualin chutiang mite chuan Biateah chuan *promotion* an hmu hlei thei vak lo.

Thian ngaina khua : Biate hi thian inkawm khawm let let ngaina mi, thian pâwl bîk insiama hlim taka inkawm khawm thîn an ni. Hman lai atangin Football an ngaina a, an tlangvâl laia inkhel ngai tûr pawha ngaih loh, an that laia football thiam tak tak an awm fur a. Tin, tûn hma deuh khan music an ngaina êm êm thîn a, Mizoram pum huap beat contest-ah pawh an lang pha hial thîn. Tûnah erawh chuan music-ah tûnhma an pha ta lo.

Thianzaho pâwl hming hrang hrangte : Tin, thianzaho, mi fel leh inleng dawl zo deuh ina chhuah khawm nuam an ti a, an inpawh thei hle. A hnuaia mite hi Biatea thianho pâwl hmingte an ni a, a tam zawk phei hi chu tun thlengin an la nung reng. Biate original thalai chin ngat chu hêng a hnuaia pâwl kan han târlan engemaw berah hian an tel deuh vek a ni. Thenkhat phei chu pâwl hnih pâwl thuma tel kawpte pawh an awm.

1	Khan United	2	Star Combination
3	Malsâwmi In chhuak	4	Chawk Kawi
5	Team Of Melody	6	Khawvêlthanga In chhuak
7	Young Boys	8	North star
9	VLF Hmar Thlipui	10	Falcons
11	Climbers	12	BZ Tactic
13	Spartan (Pu Siamta in chhuak)	14	7 O'clock
15	Phelebo	16	Sportive
17	Tornado	18	Troopers
19	Celebrace	20	Ri Tleng Dar Zam
21	King Star	22	Simpson
23	Nau Nau	24	Nancy
25	Five Stars	26	The Fox
27	AAzaabii	28	Merlin (Pi Engi In chhuak)
29	RMC (Ropuiliani Memorial)	30	Manscape
31	Mercy Sport Club	32	Mâwimâwi
33	Bernard	34	Rinrin
35	KLK	36	PPH (Pangpâr Huan)

Hêng bâkah hian thian inkawm ho, a hrana hming nei si lo an la awm cheu a ni.

Khaw inlungreal : Biate hi khaw inlungreal tia tûnhma atanga hriat thin a ni. Hei hi a dikna chen thui tak a awm. An inlungrealna chu hruaitute thu an awihna hi a ni awm e.

Tuna kan Politics kalphung chu insawisêl ngai a ni a, mahni party mi leh sa lote chu an insawisêl ve bawrh bawrh tho a, inthlan dâwnah pheî chuan nasa taka campaign a ni ve thîn ngei mai. Amaherawhchu, hruaitu atâna mipuiin an thlan chhuah tawh chu zaa sâwmriat vêl hi chuan hruaitu atân an thîlung takin an pawm zui ve mai tawh a ni. Hemi dikna lanna chu Information mic atang ringawta khawtlang hnattlang awlsam deuha an inaukhawm mai thei thîn hi a ni.

Biate hian faina lamah a zawnin kum 5 zet pakhatna a hauh a. Faina kawngah hian mipui tanrual a ngai êm êm a. Khawtlang hruaitute chauhin faina kalpui se, an thian fai seng lo ang. Mahse, mipuiin VC thu an awih a, hnattlang koh leh faina lama tan la tûra an fuihnate mipui nawlpuiin an zawm tha a, chumi avânga pakhatna ni thei an ni. He lungrualna tel lo chuan faina kawngah pakhatna a nih theih loh.

Tin, Biate hi tûna chêng mêk zât hawlh hian an pemsan tawh a, mahse, chûng zînga a tam ber erawh an rilru a pem tel lo. An awmna hmun theuhah Biate Welfare Society (BWS) an dîn a, chak takin an kalpui zel. Aizawla BWS pheî chu a pâwl a lian hle a, anmahni pawh an inhre seng meuh lo hial a ni. Anni hian Biatea thil tih pui a awm rêng rêngin chanvo pawimawh tak an la ziah a, an bang ngai lo. Sum thawhah te, thluak hman ngaiah te leh ram hruaitu biak ngai, len chilh ngaiah te an tlanche ngai lo va, Biate tân an inpe êm êm vek zêl a ni. BWS hruaitu zîngah political party hrang hranga inhmang tak tak an awm bawk a, a tawl rêl pâwl tak an ni nawk hlâwm. Chûng mite chu politics lamah han inhnial bap bap fo mah se, Biate khaw tân a nih erawh chuan kawî kawm thîn ang thapin an che nghal vek thei zêl a ni. Heng khaw chhuakte hi Biatea an kal pawhin a tam zawk chuan ‘ka zin’ ti lovin ‘ka haw’ an la ti reng.

Khaw rual el : Biate khua chu rual el pâng mai vek an ni. Chhûngkua a dîn tawh chuan chenna In puah ngei tûrah an ngai nghet tlat a, mahni puala in neih ngei hi ‘pa’ chuan an tum tlat thîn. Biate khaw paho, tlêma a nei nung deuh te a ruka inelna pheî chu a sâng hle a, chu chu Aizawla In tha tak neih a ni. Biate leh Aizawla in nei kawp a awm thluah a ni. Aizawla in neih meuh pheî chu awlai lo tak a ni a, chuti chung chuang Biatea in nei tho si, Aizawla In tha tâwk tak nei bawk an awm thluah mai. An inelna a sâng a, mi nazawng tân tel ve mai ngam chi pawh a ni lo.

Mipui nawlpui an fing : Khaw upa na na na chu a chhûnga chêngte pawh an fing deuh nge nge thîn. Aizawl pa naran ai chuan kum inrual rau rauah Delhi pa naran a fing zawk ang, a chhan chu Delhi-a a chenna environment leh nitina an thil hmuh leh hriatten a tîfing a ni. Chutiang chiah chuan Biate chu khaw upa a ni bawk a, (Kum 120 chuang a ni tawh) a chhûnga chêngte pawh an fing nge nge a ni.

Ram kang thelh taima : Kum tinin February, March leh April thla chhoah ramkang hi Mizoram hmun hrang hrangah a awm thîn. Biateah pawh ramkang awm loh kum a awm lo maithei. Ram a kan rêng rêngin Information Mic mipui hriat turin an au vat a, tichuan tlangvâl leh paho a biling a balangin kang awmna lamah an tlan liam zung zung mai zel. Kairûma thuthmun a nih miao avângin Biate ramvalh hi a zau êm êm a, ram kan theihna chance pawh a sâng bik lo thei lo. Amaherawhchu, eng anga hlaah pawh ram kang se, hman loh a sawi theih loh a, kang chu thelh tûr a ni mai. Damlo erawh an phut lem lo. Lo atan pawha neih mi loh, ram tau, awih teng chhe taka ramkang pawh ‘kang mai mai rawh se, a ram a chhe si’ an ti chuang lo a, a thelh tûra tlan tawp tur, mei a mih hma chu haw loh tur. Hei hi tûn thlenga an nih dan a la ni. A tlâwmngai zualte pheî chu ni naran tluk

rual an ni lo a. Mipui nawlpui tlan hmain an an tlan a, a hrehawm lai leh a harsa lai ber an pan chat thîn. Thleng hmasa ber leh haw tlai ber nih tum tlatna, chu Mizo tlawmngaihna chu an la vawng tlat nia. Mahse, chu tlâwmngaihna pawh chu a lo dal ve tial tial a, kangthelh nikhuaa tlan chhuak ve ta lem lo (damlo emaw hnathawk laklawh, cement chawhsa nei emaw) pawh ni lem lo, an awm ve ta zauh zauh mai.

Kangthelh nikhua hian mi hnathawka inhlawhte pawh an tlan ve mai thîn a. An thelh mih hnuah an lo haw a, an hna an thawh chhunzawm ve leh mai thîn. Hetah hian dân siam deuh a tha mai thei. Kangthelha tlan hun a zirin hnathawktu hlawh inpêk ni thei se. Ramkang chu hnathawktu mawh a ni lo va, a ruaitu mawh a ni hek lo. Hna pawh thawk thei loa nilenga kangthelhin a awm theih. Chawhma tha awrh thawk a, ramkang thelh tûra tlan a tûl châng a awm bawk. Hêngah hi chuan inlaitanin hnathawktu hlawh hi a zâtve chauh a ruaitu hian pe thîn se a dikin a rinawm. Ramkang thelh a ngaih thut hian hnathawktu chu an tlan mai thîn si a, an lo haw leh har viau pawhin a ruaituin an hlawh an pe *full* fo mai a, ramkang kha a ruaituin a mal tawrh leh ngawt zêl a, hei hi chu khawtlang hruaituten ngaihtuah that a tha maithei e.

BIATE KHAW MI CHAK, HUAISEN LEH TUAR CHHELTE

AIRAWTA : Mizo tlangvâl rual 2000 lai German râl runa an zu kal khan Silchar an thlenin Mizoho chu inbuanah an inel a, chumi tum chuan Biate tlangvâl Airâwta a chak ber a ni.

AITHUAMA : Ani hi Pu Renglina pa niin Mizoram level insaihrupawhah pakhatna a lo hauh tawh.

BAWIHTHANGA : Ani hi Rosuaka fapa a ni a. October ni 15, 1918 khan Biateah a piang a, pa san tha leh dawlh kai tak, feet 5.9 a sâng a ni. A awm 43 inches a lian a ni. Ram hnathawh a chak êm êm a, kum 1935 khan buh tin 9 hmun a vêng zo a, buh tin 600 a thar (Hman lai khan buh hi Biateah a hlawk vak lo tlangpui, hei hi a awmna vawh vâng a ni ber). Tin, Chi sêr 70 (Kg 80 vêl) Tlabung atangin Biateah a phur thleng thak. Buh tin 6 phur chungin a duh hun hunah ngat miah lovin a inthiarpui thei bawk.

Bawihthanga hi kum 1974 khan Mizoramah inbuanah a chak ber a. India sipai Eastern Command Boxing intihsiaknaah pakhatna a ni bawk. Sakei hliam thâng pika awm, tûma beih ngam loh chu amahin a luh chilh a, a kâp thal tawp mai bawk. Amah hi a chak mai a ni lo va, a tuar a chhel êm êm mai kha thil mak a tling. Tumkhat chu Khasi ram Sohriangkham luiah a thianpa nên sangha manin an kal a, luia an awm lai chuan Khasi helin an rawn kâp ringawt mai a. Ani chu hmun thumah an kâp fuh a. Hmun khat chu an kâp tlang a, silai mu dang pahnih chu a taksaah a tang a. A ngûmah pakhat a tang a, chu chu awlai takin a zen chhuak mai a, a dâr chhûnga pakhat tang chu a thûk êm avângin kut lawng chuan lak chhuah rual a ni lo a. La chhuak tûrin hnimhlum leh kakhikna hman an tum a. Mahse, chutiang hman chu a duh tlat lo mai a. “Min zai dâwn chuan hnimhlum emaw kakhikna hmang lovin min zai rawh u,” a ti tlat mai a. Chutiang chuan, a duh ang chuan a hauin an zai ta poh a, an zai chhuahsak ta a ni. ‘An zai lai chuan che hauh loin a tuar tlang thak mai a ni’ an ti.

K. LALKÛNGA : K. Lalkûnga hi Thanhra fapa niin kum 1975 khan Mizoram pumah patê inbuanah pakhatna a ni a. Kum 1977 pawh khan pakhatna a ni leh bawk. Mizorama palian inbuana chak ber ni thîn Lalkulha kha Biateah tumkhat chu a kal a. Pu K. Lalkûnga nên hian an inbuantîr a. A vawi khatnaah Lalkulha’n a la kang a, a vawi hnihnaah K. Lalkûnga’n

chiang fein a la kang ve thung a. A tum thumnaah chuan inla kang bîk an awm lo va, a tâwpah K. Lalkûnga'n a pawtthlu ta a ni.

MI TUARCHHEL PU HNAWKA : Vêngkhama hi Patea pa a ni a. Tum khat chu khawtlang hnatlannaah taivâng seh na chi, Chhimtaivâng bu hi an hmu a. An thai darh a, mite chuan, “Thut ngam in awm em?” an ti a. Vêngkhama chuan a puan ven a hlim sauh sauh a, a thut ta hmak mai a. A mawngah chuan taivâng za rual dâwn chuan an seh bur ta far mai a. Ani erawh chu na tuar lo ang maiin vaibel a zu tual tual a, a hawi vual vual ringawt mai, an ti.

MISUAL TAWRAWT TUDAWLTU CHHUANVAWRA : Chhuanvawra hi police huaisen tâwp a tling. Aizawl khawpuia misual tûru leh hnawksak bera neih Thanghutate thianho chu mitin hlah an ni a. Kham pûkah tawmkûk neiin tumahin an luhchhuah ngam lo va. Biate khua Police huaisen leh ro thap Chhuanvawra chuan, “Keima'n ka bei ang, ka man dâwn a ni,” a ti a, man tûr chuan a kal ta a. Misual Thanghuta te tawmna pûk bul a thlen chuan awrawl chhuahin a inhrosa ta a, “Kha keimah Chhuanvawra, hlah nei lo ka lo kal e, in chet vaih chuan ka bomb hlum vek ang che u,” a ti a. Chutah [a thiante awm hauh lo khan] “Thiante u, lo inrâlring rawh u, tlanchhuak an awm vaih chuan pakhat mah hlah rêng rêng loh tûr,” tiin a au that that bawk a. “Kha le, ka lo lût e, a che che chu ka kâphlum nghal ang che u,” a ti a, pistol-a tin chungin pûkah chuan a lût ta a. Thanghuta, an hotupa ber kha a thiante hnung khirh tûrin a ti a, a hnungkhirh loh chuan kahhlumah a vau chher chher mai a. Tchuan, anmahni leh anmahni chu an inhnungkhirh ta vek a, beihlet chu sawi loh, a tum pawh an tum chhin ngam lo rêng rêng a ni. Tichuan, kut hnungkhirh chungin a man ta phiar mai a ni, an ti.

KEITE VAWHLUM NGAM LALKHÛMI : Lalkhûmi hi Lalbera fanu a ni a. Tumkhat chu Riangtlei kawng lam chulah ui hruaiin a kal a, a haw lamah kalkawnga lui pakhatah a insil fai a. Chutihlai tak chuan a ui hruaite chuan hlah nei ni awm takin an rawn bel chûk chûk a. Lalkhûmi sawi dân chuan, “Ka han dâk chhuak a, Keite hi min zuan tumin a lo inrâlring phân phân tawh mai hi a lo ni a. Ka hmuh vêleh ka bula thing banrêk tiat vêl chu ka la vat a, vuak tumin ka lo inring ta a. Tichuan, min rawn zuan ta a, chuvéleh ka lo vawthla tawp mai a, a tlûk hnu pawh chuan ka vaw zui nghek nghek mai a, ka vawhlum ta a ni,” a ti.

BIATEA THIL HMASATE

Concrete Building hmasa ber : RCC Building hi Pu Lalrawna, Pu R. Lalchhanchhuaha Mualvêng pa hian Biateah a sa hmasa ber. Kum 1978-ah an sa tan a, kum 1979 khan a chhawng hnuai zawk an luah tan. Biate mai ni lovin Tuichângrâl pumpuiah RCC Building nei hmasa ber an ni. A hun lai chuan Tuichângrâl titi a tling.

Motor lian nei hmasa ber : Pu Chalzîka, Pu V. Lalzuia pa hian motor lian a nei hmasa ber a. Kum 1976 khan motor lian TMB (S Model) an lei a, Driver atân Hnehliana, Lakhipur lam mi an chhawr. Chung lai chuan Biate leh Aizawl inkarah ni 2 vêl an thang tlangpui. An motor neih tirh hian Biate to Aizawl chuan man hi mi pakhat tân Rs 30 a ni a, Aizawl to Biate chuan man pangngai erawh Rs 40 a ni thân.

Radio : Radio nei hmasa ber hi Pu Lalchinga niin ani hi Storekeeper a ni thân.

Television : TV hi Pu Saihrangan kum 1986 khan an nei a, Biateah a nei hmasa ber an ni.

Tape Recorder : Pu Chalzîka ten an nei hmasa ber.

Disc Antenna : Pu Chalzîka ten an nei hmasa ber.

Gramophone (Thingrem zai thei) : Pu Chalzîka ten an nei hmasa ber.

Two Wheeler : Mini Bullet bîke hi Pu Lalnunmâwia, Headmaster pension hian Biateah nei hmasa berin kum 1986 ah a nei.

Scooter: Scooter hi Pu R. Lalchhanchhuaha'n kum 1988 ah neiin a nei hmasa ber a ni.

Video : Pu Thanhra ten an nei hmasa ber.

Fridge : Pu H. Hmangaiha, Mualvêngten kum 1986-ah Fridge neiin, a nei hmasa ber an ni.

Jeep : Jeep motor nei hmasa ber chu Pu Lalrawna a ni a. Pu Sângzuala, Chaltlang Aizawla mi nên kum 1967 khan an inlei tawm a. Rs 4500 man a ni. Pu Rawna'n Rs 3,000 a thawh a, Pu Sângzuala'n Rs 1,500 a thawh.

Cane Chair (Hruipui thutthleng) : Biatea Cane Chair nei hmasa ber chu Biate lal, Laltluanga a ni. Chair hi a lo thlen tirhin an en luih luih a ni awm e. Thenkhat chuan 'Lal Compensate a dîl a niang,' an ti hial. Compensation la lo chuan a lei theih an ring lo a ni mah na. Ropui an ti hle.

Dining Table : Biatea Dining Table, chaw ei dawhkân sâng kan tih ang nei hmasa ber chu Biate lal Laltluangate chhung an ni. An neih tirhin khawtlang titi a tling. Chhuata chaw ei lai mêk a, thu chung, a kanga han ei dâwn tak chu mak an ti a, tûl ti lo fê fê an tam hle a ni awm e.

BIATEA THIL THLENG DANGLAM THENKHATTE

Biate hi khaw upa a ni bawk a, kum 100 chhûng chuan chanchin a ngah hman hle ang tih a hriat mai a. Thil thleng dangdai, wawiin thlenga a chhûnga chêngten an la sawi fo reng thin pawh a tam hle. Tûn tumah chuan tawi te tein tlêma zawng i han târlang teh ang.

SE CHHUNA CHHUN HLUM PERA : Pêra chung a thil thleng hi Biate history-a thil râpthlâk tâwp a ni a, chuti chung chuan sawi lan tam loh tak a ni awm e. He thil thlen lai hi kum 1870-'80 chho bawr vêl ni awmin an sawi a. Pêra chu Sailo lal khawnbawl upate zînga mi a ni a. Amah chu Sadawt niawmin an sawi nghe nghe. Pu Thangbuta sawi dân chuan Pa fing leh rorêl thiam tak mai a ni a, chutiang mi a nih avâng chuan lal pawh chuan a ring hle a, a thu leh hla chu lal pawhin a zahin a la fo mai a. Chutia lalin a thu leh hla a zah bîk avâng leh a lâk fo avâng chuan a upa puite'n an thîk a, tichuan, lal hnênah pawh chuan, "Ani hi a rorêl ang ang hi i zawm vek a, nakin lawkah chuan i lalna hi a la chhuh ang che," an ti a. Chung khawnbawlho chuan khawhring neiah an puh a, lal hnênah an hek a. Khatih lai kha chuan khawhring neia puhte chan a chau hle, tihhlum kha an hmabâk a ni mai.

Pêra pawh chu khawhring neia puh a nih tak miao avâng chuan se chhuna chhun hlum tûrin lal chuan a chungah râpthlâk takin ro a rêl ta a. An chhun hlum hma chuan mipuiin se chhun hlum tûr an chaih ang chiahin an chaih chau hmasa te te a, a chauh tâwpah an chhun hlum dâwn ta a. Hetih mêk lai hian fanu hlir 12 lai a nei a, se chhuna an chhun lai vêl hian a nupuiin thla thum mi vêl fa a pai mêk bawk a ni.

Se chhuna an chhun hlum dâwn lai tak chuan a mangang êm êm mai a, a lam tang ngam pakhat te mah an awm bawk si lo, mangang êm êmin, "Hmuh theih loh pathian, ka tu leh ka fate hi lo awmpui ang che," tiin a au ta ngawt a. Tichuan, se chhunin râpthlâk thei ang berin an chhun hlum ta a ni. A nupuiin a pai mêk, a fa chu a lo piang a, vâneihthlâk takin mipa a lo ni hlah a, a hmingah Zabiaka an sa ta a. Zabiaka chu a piang tlai an ti hle a, mipa a lo ni kher bawk nê, 'Patlaia' tiin an ko bawk a. Patlaia farnu 12 te kha khawiah nge pasal an neih zawh a, engtin nge hun an hman zêl tih erawh hriat a ni tawh lo a ni. Patlaia erawh chu a lo puitlinin fa a nei a, a hming chu Thanseia a ni. Thanseia chuan fa a nei leh nual a, chung zîngah chuan K Thankûnga, Biate VCP rei tak ni tate hi an ni ta a ni.

He thu sawi chhuaktu hi Pu Thangbuta niin Pu Tekûnga nu leh pate inneih Golden Jubilee lâwmnaah a sawi a. A sawi zêl dân chuan Pera'n a thih dân darkara hmuh theih loh pathian hnêna a tu leh fatetâna mangang tâwp khâwk chung a tawngtaina chu Pathianin a chhang a, a tu leh fate zîngah hausa lua awm lo mah se, khaw khata a rethei pâwl an awm lo mai ni lovin, buhbal nei thei pâwl, ngaihtuahawm lo tak an ni vek a ni," a ti a. A thusawi hi a dik hle.

LAIRUMI RAWNG TAKA THAH A NI : Kum 1980 chho vêl khan Pi Lairumi te chuan Fu huan an nei thîn a. Khatih lai khan kurtai kg ah Rs 2.50 vêl a ni. Anni chhûngkua hi pawisa khawl thei tak leh taima an ni a, an kurtai man pawh an khawl tam ve hman hle. An pawisa khawl Rs 4010 lai chu Pi Lairumi hian a paipawn thin a. An chhûngkaw sum kawltu, nu fel tak a ni. Pi Lairumi te hian Pawi pahni chhawr an nei a, an hming chu Vânlíanthanga leh Kimnawna te an ni. Vânlíanthanga hi a upa zawk a. Anni hi thingzai mi niin mi hrang hrangin thingzaiah an chhawr thîn. Pi Lairumi te chhûngkua pawhin thingzaiin chhawr an tum ve mêk a. Sualna hranpa êm êm an nei pawhin an hre lo.

Ni khat chu Pi Lairumi pawisa ah chu an hmu a, chhuhsak an chak ta tlat mai a. Tichuan, neihsak dân tûr an rêl a. April ni 18, 1985 ni tak chuan anni thian dun thingzai tûra kal tawh chu an damlo der a, inêntîr tûra damdawi Ina kal an duh thu an sawi a. A hmain Vânlíanthanga hian an thingzai tûr hlanna lamah a ke a tina a, a bai sa deuh rêng rêng bawh lah tak a. Pi Lairumi chuan a khawngaih êm êm a, tichuan, damdawi Inte a han kalsak a. Khatih laia Biate Doctor chu Dr Thangchungnunga a ni a. Ani chuan damdawi a lo chawh nghe nghe a.

Chutia an damdawi In kal haw leh chu inah chuan Kimnawna chuan Pi Lairumin chu thingfakin a vawhlum ta tawp mai a. A pawisa ah an lâksak a, a ruang chu rizaiin an tel a, khûmah an mut thîn a, Burma panin an kalsan ta vang vang a. Hetih lai hun hi chhun dar 11 vêl a ni awm e.

Tlai a lo ni a. Pi Lairumi chhûngte hnathawk an lo haw a, nu ber inah a lo awm si lo va, a ngaihna an hre lo hle. An thenawmte an han zâwt a, anni'n an thingzaitute an damloh thu leh damdawi a kaisak thute an lo hrih a, chu pawh ni se ina haw hun a ni tawh si. Pi Lairumi pasal ngaihtha lo chu damdawi Inah a han kal a, an haw daih tawh thu bâk engmah thu dang hriat a nei lo a.

A lo haw leh chuan chhuatah chuan thisen a hmu ta tlat mai a. Tlai dar 6 vêl a ni tawh a, ngaih thatna chi a ni tawh lo. Hmun tin an han dap zung zung a, an la en hmai lai nia an hriat khum chu an han en leh a, rizai inzial hi an va hmu a, an va en chian nâk chuan a chhûngah chuan Pi Lairumi chu an va hmu ta mai a, a lo thi khawng reng tawh a, an buai ta phat a. Chutih lai chuan thingzaia an chhawr Kimnawnate thiandun chu hmuh tûr an awm tawh si lo a, rinhleloh loh rual an ni ta lo.

Chutah chiah chuan Biate tihdân pangngaiin khuang an han tliir ta a leh! Pa leh tlangvâl chu kar lovah anrawn pungkawm nghal a (Chu chu *râlkhel dar* angah hman a ni a, chutianga khuang tliir ri an hriat tawh chuan pa leh tlangvâl zawng zawng laklawh awm lovin khuang rikna lam an pan nghal thin. Thil tha lo lam a thleng tih entîrna a nih avângin mitin an phawklek vek zêl a ni. He khuang an tliir thin hi Biate Museum-ah hmuh theihin a la awm). Tlangvâlho zînga a chak vak zual deuhte chu a ûmzui tûrin an intîr liam thuai a. Mahse, a lo berah pawh an khawih atangin darkar 4 vêl a liam hman tawh avangin

hmanhmawh taka an kal a ngai dâwn a ni. Tin, Burma lamah an tlan ngei em tih finfiahna an neih loh avangin an dinhmun a khawlh hle bawk a ni.

Morse code (êng hmanga inbiakna) hmangin zanah mi thenkhatin Khawbung lam an han bia a, rinhlelhawm deuh an hmuh thu an rawn sawi a, tichuan, Biate tlangvâl 20 rual vêl an intîr chho nghal a, anni chu hmanhmawh bâklengin an tlan chho ta a. Khawbung atangin Vaphai kal tûrin motor an hmang a. Vaphaiah chuan Burma chinchâng hre deuh an lo awm a, “Hetî zah êm êm Burmaa in han kal chuan buaina in tâwk ang, a chanve vêl chauh kal rawh u,” an lo ti a. Biate tlangvâl 10 an inthlang chhuak a, Vaphai tlangvâl 5 vêl Burma tawng thiam an hruai tel bawk a, tichuan, Burma ramah misual tualthattute zawng tûr chuan an lût ta a ni.

Tiau râl lawk an thleng a, Biate VCP Pu Tekûnga thianpa a lo awm hlah mai a, an khaw lal a lo ni lehngal a. Ani chuan a thianpa khuate an ni bawk a, man an nih lohna tûrin lehkha a lo siamsak hlah mai a, chu lehkha keng chuan hmanhmawh takin an tlan chhunzawm zêl a. Misual man tuma kal an ni bawk a, chau tawh hle mah se an kal hrâm hrâm zêl a. Tichuan, Dihai khua an han thleng ta a, chu chu Falâm khaw bul lawk a ni. Chutah chuan an mi zawnte chu in pakhatah an han hmu ta hlah mai a, an man nghal a, Biate panin an hruai let ta a ni.

Misual tlanchhia an ni bawk a, an chau ve hle a, pakhat zawk ke bai deuh a nih avângin an kal chak thei lo va, Mizoram lama an han hruaithla leh chu an hah tawngkhawng hle a. Burma-ah pawh suahsual rawng an lo bawl nasa hle tawh tih hriatin an man tih an han hmuh khan Burma lam mite an lâwm hle a, “Damin rawn chhuah hauh suh u aw,” ti an awm nawk, an ti.

Kimnawna zawk hi kûngfu thiam tak a lo ni reng a, khua an han luhpui châng apianga mipuiin an han piai liam liamte hian a lo thle zeuh a, khawih tumtuten an khawih thelh leh thîn a, an kut a ulh phêng phung mai niin an sawi. Tichuan, Biate an thlenpui hmain Kimnawna leh Vanlianthanga chu an chau tawngkhawng lutuk a, an tlin ta lo a ni.

MAK TAK MAIIN PI ROSIAMI A BO : Kum 1982 August ni 16 khan Biateah thil vânduaithlâk tak thleng a awm a. Fur lai a ni a. Pi Rosiami, kum 80 mi vêl ni tawh hi a thiannu Pi Chhingi nên thingphurin chaw eikhamah an chhuak a. Kum upate an nih tawh avângin hla tak kal thei an ni tawh lo va, tin, kawng a nâl bawk nên, tûna thingpui khawl bunna chhak vêlah khuan an kal a, a hmun an thlen chuan thing chu an fawm tan ta a.

Pi Chhingi chuan kawngkam vêl maiah chuan phurh tûr a dap a, phur khawp tûr chu a hmu mai a. Pi Rosiami erawh chu kawng ruh chho, thingphurh kawngah a thingphurh ve tûr dapin Pi Chhingi kalna aia hlaah a kal thung a, a kal chho lai pawh Pi Chhingi chuan a hmu reng a ni. Pi Chhingi chuan phur a ngah hnu chuan Pi Rosiami chu a au a, mahse, a rawn chhang ta rêng rêng lo mai a. A auh chaim hnu pawha chhangtu awm ta lo chu a hawsan ta ringawt mai a ni. In a thlen hnuin a hnung deuhah tal a rawn haw ve mai tûrah a ngai a. Mahse, rei ngial hnuah pawh chuan a la rawn haw tlat lo mai a, an ngaih a tha lo tan ta a. A chhûngte leh thenrual thate ngaih tha lo chu an thingphurhna hmunah chuan an zu kal ta a ni.

A thian nuin a kal chho a tihna lamah chuan an en a, chutah chuan a paikawng an hmu ta mai a, a bulah thingfak li nga vêl a phurh haw atana a tih ni ngei tûr hi a lo let ram

a, amah tak erawh an han auh chiam pawhin chhangtu awm lovin an hmu zo ta tlat lo mai. Lamkalte chu an beidawng titih a, hmalak zêl dân tûr ngaihtuah turin anrawn haw leh ta a ni. Hemi ni tak hian Pu Zuia motor - TMB hmanga zin tum mi thenkhat chu 'Pu Thanhanga âwih' an tih, Pi F. Lalthangvungi, Higher SS Lecturer kawt chho âwih laiah an motor a tlan tlang theih ngang loh avângin an zin tûr an lo thulh a, an lo let vel mêk a. Pi Rosiami chin hre tûra lo kalte an beidawn ruk avângin Pi Rualzachhingi te inah ro an lo rêl a, chinchâng ngaihvenin midang an lo pungkawm zel a, an phawklêk hlâwm hle a.

Pi Rosiami zawngtute an beidawn viau avâng chuan chhungkhat hnai leh thenrual tha mai lo deuh pun an titlu a. Khawtlang pun ngawt erawh an la hreh fan a; High School naupang pun an rêl ta thung a. Chutih lai tak chuan Aizawla zin tum, motor tlan tlang theih loh avâng thulh leh tate zînga mi Pu K. Zodingliana chu chinchâng ngaihvenin a va pheive a; ani chu High School naupang pun tûr chuan an tîrchho a. High School naupang leh ina mipa awm chhun chhunte chu a zawng tûrin ram lamah an liam ta zung zung a.

Pa fel deuhte an tlan hmasa a, Bungzung kawng leh Râlvawng kawng hrang hrangte en hmasa ila, mihring kal an awm chuan a chhui theih mai ang an ti a, tichuan, chung kawng chu uluk takin an chhui a. Râlvawng lama kalte chuan Pu Thangpianga farm thleng an chhui a, beidawngin an let leh a. Bungzung lama kalte chu Râlvawng lama kalte aiin an let hmasa zawk a. Anni chuan, "Pawi sumdâwng kan tâwk a, tumah kan tâwk lo rêng rêng' an ti a, kan beidawng a, kan lo let leh tawp mai a ni," an ti ve bawk a. A chhungkhat leh laina hnaite chu beidawngin an tap chuah chuah tawh a ni.

Tichuan, Pi Rosiami chu khawtlangin an zawng ta a, Mizo dânin Ni sarih leh zan sarih an zawng a, chumi chhûng zawng chuan nasa takin an zawng a, chuti chung pawh chuan hnuhma eng mah an hmu lo va, a khuangcher bo hmak mai a ni.

Pi Rosiami bo atanga a kum 3-na kum 1986 khan an ramvahnaah Pu Lâwmkima (Pu H. Sânghnuna pa) hian mihring malpui ruh ni awm tak a chhar a, a hma kum 3 kal taa Pi Rosiami bo kha tumahin an la theihngihl lo va, a mal ruh a nih ngei an ring a. Tichuan, Biate CHC Doctor Thangchungnunga an entîr a, ani chuan uluk takin a lo endik a, "Hmeichhe mal ding lam ruh a nih hi," a lo ti a. Chuti a lo nih takah chuan a bul vêlah ruhro dang hmuh beiseina an nei a, mi engemaw zât chu malpui ruh an hmuhna lamah a tûkah an liam ve leh ta a ni. An rin ang ngeiin malpui ruh a hma nia Pu Lâwmkima'n a chharna atanga field vâng lam chen vêlah hian pûk an hmu a, kal pawh a har hle a, chutah chuan ruh dang an hmu belh leh a, an ruhro hmuh zawng chu an hawn a. Chu chu Pi Rosiami ruh ngei niin an ngai a, a chhûngten kuangah mâwi taka dahin pangngai takin an vui liam leh ta a ni.

Tichuan, Pi Rosiami bona mual chuan 'Tar bo mual' tih hming a pu hlen ta a ni.

ZIRNA LAM

ANGANWADI CENTRE : Kum 1982 khan sawrkârin Biateah Nursery School a dah a, hêng Nursery School te hi Primary school-ah betin an enkawl na hnuai a awm thîn a. A hnuah Nursery School tih chu Anganwadi Centre tia thlâk leh niin Social Welfare Department in an enkawl zui ta a ni. Tûn dinhmunah hian Biateah Anganwadi Centre paruk a awm mêk a, Centre leh tuna worker-te chu hengte hi an ni:

Centre I	Lalmangaihzuai
Centre II	Lalzîkpuii Pachuau
Centre III	Lalramthari
Centre IV	B. Lâwmsângzuai
Centre V	R. Laltlanthangi
Centre VI	C. Lalliankhûmi

Mizoramah missionary ropui pahnih Rev. JH Lorrain (Pu Buanga) leh S.W. Savidge (Sap Upa) January ni 11, 1894-a an lo thleng a, Chanchintha hrilh tluk zeta an ngaih pawimawh chu zirna a ni. Mizote tân AAW B an siam nghal a, lehkhia ziahte anmahni'n an han zir hmasa te te a, an thiam vê leh midang an zirtîr zui ta zel a ni.

PRIMARY SCHOOL : Kum 1894 atanga chhiara kum 8 a lo vei hnuin kum 1902-ah Biataeh a enchhin ntân missionary sapten school an din a. Zirtîrtuah Pu Chawngdawla an la a. A kum leh 1903 October thlaah thingtlang school nghet hmasa ber dawttu ni tûrin Biataeh Lower Primary school din zui nghal a ni. Hetah hian Pu Chawngdawla chu zirtîrtu atân lâk a ni nghal a. Kum 1906-ah Pu Chawngdawla chu Pu Chawngliantlira'n a thlâk leh ta a ni.

Ani chanchin hi han sawi thui hlek ila. Bengkhuaia ten Alexandrapore thingpui huana Winchester an thah a, a fanu Mary Wichester an man rual khan Pi Nokhiri an man tel a. Chu nu chu mi pakhatin nupuiah a nei a, chumi fa chu Pu Chawngliantlira hi niin an sawi. Kum 1910 ah Chawngliantlira chu Pu Khuanga'n a thlâk leh a. Kum 1914-ah Biata Kohhran chuan Biak In a nei ve leh a, chutah chuan Sande Sikul awmin zia leh chhiar an zir thîn. Kum 1921-ah Pu Khuanga chu hla phuah thiam CZ Huala'n a rawn thlâk ve leh ta a ni. Kum 1923-ah Primary School Exam Centre hawn a ni leh a, khaw tam tak atangin Lower Primary exam bei tûrin Biataeh an lo kalkhawm thîn a ni. Kum 1934-ah C.Z. Huala chu Pu Chhuanzova'n a thlâk leh a, Pu Chhuanzova chu Pu Chaldailova'n a thlâk leh a, Pu Chaldailova chu Pu Rosiama, *Hotupui* tia hriat lâk tak chuan kum 1952-ah a rawn thlâk ve leh ta a ni.

Kum 1962 atangin Primary school pakhat chauh awm thîn chu pahnih awmin Primary School II a lo piang ta a, Head Teacher atân Pu Vunga lâk niin 'Pu Vunga School' tia hriat thîn a ni. Kum 1972-ah Primary School III a piang ve leh a, Head Teacher atân Pu H. Hauzuala dah niin he school hi 'Pu Haua School' tia hriat thîn a ni. Kum 1991-ah Primary school II leh III chu Gov't Eastern HS ah betin *Comprehensive Eastern High School, Primary Section* tiin a hming a pu a. Primary School I chu Gov't Modern Middle School-ah hemi kum vek hian betin *Comprehensive Modern School, Primary Section* tih hming a pu ta a ni.

Hun a lo kal zêl a, English Medium school din a lo ni leh a. CM English School din a nih hnuah PES School chu Biata North Kohhranin andin ve leh a, chutah chuan naupang an lût tam tial tial a, chu chuan Govt. Primary School zirlaite chu hmundang ang bawkin a ei ral tial tial a, a tawpah Primary School II eh III chu tihtâwp a lo ni ta hial a, tûnah chuan Gov't Primary School pakhat chauh a awm ta. Tûna he school-a thawk mêkte chu:

1. Pi K. Lalruatsângi, Headmaster.
2. H. Lalmangaihi, Teacher.
3. Lalramhlunmâwii, Teacher.
4. Lucy Lalmuanzovi, Teacher.

5. T. Lalmangaihzuale, H & P Instructor.
6. R. Lalthazuali, Teacher.
7. JL Fakzuale, Teacher, te an ni.

MIDDLE SCHOOL : Kum 1950-ah Private in Biateah Middle School din a ni a, Headmaster hmasa ber chu Pu Chalhuna a ni. Ani hi Pu Tlangmâwia'n a thlâk leh a. Kum 1966-ah ram buai avângin khar lailawk niin kum 4 lai khar a ni. Kum 1970-ah Private bawkin an hawng tha leh a, Pu V. Thangmâwia chu Headmaster a ni. A hnu kum 2-na, kum 1972-ah private school chu deficit school a ni a, kum 1980-ah sawrkârin provincialise a ni ta a ni. Kum 1983-ah Middle School II din a ni leh a, a hmingah Modern Middle School tiin sak a ni. Headmaster atân Pu Lalchungnunga lâk a ni a, kum 1985-ah deficit niin kum 1994-ah sawrkârin a provincialise ve leh ta a ni.

Headmaster lo ni tawhte :-

1. Pu Chalhuna
2. Pu Tlangmâwia

Anni pahnih hnua headmaster hna cheltute hriatchhuah zawh an ni rih lo. A hnukung deuhah heng mite hi headmaster an ni leh hlâwm:

1	Pu. R. Vânlalauva	2	Pu. Zohmingthanga
3	Pu. Lalruna	4	Pu. Chalthanga
5	Pu. Lalbiakthanga	6	Pu. Kawlliana Kawlni
7	Pu. Lalsailova	8	Pu. R. Lalbiakmâwia

Tûna thawk mêkte :-

1. Pi Lalthuami Tochhawng, i/c Headmaster
2. Pu K. Lalnunmâwia
3. Pu TBC Lalsângliana
4. Tv. Zoramâwia
5. Pu. Lalhruaizêla

EASTERN HIGH SCHOOL : Kum 1958 khan Biateah private in High School din a ni a, Mizorama High School pangana a ni. A hming atân *Eastern High School* tih niin vawiin thlengin he hming hi a la pu reng a ni. A hming hi Biate lal Pu Laltluanga Sailo sak a ni nghe nghe. Headmaster atân Pu VL Zaithanga B.A. lâk niin hetih lai hian khawchhak tlang dungah Biateah bânHigh School a la awm lo. Biate chu zu awm lohna khua tia hriat lâk a lo ni baw a, hmun hrang hrang atangin Biatea school kai an tam thîn hle.

Rambuai hma deuh kum 1964 khan Deficit-ah hlân a ni zet a. Kum 1966-a ram a lo buai takah khan khar a lo ni leh a. Kum 1970-ah High School neih leh duhna a lo lian leh ta hle a, tichuan, private bawkin hawn leh a ni a, Pu K. Lung Muana B.A., B.T. chu Headmaster atân lâk a ni a, vânehithlâk takin kum 1972-ah deficit ah hlân a ni a, kum 1991-ah provincialise a ni leh ta a ni. Kum 1984-ah Matric Exam Centre-ah dah niin exam lai chuan Biate khaw chhehvêl atangin exam bei an rawn kal thahnem thei hle a ni.

Headmaster lo ni tawhte :-

	Hming	Hna an chelh chung
1	Pu VL Zaithanga	1958
2	Pu Lalthianghlina	1959
3	Pu Thiankûnga	1959
4	Pu Lahnuna	1960
5	Pu Dosânga	1961-1965
6	Pu K. Lungmuana	1970
7	Pu C. Lalkûnga	1971-1972
8	Lalrikhûma Sailo	1973-1977
9	F. Lalsawithuama	1979-1992
10	C. Thuamluaia	1992-1999
11	H. Lalnunmâwia	1999-2010
12	Lalmuanpuui	2010-2012
13	Lalhmingliani	2013-2018
14	C. Lalrinawma	2019-2023
15	V. Lalrempuii	2023

Tûna EHS-a thawk mêkte :-

1	Pi V. Lalrempuii
2	Pu Lalrinnggheta
3	Pi R. Chhingpuui
4	Pi Chawngzampuii
5	Tv Malsawmkima (Internship till November 2023)
6	Pu B. Lalruatfela, LDC
7	Pu H. Rodinmâwia, 4 th Grade

BIATE HIGHER SECONDARY SCHOOL

A tobul : Kum 2002 kum tâwp lam khan VCP Pu Piangruma kaihhruaina hnuaiah Biate khuua Higher Secondary School awm ve duhna khawtlang hruaitu VC te leh mi thahnemngaite rilruah a lian hle a. A din dân tûr chungchânga inrawnkhawmna VC ten khawtlanga a sâwm awm an tihte sâwmin sawi hona kum 2003 January thla chawhma lamah Pi Piangruma VCP inah neih a ni a. Hemi tuma kalkhawmte hian Higher Secondary School neih ve ngei thaa hriain Pu Piangruma kaihhruaina bawkin ni 20.01.2003 Zan dar 6:30-ah inrawn khawmna neih leh a ni a. Hetah hian khatih laia VC member-te chu Pu Piangruma VCP, Pu BL Pârkhûnga Vice President, Pu H. Lalrosema Secretary, H. Vânlalthaa VC Member, Pu H. Laltanpuia VC Member, Pu C. Lalrinliana VC Member te an ni. Hemi zan hian VC member-te bâkah Biatea school zawng zawng Headmaster leh Head Teacher te sâwm niin anni bâkah prominênt citizen - Pu K. Lalbulliana, Pu C. Lalkûnga, Pu Lalhmachhuana Râlte, Pu V. Lalpâwlliana leh Dr H. Lalengzaua, Dental Surgeon, Biate CHC te an tel baw a ni.

Hemi zan hian tuna a hming “Biate Higher Secondary School Managing Board” tih hi phuah a ni a, Managing Board member hmasa ber atan heng mite hi ruat nghal an ni:

Chairman : Pu BL Pârkhûnga, Vice President, VC Biate
Vice chairman : Pu C. Lalkûnga

Secretary : Pu C. Lalrinliana
Asst. Secretary : Dr H. Lalengzaui
Fin. Secretary : Pu K. Lalbulliana

School sâng zawk din chungchângah hian khatih laia VC-te leh Board member-te an phur tlang hle a, Committee pawh an nei zing hle. January ni 29, 2003 zana OB Meeting hmasa berin he school kal zêl dân tûr chungchâng VCP Pu Piangruma leh Vice Chairman Pu C. Lalkûnga te School Education Director leh Secretary te dâwra Aizawl kal tûra an rêl pawh rang taka kal nghalin, February ni 17, 2003 zana neih Board Meeting-ah an Aizawl kal report an pe a, an hlim dar dar hle a ni.

Sum leh pai : School meuh han din tûr chuan sum leh pai a lo hau tak êm êm mai a. Board Meeting in a lo rêl tawh angin February ni 24, 2003 (Monday) ni-ah Gov't Eastern High School Biateah sawrkâr hnathawk zawng zawngte kokhawmin an hlawnh atanga 1% thawh tûra ngen an ni a. Muster roll-a thawkte pawhin 1% tho an thawh a, sawrkâr hnathawkte pawh an phûr tlang hle. Tin, dâwrkai leh Biatea a awm thei deuh nia ngaihte pawh donation thawh ve tûrin lehkha pêk a, hrilhfianna neih a ni bawk. Amaherawhchu, sum thawh lamah pawh malsâwmna an dawn chhoh tak viau avângin dâwrkaite hi chuan an thawh ve hman ta lo a ni.

Tin, khatih lai khan World Bank Road, Biate to Khawzawl chu Tarmat Company in a thawk mêk a. Tûna Biate Quarry atanga Company in lung an lâk atangin he school tân hian cubic metre tinah *royalty* Rs. 25 lâk zêl a ni a, kum khatah Rs. 120,000 a lo tling khawm hman a ni. Tin, Râlvawng kawn, Tarbo Mual in lam pang chho thing chu Rs. 50,000 in hralh a ni bawk a. Hêng sum hi Pu Piangruma, VCP leh Pu H. Lalnunmâwia te hmingin Sialhawka Mizoram Rural Bank-ah dah thîn a ni.

Zirtîrtu lâk hmasak : Zirtîrtu (Lecturer) hmasa ber mi 4 te chu Board in la se, a tih angin personal interview hmasa ber chu April ni 15-17, 2003 chhûngin Pu KL Lianchia In, Electric Vêng, Aizawlah neih a ni a, chutah chuan hêng mite hi lâk an ni:

1. Pu Lalsângliana Kawlni, Sialhawk
2. NI R. Laldusaki, Biate
3. NI Elizabeth Lalnunpuii, Khawlian
4. NI Lalrozami, Zemabawk

Zirtîrtu lâk hmasak berte hi thla tin Rs. 3,000 hlawnh tûra lâk an ni. Zirlaiten admission fee Rs. 500 bâkah tuition fee Rs. 150 an chawi a ni. Higher Secondary School hian a tîrah building a neih loh avângin Gov't EHS Biateah attach a ni a, khatih laia Headmaster Pu H. Lalnunmâwia leh a thawhpuite inpêkna a sâng hle.

Hawn a ni ta : Biate Higher Secondary School hi Govt. Eastern High School, Biateah May ni 1, 2003, zîng lam dar 10:00-ah VCP Pu Piangruma'n urhsun takin a hawng a. A hawnna inkhawmah hian zirlai te, zirtîrtu lâk thar te leh Managing Board member te kal an tha hle.

Biate HSS-ah hian acting Principal hmasa ber atan Pu H. Lalnunmâwia, Headmaster, Govt. EHS Biate chu September ni 5, 2003-a Managing Board committee meeting chuan a ruat a. Tin, sawi hmai theih hauh loh tur chu Pu C. Lalkûnga, Managing Board vice chairman chuan sum lama Board in thahnem a ngaihzia hriain Mizo Subject-

ah kum khat el euh mai hlawh phut hauh lovin a thawk a, hei hi thil chhinchhiahtlâk tak a ni awm e.

Permission chungchâng : School hi mahni thua hawn ngawt theih a ni lo va, sawrkâr lam atanga phalna neih ngei a ngai a ni. He school pawh hi hawn a nih atangin phalna hmuh dân tûr ngaihtuah nghal char char a ni. VCP leh a thawhpuiten theihtâwpa an beih hnuin a din kum 2003 kum tâwp lamah Permission leh Grant-in-Aid chu sawrkâr atangin an hmu thei ta mai a. Grant-in-Aid hmuh a nih takah chuan sawrkâr atangin kum tin Rs. 75,000 dawn a ni ta a. Managing Board pawh a lâwm hle. September ni 15, 2004-a Managing Board meeting chuan September 2004 atangin sawrkâr hnathawkte hlawh atanga 1% an lo cut thin chu an titâwp ta a. Kum hnih chhûng zet sawrkâr hnathawkte hlawh atangin 1% cut tihna a nih chu. Khatih laia Biatea sawrkâr hnathawkte kha an lo fakawm hle mai.

Adhoc Aided-ah dah a ni : He school hian Pathian malsâwmna dawng zêlin VC hrang hrangte kaihhruaina hnuaiah hma a sawn ve zêl a. Managing Board Committee meeting April ni 26, 2004 a neih chuan VC President apiangte Managing Board Chairman ni zêl tawh se, tiin a rêl a, chutiang chuan vawiin thlengin a la kal ta zêl a ni. March 2006-ah Pu Piangruma VCP chu Pu PC Lianthangpuia'n a rawn thlâk ve leh a, VC term thara Managing Board Office Bearer-te chu hêng mite hi an ni:

Chairman	: Pu PC Lianthangpuia, VCP
Vice chairman	: Pu K. Lalbulliana, Teacher EHS
Secretary	: Pu H. Lalnunmâwia, Headmaster, EHS
Asst. Secretary	: Pu C. Vânlalhruaia, Secretary, VC
Treasurer	: Pu H. Laltanpuia

OB-te pui tûr hian Board member engemaw zât ruat an ni bawh.

Board Chairman Pu PC Lianthangpuia VCP kaihhruaina hnuaiah HSS hi Adhoc Aided tûra nasa taka nawr chhunzawm zêl a ni a. Tichuan, VC-te thawhrimna azârah April 1, 2008 khan School dang tam tak zîngah Adhoc Aided School-ah hlânkai a lo ni ta a ni.

Kum 2008 kum tîr lam thleng hian hêng mite hi Biate HSS-ah an thawk:

1. Pu Lalsângliana Kawlni, Principal
2. Pi R. Lalduhsaki, Lecturer, Pol Sc
3. NI F. Lalthangvungi, Lecturer, Edu
4. NI Ranghakliani, Lecturer Mizo

Thawktu lâk belh zel a ni : NI Ramnghakliani hi kum 2008 kum tîr deuhah lâk a ni a, chumi hnuaah English lecturer a thawk mêk chuan pasal a nei a, a thawh chhunzawm theih tak loh avângin a aiawh tûr zawn a ni a, a aiah Tv Zomâwia Khiangte lâk a ni a, ani hian May ni 16, 2008 (Friday) ah a hna a zawm. Hetih lai hian Principal hian thla khatah Rs. 5,000 a hlawh a, Lecturer dang ten Rs. 4,000 an hlawh thung. Adhoc Aided status a hlânkai a lo nih takah khan zirtirtu atan Tv F. Lalnunthara, Pu H. Lalnunhlina leh Tv Lallâwmsânga te a thawh khat nan lâk leh an ni a. A thawh hnihnaah Tv Lalruatfela, NI Gospel Hmangaihthangi, NI H. Lalhmingliani, Tv. Aldriene F. Lalnunneia leh Tv JC Zoherliana te lak belh an ni zui leh ta an ni: Tin, Adhoc Aided School-ah fourth Grade post pakhat sawrkâr in a rawn dah hlah a, Pu Laltlansânga chu hemi atân hian lâk a ni.

Adhoc Aided School dinhmun a kai hnu lawk May 2008 thlaah Eastern High School-a attach chu tihtâwpin Primary School-I building hlui, Vawktekhaitlangah May ni 20, 2008 ah School chu sawn a ni ta a. Hun a lo kal zêl a, VC lo inthlâk lehin Pu Liankûnga VCP a lo ni leh a. HSSLC Exam Centre chungchângah te, School Electric Connection leh thawktute B.Ed Training leh thil dang tam takah hma lâkna a awm chho ta zel a ni.

Hun lo kal zêlah VC thar a lo piang leh a. VCP Pu R.V. Hluna chu Managing Board Chairman thar a lo ni a. Pathian zarah School pawh a kal tluang chho zêl a, thawktute pawhin a tahtawlin B.Ed. an training zêl baw a. School in harsatna lian tham êm êm tâwk lovin hun a kal chho ve zêl a, Tûnah hian VCP Pu C. Lalrinliana chu Board Chairman a ni mêk a ni.

Economics Subject Lecturer Pu Lalnunhlina chuan hna dang a thawh tak avângin a aiawh tûrin Tv K. Zoramsânga lâk a ni a, June ni 26,2012-ah a hna a zawm. Economics lecturer pakhat Pu Lallâwmsânga chu 2022 khan vanduaithlâk takin a boral a, kum 2022 vek khan a aiah Tv K. Laldinkima lâk a ni leh ta a ni.

He School atang hian din a nih atanga tûn thlengin zirlai 300 chuangin HSSLC an pass chhuak tawh a, kum 2010 khan he School-a zirlai naupang Lalrinnggheta chu MBSE hnuaia Arts stream exam bîkah 10-na a ni pha a ni.

Provincialise a ni : Biate HSS hi Pathian zarah a kal tluang hle a. School dang hmasawn rualin hma a sawn ve zêl a. September ni 27, 2023 khan Mizoram sawrkar Council of Minister thukhawm chuan Higher Secondary Adhoc Grant-in-Aid 12 a provincialise zîngah he school hi a tel ve leh . Provincialisation effective date chu October ni 1, 2023 a ni. Din a nih atanga a kum 20-naah Provincialisation dinhmunah hlân kai a ni ta a ni.

Tûna Bite HSS-a thawk mêkte:

1	Pu Lalsângliana Kawlini, Principal	2	Pi R. Laldusaki, Pol. Science Lecturer
3	NI F. Lalthangvungi, Education Lecturer	4	Pi Ramnghakliani, Mizo Lecturer
5	Pu Zomâwia Kiangte, English Lecturer	6	Pu F. Lalnunthara, Pol. Science Lecturer
7	Pi H. Lalhmingliani, Mizo Lecturer	8	Pu JC Zoherliana, History Lecturer
9	Pu Lalruatfela. History Lecturer	10	Pu Aldriene F. Lalnunneia. Education Lecturer
11	NI Gospel Hmangaihthangi. English Lecturer	12	Tv K. Zoramsânga, Economics Lecturer
13	Tv K. Laldinkima, Economics Lecturer	14	Pu Laltlansânga, 4 th Grade.

CHAWNGI MEMORIAL ENGLISH SCHOOL : CM English School hi Pu H. Lalnunmâwiate chhûngin kum 1999 khan an din a, Nursery atangin Class VII thleng a awm. Naupang pawh an nei theiin he school hian bawh a hlawh hle. CM Scholl-a Principal lo ni tawhte:

1. Tv Zothanpuia
2. Pu C. Thanmâwia Hmar
3. Pu Danny K. Lallâwmzuala

Tûna thawk mêkte:

1. Danny K. Lallâwmzuala, Principal
2. Mary Hmingthanpuii

3. Lalrosânga
4. Lalramdingchhuak
5. Ramnghinglova
6. C. lalsiamkima
7. Lalremruati
8. Ramchhanmâwii
9. Hmangaihzuai
10. Lalmuankim Jongte

PRESBYTERIAN ENGLISH SCHOOL, BIATE : Presbyterian English School, Biate hi Biate North Kohhranin kum 2006 khan an din a. Din a nih tirh atangin naupangin an bawh hle a, tân dinhmunah hian Biatea school naupang ngah ber an ni. School naupang monthly fee bâkah Synod atangin kum tin Lump sum Grant Rs. 150,000 an dawng thîn. Manging Board member changtlung tak awmin Kohhran Upa ngei Chairman-na hnuaiah zawi leh dam thlapa enkawl a ni a, Pathianin mal a sawm hle niin a lang: Principal hna lo thawk tawhte:

1. Jim D. Gangte
2. F.Lalnunpâri
3. Rev. B. Lalremzuala
4. Upa K. Lalbulliana
5. Rev. Samuel Lalhmangaihsânga
6. H Sanghnuna
7. H Laltanpuia

Tuna thawk mekte ;-

1. Aldrin Lalhriatpuia
2. R. Lalnunmâwii
3. Grace Vânlalhriatrengi
4. Lallungmuana

BIATE LEH FAINA

Zêp nâk maw, Biate lârna ber chu ‘faina’ hi a ni kan ti thei awm e. Ni e, Biate hian faina hi hun rei tawh ngial atang khan thupuiah a lo neih tawh a, Lal lai hun daih atang tawh khan faina hi kalpui a lo ni tawh a ni.

Faina hi Biateah an buaipuina a rei tawh : Lal Thangchuanga lai lai khan kârtin khaw chhûng nun phung leh faina vawn that leh that loh enthlithlai tûrin Kawlbawi a ruat a. Faina kawnga hma la tha lo leh kawhmawh bawl deuhthe chu Siki chawitîr thîn an ni.

Tin, YMA din a lo nih khan faina kawngah nasa takin an thawk thîn a. Anni khan In chhûng leh bungbêlte vawnfai an zirtîr a, a endik hna thlengin an thawk thîn a. Fai lâwmman pawh an lo pe tawh thîn a ni.

Khawlai fai nan ran khuahkhirh an tan hma : Kum 1947 a Mizo Children Association din a nih khan naupangho chuan Inrinni tuk tinin kawngpui an phiat fai thîn a. Fai tûr chuan khawlaiah ran êk a awm loh a ngai tih hriain kum 1980 cho bawr vêl daih tawh khan khaw chhûnga Sial luh an rem ti tawh lo va; kum 1986-ah Vawk an khuahkhirh tan a, an khuahkhirh tirh chuan a In hnan pawh sa lovin an in hnuaite an hung a, chutah chuan an

chentîr mai zêl thîn a ni. Hun a lo kal zêl a, a hrana in saksak an intihhmuh chho ta zêl a ni. Kum 1993-ah khawlaia Ar tla thin chu khung tan a ni bawk. Kum 1994-ah Bawng, Sakawr, Kel, Beram etc. te khuahkhirh an ni zui leh bawk a. Kum 2003 khan ui khuahkhirh a ni zui leh ta a ni.

Heti chung hian khaw dang tihdan ang thovin in tina bawlhhlawh chu a tlangpuiin anmahni hnaih ber kawrah an paih mai thin a. Kawng atanga bawlhhlawh paih a lan ther thur loh chuan chungkaw fel fai tak an ni mai. Hun a lo kal leh deuh hlek a, Biate khawchhunga luang tlang luah chuan paih loh ni se tiin VC ten thuchhuah an siam a. Amaherawhchu, Motor-a paih a nih miao loh avangin bawlhhlawh paih tura hla taka kal chu a harsa an ti tlang hle a ni. A fel deuh chuan an fehnaah an bawlhhlawh an phur a, khawchhung atanga hla deuhah an paih hram thin.

Motor hmangin bawlhhlawh paih tan a ni : Kum 2013 khan YMA Committee chuan hun rei tak ata tawh an chak êm êm thîn, an la tih theih loh chu ti tanin, YMA bul tumin in tin bawlhhlawh motor-a paih tan an rêl a. Motora bawlhhlawh an paih tan hun hi February ni 14, 2013 a ni. Bawlhhlawh paihna chu khawchhung atang 3 kilometre vela hlaah a ni a, heta tang hian khawchhung leh a bul vela bawlhhlawh paih thin chu a lo tâwp ta a ni. In tinah motor hmanna senso atan Rs. 10 an khawn a. Tichuan, motor-a bawlhhlawh paih chu vawiin thlengin châwl miah lovin la ti chhonzawm zel a ni ta a ni. Heng vang hi ni tak maw, kum 2015 khan Champhai District chhûnga khaw fai berah Biate khua thlan a ni.

Faina beihpui thlâk tak tak chu kum 2017 kha a ni : Kum 2017 kha Biate a fai tak tak intan kum a ni. Hemi kum hian Urban Development and Poverty Alleviation Department chuan Notified Town zîngah fai lama inelna a buatsaih a. Pakhatna nih ngei tumin chêt an han la tak tak mai a; hemi kum hian kawrpui leh Biate hnaih kawr zawng zawng tihfai a ni. He bawlhhlawh thenfai hna hi a hautak hle.

Biate khaw chhûngah hian kawr 10 chuang a luang tlang a, a tam zawk chu fûr lai chauha luang a ni a, kum tluana tui hna nei pawh an awm bawk a. Sawi tawh angin heng kawrahte hian kum 1900-a Biatea Kairuma hoa an kai atang khan bawlhhlawh hi 2013 kum tîr lam thleng khan paih a lo ni ngar ngar tawh a! Kum 113 chung zet mai! Kum 2013 atanga khan kawra bawlhhlawh paih an chin thin chu a lo tâwp ta a, kum 113 chung teh meuh, Mizorama khawpui lian 4-na lo hauh pha ve tawh thîn khua tena an bawlhhlawh paih vûm tam tawh dan tûr chu suangtuah phâk bâk a ni hial awm e.

Tichuan, khatih laia VCP Pu R.V. Hluna kaihhruainain Pu C. Lalrinliana, Vice President (tûna VCP ni mêk), Pu H. Lalchhuanawma, VCM, Pu H. Lalmuanpuia, VCM, Pu Zairemtluanga, VCM, Pi C. Lallâwmkimi VCM, Pi Lalnîlâwmi Râlte, VCM leh VEC member Pu Biakchhuana leh Pi Vanzîki te kha a hmahruaitu an ni. Anni hian Biatea kawr hrang hranga hmasang ata tawh bawlhhlawh tawih thei lo, thîr lam chi te, polythene leh plastic te, a bîk takin thawmhnaw hlui, chirhdiaka inchiah rei tawh, uih vung vung mai, tawih ral si lote chu luhchilhin an hai chhuak ngheng mai a ni! Awihawm lo khawpa tam paih a ni hlawm a. “Kelsih kawr chauha bawlhhlawh hai chhuah pawh chu Tipper trip 23 lai a ni a, Khawthar tui kawr bîk atangin trip 13 hai chhuah a ni bawk. Chung chu mumal takin record buah chhinchhiah zel a ni. Chung chu thenfai lai khan a hautak hle a, dardthlang kehthem hai fuh palha kut ti thi a, inhliam an awm fo bawk a, a changin bawngtuthlawhin kan hai a, a tam ber chu kut lawnga hai a ni,” tiin Pu RV Hluna, khatih laia VCP khan a sawi.

Chuti a nih chuan Biatea kawr 10 chuangah hian Tipper trip 60 vel chu phâng lovin bawlhhlawh haichhuah a, paih a ni ang tih a rin theih a ni.

“Biatea kawr kan han tifa tak tak chu a turu hle. Kawr kha a tenawm hlawm hle a; bawhhlawh paihna rei tawh, tâng thûk tak tak a tam êm êm a; Jacket chhia te, tu pa kekawr chhiate, tu nu pawnfen hnuaite kan han pawt fan dâwr dâwr a, kan pawt dawh thut a, kan hmai leh kan taksaah a rawn tuam hlup mai thin a, kan luak lo chauh zêl. Tin, bawlhhlawh paih thar, tawih tan te, sa thi uihte kan tawng zing êm êm a, a then a uih tantîr te a ni a, a then a uih vânglai te, a then a uih zo lam tawhte an ni. Uih dan inang lo tak tak - uih thâng huam te, uih thûr deuh nghur te, uih vung vung te a inpâwlh nuaih mai. Kan zuk hamna lamah uih tak, nâl pelh pulh zu ham chu hrehawm tak a ni, kan kut kan tât nawk nawk zêl mai. Khatia kan tihfai lai kha chuan chhûnah Kuhva pawh, Sahdah pawh engmah kan ei ngai lo, min pe mah se kan ei thei lo. Chaw pawh ei hlei thei lo kan awm nawk zêl,” tiin kha tih laia VC member Pu H Lalchhuanawma’n a sawi bawh.

VC-te khan chung bawlhhlawh hai tur chuan hlawhfa an ruai fo a, mahse an ten deuh tlat mai a, tihfai an duh miao mai si a, a khaw nu leh pa chan chang takin anmahniin Biate faina thanmawh bawh, kawrpui tihfai hna chu ‘luhchilh nun’ nei tak takin an luhchilh a, tichuan, tân dinhmun hi a lo thleng thei ta a ni. VC ten ten hauh lova tihfai hna an han khawih takah chuan mi rawihte pawhin an ten lo ta deuh a, an hnung an zui ta zel a ni.

A hma zawng kha chuan kawngpui leh kawngkam vêl an tifa ve a, han en mai chuan a fai hmêl ve vûk thîn a, kawr erawh entlâk a awm ngai bik lo. Kum 2017 atanga kawr an han tifa tak tak chu hmuhawm a tling hial. Kha hna hautak tak an thawh hnu atang kha chuan âwm nêw zâwkte pawhin awlsam takin an chhunzawm thei tawh a ni.

Kum 2017-a khaw fai lawmman pakhatna an nih lâwmpui nan khatih laia UD & PA Minister Pu Zodintluanga’n Project chêng nuai 50 man siamna daih a pe hlauh mai a. Chu chu an hmang tangkai zui hle. Kawr zawng zawngah kawngpui atanga lang thei chin a chhuat lung an phah a, a bang an rem vek bawh a. Zun in 10 chuang an siam a, kawngpui zim lai an zauh bawh a, Biate hmêl a thlâk danglam dawrh ta a ni.

Biate in Fai lâwmmman a dawng mawlh mawlh : Kum 2017 atang khan a zâwn zatin kum 2018, 2019, 2020, 2021-ah te khawpui fai inelnaah Biate chu pakhatna a ni chho ta zêl a. Kum 2022-ah erawh pahnihna niin Ngopa khua chu pakhatna an ni ve thung. A zâwna Khawpui fai ber kum 5 an nihna hi khawtlangin ropui takin ruai nêw October ni 10, 2022 khan Biate Town Faina Committee huaihawtin lâwm a ni a, hriatrengna lungphun pawh phun a ni nghe nghe.

Biate khua hi faina kawngah an lungual hle a. Masi bial 14 te hi fainaah an inel thin a, an tang nasa thei hle. Tin, School hrang hrang, Office hrang hrang leh restaurant te pawh faiah an inel châmchi a. Hêng inelnaah hian vêng laili aiin vêng daifem lama awm te pakhatna an ni zêl thîn hi thil chhinchhiahtlâk tak a ni. Khaw daifêmah bal a awm vak ngai lo tih a tichiang a ni. Fainaa lâw erawh thil hahthlâk tak mai a ni a, tan mar pât reng a ngai a, han zuai deuh châng pawh an ngah ve thîn hle a ni.

All India level Fainaah Biate a lang thin : India ram pum khaw 4,000 chuang zînga fai inelna Swachh Survekshan-ah Biate hi tum hnih a lang. Kum 2018 khan “Best City in

innovation & Best Practices in North East zone” tia puan a ni a, kum 2021 khan “Best City in Citizens’ Feedback in the North East Zone” dunhmun a lo hauh tawh bawh a ni.

BIATE KHAW KUM PAWIMAWHTE :

1780 hma lam	Biate hnamin Zialung khua an luah hun vêl.
1780 hnu	Biate hnam hovin Hringchar Phai an luh thlâk hun vêl.
1900 Pâwltlâk thla	Lal Kairûma’n Biate khua a din tan a, an inbeng bel tan.
1901	Biatea inbenbel kum.
1903	Biateah Lower Primary School din tan a ni.
1904	Zosaphluian (D.E. Jones) Biate a tlawh kum.
1906	Biateah Kristian an awm tan (Fehtea, Lalbuana, Thangburha leh Lalhema).
1907	Biate hmun atangin Râlvawnga insawn kum.
1909	Râlvawng atanga Biatea let leh kum. Bawh Vêngah bawh an khawh.
22.2.1912	Biate lal Kairûma thih ni.
1913	Abor run kum. Biate tlangvâl 14 an kal ve.
1914	Lal Thangchuanga rorêl tan kum. Biate Biak In sak tan a ni.
1917	German ral run tûra Mizo tlangvâl kal kum. Biate tlangvâl 20 an kal ve.
1918	German râl run lo haw kum.
1919	Hripui len kum. Abor run tum nhinna. Biate tlangvâl 6 an tel leh.
1920	Biatea thingpui phun tan kum. Salvation Army din kum a ni bawh.
1921	Pastor Fehtea Tirkoh hna zir zovin Biateah a thawh tan.
1926	Pastor Fehtea Pastor atân nemngheh a ni.
1921	Zirtirtu CZ Huala thawh tan kum.
1923	Lower Primary School Exam centre Biateah hawn tan a ni.
1925	Missionary Miss Kitty Lewis (Zomâwii) Biate tlawh kum.
1929	Minpui Kum. Rorêl thiam manah Lal Thangchuanga’n Silai a dawn kum.
1937	YLA Biatea din kum. (1947-ah YMA tia thlâk a ni).
1938	Biate Zawkbuk thiah kum. Tuichânggrâl Presbytery pian kum.
1939	Biate lalin Daithlang thingpui huan a theh kum.
1943	Lushai Brigade Biatea awm kum.
1946	Mizo Union din kum.
1947	Mizo Children Association din kum.
1948	Lalthangchuanga thih kum.
1949	Bawrsap Barkataki Biateah a lo kal a, Biate lal atân Laltluanga a ruat.
1950	Middle School hawn tan kum.
1961	Pastor Lalbiakthanga’n Zawnei Conference Biateah a ko.
1969	Biate Sialhawka khawm tûra tih kum.
5.2.1969	Sialhawka khawm tûra Biate tih chu thulh a ni. He ni hi Biateah serh zel a ni.
1970	Ram buai avânga khar lailawk Middle School leh High School hawn tan leh kum. Dak pawh ram buai avânga chawlh tawh chu chhonzawm leh a ni.
1972	Primary School III hawn kum.
1975	Biateah PHC din a ni. Biatea Chanchinbu hmasa ber ‘Bengvarna’ tihchhuah a ni.
10.3.1976	Tuichânggrâl Truck Road hawn ni. Biatea Truck leh Bus luh ni.
1980	Biatea khaw chhûngah Sial luh khap tan a ni. Pi Lairûmi râwng taka thah a ni.
1981	Biate chu sub town-ah puan a ni. Middle School II hawn a ni bawh.
19.5.1981	Biatea Electric khawl hawn ni.

1982	Biate EHS chu Exam Centre dinhmun pêk a ni. Pi Rosiami thing phur a bo hlen.
1985	Biate khaw chhông kawngpui blacktop a ni.
1993	Biateah ar khung tan a ni.
1994	Bawng, Sakawr, Kel, Beram, etc. khuahkhirh tan a ni.
1997	Revenue Deptt. in Biate In tin an patta. YMA Diamond Jubilee lâwm a ni.
2003	Biate Higher Secondary School din kum. Ui khuahkhirh tan a ni.
14.2.2013	Biateah a vawikhat nan YMA bul tumin motor-a hnawm paih tan a ni.
21.2.2014	Biate Thingpui Kut ropui taka hman a ni.
2015	Champhai District chhônga khaw fai berah thlan a ni.
2017	Mizoram Khawpui fai berah a hmasa ber atân thlan a ni.
2018	Mizoram Khawpui fai berah a tum 2-nan thlan a ni
2019	Mizoram Khawpui fai berah a tum 3-nan thlan a ni. L. Malsâwma Colney thih kum.
2020	Mizoram Khawpui fai berah a tum 4-nan thlan a ni
2021	Mizoram Khawpui fai berah a tum 5-nan thlan a ni
2023	YMA Inkhâwmpui Lian Biatein a thleng. Biate HSS Provincialise a ni.

...oooOooo...

CHALRANG CHANCHIN

B. Lalthangsiama, Chalrang
Phone No : 9862552338

CHALRANG RAM : Chalrang khua hi Mizoram khawpui Aizawl aṭanga km 180 vela hla Khawzawl District chhunga awm a ni a, Khawzawl aṭanga km 30 vela hlaah a awm. Chhak lamah Vangtlang mel 4 a hla leh Tualte mel 9 vela hla a ri a. Thlang lamah Khawhai mel 2 a hla (tunah chuan New Chalrang nen an inzawm tawh) nen a inri a. Chhim lamah Riangtlei mel 7 a hla leh Sialhawk ram Lungpum a ri a. Hmar lamah Chawngtlai mel 9 leh Zuchhip (Phaisen lui) a ri.

Lui lian tlawh chhan a nei lo va, ramvahna tham deuhthe chu Tualte lui, Raifan lui leh Phaisen lui te an ni. Ṭhal nghate han vuak ve mai theihnate chu Chalrang lui, Luidung lui, Laisawr lui, Khawhlui lui leh Sakeithingham lui te an ni. Chalrang khua hi khaw hmun rem teh chiam lo, rem lo lutuk ni bawk si lo, chhuah chhawnga awm tlang thawveng ṭha tak leh kawtchhuah nuam tak nei, ni chhuak dawng ṭha em em khua a ni a. A hmun hi a hrisel ṭha thawkhat viau. Kum 1895-ah he khaw hmunah hian Zataia (Khawhai lal) hoin an lo awm tawh a. Kum tam fe a liam hnuin kum 1925-ah an lo luah leh ta a ni.

He thu buatsaih laia Chalrang khaw dinhmun chu hetiang a ni : In luah lai 173 niin mihring 835 an awm a, Kohhran 3 - Presbyterian, Isua Krista Kohhran leh UPC (NEI) te an awm. Zirna hi High School (Private), Govt. Middle School, Govt. Primary School leh Presbyterian English School te a awm. Tin, Anganwadi Centre I leh II awmin Health Department-ah Health Clinic a awm bawk a ni.

CHALRANG KHAW LO INDIN DAN : Chalrang khaw chanchin kan sawi dawn avangin tute nge khua lo din a, Chalrang khua tih hming alo put chhante sawi lan hmasak phawt a ngai dawn a. Pu Lalthangkima Sailo Chalrang lal thlahtu te chhui hmasak loh chuan a famkim dawn lo va, a tawi thei ang berin kan zia mai ang a. A ṭobul kan chhui theih chinah; Nova'n (Bible-a mi ni lo) Dongula a hring a, Dongula'n Niguitea a hring a, Niguitea'n Bawklua (Sihsinga) a hring a, Bawklua'n Ralnaa, Ralnaa'n Chhuahlawma, Chhuahlawma'n Zahmuaka, Zahmuaka'n Ṭhangura, Thangura'n Thangmanga, Thangmanga'n Sailova, Sailova'n Chungnunga, Chungnunga'n Rohnaa, Rohnaa'n Lallula, Lallula'n Lalthangvuta(Vuttaia), Vuttaia'n Lalvunga, Lalvunga'n Zataia, Zataia'n Chalrang lal Lalthangkima a hring. An ṭobul kan chhui theih chin chu chhuan 17 thleng a ni. Thangkima Sailo hi a naupan laiin a pi Darkungi(Pi Puui) kiangah Siallukawtah a awm ṭhin a. A pi hian Arbawmah te, Sialhmunah te, Karmualah leh Darsamah te alo kaipui tawh nia hriat a ni.

KHAW HMING SAK CHHAN : Vailian vawi 2-na chu kum 1889 – 1890-ah a lo thleng a. Chutihlaia naupang te kum 18 vel lek a upa a nih laia Ngentiang khuaa lal Zataia chuan Vailian chu lo doin theihtawp lo chhuah mah se hneh zo dawn loa a inhriat avangin a unaupa Ralṭhiaua Vangtlang lal chu a bel ta chawt a. A unaupa kiangawm reng pawh chu ralmuang tawka a hriat loh avangin Tuipui kama puk chu a hote nen chuan an bel leh ta a. Tun thleng hian **Zataia ral tlan puk** an la ti a ni.

Chumi hnuah chuan Riangtlei leh Vangtlang inkar Chhinlungah an insawn leh a, he mi hmunah hian Chalrang lal Thangkima Sailo chu 1895-ah a lo piang ta a ni. Hemi hmuna an awm lai hian Vailian vawi 2-na pawh chuan zual lam ala pan zel dawn nia an hriat avangin an hlah a la ngai reng a. A upa min Senphuaia chuan Vailian kuta inpek mai

chu an tan tha zawk dawna a hriat avangin lal chu thurawn a pe a. Senphuaia thurawn ang chuan 1895 kum chuan North Vanlaiphaia sipaiho inkulh hnenah chuan an va inpe ta rawih a. An silaite pawh an tung vek a, chuta an lo haw leh hnu chuan khaw thar kai an rel a, Zataia chuan Ngentiang leh a chhehvela a khaw mite tlandarh tawh chu huikhawm lehin khua an din ta a. Chalrang khua tih hming a pu ta a. Hetih hun hi kum 1895 vel nia hriat a ni. He hmunah hian kum 6 dawn an awm hnuin Lungtan ram Niawn tuiah kum 1901 velah an insawn thla a, Chalrang khua chu luahtu awm lovin a lo ram leh ta a ni.

Chalrang khaw hming put chhan nia an sawi chu Kairuma Biate lal leh a pasaltha Khalhrumate ho ram hauh tur zawnga an ram chhuah tumin helai hmunah hian Ramsial (Sele) chal khirh tawh tak mai tur hi an hmu a, kah tuma an veh pawhin thal an thlah thei ta lo va. Chu Ramsial chu a chala a rang (var) kalh mai hi an hmu a, *Ramsial chalrang ram* an vuah ta nghe nghe a ni. Hemi hnu hian Zataia hoin Chalrangah hian an kai ta a, ramngaw a la ni bawh nen khaw hnuaiah chuan Sihpui al tak a awm a, ramsa chi hrang hrang ten an tlan a, hemi hmun hi Ramsial chalrang an hmuhna hmun kha a ni.

Pasaltha Khalruma hi pasaltha huaisen tak a ni a. An Sai ramchhuah ni khuate hian a hmahruaitu a ni thin a, Tualte ram atanga Chalrang ram rawn paltlanga Sialhawk rama kal thin Sai ho rawn kalna *“Sai tluang”* a awm zui mai a. Tumkhat chu Chalrang ram chhunga saitluangah chuan Pasaltha Khalhrumate chuan Sai an lo chang a, Sai pa lian tak lo chhuak an han hmuh chuan Muzuk fei (Feikibar nei lo chi) chuan Pasaltha Khalhruma chuan a lo khawh a, tun thleng hian he lai hmun hi *‘Khalhruma Sai khawh kawn’* tih hming ala pu a ni.

Chalrang khaw hming put chhan sawi dan dang awm leh chu – Hmarho ten helai hmun hi an lo luah tawh ang a, Chalrang tiin a hming an lo chawi tawh a ni ang, tih thute an sawi a. Engpawh chu ni se, Chalrang khua tih hming chu tun thlengin ala pu ta zel a ni.

AWNNU HMUNAH AN KAI : Zataia’n Chalrang chhuahsan a, Lungtana a insawn hnu chuan a nu Darkungi (Pi Puii) chuan a pasal Lalvunga Siallukawta a thih tak avanga Arbawmah te, Sialhmunah te, Karmualah te leh Darsamah te khaw siama a kal lawr hnuaah a fapa Zataia thurawn angin kum 1912-ah a tupa Thangkima Sailo hruaiin Darsam atangin Awnnuah an kai a. Helai hmuna an kai tan tirh hian Pi Puii chuan khawvel mihring lo la awm leh zel tura miten, he hmunah hian khua dinin kan lo khawsa ve tawh a ni tih an hriat theih nan tiin thing chikhat Phunchawng thing chu a phun a. He thing hi a thang duhin a par mawi em em thin a ni. Mak ve deuh chu, he Awnnu ram hi luah tawh loh a nih hnuaah Lo atan neih a ni tawh thin a, Pi Puii Phunchawng phun chu kit thin mah se duah taka rawn chawr chhuak lehin mawi takin par a rawn chhuah leh mai thin a, tun thleng hian a la awm reng a ni. He Awnnu hmunah hian Mizo lal ropui leh hmingthang Vanhnuailiana hoin kum 1860 hma lam khan khua an lo siam tawh a, tun thlengin helai hmunah hian Vanhnuailiana Tuikhur pawh a la awm. Awnnu atnag hian a upate nen Tualteah an kai leh ta a ni.

Awnnu an kai hnu hian Pi Darkungi, Lalvunga nupui chu alo upat deuh tawh avangin Zataia, Khawhai lal chuan a fapa Thangkima Sailo chu a pi Darkungi lalna tlang rawn thut turin a upate a koh hawntir a. Hetihlai hun hi kum 1916 favang vel a ni a. Pu Thangkiman tlang a chang ta a ni. Chung lai chuan Pu Thangkima chu Aizawlah a awm a, a nupui Sekungi Chhangte nen missionary Sandy-a puiin an awm a, lehkha thiam thei tak Sap tawng pawh thiam em em a ni a. Hetih hun lai hian Sikul pawl (class) zat hi Standard

tiin an lama Standard five leh six a zir a. Pawl 5 leh pawl 6 a zir lai hian First Division-ah a pass ve ve a. Kohhran hlate a letling a, a hla 5 lai mai chu Kristian Hlabuah a chuang nghe nghe a. Amah hi solfa thiam tak a ni baw.

KHAWCHHIAR NEIH DAN : Kum 1914 a lo inherchhuah chuan khawperte pawhin khawchhiar an nei tur a ni, tih chu sorkar lam thuchuak a lo ni a. Khawchhiar atan Neihdawn khuua awm Hrangchhuana Hauzel chu Khawhai lal Zataia chuan a nu Darkungi khawchhiar atan a upate a han hrutair ta a ni. Hrangchhuana khawchhiar atana Zataia'n a lakna chhan chu Vuttaia fapa 3-na a ni a. Lungliana khua Rullamah kum 1884 a piang a ni a. A pa Luanzawnga Hauzel a ni a, a nu chu Kungliana fanu Lalpuithluaii Sailo a ni. Kungliana chu Lallula fapa 4-na Vuttaia chhangtu a ni. Tichuan, Hrangchhuana chu Chalrang khawchhiar a lo ni ta a. A pension hnuah a fapa Lalchhawznova'n kum 1942 atanga 1946 thleng khawchhiar hna a thawk leh a, Manipur-ah an pem tak avangin a aiawh atan a nau Thangdula'n kum 1947 atanga 1954 (VC thlan hmasak ber) thleng khawchhiar hna a thawk ve leh a. Lal ban a lo ni a, Village Council a lo piang a, Khawchhiar hna hi a lo tawp ta a ni.

FRANCE RAM KAL : Aizawl atanga Pu Thangkima an koh haw takah chuan tlang chang a lo ni a. A pi Darkungi awp ram chin zawnzawn chu a awp ve nghal a. Lal dinhmuna a din hnu chuan a upate nen ro an rel ho a. Lal fing leh lehkhathiam a lo ni baw a, lal dangte leh a thenawm kuate pawhin an zahin a thu an ngaichang em em thin. (A pa Zataia pawhin a fateho a kohkhawm tum pawhin *"Fin in duh leh Chalrangah awm rawh u"* a ti hial a ni awm e. Kum 1917 alo inher chhuak a, Kumpinu (British) Sorkar chuan a lei dote dopui turin Mizo lalte Bawrsapin a kokhawm a, *"British ram tanin hmelma kan do ang, ti a British flag kal hual theuh tur"* a tih tum khan Aizawl thleng hmasa lal hote khan *"Chalrang lal Thangkima lo thleng ve phawt se, a ngaidan kan hriat hma chuan flag chu kan kal hual rih lo vang"* an ti a. Thangkima a lo thleng a, thu tlukna an siam thei ta chauh a ni. Mizo lalho Council-ah hotu pawimawh a ni reng a, Assam Governor in Mizoram a rawn tlawh dawn ni khuain lalho aiawha lo dawngsawngtu berah a tang thin a, an thlamuanpui hle thin.

Kumpinu (British) Sorkar chuan France rama kal a, a leido German ral do pui turin Mizo tlangval 2000 rual zel chu ral run turin a tir a. Thangkima Sailo pawh a khaw tlangvalte nen kal turin British Sorkar chuan an rawn ngen a, heng mite hi German ral run tura Chalrang atanga kalte an ni :-

1. Thangkima Sailo
2. Rokunga
3. Neihzika
4. Doruma
5. Pachhunga
6. Khawkung

Hemi tum hian lal pakhatin mi 500 zel an hova, chuta lalho kalte chu :-

1. Thangkima Sailo, *Chalrang lal*
2. Dohleia Sailo, *West Lungdar lal*
3. Thanghlianga Sailo, *Tlangsam lal*
4. Thanzama Sailo, *Lunglei lal*

German ral runa kum 1917-a kalte chu France ramah rei fe an awm hnu chuan a kal hote pawh an lung a leng ta hle a ni awm e. An kalsan tak Chalrang Awnnu hmuna awmte pawh an khua a har hle a, Thangkima nupui phuah niawm takin Thangkima chu hla an lo phuah khum a, hetiangin –

*“Ka pawm lai lal dâng, ka ngai em che,
Tiaupui chhum khi van lai kawlkungah a zâm;
Zan talaiah lunglen hi tuar ve maw!*

*Laldâng, cham rei lo la, râl daiah, Rangpui zo dai sah zai an rel dawn;
A ngûr lal Saienga tual lenna.”*

German ral rûna France rama Pu Thangkima leh a hote an kal hlanin Chalrang Awnnu aţangin khaw thar kai turin a pi Darkungi leh a upate chuan khua an lo sat a. Hetih hun lai hi kum 1918 ţhal tir a ni. Tichuan, ral runa kalte chu nghak zo lovin khawtharah chuan an kai a. A ųhenin khuaah an lo nghak thung a. Kum 1918 tawp lamah chuan an lo haw ve ta a. Kum 1919-ah tuna Chalrang khua aţanga km 2 vela hla Hausak ram hmunah an kai kim ta a ni.

Khawthar an kainaah hian Awnnu hmuna a Pi Darkungi’n upa atana a ruatte a chhawm zel a. Amaha rorelna kengkawh mai lovin a upate nen ro an rel ųhin a ni ber. Thubuai/hlabuai ngaihtuah reng reng chu lal leh upate kutah a awm. Awnnu aţanga upa a chhawmte chu, Kairuma (Biate lal ni lo), Benga, Thangpuiliana, Zahluma, Thanzinga, Hrangchhuana, Khawchhiar, Lalbawiha, Lalbuta, Thlangtlaa, Kapphunga leh Hrangtawia te an ni.

Thangkima hian Awnnu aţanga an insawn leh hnuin lal upa tur ruat belh ųha a ti a. Tichuan, heng mite hi a ruat belh leh ta a ni – Vanhnuaia, Chawngchhunga, Kailiana, Tlangkhuma, Lalchhawnzova, Thangzuala, Chawngmanga, Zaduhvea, Thangliana, Thangkawla, Neihtluanga, Pangųhuama, Thanųhuama, Rokunga, Nunkhara leh Suakkunga. Val upa atan heng mite hi an ruat bawk – Lalduata, Pangųhuama, Luaia leh Lalkawlha te. Val upate hian khawtlangah hmun pawimawh tak an luah a, tlangvalho kaihruaitu leh ho khawmtu pawimawh tak an ni. Mizo tlawmngaihna kengkawhtu pawimawh tak an ni a, khaw chhunga mi tlawmngai zing aţangin hrulaitu nihna pianpui nei an thlang chhuak kher ųhin a, chung ho chu **Val upa** an ti. Kum 1920 aţanga 1952 chhungin Val upate hi an awm.

BAWLPU : Chalrangah hian Bawlpu an awm a. An hna ber chu damlo te thawi a ni. Bawlpu hi Liantlaia a ni.

SADAWT : Sadawt hi Kristianna awm hmaa sakhaw lam Puithiam an ni a. Hrangtawia chu Sadawt a ni a, amah puitu chu Sarbaka (thlah pawlh) a ni a, heng mite hian Kristianna lo awm thlengin Sadawt hna an thawk.

THIRDENG : Chalrang Thirdeng hmasa ber chu Kapphunga a ni a. A hnuah Thangliana a ni. Tin, a fapa Khuangųhiauva’n a chhunzawm zel a, lal lal lai hun chung zawngin a thawk a. An ni pafa hi an kut a them thiam em em a, Pathian thilthlawn pek nasa tak dawngin khaw ųhenawmte hriat phak khawpin an lar a ni.

TLANGAU : Tlangau hi khaw chhunga thu pawimawh puangtu an ni a. Lal lal lai hun chhung hian Chalrang khuaah mi 6 Tlangau an awm hman a, chung mite chu a indawt dan hetiang a ni – 1. Chalbuanga, 2. Vanaia, 3. Noa, 4. Laizika, 5. Thangtlaia, 6. Kapdaia.

PI DARKUNGI BORAL : Pu Thangkima leh a hote France ram kal an lo haw hnuah Chalrang Hausak ramah an kai chho tih kha a ni a. Hemi hmunah hian kum 6 vel an awm hman a, heta an awm laiin Pu Thangkima pi, Darkungi (Pi Puii) chu fur laiin a boral a. A thih hian lalnu ropui leh hmingthang a ni baw k a, lal hrang hrang thenawm khuaa awm ten an rawn sun a. Mipui tam tak khaw thenawm atanga lo kalte leh a khua leh tui ten an sunin an thlah liam a. Tin, a fapa Zataia (Khawhai lal) leh a upate, a khua leh tui ten ui tak chungin an thlah liam baw k. Sailo lal ropui Lalvunga nupui Darkungi hi lal fing leh rorel thiam a ni a. A boral thu hria apiang ten an ui thu an sawi thin. A lungdawahah heti hian an zia k –

**DARKUNGI – LALVUNGA NUPUI HRIATRENGNA.
KUM 67 A DAM. 8.6.22-A A THI TA
KUM 47 RO A REL. A CHUNGA MI AN
LUNGAWI EM EM A. A KHUA LEH TUIIN
AN KHAWNGAIA RAN HETI ZAT HI
A HLAWH. SIAL. 11 KEL. 37
VAWK. 13. UI 9**

Heti ang zat lai mai hi ni khat thil thua an talh nge ni ang? Mihring an la tam lo hle ang a, in 50 vel emaw chauh an nih hmel si a. Lalnu thisenna chaw leh sa zawng tlai leh puar takin an ei chu a rinawm a ni. Pi Darkungi a boral tak hnuah chuan khawthar kai an rel leh a. Kum 1924 thal laiin khaw thar chu an sat a, kum 1925-ah an kai phei ta vek a ni. (He Chalrang khua an luah leh hi kum 1895 vel a Khawhai lal Zataia hoa an lo awm tawhna khaw hmun kha a ni nghe nghe.)

YLA DIN : Indopui II-na pawhin a dan zawh loh Zawlbuk nungchang chhunzawm zel turin 1935 kumah chuan Mizoramah YLA chu Pu Niara leh Pi Zaii te Bangla-ah din a ni a. Chumi hnu kum 10 vel a vei hnuah, ni 5.1.1945 zanah Chalrang LP School-ah mi 72 lai member kalkhawm ten YLA an din a. Chumi tuma hruaitu thlante chu –

President	: Lalchhawnzova
Vice President	: Lalduata
Secretary	: Rosema Sailo, LP Teacher
Asst. Secretary	: Thanghuta
Treasurer	: Runriallova
Fin. Secretary	: Lalbuaia

Heng mi thlan tharte hian YLA hruai hna an thawk nghal a. Hemi hnu kum 1946 June ni 19-ah Chalrangah Mizo Union din a ni leh a. Hruaitu insiamin heng mite hi hruaitute an ni:

President	: Lalchhawnzova
Secretary	: Thangdula
Asst. Secretary	: Khuangkunga
Treasurer	: Runriallova

Kum 1976 May ni 2-ah Chalrang Branch Mizo Hmeichhe Insuihkhawm Pawl (MHIP) din a ni a. Kum 1983 January ni 1-ah Zoram Upa Pawl (ZUP) Unit tunah chuan Mizoram Upa Pawl (MUP) Branch an tih chu din a ni bawk.

Kum thum vel a ral hnu kum 1949 January thlaah chuan hun danglam tak mai a lo thleng a, lal ban duhna a lo awm thut avangin Mizo Union chu Mizoramah an nuar ta a. Khaw thenkhatah chuan lal inte an tawng a, hmun thenkhatah in leh lote an tichhia a, huan thlaite an tichhe bawk a. Chung hrem tur chuan ADC (Bawrhsap) chuan sipaiho hruaiin khaw hrang hrang a fang a, mi tam tak an vua a, a thene phei chu ramtuileilo khawp hialin an sawisa a ni. Thangkima khua Chalrangah chuan Mizo Union chuan pawl an khawih ve lo bawk a, lal chuan *“Ka khuaah chuan hrem tur tumah an awm lo”* a ti tlat a, kut tuar tumah an awm ve ta lo a ni.

Thangkima chu lal fang leh rorel thiam, khua leh tui awp khawmtu huaisen a ni a. A khua leh tui ten an thlamuanpui hle a. Pu Thangkima hi pasaltha huaisen, Sa pawh 100 chuang zet kap a ni a. Sai 2, Ramsial 2 leh Sakei 2 a kap a. Mizoin pialral kai thei kan tih ang hi a ni. Finna, dikna, rinawmna, taimakna leh hawihhawmna te hi amahah a langsar em em a. A khua leh tui te pawh chutiang lamah chuan chhawr tlak ni turin a fuih thin a, a khua leh tuite pawhin he lamah hian theihtawpin hma an la thin. Khaw teah chuan rual el tak niin zirna lama hlawhtling pawh an thahnem ve hle a ni.

Thangkima chu kum 1928-ah a nau Lalkhuma lalna tur khua sat turin mi 20 vel nen Hriphaw an pan a. A ram chu ngaw dur pui a ni a, a hautak hle a ni awm e. Hemi tum hian Chalrang lal chuan Sai 2 leh Ramsial/Tumpang chal ki tha em em a kap nghe nghe. (Hei hi a Autobiography a ziahah *“Ka hunting memorial”* a ti nghe nghe). Hemi hnu lawk hian Thangkima hian a fa 5-na tur a hring a, a upa pakhat Pu Vana chuan hla a han chham ta a,

*Ngur zawnz zawnz laiah a chungnung lur,
Vungdanga chawi Sailian Tumpang khalnemtu;
Sakhming Lal Hranglawta kan ti e, tiin.*

Indopui II-na alo thlena Japan ral a len lai khan Bawrhsapin tul thut a awm takin tiin buh nei deuh khuaah buhfai leh buhum a lei a, Chalrang In 100 khua atangin mound 500 leiin a dahtha a. Hei hian Lalthangkima khuate chu ei leh barah an intodelh tih a tilang hle. Sorkar lam pawh an lawm hle a, Indopui a lo tawp khan *“BUH SILAI”* an tih mai *Ulhbur Phir* Mizorama mi bik 16 an pekte zingah Thangkima Sailo Chalrang lal hi a tel pha a ni.

LAL ZE MAK TAK MAI CHU : Bawrhsap Macdonald khan Mizo lal 4 lai a ban kha a ni a. Kawlkulh lal Dolura pawh a ban zingah a tel a. Thangkima fapa Lalchungnunga Hav./Clerk hna atanga chawl ta chu Kawlkulha lal turin Bawrhsap in a ruat a. Thangkima Sailo Chalrang lal chuan Bawrhsap hnenah, *“Kawlkulh lal hi lal tlak lo leh rorel tlak lo i ti a nih pawhin fapa a nei tho a, a fapa hi a pa aiawh tir mai la, a tha mai lawm ni ? Engpawh ni se, keini pafa chuan mi chawei thleng luahlan chu kan thei lo”* a ti a. Kawlkulh lal Dolura fapa tana a dilpuina chu Bawrhsap pawh chuan a pawmpui ta a ni. Lalna a hlut tehlu nen mi tam takin lalna leh thuneihna an ngai hlu em em a, khatianga a han hnawl mai kha a makin a ropui tak zet a ni.

ZAWLBUK : Zawlbuk hi Mizote nuna bet tlat a ni a. Tunhmaa Lal lal laia khawtlang nuna thil pawimawh tak a ni. Zawlbukah hian zanah pa ho leh tlangval ho an kalkhawm thin a.

Tlangvalho an riakkhawm thin. Mi, ral leh sa rala vengtu tha tak an ni a, naupang tlema fel ve tawh deuh ten zana tuah tur thingnawi an fawm thin, chung chu aian zana paho an titi khawm thin a. Pasaltha chanchin, tlawmngai, huaisen leh thil dang dang chanchin sawiin mihring awm dan tur leh nungchang mawite an inzirtir thin baw a ni.

Lal awmna khuaah Zawlbu a awm ziah avangin Chalrangah pawh hian Zawlbu hi kum 1924 vel atangin a awm tan a, kum 1942 October thla thlengin a ding a, chumi hnu atang chuan a lo tawp ta a ni. Chalrang khuaah hian Pu Thangkiman kum 1916 favang atanga 1954 January thla thleng khan lal roelna a kalpui a, lal roelna chu a lo tawp ta a, chumi hnuah VC thlan hmasak ber ten roelna an kalpui ta a ni.

CHARGE INHLANNA ROPUI : Mizo lalte an tlawm tak 1954 kum tirah Mizorama a vawikhat nan Village Council thlan hmasa ber neih a ngai a. Chalrangah pawh Village Council thlan a ni a, VC Thlan tharte hnenah Charge hlan a lo tul a. Hemi tuma Pu Thangkima Sailo Chalrang lal thusawi ang hi khatih laia Mizo lalho zingah khan sawi an awm ve kher awm lo ve. VC thlan tharte pualin zana LP School-ah public meeting koh a ni a, mipui an kal tha hle a, mi 105 lai an kal a, School-ah an leng lo a ni ber mai. Pastor Pasena'n chair a la a, tawngtaina hun a hman zawh hnuin Pu Thangkima chu thu sawi turin a sawm a, lo ding chhuakin he thu ropui leh fing tak hi a sawi a –

“Ka khua leh tui duh tak, Chalrang mipui te u. Zaninah hian hun danglam tak kan lo chuang chhuak ta a. Hei hi thilmak danglam tak a ni lo tih hi kan zavai hian kan hriat hmasak ka duh a ni. Khawvel hun inher danglam hian tute lalna emaw tute tawpna emaw a lo her chhuahpui thin a ni. Kum 400 lai lei pangkhing awptu Pathian ang hiala inchhal Kaisara pawh a lo tlawm tawh kha. Ani chang a ni lo, Agupta lal te, Babulon lal Nebukadnezara-te meuh pawh an lo tlawm tawh kha. Dictator ropui khawvel zawng zawng hneh tumtu Hitler-a te, Napoleon-a te pawh an tlawm tawh baw kha. Russia ram ropuia lal ber King Czara te pawh an tlawm tawh baw kha. Chutiang bawkin keini Mizoramah kum 200 zet lo lal tawh Sailo lalte pawh kan tawp a hun a ni ve tawh mai a, thildanglam a ni reng reng lo. Tute emaw an tawp hian tute emaw tan zalenna alo inherchhuak a ni baw si a. Khawvel lal tam tak ang lova thisen far khat mah seng lova kan hun kan hman thei hi Pathian malsawmna ropui tak kan dawn a ni. Ka lalpui, kan thian thenkhatte erawh chuan an hriatthiam loh ka hlau hle a, an tan tawngai sak tul in ka hria. Vawiin thlenga ka tlang chhuak upate leh thian thenkhat ten min phatsan lova, min tawawmte hi mak ti suh u. ‘Lal leh tlang khatah, thih leh ruamkhatah’ lo ti tlang tawhte kan nih hi! Ka lama an tang hi nangni an huat vang che u lah a ni baw hek lo. Mi dik takte tihdanin thutiam an hlen ve mai zawk a nih hi. Tunhma kum 30 zet atang tawh a, Chalrang khaw tana ka fin vena leh ka remhriatna zawng zawng khawtlang hmasawmna lam kawnga ka hman thin dan leh tan ka lak dan hretu in ni chauh ni lovin a tihlawhtlingtu chu in nih thin kha. Zaninah hian VC thlan tharte kutah chutianga mawhphurhna zawng zawng chu ka hlan dawn a. Khawtlang tana thiltha tih an tumna kawngah chuan kei mi tanpui thin ang baw khan anni pawh tanpui an ngaihnaah chuan tanpui zel turin ka ngen takmeuh cheu a ni. Anni pawh tumah thlei bik nei lova, hmangaihna nena ro an rel ngei ka ringin ka duh baw a. Harsatna tam tak an sut tur a awm ang tih pawh ka hriatpui a ni. Chutiang kawngah chuan a tul ang a pianga tanpui turin kei leh ro mi relpuitute nen hian kan inpeih reng a ni tih an hriat ka duh baw. Zalenna hi hman thiam loh chuan keimahni ngei pawh min vaw let thei a ni tih pawh kan zavai hian i hre theuh ang u. Tunah VC thlan tharte kutah khawtlang neitu nihna leh thuneihna ka hlan e”

a ti a. Mipui ten hnukulh ʔeuha lal thusawi ropui tak an ngaihthlak hnu chuan kut an beng dur dur a, an ʔin ta a ni. He thuchah ropui leh ril tak hi hmun danga Zoram mipuite hian han hre ve hlawm se, ropui an tiin mak an ti hial hlawm ve ngei ang.

PEM NASA KHUA : Chalrang khua hi a khaw phu tawkah pem chhuak tamna khua a ni awm e. Burma, Manipur/Tuiʔhapuiah te an pem hlawm a. Manipur Kawnpuiah phei chuan Chalrang Veng tih tham hial an awm a ni. Tun hnu kan hriat phak ve chinah pawh Aizawl, Tlamsam, Khawzawl, Lunglei leh Mizoram hmun hrang hrangah te an pem nual a. Burma rama doctor thiam Dr. Thanbilhluai leh Dr. Vanlalmuana te chu Chalrang khaw chhuak an ni a. An hnuai aʔanga zir chuak Doctor pawh an tam hle. USA-ah pawh Pastor 2, Pastor Jacob Rodawla leh Pastor B. Thangzauva te an awm a, Israel Sorkar Office lianah hna lian tak chelhtu Rebek-i te pawh an awm bawk.

NEW CHALRANG A PIANG : Kum 1978-ah People Conference (PC) Party a sorkar a, khatih laia Supply Minister Pu Zairemthanga hmalakna nena kal kawpin Chalrang khua chu Khawhai nena infin khawm tura hmalaknaah Chalrang Community Hall-ah public meeting neih a ni. Mahni ram chin ve vea awm a, khaw lian tham ve tak din ni se tih relho a ni a. Kawngpui kama awm hlutna leh khawpui din chu rel niin khawthar din chu pass a ni a. Tichuan, New Chalrang chu a lo piang ta a ni. Kum 1984 atangin in a ding ʔan a, hemi hmuna khawthar kai ve duh lo chhungkaw tam tak erawh an awm thung a. Chung mite chuan Chalrang khaw hmun hi an la luah ta zel a ni. Tunah hian New Chalrangah hian in 130 chuang zet chu Chalrang aʔangin an insawn thla tawh a ni.

ZIRNA LAM : Kum 1927-ah Lower Primary School (LP School) a ding a. Zirtirtu hmasa ber chu Patawia (Pu C.Pahlira u) a ni. 1947-ah Phaipui Manipur-ah pemin Chalrang khaw mi ʔhenkhat a pem pui a. A hnuaah Chalrang lal Thirdeing Thangliana hoin kum 1955-ah Manipur-ah pem an awm leh nual a, Zirtirtu 2-na Pu Rosema Sailo chuan kum 1943 aʔanga 1981 chhung a zirtir leh a. Khawvel indopui II-na Japan ral len tawp lam deuh a ni. Pu Rosema Sailo chu Sialsukah kum 1946 khan Guru Training a zo a, kum 1953 – 1954 khan Aizawl Chaltlang atangin Basic Training DIET-ah a zo bawk. Naupang zirtirnaah a inpein a tuina zawng tak a ni a, Chalrang LP School aʔanga zir zawm zelte Graduate an tam hle a ni. Amah hi zirtir hnaah a tui leh a ʔhat em avang hian **Zirtirtu pa** tia koh a ni hial. A pension hnuin Pu H. Rinenga, Pu R. Thangthuama, Pu Vanlalthanga leh Pu LP Liansiama ten Head Teacher hna an thawk ve leh a. Zirtirtu pawh engemaw zat an lo awm ve ta bawk.

Chalrang LP School aʔanga zirna lama hlawhtling hmasa langsar zualte chu;

1. Laltinbiaka, B.A., B.Ed Headmaster (Rtd.)
2. Dr H Vanlalhluna, M.A., Ph.D. College Principal (Rtd.)
3. H Zosiamliana, MA., M.Phil. Associate Professor (Rtd.)
4. Rualkhuma Hmar, Advocate M.A., LLB
5. Lalbiakzuala, S.E. PWD (Rtd.)
6. J Sangkhuma, S.E. PWD (Rtd.)
7. JH Roʔthuama, B.A., Ex-Minister
8. Lalduhsanga Khiangte, S.E. P&E
9. Dr Lalsangluaia, MBBS., M.S. (Ophthalmology) (Rtd.)
10. Lalthanzuala, M.Sc., Agri. (Rtd.)
11. Dr Lalsawmliana Sailo, MBBS
12. JH Ramfangzauva, MA (Eco), I.E.S.

Heng mi hmasa te hnuah hian mi tam tak an lo chhuak leh tawh a, kan ziaik lang seng ta lo a ni.

Kum 1970-ah Middle School din a ni a. Headmaster atan H Vanlalhluna lak a ni a, Hrangluia, Hrangthanpuia, Pu C Rosanga leh Pu Suandochina te nen an thawk ho. Pu H Vanlalhluna hnua Headmaster hna thawkte chu Pu. H Zosiamliana, Rualkhuma Hmar, K Sangthuama, Pu C Lalengvara, Pu Lalthangruna Sailo, Pu Suakhnuna Kawlni, Pu H Lalhlithanga, Pu Vanlalhruaia Ralte leh Pu Vanlalruata Ralte te an ni. Khaw thenawmah zirna inte a la awm tam loh avang leh zirna lama inenkawlina a that avang hian thenawm khuate atangin zirlai engemaw zat an rawn kal thin a. Zirlai pawh an thahnem thei hle. Pu H Vanlalhluna hnua chuan tun thlengin mi hrang hrang an lo thawk leh ta zel a ni.

Kum 1976 kum tirah khawtlang mipui kalkhawm chuan khawtlangin hma a lo sawn a, rampum huapa mi thiltithei leh khawtlang leh ram tana mi chhawrnahawm te kan lo neih ve theih nan tiin High School an din a. Headmaster hmasa ber atan Pu H Vanlalhluna lak a ni a, a ni hian Middle School nen a thawk kawp a. A ni hnua hian Pu H Zosiamliana, Pu TC Pachhunga leh Pu Vanlalrawna ten Chalrang High School Headmaster hna hi an lo thawk tawh baw. Khaw hrang hrang atangin Zirtirtu tam tak an rawn thawk tawh a. Zirlaite pawh khaw thenawm atangin an lo kal ve nual thin. Changtlung ve tawh taka High School neih a nih tawh hnua Khawhai High School nena infinkhawm tura Sorkar lamin a ruahman avangin kum 1982 thleng lo ding tawh Chalrang High School chu kum 1983-ah Khawhai High School nen chhun fin a lo ni ta a ni.

SAKHUANA LAM : Pu Thangkima Sailo Chalrang lal hi Pathian thu awih Kristian hmasa niin Missionary Sap hote hnung zuiin an bulah a lo awm tawh thin a. Mizo pastor hmasa ber Pastor Chhuahkhama dawta Pathian thu Cherra-a zir tura a inbuatsaih lain a pa Zataia'n a pi lalna tlanga lal tura a koh haw avangin a zir zawm thei ta lo a ni. Hetih hun lai, kum 1914 vel khan Chalrangah kristian an lo awm tan tawh a. Kum 1915 a lo inher chhuah chuan Kohhran mumal takin a ding a. Upa atan Upa Hrangchhuana leh Upa Tlailiana te ruat an ni a, khawthar an kai thlengin Upa nihna an keng zel. Kum 1925-ah Upa Tlailiana chu nemngheh niin Upa Hrangchhuana chu 1926-ah nemngheh a ni leh baw.

Hun a lo kal zel a, Pu Thangkima lal fing tak chu Kristian hmasa a nih vangin Kristianna a ngai pawimawh hle a, Kohhran rorelna sang Assembly (tunah chuan Synod tih ni) ah Pastor bial thut hmun tura a dil angin kum 1939-ah Chalrang chu Pastor bial thut hmun atana siam a ni a, Pastor Pasena chu Chalrang Pastor bialah Pastor hmasa ber atan dah a ni a, amah hi Tlangsam khaw chhuak a ni. Hetih hun lai hian Chalrang Pastor bial hi a zau hle a. Inkhawmpui a awmin khual atanga inkhawmpui tura lo kalte chu nilengin kein an rawn kal thin. Pastor Pasena chu pum lam natna avangin 1960-ah a boral a, a aiawh turin Pastor Biaksanga dah leh a ni. Ani hi South Khawbung khaw chhuak a ni a, thu leh hla lama mitin hriat Pu B Lalthangliana pa nau a ni a. Thiamna sang nei lo mah sen Pathian ring tlat mi a ni. Pastor Biaksanga chu kum 1980 khan Sairangah sawn a ni a. A hnu leh kum 1981-ah chuan Chalrang Pastor bial ni thin chu Khawhai Pastor bial tih a lo ni ta a ni. Kum 30 chuang zet a vei hnua kum 2013 khan Chalrang Pastor bial chu Synod hnua atangin hawn thar a lo ni leh ta a ni.

CHUL HUAN : Kum 1935-ah sorkar thupek angin Village Welfare Committee din a ni a, Chairman atan Pu Lalthangkima Sailo, Secretary-ah Pu Lalchhawnzova ruat an ni.

Khawtlang tan Thingpui huan leh Thingtheihmu huan òh a ni a, Aizawl thingpui huan tlang, tuna Macdonald Hill ni ta atangin a chi an la a, chu chu an ching a, a lo puitlin meuh chuan khawtlang tan sum hnar òh a ni a, tun thlengin khawtlangin an chhawr òh a hle. Thingpui leh Thingtheihmu karah Serthlum, Zawngtãh, Lamkhuang leh Theihai te an ching baw a, tun thlengin khawtlangin an chhawr hle.

KHAWKHAWM : Mizo lalho ban an nih khan Pu Lalthangkima pawh ban a ni ta a. Lal fing leh rorel thiam in lam leh ram lama thangchhuah meuh chu a khaw mipuite tan a la òh a em em zel a, kum 1966-a rambuai khan khatih laia mipuite chu an buaiin an mangang hle a nih kha. Khaw òh a khatah phei chuan India sipaiin mi an vaw nasain an rikrap nasa viau a nih kha. Chalrang khaw hote chuan engmah nasa takin an tuar lo va. In an hal tih ngawt loh chu ramtuileilo khawpa sawisak angte an awm lo a ni awm e. vai sipaiho kha MNF (underground) tamna khua nia an hriatah an lut zing hle a, India sorkar-in sipaite òh a chakna hmangin khaw hrang hrang a khawm a. Khawhai leh a chhehvel khuate pawh engemaw zat khawtlang hruaitute chu Khawhaiah kokhawmin, Khawhai hmunah khawm(grouping) tura inpe turin Sipaiho chuan hming ziah luih tir an tum a. Pu Thangkima leh Pu Thanghuta thurawn angin Chalrang khua erawh chuan hming an ziaak ve duh lo a, khawm an ni ve ta lo a ni. Hetah hian Pu Thangkima, Lal fing leh huaisen lehkhathiam leh German ral runa France rama kal, British Kumpinu sorkar meuhina Tangkapui a pek avangin sipaiho in an zah a ni ang, Chalrang khua hi khawm an nih ve lohna chhan hi.

Rambuai lai ngang a nih avangin a khaw mipuite tana nun petu Pu Thangkima meuh pawhin a rilru khawtlang tan a seng nasa hle. Vawikhat pawh sipai hotu, Major Nathana hoin Khawhai atangin Chalrangah an lo kal a. Pu Thangkima chu an rawn òh a thawn thut a, Nathana chuan a hote chu rifle nen inring turin a ti a. Chalrang lal chu a in atang chuan an ko chhuak ta a. Nathana chuan, *“Thangkim, khawiah nge Mizo sipai (MNF) te an awm ? I sawi loh chuan kan kap dawn che,”* a ti a. Rifle hmawra Chemte (Bayonet) chuan Pu Thangkima chalah an tin a. *“Tualte atangin Chalrangah MNF an lo kal a, chaw I lo pe a ni”* a ti ta mai a. Thangkima chuan *“Ka hre lo, chutiang kan khuaah an lo kal ka hre hauh lo mai. Khawi atanga chu thu chu hria nge i nih ?”* a ti a. Nathana chuan a hote chu silai kap mai thei turin a kau tir a. Thangkima thinrim lutuk chuan *“In ngam leh min kap rawh u, nangni sipaiho hian dawt sawiah min ngai a, min ring lo a ni maw ?!”* tih pahin a kawr awm a hlim a. *“Min kap ngam a nih chuan min kap teh u. British Kumpinu sorkar pawhin min ringin France ramah German ral run turin min ko va, Headman-ah min awm tir a sin !”* a ti a. Kah tum sipaite chuan an silai chu an la thla ta a ni.

Thangkima chuan Nathana leh a hote chu a inah hruaiin Kumpinu sorkar-ina Tangkapui kawr (Jaman kawr) leh a dara bel awm *‘mi huaisente chawimawina’* chu a entir a. Chumi hnuah chuan Major Nathana leh a hote chu Khawhaiah an chhuk thla ta daih a. Khawhaia sipai awmkhawm ho hnenah chuan *“Chalrang khuaah in kal chuan fimkhur hle ang che u. An lal Thangkima khi mifing, Sap òh a thawn thiam, mi huaisen, British sorkar pawh ina an rin tawk avanga chawimawina Tangkapui an hlan ngat a ni”* a ti a. A hnu deuhah Pu Thangkima chu Khawhai tlang Sipai Camp-ah chuan Chalrang khawtlang hruaitute nen koh thlak an ni a. Chutah chuan thu chhan har pui pui, an chhan loh a pawh tur thu chi hrang hrang an zawt a. An tan chuan chhan loh chi pawh a ni awm lo e. Hemi tum hian Pu Thangkima chu a lo upa tawhin a kumte a tam tawh a. A khua leh tuite chhan nan thli thaw vuk vuk karah sipaiho chuan an hreng ta reng mai a. A thinrim lutuk insangmar chu a zo lo va, leiah a tlu tawp mai a. A lungphu in òh a thah loh pahin, a òh a thah loh pui chhunzawm

ta zel a, hemi aṭang hian a taksa chu zawi zawiin a chak lo tial tial a. Chalrang tana a finna leh thiamna, a hun leh tha a lo hman ṭhin zawng zawngte chu hmang thei tawh lovin nitinin a hniam zel a. Theihtawpa an enkawl chung pawhin a chau tulh tulh mai a. Ni 30.10.1969 ah a nunnain a tlin ta lo va, a nupui leh a fanau, a khua leh tui ten ui em emin an thlah liam ta a ni. A thlan hi Chalrang khaw chung lun lai tak Chawlhmunah a awm a, fapa 13 leh fanu 6 a nei. A thlan lungah heti hian ziaak a ni –



KAN PA DUH TAK

THANGKIMA SAILO KUM 75 CHALRANG LAL

KUM 40 RO A REL

1917 AH FRANCE RAM KAL HO
HEADMAN A NI. LAL FING LEH
ROREL THIAM TAK, IN LAM LEH
RAM LAMA THANGCHHUAH A NI.
NI 30.10.1969 AH A NUPI FANAU, A KHUA
LEH TUI TEN NGAI EM EMIN KAN ṬHEN TA.

Thu laknate :-

1. Thangdula, Chalrang Ex-Khawchhiar.
2. Upa Khawsata, Chalrang.
3. Pu Liangngenga, Chalrang Branch YMA hruaitu hlun.
4. Rualkhuma Hmar, Advocate, MA, LLB. thu leh hla.
5. Autobiography of Pu Lalthangkima Sailo, Chalrang lal.
6. Chalrang Centenary Souvenir Bu.

.....oooOooo.....

Bul deuh tak atangin i han tan dawn ila. Amaherawhchu, a thui lutuk loh nan thluaithlum lovin tlangpui deuh takin i han la lawn dawn teh ang. Sailo Lal ten chhak an nawr lai khan Lallula thlah Lalsavunga chuan Aizawl atangin a nawr chho a, mahse, Darlawngah a thi ta mai si a. A fapa Vanhnuailiana chuan a ai a rawn awh ta a, chhak lam a nawr chho zel a. Tualte a thlen pheii chuan a lo ropuiin khua(In) pawh a ngah tawh hle a, tun thlenga Tualte Vanglai kan tih fo hi a ropui vanglai a ni. Mizo lalah na na na chuan Selesih Sangsarih khua tih loh chuan an khum kher awm lo ve. Hetih hun lai a ramdang atanga lo kalte pawhin tlawh hram an tum thin hialin an sawi, tun thlengin a Seluphan leh a thlan thlak hlu pawh hi hmuhdawm a la tling a ni. Hetih lai tho hian Khawchhak Falamah chuan Lal ropui deuh mai, Dawi pawh thiam hiala sawi a awm baw a. Zoram Tiau thlang lama lalte chuan a hnenah chhiah an pe thin a(Lal ropui Nikuala leh Chawngtlai, Page 279). Nikuala hun hnahnung by Lalfakzuala). Khua an sah dawn pawhin a hnenah phalna an lak phawt a ngai thin a ni. Heng hun lai hian Zoram lam lalte leh khawchhak lam ral hi an indo reng a, 'Pawihchhe Ral' an ti mai thin. A nihna takah chun an leido te hi Sukte, Hakha, Dawn leh Thlanthlang Pawihho an ni ber a. Rawlral pawhin an inbei fo a ni. Mizo History ziaktute chuan Tualte Vanglai hi Kum 1857 vel niin an ziaik.

Nikuala lo lan tanna : Tualte Vanglai huna Vanhnuailiana a lal lai tho hian Tiau chhak leh thlangah Zahauho chu lian takin khaw 40 dawn laiah an lal a, chung zinga pakhat chu Khawzalana Nikuala pa hi a ni a, Tlauhmun Lal a ni. Nikuala chu unau mipa panga zinga a naupang lam (a thenin naupang ber an ti) a ni a, Lalna inhlan chhawnah hian Zahau danah fa naupang ten tlang an chan loh avangin Nikuala pawh hi Tlang chang lo tur a ni a, chuvangin, a vak vel nasa hle thin niin an sawi. Thenkhat chuan a tei vel chu Lalna tlang zawng a ni an ti a, a enga pawh ni se hetih hun lai hian Tiau ralahte pawh a rawn tla thla fo thin a ni. Nikuala chu pathlawi naupang te niin an sawi baw. Chutianga chutih hun laia mahni a vakvel fo chu pa namai lo tak a ni ang tih Vanhnuailiana a lo hre thuai a, a chanchinte zawt thlithlaiin a ngaihven ta hle a, a tawi zawngin sawi ta ila, Vanhnuailiana chuan chhak lam ralte nena an inkar thua remna sawi turin a ngen ta a. A han hlawhtlin phawt chuan a lal ram atangin lalna tlang siam ve turin a tiam ta a ni. Nikuala chuan Vanhnuailiana te ang lal ropuiin chutianga a tiam chuan a thutiam a hlen ngei ringin ani pawh chuan inremna palai hna chu a thawk ta a, a vanneih a siamin a hlawhtling chho ta mai a, Tiau ral Pawiho nena an indo a kham ta a, tichuan Vanhnuailiana hnenah Tualteah chuan a awm ve ta a(He a hnathawh ropui tak chawh hian a fapa upa zawk hmingah pawh Dokhama a sa ta reng a ni). Lalna tlang erawh a siamsak nghal mai lo a, veng hming neiin a awm ve ta niin an sawi. Mahse Tualte vanglai chu Mautam avangin an darh leh zo ta a. Hemi kum hi hriat chian a har deuh. A chhan chu Mautam hi Zoram hmun hran hranah a tam hun hi a in ang chiah lo a ni mai thei. Ziaktu hrang hrangte ziah dan a inang lo. Vanhnuailiana chu Tualte atangin Lungdupah a kai a, Lungdupah hian kum 7 vel awm a sawi a ni. Lungdup atangin Champhaia a kai leh a, hei hi kum 1867 velah niin an sawi. Tichuan Vanhnuailiana chu tuna Ruantlanga Vanhnuailiana Hmun an tihah hian a thu ta a, khua pawh la ngah thawkhat hle niin an sawi.

Vanhnuailiana fate thlang tlak chhan : Vanhnuailiana Champhaia a awm lai hian Zan khat chu a khaw in a kang hluah mai a, Tlangval tawng thlahdah deuh ten "Sukteho hal a ni ang' an lo ti mai pek a, khual thuthang leh ar pan chuk tih zawng zawng an neih ta a.

Vanhnuailiana'n a lo hriat meuh chuan Sukteho hal riakah an lo puh thlu hman a, Vanhnuailiana chuan umzui turin a ti a, an umzui ta mai a. Nikuala nghe nghein 'Ka pu, Sukte hal a ni ngei tih pawh i hre hauh si lo a, duh aiin thu i thlah hma lu deuh lo maw?' a ti a. Vanhnuailiana pawh a inthiam leh ta meuh lo a, 'Ko kir leh mai rawh u' a han ti nain Tlangvalho chu koh kir phak rual an ni tawh si lo. A umzuitute lahin tumah an va hmu ta lova, Sukte Lo vat Ramriak an va that ta ngawt pek a. Sukteho chu an lungawi lo nasa ta mai a. 'E he hei... Lungtat a par ta a, Run lui a lehluan ta a ni maw!' an ti niin an sawi. Chutianga Nikuala'n remthu a lo sawi tawh, Vanhnuailiana khuate thoin an han bawhchhe leh chu chinchang hre pha chinho thla a muang ta lo hle mai a. Engtik hunah emaw chuan phuba lain an rawn thawk ngei dawn tih an hre sa ran mai. Chutih nak alai chuan Vanhnuailiana chu a thi zui a, a fate chuan thlang tlak zai an rel ta a ni an ti.

Nikuala Lal tan dan : Nikuala pawh Vanhnuailiana chuan fa anga a neih avangin a hnenah chuan a awm ve zel a, hetih lai hian Vanhnuailiana chuan Hmarho (Manipur ramah) a run fo a, a hlawhtling thei hle a, Nikuala pawh a tel ve thin a ni awm e. Manipur phai velah Mizoram chin ramri lung pawh a phun niin an sawi thin. Mahse, Vanhnuailiana chu a lo hrisel lo tan ta hle a Nikuala pawh belrawh mual pein sangal khawng hrangin Lungverhah a awm hrang ve tan ta a ni. Helaia a awm hran tanna hi 'Nikuala Hmun' an ti a ni awm e. Kum 1870-ah Vanhnuailiana a thi ta a, A fateho chuan thlang tlak zai an rel ta a.

Nikuala erawh chuan, "Kei chu ka pu in Tuipui leh Tiau inkar chhim lamah Khuangthing, hmar lamah Vaikhawtlang thleng i ram a ni ang min ti a, thlang ka tla ve dawn lo ve," a ti ta tlat mai a. Vanhnuailiana fate chuan thlang an tlaksan ta a ni. Nikuala tupa Zahuata Diary-a a lan danin Nikuala khaw kai kual dan chu hetiang hi a ni. Lungverh atangin Khuangleng Zopui (1872-1873), Khuangleng Zopui atangin Leithum(1873-1874)ah a kai a, In 70 zet a nei ta a, Leithum atangin Vanzauah (1875-1877), hetah pawh hian in 70 a la nei a, Vanzau atangin Phuihnam, Tlaikuang an tih bawkah (1877-1881). Helaia an awm lai hian Thing a tam a, tam a tla zui ta a. Mahse, Phuihnamah chuan tam a tla ve ta tlat lo mai a, chuvang chuan Nikuala khua chu an pan ta huai huai mai a, khua a lo nei pung ta hle a, in 400 lai neiin hmun danga an awm aia rei an awm ta nghe nghe a, a fa pa Dokhama pawh Phuihnamah a piang ta a ni. A fapa hmingah chuan Lalburha ngeiin, 'Kan karah do i kham a, chuvangin, Dokhama kan sa tur a ni' a ti a ni awm e. Phuihnam atang hian Bungzungah (1881-1883) an kai leh a, in 100 laiin an pun belh a, mahse chhaklama ralte nen an lo indo nasa ta deuh deuh a, chuvangin, Sailo lallo chuan thlang an tla ta vek a, Nikuala chu amahin helaiah hian a lal ta a ni. Indo chu a lo hluar chhoh zel tak avangin Nikuala chuan in 150 neiin Thlahmunga chu Zawngtetuiah a lal tir a, amah chuan Buang a kai (1884-1886) leh ta a ni. Buang a kai hian in 350 a la nei tho a ni.

'Pawihchhe ral' an tih mai nen chuan an indo nasa tulh tulh a. Amah Nikuala ngei pawh Zahau Pawih tho ni mah se Lusei Lal nghenchhana Tiau thlang lama lal a nih avangin Zahauho tih lovah chuan Tiau chhak lam Pawihthe nen chuan an inchemhar lo thei lo va. Indo chang an nei ta fo a, rawlral pawhin an inbei fo mai; chuvang chuan Nikualan tanhmun tha a mamawh lehzual a, khawthar kai leh a duh ta a. Ral dona remchang a dap ta a. Tichuan, Buang atangin Chawngtlai a kai ta a. Chawngtlai a kai hian in 400 zet chu a lo tling leh tawh a (A tupa Zahuata Diary chuan 500 a ti), Chawngtlai a kai kum hi upate chuan 1887 vel niin an sawi a, mahse, Nikuala chanchin chhuinaa document hmuh chhun chu 1889 a ni a, Chawngtlai khaw lo pian chhuahna bul tak chu hei hi a ni ta a ni. Nikuala'n Chawngtlai a kai lai hun hi 1888 kum tawp lam emaw 1889 kumtir lam emaw a

nih ngei a rinawm. A chhan chu hetih lai December thla leh February thla inkar vel hi Chawngtlai thing/ par lai a ni a, he khuain a hming put chhan pawh a ni reng a ni.

Sailoho chuan Tuipui ral a kaithla chu an lo ngaimawh hle a. Mahse, Vanhnuailiana fapa Lalburha chuan a thlavang a hauh a, helaia a awm hian an tan phaw leh daingul a nih zawk zia in a unaute leh a pasalthate chu a lo thlem dam leh ta a ni. Nikuala chu Lalburha'n a beisei ang ngei chuan Sailo tan mai pawh ni lo, Zoram tan "Phaw leh Daingul" a lo ni ta reng a, chhaklam ral chuan Tiau lui bak an rawn pel ngam ta lo a, an rawn pelh pawhin Nikuala lakah an tlawm zel a. Tun thlengin India (Mizoram) ramri pawh Tiau chin a lo ni ta a, Mizoram Dil lian ber Rihdil Burma rama a awm tlat ang ni loin, Mizoram phaizawl zau ber Champhai pawh Mizoramah ngei a lo awm phah ta a ni. Nikualan helai hmun hi lo veng tlat lo se tuna India leh Burma inramrina hi Tiau lui ni lovin khawchhak Tuipui zawk hi a nih ngei a rinawm.

A tawi zawngin sawi ta mai ila, Lal Nikuala chu Chawngtlaiah kum 1887/1889 vel atangin kum 1892 April ni 25 Vailianin an man thlengin a awm ta a ni. Kum 1893 a Chin Lushai country Military report-ah pheii chuan heti hian a inziak *"Far away to the west, in the very heart of the hill tract,, a chief Nikwe had established a village. He formed a separate section of his own and he protected some 20 villages,"* tiin.

Chawngtlai khaw hal hnu chuan : Nikuala Chawngtlaia a awm chhung hian sulhnu leh chanchin tam tak a nei a, hetah hi chuan ziah sen a ni lo. Kum 1892 April 25-ah an man a, an Camp-ah(tuna Vairiah hmun, Chawngtlai High School vengah) an hruai a, a tuk ni 26 April-ah hruai chhuakin khua an chhuahsan a, a khua an hal bawk avangin Lalnu Lalngurvungi hoin Hmawngmualah an inbawk a, He thu pawh hi hnialna a awm thin, chu chu Hmawngmual hi Tualte ram ang leh khua anga sawi ani, Chuvangin a tihchian nan North Lushai Hills Bawrsap A.W Davis a Report-ah chuan kum 1893-ah Lunglei Superintendent, Captain Shakespeara'n Lalngurvungi hova Dokhamate khawsakna a va tlawh thu a chuang a. Hmawngmual hian khawi khaw hming dang mah a pu lo. Hei bakah sipaihoin Dokhama awmna an va tlawh hi Hmawngmual (Mongmual) ti ngeia ziah chu 'Englishman's Overland Mail' Chanchinbu ni 8 March 1893 a chhuakah a chuang a ni. Hmawngmual atang chuan Kel kang kai an tum a, Chutihlai chuan Kel kang chu a ram a thain ngaw a cham dup a, Dokhama ten British awp an ni tawh tih an la hre lo a, Sailo lal, Lalburha hnenah Kel kang kai an va dil a, Lalburha chuan a lo phal lo a, Mualkhangah an inbengbel ta rih a, hetih lai hi kum 1894 kha a ni a, hetah hian Kristian hla phuah thiam Patea a piang. Falam lal hnenah ram an dil leh a, (Falam lal hnuaia awm emaw an la inti a) Falam lal lahin, 'In duh leh kai rawh u' a lo ti mai si a. Tichuan, Mualkhang atangin Kel kang an kai leh ta a, Dokhama upaten Lalburhate chu hlain an deng zui kher a;

*"Thlang hnawmin lo sel lo u,
Awmlai leng leh Sappui ral lo chuan,
Kan kai nan khawtlang in dal lo ve.* tiin.

Lalburha pawh a thinrim viau a ni awm e. Lalnu hoin Tuna Chawngtlai ram Mauhakah an kai bawk a. Mahse, anni pawh kum khat hnuaiah Kel kangah an kai ve leh ta a ni. He khuaah hian Dokhama chuan fa a nei a, a hmingah Zahuata an phuah ta a ni.

Hetih laia thil pawimawh tak lo lang chu Falam lal leh Zahau Lal ten Lusei lal thenkhat hnenah lei man/ram luah man an la thin tih North Lushai Hills awptu ten an hria a,

Sorkarin chung lai vela awmte chhiah chawisak atan Falam lal hnenah Sial 40 an pe a, chu chu Lusei lal ten Falam hnenah chhiah an pek tawpna a nih tur thu hrihlin Lusei lalte pawh Falam hnenah chhiah pe tawh lo turin an hriattir ta bawh a ni. (Lal ropui Nikuala leh Chawngtlai. Page 279. Nikuala hun hnuhnung by Lalfakzuala).

Kelkangah engemaw chen an awm hnuah Bawrsapin Lalna tlang a sem a, Dokhama chu kum 1899 kum tawp lamah Artlangah in 60 nen a kai hrang a, Nikuala khua ni thin kha a fapate 2 in tlang an chan tak ve ve avangin khaw 2 an lo ni ta a. kelkanga Liannawla a lal tan hi kum 1899 niin Dokhama chu hemi kum vek hian Artlangah a kai tihna a ni. Artlang atangin Tualteah kum 1903 velah a kai ve leh a, Tualte atang hian kum 1906-ah Chawngtlai a zuan a, kum 1907-ah an kai pheih leh ta a ni.

Kum 1906 kum tawpah Chawngtlaiah, Nikuala hunlaia a kulh awmna chung fing hnih vel leka hlaah an kai pheih leh ta a, chu hmun chu tun thlengin Chawngtlai hmun tia hriat zui a lo ni ta a ni. Helaia an awm lai hian Tualte khaw hming pu ni a sawina a awm a. Amaherawhchu, hetih hunlai a mi document haichhuahah chuan 'Dokhama Chawngtlai' tih leh 'Dokhama Chief of Chawngtlai' ti zelin Sorkarin a record a, Hetih lai hian Tualte khua a awm lo tih a hriat. A tichiangtu atan tlem lo tarlang ta ila.

1. Chawngtlai Lal, Nikuala tupa Zahuata'n a chanchin a ziahnaah chuan Dokhama chuan khaw 5 (Khua panga) a satin a sawi. Chungte chu-Hmawngmual (Tuna Chawngtlai ram), Kelkang, Artlang, Tualte, Chawngtlai a ni. Heng khua a sah hian khawthar a kai tawh chuan a kalsan tak khua chu khaw ram a ni zel tawh (Zahuata Diary).
2. Mizoram Synod Archive-a 'List of Church' record a neihah chuan Mizoram khawchhak lama Tirhkoh Thangkhuma bial ziah lan a ni a, Khaw 22 a bial a, chung a bial chu fel takin record a ni. Chutah chuan 'Name of the Chief - Dokhama. Name of the Village - Chawngtlai' tih a ni. Hei hi Synod Archive-ah en theihin a awm.
3. Synod Archive a Kohhran chhinchhiahna bu-ah chuan Chawngtlai khua a Ringtu hmasate leh lal leh an khaw hming a inziak a. Hei bakah hian Lal Dokhama lal laia awptu Bawrsap hmaa thubuai lut Document hmuh chhuahahte chuan Dokhama chu Chawngtlai lal a nih zia a tilang tel bawh. (Lal ropui Nikuala leh Chawngtlai. page-297. Nikuala hun hnuhnung by Lalfakzuala). Engpawhnise, Dokhama, Nikuala fapa hi Chawngtlaia a awm lai chuan Chawngtlai lal a ni a, Kelkanga awm lai chuan Kelkang lal a ni a, Artlanga a awmlaiin Artlang lal a ni a, Tualtea awm lai chuan Tualte lal a ni. Chawngtlaia Dokhama a awm lai reng pawha Tualte lal tih luih tlat hi hmanlai Mizo lalho tlang chan dan leh khaw kaina hmun hming phuah dan nen thil inmil lo lutuk a ni.

Kum 1911-ah Chawngtlai hmunah chuan Dokhama fapa Zahuata pawhin nupui a nei ta. Kum 1913-ah Dokhama chuan a fapa Zahuata chu in 30 neiin Bualfiangah a kaitir a, mahse, Sakei hrang avangin kum khat emaw lek chutah chuan an awm a, Kum 1913 vek hian Lal Dokhama chu Tualteah a pheih ve leh a. Lal Zahuata chu kum 1915 ah Keifangtlangah an kai leh a, Chawngtlai rama Biak In hmasa ber chu hetah hian an sa ta a ni. Helai thuah pawh hian Chawngtlai khua hi Lal Nikuala tupa Zahuata lal ve atang chauha lo piang anga sawina a awm bawh. Mahse Saphoin Mizoram an awp laia Nikuala chungchang report an pek pahnih chauh lo tarlang ila a chiang mai awm e, hetiangin –

1. *...and that the latter in their turn bought their guns from the Duhlien villages across the Tyo-Kairuma, Sailienpui, Lalbura(Chhim), Lalbura (Vonolel's son), Kaihranga,*

Dokuma (Chongtleng) and Nikwe (while at Chongtlai) - WCM Dundas. Assistant Superintendent, Lushai Hills 1899.

2. *I hear that South Kairuma, Lalbura, (two villages Kairanga, Dokuma, Nikweqwe (whilst at Chongklai)) were some of the Lushai villages chich sold to Whennohs. - Sakhiliang lal Manglon statement Asst. Superintendent, Tiddim in ni 17.4.1899-a a record.*

Heta Nikwe tih hi Nikuala tihna a ni a, Nikweqwe tih hi Nikuala khua tihna a ni. British empire aiawh sipai lalho khan kum 1900 hma lam khan 'Nikuala khua Chawngtlai' tiin an lo zia kalh tawh a ni. Heng atang chauh pawh hian Chawngtlai khua hi Lal Zahuata in dan kum 1913 atang chauha lang a nih loh zia a lantir chiang hle awm e. Helam hi chu kan sawi tum ber a nih loh avangin kan sawi tam tawh lo vang.

Zahuata chu Keifang atang chuan a pu Nikuala Lalna hmun Chawngtlaiah chuan kum 1918 German ral run lo haw kumah a kai leh a, hetah hian Tualte lama Dokhama pheih leh tur khua atangin tlem a zawngin an rawn fin baw a, in 67 an lo tling ve ta a ni. Hetah hian kum 6 zet an awm a, kum 1924-ah chuan Keifangtlangah baw Zahuata chu a pheih leh a (hemi kum hian ka pu Zadailova, Siamliana pa pawh a thi a, Keifangtlang thlanmualah hian phum a ni. *HC Hmaa*), tun thlengin a thlan pawh hmuh theihin a la awm. Keifangtlangah hian kum 1924- 1931 thleng an awm zui a, kum 1931 leh 1932 hian Zahuata chu Chawngtlai (Saizawl hmun tuna vengpui) ah a kai pheih leh ta a ni. Tichuan hemi kum atang hian khaw hmun sawna khaw thar kai tawh lovin Chawngtlai chu tun thlengin mei mit lovin a lo awm ta a. Saizawl hmun, Tuna Mual Veng kan tih thin atang hian veng hrang hrang lo piangin KEL Road-in (Khawzawl to East Lungdar Road) min paltlang hnuah pheih chuan kawngpui bawhin kan inzarpah ta a ni.

Chawngtlai Lal Nikuala phai ram lung ina tang chu tu khaw kha ngaihsak hlawh lovin a tang bo ta vang vang a, Tumah tih tak zeta a chanchin chhui reng an awm lo. Pakhat te mah an awm lo. Ngaihsak pawh a hlawh lem lo hle. Amaherawhchu, Mizo Historical Village Society, Chawngtlai hmalaknain Nikuala chanchin chu nasa taka chhui zui zel a ni a. Mizohoin kan lo la hriat loh a thih dan chu hmuhchhuah lo ni tain, khatih laia India ram khawpui bera tan in, Alipore Central Jail, Calcutta-ah September ni 3, 1894 khan a boral a ni. A thih lai hian Alipore jail-ah Mizo tang ve dang an awm tawh lo. Tichuan, a ram tan inhlan ralin a ruang leh silhfen te chu Zoramah a lo haw ta lo a ni.

Chawngtlai hmun hluiah hian Chawngtlai Presbyterian Kohhran chuan Chawngtlaia Kristianna lo din tanna hmun hriatreng nan lung a phun a. He hmuna ringtua lo inpe hmasate Synod Archive record copy ang deuh chiah tarlan a ni nghe nghe.

A AWMNA LAI : Chawngtlai khua hi Khawzawl District a awm a ni a, Distric Headquarters atanga chhim chhak lam km 10 chauha hla a ni. Longitude Degree 93.20 leh Latitude Degree 23.45 vela awm a ni. A ram hmarchhak lam deuhah Tropic of Cancer in a tan tlang. A ramri chu:- *Khawchhak lamah - Khawchhak Tuipui a awm a, Tuipui khua a awm. Khawthlang lamah - Phaisen lui a awm a, Phaisen lui atanga km 20 velah Khawhai leh Chalrang khua a awm. Chhim lamah - Khuailui a awm a, Khuailui atanga km 5 velah Khuailui tlang liamah Tualte khua a awm. Hmar lamah - Tuimuk lui a awm a, chu chu Lungtlanghing tlang bulthut a ni. Lungtlanghing tlangchhip lamah Ngaizawl leh Neihdawn khua a awm. Hmarthlang lamah-- Khawzawl a awm a, Champhai to Aizawl Road in a*

paltlang. Tin, Chawngtlai ram hi Khawchhak Tuipui ruam pheiah Champhai to Aizawl Road in a paltlang a, a khua hi Lungdar (E) Road leh Tualte Road in a paltlang bawk.

SIK LEH SA : Chawngtlai hi a boruak a vawt nuam hle a, tunhma pheih chuan thlasikah vur a tla thin. Tunah hian vur a tla ngai ta meuh lo a, Global Warming hian a tidanglam ve te pawh a ni ang e. A tlangpuiin a vawh lai berin 3°C vel a ni a, a lum lai berin 30°C vel a ni.

Mizo Historical Village Society : Chawngtlai khua chu kum 2014 February 21-ah Mizo Historical Village a puan a ni a; Mizo Historical Village a inpuanna chhante lo tarlang ila:-

- 1) Mizo Lal ropui, Zoram tuna a nihna anga awmtirtu, Lal Nikuala Lalna khua a nih vang.
- 2) Hmanlai Zofa thlangtlate hnuhma hmuh tur Lung milem, Lung rahbi etc a la awm nual vang.
- 3) Nikuala Sulhnu, Zoram chhan nana theihtawp a chhuahna hnuhma - Sahlam, Lal Nikuala in hmun, Sibih. Mithah kawn, Ral thah tlang, etc awmna a nih avangin.
- 4) Khaw malkhaia hmanlai thil (Historical site) awm tamna khua a nih vang.
- 5) Lal Nikuala Zahau leh a pasalthate hi tuna India leh Myanmar inrina (Mizoram leh Burma)lo awm theihna chhan an nih avanga chawimawia, tilartu a nih vang.
- 6) Zoram Khawvel hnam rohlu, Historical sites leh Monument te ngaihluah, vawnhim a, tuaithar nachang kan lo hriat zel nan. adt.

Kum 2013 October thlaah Mizo Historical Village Committee chu Organising Committee angin Chawngtlai Village Council remtihna thlapin din a ni a, Kum 2014-ah pawl angin a lo ding ta zel a. A hmingah Mizo Historical Village Chawngtlai tih a ni chho ta a, Hmalakna kawng hrang hrang a neih thin avangin thawh tur a lo tam telh telh a. Recognise/register loh NGO nih reng a rem thei reng bik lo va. Tichuan, Section 8 of the Mizoram Societies Registration Act. 2005 (Act No 13 Of 2005) hmangin Register a lo ni ta a. Ni 19.08. 2022-ah Registration Number MSR-1524 pek niin pawl hming atan Mizo Historical Village Society (MHVS) tih a lo ni ta a ni.

HMUNHMA HUMHALH LEH CHHINCHHIAH TLAK DEUHTE

Heng a hnuaia mite hi Mizo Historical Village Society chuan Mizoram leh Zofate tan a vawng himin a humhalh mek a. An chanchin a tawi thei angin tarlang ila :-

Nikuala Sahlam (1889-1892) : Hei hi Lal Nikualan amah rawn runtute, a pasalthaten an thah ral thah lu an khaina thingkung a ni. Hlai thing a ni a, a tar tawh hle. Zaihri thingin a bawm a, hei hian a la chhan hram hram niin a lang. He Sahlamah hian milu 19 chuang khai a lo ni tawh a ni.

Lalruanga-lung-kahkeh : Lungpui lian tak, a laia khi ruah a ni. Tunhma chuan a kahkehna (Thalmu?) a khi karah a inhnawh tut thin. Mizo dawithiam hmingthang Lalruanga kha Chawngtlai khuaah hian a lo kal ve tawh ngei a ni ang! A lung kah keh pawh a awm tlat.

Lungsen/Ai enna lung : He laia lo cheng hmasa ten kum tinin he lung sen leh sen loh atangin hian an thlawhmma hausak leh hausak loh (buh thar tam leh tam loh tur) dan tur an lo rin hriat thei thin a ni.

Lung milem : Nikuala hun hma daih atanga awm tawh Lungphun, milem inziak(Mizorama lut hmasate sulhnu ni a rin a ni) hi hmun li laiah a awm a, hmun khat chu tihchhiat a ni tawh. Vangchhia, Mualkawi, Khawhai, adt ah hetiang deuh lung hi hmuh tur a awm bawk.

Nikuala in hmun : Kum 1888-1889-a Chawngtlaia a rawn luh leh Pawih ral a do laia a awmna in hmun a ni. Tunah chuan Nikuala Lal mualzawl kha Playground atan laih zauh belh a ni tawh a. Chumi sir te maiah chuan he Nikuala In hmun hi a la awm.

Mizorama Lungphun sang ber : Feet 24 leh a chanve laia sang, Lung sakhat phun chawp ngatah chuan Mizoramah a aia sang hmuh tur awm lo. He Lung hi Chawngtlai Phaiveng Presbyterian Kohhranten Mizorama Chanchin tha kum za (100) tlin lawm nana an phun a ni a, kum 1994-a phun a ni a. Phaiveng Kohhran Biak In kawtah a awm.

Pawih thah kawn : Hei hi chuan ‘Mizoram Dil lian ber chu Rih Dil a ni a, Burma ramah a awm’ tih kha a ang deuh. Khawhai tlang Phul hmunah a awm a, Nikuala Pasaltha Chawngluta’n Dawn pasaltha Ralbilha a thahna hmun a ni a, Hemi tuma lo kalte hi Nikuala Pasaltha ten an lo that mang a ni.

Hranghleia thlan : Pasaltha Hmingthang, huaisen leh tuan rang, Nikuala awmna apianga awm ve zel thin a ni a, a chanchin hi lehkhabuah a hranin a awm bakah mi hrang hrangin an ziaak tawh a, sawi tam ngai loah dah phawt ang. Chawngtlai thlanmualah a awm.

Khawhlui thlanmual : Thingtlang khua Saphoin an thutchilh loh naa mumal taka Thlanmual awmna hmasa ber a ni a, Chawngtlai ram chhung Keifang hmuna awm a ni.

Khawpuitan : A hming tak chu Tantinchhingi Khawpuitan a ni. He tlang chanchin hi Lalhmachhuana Zofa chuan Mizoram tlang hmingthangte tih buah ngaihnawm takin a ziaak. Zahau Lal, Chawngtlai Lal, Nikuala khaw chuanna, leido a lak dawn leh a rammut dawn apianga a inthawina hmun, Lasite khawpuitan a ni. Hetah hian Tantinchhingi Puantahna te, Tante te leh Tantinchhingi puk te a awm. Chawngtlai khaw hmar lam tlang dunga awm a ni a, Champhai road chungah ralkhat atang pawhin a lang thei. Hmun thengthaw, boruak nuam em em mai niin he tlang atang hian Zoram hmun zau tak leh tlangsang ho engemaw zat a lang thei.

Mi thah kawn : Khawchhak Pawiten rawlrala Mizoram an beih hnahnun bera an mi thah hnahnung pahnih Kapvunga leh Hrangbawiha an thahna hmun a ni. Heng mi pahnih rawlrala thah an nih avang hian Nikuala pawn phuba lain Pawih ral engemaw zat a that ve leh niin sawi thin a ni. Chawngtlai leh Khawhai inkar kawng hlui hnuai, Phaisen feh kawnga awm a ni.

Liantlirthanga Hmun : Chawngtlaia Nikuala a thut laia a daideng atana a hman, Liantlirthanga awmna a ni a, Liantlirthanga hi Nikuala laichin hnai tak a ni. Bualpui Dil kamah awm.

Tuthanga thlan : Khawhlui Thlanmualah a awm a, Mi 10 that, Sal 6 nei, Pasaltha a ni.

Rokhawli thlan : Hmeichhe khuangchawi tawh thlan a ni a, hmuh theihin a la awm.

Hranglung : Pasaltha, sa leh rala mi huaisen leh kei ka ni inti ngam chinten an vanglai an hriat reng nana Lung an phun thin ani. Ziak leh chhiar thiam hma thil a ni a, engmah a in ziak ngai lo. Mi bik lungphun a ni. Hmanlai chuan thianga leh thianga lo a tam em em a - Sailo hnamin sa piangsual an ei thianga lo a, Lusei hnamin khiang thing leh fartuah thing hmanruaah an lain an hmang thianga lo. Khiang chu kuang urna a ni a, Fartuah chu mirawp lam dawna milem an tuk thinna a nih vang pawh a ni ang. Hranglung pawh hi Chawngthu hnam chauh an phun thin a, chu pawh leido nei khua lo chuan an phun meuh lo.

Tin, Hranglung hi anchhia nena phun thin a nih avangin miin an tichhe ngai lo; “He ka Hranglung hi mi a ni emaw, sa a ni emaw, a tichhetu chu ngal ngetin thi rawh se” tiin an phun thin. Hmanlai hunah pawh a tichhetu hian a tichhiat atanga reiloteah thihna sawi tur tingin tawh an lo awm ngei niin an sawi. Hranglung hi hmun hnihah hmuh a ni a, pakhat chu Keifang hmunah a ni a, pakhat chu Lalruanga lungkahkeh leh Chawngtlai Hmun (Khawhlui hmun) inkarah a awm.

Pakthanga tui & a thutna leh a khan : Pakthanga hi Nikuala Pasaltha a ni a, Chawngtlai Phaiveng atanga km 2 velah a hming chawi tui a awm a, chumi bulah chuan a sa channaa a thutna thin lungpui khua a la awm reng a, khan a nei bawh a, ral channa khan nge sa channa khan erawh hriat a ni tawh lo. Mangcheua Mual panna kawngin a paltlang.

Lal Lungdawn : He Lungdawn hi Lal Zahuata’n a pa Dokhama hriat reng nana kum 1929 September ni 26-a a dawn a ni a, lungphek hlai pathum hi a phun ding a, a chungah lung pheh a phah leh a, Feet 4 vela sang a ni. Hetih lai hian amah Lal Zahuata chu Keifanghmunah a la awm a, tuna Chawngtlai Mual veng hi Saizawl tih a ni a, heta kai pheh hi a tum avangin a kawtchhuahah lung a va dawn a ni. A bul lawkah hian Pastor Kaplunga damlai lung a awm bawh. Hetah hian Kelang Lal Liannawla lungdawn a awm bawh.

Vai riah hmun : Hei hi Lal Nikuala man tum Vailianin kum 1892-a an riah hmun a ni. He hmun hi Lal Nikuala Chawngtlaia a awm laia an man ngei a ni tih tichiangtu a ni.

Nikuala thuhrukna hmun : Lal Nikuala man an tum hmasak kum 1892 khan a upaten Vailian chuan Lal an huat zawngte chu Sipai tam tak hruaiin an man mai thin a ni tih hriain Lal Nikuala an lo thuhrukna hmun, tuna Phaiveng hnuai, Sakhi leilawn kawr dungah a awm. A bul lawkah Hranghleia pawh Nikuala veng pah turin an thukru bawh.

Chawngtlai hmun leh Manganga lung : Chawngtlai khua atanga hnai te, km 1 awm leka awm a ni a, helai hmunah hian Lal Nikuala fapa, Dokhama chu Tualte atangin a rawn kai a, a rawn kai hian in 177 a nei a, a fapa Zahuata chuan Kelang atanga an kai kual dan chu a Diary-ah heti hian a ziak.” *Tin, Bawrh sap-in tlang a sem a, ka pa tan Tualte Artlang Chawngtlai a ruatsak a, Kelang a chuan kei pawh ka lo piang ve ta a, Artlang kan kai a, in 60 lai kan ni a, chuta tangin Tualteah kan kai leh a, 160 lai kan lo tling ta. Tin, chuta tangin Chawngtlai kan kai leh a, in 177 lai kan lo tling ta a ni. Chumi khua atang chuan ka pain in 30 in min kai hran tir ta a ni.*” (Zahuata Diary pheh 5 na).

He hmun hi Chawngtlai khuaa ringtu hmasa ber berte Baptisma channa hmun a ni a, Baptisma chang hmasa ber pawh helai hmunah hian Pastor Vanchhunga’n a Baptis a ni. Chawngtlai hmuna an awm lai hian Lal Dokhama chuan Thirdeng Manganga (‘Mang’ tih hi thluk tur) a nei a, Khaw thar kaia insawn reng an ni a, a ninawm deuh pawh a niang.

Helai hmunah hian kum sarih lai an awm ta a. Thirdeng pa in nuam a ti hle a ni an ti. In pawh 300 lai an tling leh tawh a, Lung a phun ta a, A lungphunah chuan tlanglam hla in:

*Thang leh thar tawnah ka hril zel dawn,
Deng hmingliana rolung chul lo tur*

a ti hial a ni. He lungphun hi tunah pawh a la awm reng a, Helaia an awm lai hian an lo thahnem leh ta a, an tawng pawh a lo chapo leh tan tawh a, 'Khuavel Chelh loh Chawngtlai khua' an lo inti leh ngam ngat ta a ni. An hlaah pawh- "*Khuavel Chelh loh Chawngtlai tlang hmingthang kan lenna*" tiin Puma zaiin an chawi thin. He laia Thirdeng pa Lungphun hi Chawngtlai khaw lungphuna hawrawp inziak hmasa ber a ni. Engtik hun laiin emaw a lung hi a lo tlu bung a, mahse, a kehchhe lo hlauh. Helaia an awm laia Chawngtlai tana thil chhinchhiah thenkhat chu:-

- 1) Kum 1911 September ni 11-ah Kohhran a ding.
- 2) Helaia awm lai hian Phaisen Leilet siam tan a ni.
- 3) Chawngtlai ram chhunga Lungphuna hawrawp chuang hmasa ber awmna a ni.
- 4) Chawngtlai lal, Zahuata indan tanna (kum 1913) a ni.
- 5) Mizorama Kristian thlan lung la ding mek hlui ber la awmna.
- 6) Chawngtlaia Pathian thuawih/ringtu Baptisma channa hmasa ber a ni.

Mangcheua Mual : Mangcheua hi Nikuala pasaltha a ni a, Nikuala'n Chawngtlai khaw hnuaiah daido atan a dah a, chulai hmun chu Mangcheua Mual tih a la ni ta reng a ni.

Hranghleia Tawlhlopuan leh Feikibar : He puan hlu tak hi Lal Nikuala leh a nupui Lalngurvungin an pasaltha thih ngam lu pua hmelma bei ngam tute hnena an hlan thin a ni. Pu Hranghleia fanu Pi Hmingliani'n a pa hnen atanga a rochun tun thlengin hmuh theihin a lo la kawl tha a, He Tawlhlopuan hming pawh hi Lal Nikuala atanga lo chhuak a ni nghe nghe. Hranghleia hman thin Feikibar pawh kawl that a la ni. Tawlhlopuan/Puanrin pawh a fanuin a kawl tha reng thin a, a thih hmain Pu C Laltlangmawia a hlan chhawng ta a ni.

Sakhi leilawn : Kawra khuarelin leilawn a lo dawh sa hi hmun hrang hrangah hmuh tur a awm. History kaihhnawih a ni lem lo na a, a lo awm tan dan tur ngaihtuahin thil hmuh manhla tak a ni ve hrim hrim. Chawngtlai ram chhungah hian heng hi pathum lai a awm.

Lungding : Hmanlai chuan kan pipute hian thingbul danglam deuh leh lungpui maksak leh pangngai lo khawpa lian hian huai neiin an ngai thin a, chu huai chu tihlung nih loh an hlau thin. Mangcheua Mual ral lawkah hian Lungpui lian tak teh kualin feet 72 a lian a awm a, a san lam pawh feet 72 zet a ni. He Lungpui hi hmanlai chuan an be thina sawi a ni.

Pi Thangvungi thlan : Khawhar hla tha tak phuahtu Pi Thangvungi thlan hi Chawngtlai khaw thlanmual hluiah a awm a. A hla phuah zinga larte chu, 'A chatuan roluah tumin' tih leh 'Chhandamtu'n hmun a siam zo ta' tih hla a ni.

Lal Nikuala hriatrengna Lungphun : Hei hi Lal lungdawh bulah a awm a, lungphun san zawng hi lei atanga feet 32 zet a ni. Kum 2023 khan lungphun hi hawn a ni.

Biaklawma Lung : Tv Biaklawma hi mi danglam tak a ni a, kum 22 mi chauh ni a thi ta kha a dam laiin 'Val upa' nihna pek a ni. Mizorama Naulawm/Nauhual lo chhuahna bul a ni a, Chawngtlaia Boy Scout dintu a ni.

Pipu Chhuahtlang : Hei hi kum 2023 a din tan a ni a, chhunzawm zel tura ruahman a ni. Lung 11 phun tawh a ni a, A khaikhawmtu lung 1, Pasaltha lung 5 leh Lal 5 an chanchin tawi ziaka tarlan a ni. Mizo Lal leh Pasaltha ram leh hnam tana thawk tha leh thawhhlawkte lung leh Chawngtlai mi bikte lungphun belh zel tum a ni. Tin, Mizo freedom fighter ho hming tarlana he hmunah hian anmahni hriatrengna siam belh zel tum a ni.

Ral thah tlang : Hei hi Chawngtlai khaw lu, Pu Mawia uikham chungah a awm a. Kum 1891 November thlaah helai tlangah hian Tiau rala an leido khua Dawn khaw lal fapa hovin Chawngtlai an rawn run a. Nikuala ten kulh tanchhanin an lo bei let a, he tlangah hian Dawn lal fapa chu pasaltha Hranghleian a kaphlum ta a ni.

TLAWMNGAI PAWL LEH ASSOCIATION HRANG HRANG

Young Mizo Association (YMA) : Chawngtlai khuaah hian YMA hi kum 1945-ah a ding a, a din hun lai hi hian Young Lushai Association tih a la ni. Tin, Central YMA thuchhuak ni lem lo, Chawngtlai leh a khaw thenawm vela lar tak pakhat chu Mizo Children Association (MCA) a ni. He pawl hi kum 1964-ah din a ni a, Hall te pawh MCA hian a nei hman. An hnathawh a hluin a tangkai em em. Kum 1977 khan MCA chu tihtawp a lo ni leh ta a ni. Chawngtlai Branch YMA a lo din atanga a vawikhatna atan, a din atanga kum 38-naah Chawngtlai Branch YMA chuan Chawngtlai khuaa Tlangval tlawmngai ber thlanna hmasa ber a buatsaih a, a buaipututen in tina lutin tlawmngai an tih ber an zawt a, an ziaak zel a, chuta tlawmngai bera thlan chu Tv. Vaichhawna a ni a, kum 2024 hian min la dampui a ni. Tin, Chawngtlai Branch YMA hian kum 1983-ah Office a sa tan a, tunah chuan hmuh theihin a lo ding ta, kum 1989 February 17-ah Library a ding a, kartin Thawhtanni, Nilaini leh Inrinni zingah hawn a ni thin a, tunah hian Nilaini leh Inrinni zingah hawn a ni a, tunah chuan Concrete Building-in sak a ni a, lehkhabu pawh 5000 chuang zet a nei tawh. Kum 2012 atangin Chawngtlai Branch YMA atangin Phaiveng Branch YMA a indang.

Mizo Hmeichhe Insuihkhawm Pawl (MHIP) : MHIP hi a din tirh chuan Mahila Samiti tih a ni a, kum 1974 vela din a ni. Tunah chuan MHIP tih a lo ni ta a ni.

Mizoram Upa Pawl :- He pawl pawh hi a din tirh chuan Zoram Upa Pawl (ZUP) tih a ni a, kum 1975-ah din a ni. Tunah chuan MUP tia hriat a lo ni ta.

Mizo Historical Village Society : Hei hi a tirah chuan Organising Committee ang chauh (2013) a din a ni a, Chawngtlaian Mizo Historical Village kan inpuan dawna din a ni. Hun a lo kal zel a, Committee-a din a lo tul tak avangin kum 2014-ah Mizo Historical Village Chawngtlai tiin din a ni a. Tunah chuan Mizo Historical Village Society tih a lo ni ta a ni.

Heng bakah Association hrang hrang, a hunlai milin a ding thin a, thingtlang khua ngang a nih avangin pawl nghet tak tak dang din hleih theih a ni lo. Pawl lo ding tawh leh ding mek zinga langsar zual deuh deuh te chu –

- 1) **Boy Scout** :- Hei hi kum 1938 hma lam velah lo dingin kum 1947 velah a tawp ta a ni.
- 2) **Games and Sport Association** : Hei hi kum 1973 velah a ding tan a, thingtlang lo neihna hmunah chuan chak taka hma lak theih a ni lo nain thalaiten an tuipui hle. Tun thlengin a la ding chho ve zel.

- 3) **Mizo Zirlai Pawl (MZP)** : He pawl hi kum 2003-ah din a ni a, Sub-Headquarters hming pu a din a ni.
- 4) **All Mizoram Farmers' Association (AMFU)** : Hei hi kum 1978 vel khan a ding tawh a. Lo nei mite tan theihtawpin an thawk thin.
- 5) **Sawhthing Chingtu Association** : Sawhthing hi hun rei tak chin a lo ni ve ta a. Sawhthing chingtute an lo pung zel a, he Association pawh hi a tangkai tulh tulh mai.
- 6) **Chawngtlai Educational Employees Association(CEEA)** : (CEEA) hi kum 1980 khan a ding tawh a. Tunhma chuan CTA (Chawngtlai Teacher Association) tih a ni thin.
- 7) **Chawngtlai Boxing Association** : Kum 2009 velah a ding a, President hmasa ber chu Pu Tlangthanmawia a ni a, An din atanga reiloteah Boxing-a District Champion leh Mizoram LPS Profight champion kan nei nghal.
- 8) **Chawngtlai Welfare Committee (CWC)** : Hei hi kum 2000 June ni 24-ah din a ni a, he Welfare-ah hian a rei emaw rei lo emaw Chawngtlaia hun rei tak atanga lo awm tawh hrim hrim, a duh apiang a huap a, khawi khuaa awm pawh a huap vek a ni. Aizawl hi Headquarters-ah hmangin Chawngtlai khua nen thlunzawm vek a ni.
- 9) **Consumer Union** : Hei hi kum 2012 vel khan a ding zawk a, a tawp lailawk leh a, kum 2022 khan din thar a lo ni leh ta a ni.
- 10) **Wolf Cup** : Hei hi kum 1939 a din a ni a, Cup Master chu Tv. Biaklawma a ni. He Pawl hian thutiam an nei a, chu chu - *'Chinghne no chuan a pui thu a zawm thin, Chinghne no chuan ama thu a zawm mai lo'*. tih leh *'Pathian leh Lalber leh kan ram tana ka tih tur pual ti turin, Wolf Cup Pact dan zawm turin leh nitina tu emaw tal tana thiltha ti turin, dan zawm turin leh nitina tu emaw tal tanpui turin theihtawp chhuah ka tiam tlat e'* tih a ni.

Chawngtlaiah hian Association hrang hrang PRISM, Grape, Sapthei, Tomato, Phai leilet nei Huan neite pawhin Association a remchan dan angin an din thin a, a then chu hunin a hril a, pawimawhna tam tak a awm tak lem loh avanga tawp tate a awm bawk. Chutih rualin mihring indaih loh avang te, thawktute tui tlan lohna avang tea tawp ta an awm nual bawk.

SAWRKAR LEH A KUT THLAKNATE

Chawngtlai sorkar Department Office lo awm tawhte leh awm mekte lo tarlang ila:-

1. **Education Department.** Hei hi Sorkar hnathawk kan neih tamna ber a ni a, kum 2024 hian High School- 1, Middle School- 1, Primary School- 3 a awm a, private school Presbyterian English School (Kg 1-Class VIII) pakhat a awm bawk. Sorkar School khaikhawmtu hi SDEO Khawzawl a ni. Tin, heng school bakah hian Anganwadi Centre hmun 4-ah a awm bawk.
2. **Post Office.** Hei hi pakhat a awm a, kum 1959 atangin hawn a ni a, Branch-a ding a ni a, thawktu 2 an awm. Post Master hmasa ber leh tang rei ber chu Pu R. Vanhnuaithanga a ni.
3. **Health Sub-Centre** : Hei hi kum 1970 atangin Dispensary a din niin Nurse 1 dah a ni a, Nurse hmasa ber chu Lalbiaktluangi a ni a, Compounder hmasa ber chu Lalvela a ni. Kum 1979 velah Health Sub-Centre tia thlak a ni.
4. **Agriculture Department** : Kum 1972-ah Agriculture Department in Quarters an sa a, thawktu (Staff) mi 3 vel an dah a, hei hi Chawngtlai ram Bualpuia Alu an chin vang a ni ber. Kum 2002-ah Rest House an sa leh a, IV Grade pakhatin a enkawl a, tun dinhmunah erawh heng hi engmah a awm tawh lo.

5. **Administrative Officer (AO)** : Hei hi kum 1969 atangin a awm a, Quarters fel tak a nei a, kum 1969-ah Godown pawh sak tan a ni. AO tihtawp a nih khan LDC-in a hna hi engemaw chen a kut ken a, tunah erawh a awm tawh hlawm lo. Buhfai kudam pawh a awm tawh lo. Kum 1981 leh 1982 kum bawr hi Mizoram chu President Rule a a awm avangin V.C awm lovin AO hian a kawp nghe nghe a ni.
6. **Public Work Department** : Khawzawl to East Lungdar Road (KEL Road) siam a nih lai kum 1973 khan SA Quarters sak a ni a, tunah erawh Quarters hi a awm tawh lo.
7. **Electric Department** : Power supply Khawzawl atanga pek a ni thin a, Chawngtlai khaw mi thawktu 2 tunah (2024) an awm a, chu chuan min thutchilh thin. Tunah chuan tualchhungah thawktu 2 kan nei. Electric hi kum 1987 atangin Chawngtlaiah a eng tan a. Tunah hian Khawhai atangin power supply hi pawh a ni.
8. **Public Health Engineering (PHE)** : Khawzawl Division-in min awp a, tunah hian thawktu pakhat tualchhung mi a awm. PHE Department lam hian tui enkawl hna hi tualchhung kutah a dah a, chu pawh chu tidanglam hretin WATSAN Committee din a ni a, chu chuan a enkawl zui ta zel a ni.

ZIRNA IN : Tunhma atangin Chawngtlai hi khaw hlun pawl leh thingtlang khuaah chuan lian pawl tak ni ve mah se, zirna lamah mi lar leh mi hmingthang a chherchhuak lo hle a. Primary School pawh a ding hma viau a; mahse, hei hian rahchhuah a nei nep viau niin a lang. Primary School a din atanga kum 75 inkar (1925-2000) hmasawwna aiin tunhnai kum 20 (2000-2020) chhunga hmsawwna hi a nasa fe zawk a tih theih awm e. A hnuaia tarlan hi School hrang hrang neih tawh leh tuna neih dan a ni:-

School Hming	Din kum
Primary School I	1925
Middle School	1963
Primary School II	1977
Primary School III	1979
High School (a hmasa)	1978
(a hnukung)	1985
Emmanuel English Medium	2013 (ding tawh lo)
Presbyterian English School	2015

KOHRAN LAM: Tuna (2024) Chawngtlai khuaa Kohhran awm mekte :-

Kohhran hming	Din hun
Presbyterian Kohhran	11 th September, 1911
United Pentecostal Church	1951
Roman Catholic	20 th June, 1960
Isua Kohhran (a hma chuan IKK)	6 th May, 1972
Salvation Army	1994


Presbyterian Kohhran Biak in hi pahnih a awm a. United Pentecostal Church-ah hian engemaw hun lai khan North East lam an awm ve a, Biak in pawh an nei hrang hman a, tunah erawh an awm tawh lo a ni.

VILLAGE COUNCIL : Village Council hi kum 1954 atanga neih tan a ni a, hemi tum hian kum 1954-1957 VC term chelhtu turte thlan nghal an ni. Zoram buai lai, kum 1966 hian

Village Council hi thlan an ni lo va, a ruata ruat an ni. Tin, kum 1980-1982 hi Mizoram President rule-a dah a nih avangin Village Council an awm lo va. Administrative Officer Pu Rohmingthanga leh Pu K Sanghnuna ten an awp. Kum 1982-ah VC thlan a ni leh a, kum 1982-1983 chung an VC a. Hemi dawl kum 1984 a VC thlante chu dissolve an ni a, Hei hi Administration lama buai a awm vang a ni awm e. Tichuan, kum 1984-ah VC a awm lo a, Pu Lalhranga CA in a awp a ni. Chawngtlai Village Council President ni rei ber chu Pu Saihranga a ni a, kum 1958 atanga 1966 thlang VCP hna a chelh. Tin, Secretary ni rei ber chu Pu PC Rozika a ni a, kum 1972 atanga 1999 thlang Secretary hna hi a chelh a ni.

Village Council hi Chawngtlai khuaah term 21 neih a ni tawh a. Kum thum term zel a ni thin. Kum 2015 atang chuan an term chung tihdanglam a nih bakah hmeichhe dinhmun chawikanna ni bawkin VC member-ah hmeichhia telhna tur dan a lo chhuak a, kum 2015 atangin hmeichhia thlan tel a lo ni ta a. Hmeichhe VC hmasa ber chu Pi Kaptluangi a ni. Tichuan, kum 2015 a VC-te chu kum 2020 thlang VC an ni ta a. Kum 2020 kum tawp lamah VC term 21-na chu thlan a lo ni leh a. Amaherawhchu, an term an hman zawh hmain suspend a ni a, hei hi financial management-ah buai a awm vang a ni. VC aiah Advisory Board dahin, member 5 an awm a, Chairman-ah Champhai LAD atangin Field Inspector Lalchhuanliana dah a ni. Advisory Board pawh chu Mizoram MLA inthlan 2023 in a nang a. Sorkarna a inthlak avangin tum 2 board hi a ding hman bawh a ni.

TLANGKAWMNA : History hi thil kal tawh pawh ni se hriat sual palh leh tih dik loh tam tak awm thei a ni a. Hriat belh leh hmuhchhuah thar awm reng a nih bawh avangin a famkim mawh hle. Mizo hnam hi thiamna lamah a naupan avangin ziaik leh chhiar lamah kan hnufual hle a, kan chanchin pawh ziaika dah that tak loh a tam hle. Pa thil chhinchhiah thei deuh leh upate thu lak a tam em em thin. Research base leh document base loh a ziaik a tam a, hnamdang ten an chanchin an ziahna a lo lang hlek pawh kan tan chuan a pawimawhin document tha tak a tling thin. British ten min awp dawn leh min awp fel hnua an thu ziaik hrang hrang hmuhchhuahte hi Nikuala chanchinah pawh behchhan tlak ber berte a ni awm e. Ziaik leh chhiar thiam kan lo awm china kan thu ziaik leh chhinchhiahte hi Chawngtlai khaw chanchina kan inngahna a ni. Mizo ten kan history kan ziaik theuh theuh pawh a inan loh hlawm avangin a then ring a, a then hnawh leh si hian thudik a hai lantir lo fo mai. Ziaik hrang hrang lakhawma thil ni thei lo paih a, thil ni thei chuktuah rem kan thiam loh chuan history inang lo kan chhepkhawm teuh mai dawn a lo ni. Chuvangin, thil nihna tak chik a, fel taka chhinchhiah kan uar deuh deuh zel a ngai a ni.



CHHAWRTUI CHANCHIN

Chhawrtui khaw chanchin hi tunhma pawhin sawi ho leh ziah a lo ni tawh thin a, hriat dan leh rin dan inang lo tak takte pawh awm thei a ni. Hun rei tak, tuan leh mang thil a nih avangin a dik tak hriat theih a ni lo va, thil awm dan chhui a, a nih theih dan ngun taka chhut pawh a ngai a ni. Hun a lo kal zel a, hriat dan dang dang a piang a, lehkhabyte dap zau zel a nih hian kan thil hriat dante pawh a lo danglam chho zel thin a ni.

A AWMNA HMUN: Chhawrtui khua hi Mizoram hmar chan khaw chhak lam, Aizawl – Champhai kawng, Kawlkulh atanga chhim lam km 17-ah a awm a, 23.5° Longitude leh 93.13° E Latitude ah awmin, Tropic of Cancer in a tan tlang. A khaw hmun san zawng (altitude) hi 1175 m (3850 ft) vel a ni. A chhehvelah khua 6 a awm a, khawchhak lamah Arro, chhim chhakah Hmuncheng, chhim lamah Vanchengpui, chhim thlangah Rullam, khawthlang lamah Maite leh hmar lamah Puilo khua te an ni a. A khua hi Kawlkulh – Lungpho kawng, PMGSY/ metal road in a paltlang a, Aizawl atangin km 137 a hla a ni.

A HMING LO CHHUAH DAN: Chhawrtui khua hi rin thu leh upa titi atang lo chuan a hming lo chhuah dan chhui a harsa tawh hle a, heng hi sawi dan hrang hrang a ni hlawm.

1. A LUI KAWR BEHCHHAN PHUAH (Source – Upa C. Thuamluaia): Hei hi hmar hnam ho thawnthu atanga hriat a ni a. Hetiang hian an sawi ; Hmanlaiin helai hmunah hian khua a lo ding tawh a. Chu khaw dintute chuan an tuikhur lui chu a chhengchhiat em avangin ‘Sawrtui’ an ti a. Chu chu ‘Lui chhengchhia, Lung chhawrdawh tui’ tihna a ni a. Chu lui kawr hming chawi chuan ‘Sawra tui’ an ti a. Khaw hmingah a pu hlen ta a, hun kal zelah Sawra tui tih chu ‘Sawrtui’ an ti a. Chuta tang chuan Chhawrtui tih hming hi a lo chhuak ta a ni.
2. NEIHLALA TUI CHHUNCHHUAH ATANGIN (Source – HB Hbranchhuan MA, B.ed & L Khuma Varte, MA, M.Phil): Hemi chawia Chhawrtui hming hi lo pu ta niin sawi a ni baw. Neihlala hian a nupui Tuanpuui chawi atan lungkarah tui a chhun chhuak a, chu chu khawtlangin an ring ta a. An chhawr tak em avang chuan ‘Chhawrtui’ tih a ni ta a. Chu chu a khua in hming atan a pu ta niin an sawi.

MI CHENG HMASATE: A mi cheng hmasate han tih hian Chiang taka hriat theih tawh loh leh eng hun laia cheng nge an nih hriat chian theih si loh, an cheng ngei a ni ang tih hriat theih lawi site kan sawi dawn a ni.

1. CHHAWRTUI (SAWRA TUI) VUAH TUTE: A hma a kan sawi tawh ang khan Neihlalte Chhawrtuia an chen hma hian mi cheng an lo awm tawh a, Neihlalte an awm hian ‘Thiek ho hruaiin Neihlala chu Chhawrtuia a awm tih HB Hbranchhuan lehkhabu Hmar chanchinah leh L Khuma Varte lehkhabuah ziakin kan hmu a. Heng ho hi Chhawrtui kan tih tak hming ‘Sawra tui’ tih phuahtute chu ni turah ngai ila.
2. NEIHLALA LEH THIEKHO: Anni ho hi ziaka kan hmuh theih hmasa berte chu an ni. A hmaa kan sawi tawh angin anni ho hi Rengpui Chawnhmanga hun lai a awm ni awmin kan hmu a, a hun lai tak erawh chu a ziatktute hian rinthu bakin an sawi thei lo a, an rindan chuan AD 150 vel niin an sawi a, Hetih hunlai hian he khaw hmunah ngei hian

an lo awm tawh a. Tuna Chhawrtui tuikhur pawh hi tuikhur atan an lo hmang tawh niin a lang. Hei hi tak tak a nih chuan Mizorama tuikhur upa ber a ni hial awm e.

3. TUAWNGA: Tuawnga hi a hming pum chu Raltuawnga niin an sawi. A thlahtute chiang taka chhui theih ni mah se eng hunlai chiah khan nge Chhawrtuihian a awm hriat a ni lo a, Lalfate in dan dan chhui erawh chuan kum 1870-1873 vel niin a lang.
4. KAIHRANGA: Kaihranga hi Vanhnuailiana tupa, Vanhnuailiana fapa upa ber, Dothiauva fapa a ni a, Vanhnuailiana Lungdupa (Kelkang ram) a awm laiin a fapa Dothiaua hi Baktawngah a in dang a, Dothiaua thih hnu hian a fapa Kaihrangan a pa aiawhin lal a lo ni a, Baktawng atang chuan Khawhrenchang (Hmuntha ram) kalin Khawbelah a kai leh a. Khawbel atang hian Chhawrtui ram, Sairuhkawn tlangah a awm leh ta a ni.
5. RANGTEHO: Rangte ho hi engtia Chhawrtui ramah hian lo awm ve tlat nge an nih tih hi sawi a harsa khawp mai. Anni hi in tlem tein tuna Chhawrtui khua atanga chhim lam km 4 vela hla, Uilungzo tlang hmawr hmar lam pangah hian an awm a, an awm lai hun hi Kaihranga Chhawrtuia a awm lai vel bawh kha niin a lang. An awmna lai hmun hi tun thlengin 'Rangte hmun' tih a la ni a, an awmna bul lui hi chu 'Rangte lui' tih la niin an awmna tlang tlak lam pangah tui awm chu 'Rangte tuikhur' tih a la ni reng a ni.

Kum 1966 a Mizoram a lo buai khan Chhawrtui ram, Lunglei ramah Volunteer ho chuan Camp lian tak an nei a, Chhiarpui ramah camp lian tak an nei bawh a. Heng Camp atang hian hmun hrang hrangah chet an la thin a ni. Rambuai kum 1966-67 chhung hian ram buai avang hian Chhawrtui khua leh ram chhungah Sipai kut tuarin mi pali an thi hman a ni.

Kum 1967 March 13 chuan MNA ten Ruallung Sipaiho Maite kal an lambun a. He an lambunnaah hian Sipai Major Pradhan Singh an kaphlum tel a. Chutia India sipai an thih teuh avang chuan Sipaiho thin a rim em em a, heta sipai lambun tute hi Chhawrtui rama awm ni awma sawi an hria a, Chhawrtuihian chuan hmun hrang hrang atangin Sipai an rawn kalkhawm ta a, Heta vai Sipai rawn kalkhawmte hi khaw mipui zat zet niin an sawi. (He mi tuma sipaiho lambuntute hi Ch Battalion ho an ni a, vai sipaiho hi 6th Marathi Regiment an ni thung. Sipaiho thinrim chuan khuaa mipuite chu khawmin mutbu leh bungbel, thawmhaw inthlakna pawh ken phal loin Khawhai lamah an hruai pheih a, Chhawrtui khua chu an hal darh ta vek a ni.

Chhawrtui hruai khawm ni hi ni 21.3.1968 niin, hemi ni atang hian Chhawrtui chu khaw ram a lo ni ta a, kum 1973 kumtirah luah leh a ni ta chauh a ni. Khua luah leh a nih hma, kum 1972 kumah Khawhai atangin Chhiarpui ram, Tuichang kam, Tiauzau ram chu lo atan neiin kum 1972 Krismas leh 1973 kumthar lawmna hun pawh thlawhlaiah hmangin kum 1973 kumtir teh khaw hmun chu an luah leh a. Tun thleng hian mei mit loin a awm ta a, kum 2023 chu a kum 50-na a lo ni ta hial a. Golden Jubilee hi khawchhuakte leh khaw chhung mipuiten ruai nen ropui taka lawm a ni.

CHHAWRTUIA CHENG TAWH MI HMINGTHANGTE

Sawi tawh angina hmakhawsang atangin Chhawrtui khua hi luahtu an lo awm tawh a. Chung zinga Zoram dengchhuak mi hmingthang deuhthe chu;

NEIHLALA LEH TUANPUUI: Neihlala hi sawi dan pakhtah chuan Chhawrtui khaw sat chhuaktu hmasa ber leh a khaw hming put chhan nia sawi ani a. A hming hi Hmar hnam in an lehkhahu a an ziah hian ‘Neihlal hai’ tih hi an ziah dan niin, keini Duhlian tawnga ziaktute erawh chuan ‘Chhawrtui Neihlala’ tiin kan ziah ber thin. Neihlala awm lai hian Khawkhum lam atanga raltlan Tuanpuui rawn awm vein Tuanpuui nen hian an innei a, engemaw rokhawlhna avangin an inthen leh nia sawi a ni. An ni pahnih sulhnu nia sawi thil tamtak a awm a. Chungte chu Chhawrtui rama thil hlui hmingthang kan neih engemaw zat zinga mi hi a ni.

LALBURHA: Sailo lal ropui zingah Lalburha hi chhiar hmaih phal rual a ni lo. British sorkar lo lian meuh pawhin an tukdawl theih loh khawpa lal ropui a ni a, inremna an siampui khawp leh a lalna tlang tur pawh duhthlang thei ngat a ni.

THANGVUKA: Pasalthate chanchin an sawi a an sawi hmaih theih hauh loh chu Thangvuka hi a ni. Amah hi pasaltha Chawngduma Tlau fapa a ni a, A hunlai hi pasalthate hun hnuhnung lam a ni a. Chhak leh thlang indo kum 1887 vel kha a tlangval lai niin a lang. Inrun chin lai hun a inrunnaa a tel hmasak ber tum hian sal sawm lai man thei khawpa huaisen a ni. Kum 1856 vela piang niin a lang. Thangvuka hi a tirah chuan Kaihranga pasaltha a ni a, Lalburha’n ralmuanga khua a din hian Kaihranga khua atangin Lalburha hnenah a awm a, ni 25.2.1931-ah kum 76 mi niin Chhawrtui a boral ta a ni.

CHHAWRTUI RAM/KHAW CHHUNG THIL HMINGTHANGTE

Chhawrtui khua leh ram chhungah hian thil hmingthang deuh deuh a awm a. Chung zinga thenkhat i han tarlang teh ang.

CHHAWRTUI TUIKHUR: Chhawrtui tih a khaw hming a nih rualin a tuikhur hming pawh a ni nghal baw a. He tuikhur hi Chhawrtui khaw luahtu Neihlala’n a nupui Tuanpuui chawi atan a chhun chhuah nia sawi a ni. Tuikhur thuk tak a ni a. Hei aia tuikhur upa hi sawi tur a awmin a lang lo. Tunah chuan a tuikhur hi chawlhbuk sak hnanin khawthlirna hmun nuam tak a ni. A tuikhur hian en a hlawhin thlalak puitu pawh a ngah hle a. Chhawrtui khua tlawhtute en leh thla lakpui ziah a ni ti ila kan sawi sual tam awm lo e.

TUANI LUNG: Tuani lung hi Chhawrtui khua atanga khawchhak lam km 1 pawh tling lo, Tuichang kawnga awm a ni a. Neihlala leh Tuanpuui te inlawm laia an phun ni a sawi a ni. A hmunhma hi enkawl niin hung vek a ni a, a bulah chawlhbuk nuam tak sak a ni baw. A lungphun hi tih danglam loh niin ram palailengah lungphek phun a ni a. A tira an phun ang angin a la ding.

TUANI LIM TUANI BUNG: Tuani lim awmna hmun hi khua atanga hnaite, Tuichang kawng bul lawka awm a ni a. Tuani lim hi lungpher awih pangah mihring lem lian taka ziah a awm a, a bulah hian thil lem chi dang, chem leh fei lem niawm takte a awm baw. He milem hi ‘Tuani lim’ an tih chu a ni. Tin, Tuani Bung hi Tuani lim sir chiaha awm a ni a, Bung zungte hian Tuani lim hi a lo khuh nual tawh a ni. Tuani Bung hi Bung lian tak a ni a, khaw chhung atang pawhin a lang thei a, he Bung hi engtik atanga lo awm tawh nge tih hriat a ni lo.

FANGFAR: Fangfar hi thil vang tak a ni a. A awmna hmun hi hmun kumkar leh ngaw kar a nih thin avangin hmuh mai harsa tak a ni. A awm duhna lai hi kawr dung lengkir hnuai, tuiin a luan pawh chiaha si loh, puk hultha tak si-ah a ni thin. Hmun hnawng, hul baw si hi a awm duhna thin a ni. Vanneihthlak takin Fangfar hi Chhawrtui ram chhungah hmun hniah a awm a, Chhiarpui ram Mausem luiah leh Mindawl luiah te hmuh theihin a awm.

KHAWTLANG INAWPNA: Kum 1954 a lo nih chuan Mizorama pumah boruak a inher danglam ta hle a, August thlaah Village Council Member thlan an ni. Kum 1973 a khaw bu luah a nih leh hian khawtlang inawpna mumal zawka kalpui duhna lo awmin Village Committee din a ni a, Kum 1983 ah Village Council/Court neih tan a ni.

YOUNG MIZO ASSOCIATION (YMA): YMA hi chatlak awm miah loin kalpui zel a ni a. Hruaitu hmasate lo kalpui dan kalphung tha te chhawm nung zelin mumal taka kalpui a ni a, mi harsa te, tanpui ngai te leh chhawmdawl ngai te thlahthlam loin tanpui leh chhawmdawl an ngaihna zawnah theihtawp chhuahin hma a la thin a. Khawtlang faina leh thianghlimna kawngah thahnemngai takin hna a thawk thin. Kum 2023 khan YMA member 526 awmin, mipa – 329 leh hmeichhia – 197 an awm a. Life member 9 an awm a, hruaitu hlun chawimawina dawng tawh mi 4 an awm baw. Tin, kum 1990 atangin YMA Library neih a ni. Library building neiin tunah hian mimal leh Raja Ram Mohan Roy Library Foundation (RRRLF) Kolkata atanga lehkhabu dawn atangin lehkhabu 3800 chuang a awm a. Heng lehkhabu hi zirlai te leh khaw chhung miten kan tangkai pui hle a ni.

CHHAWRTUI BRANCH MHIP: Ni 23.5.1978 zanah Mizo Hmeichhe Insuihkhawm Pawl Chhawrtui Branch din a ni a. Kum 1983 ah Balwadi din a ni. Chu chu ni 20.12.2003-ah Creche Centre ti a thlak a ni. Ni 7.1.2004-ah Creche Centre hi hawn a ni a, IWMP scheme atangin a building sak that a ni baw. Kum 2015 April thla atangin Creche Centre hi withdraw/ surrender leh a ni. Kum 1986-ah ICDS hmalakna atangin Anganwadi Centre din a ni a, tunah hian Anganwadi centre pathum a awm mek.

MIZORAM UP A PAWL (MUP): Mizoram Upa Pawl hi ni 14.1.1993 zanah paho kalkhawmin an din a. Tunah hian MUP Chhawrtui Unit hnuaiah member 131 awmin, mipa-65 leh hmeichhia – 66 an awm mek.

CHHAWRTUI KHUAA KOHHRAN HRANG HRANG AWMTE: Chhawrtui khuaa Kohhran hrang hrang tuna awm mekte chu, Presbyterian Kohhran, Roman Catholic, Salvation Army, United Pentecostal Church of North East India, United Pentecostal Church of Mizoram te an ni.

ZIRNA LAMA CHHAWRTUI KHAWTLANG DINHMUN: Chhawrtui khuaa Zirna in hrang hrang awmte chu Govt. Primary School, Govt. Middle School, Chhawrtui High School (GIA) leh Presbyterian English Medium School te an ni.

...oooOooo...

DULTE CHANCHIN

DULTE KHAW TOBUL: Dulte hming put chhan Dultea hi a thiahtu te chhui ngaihna a awm lo va, amah hi Lal hnam ni lovin ho neia khua dina awm thin a ni a, a hming chawi a he khua hi Dulte ti a phuah a ni. An awmna hmasa ber, tuna Dulte hmar thlang tlang hi Dulte khaw hming chawitu niin Dulte tlang tih a ni a, Khawhlui tlang leh Lalhanga lu nunah te an insawn chhuah leh hnuah Mizoram buaia khawkhawm atangin tuna khaw awmnaah hian inbenbel a ni ta a ni. Tuna khaw dinnaa hmun hi Sarawt kawn tih a ni a, inbenbel a nih takah hian Dulte khua hming a pu hlen ta ni, hemi hmun luah hun hi kum 1971 a ni.

A MI CHENGTE CHANCHIN: Dulte khua hi kum 1800 hnu lamah Dultea ho a khua an din ni a hriat a ni a, khua an din tan hian in 30 vel chauh an ni awm e. Mihring cheng hi 100 vel bawr niin hriat a ni a, kan lo pun chhoh zel hnu hian hnam lar zualte chu Pachuau, Hauhna, Hrahsel, Ralte Rentlei, Khawhling, Hmar leh Tochhawng te an ni a, tun dinhmunah In 218 awmin mihring 1225 an cheng mek.

EIZAWNNA: Dulte khuaa mi chengte eizawna bulpui ber chu tlangram lo neih a ni. Tin, ranvulh, huan siam leh kut themthiamna lam thawkte pawh an awm a, hei bakah hian thlaithar Bazar-a zuar, sumdawng leh sawrkar hnathawka eizawng chungkaw thenkhat an awm baw.

ZIRNA LAM: Zirna in neih hmasak ber hun hi kum 1949 niin private in Primary school din a ni a, kum 1973-ah Government School-ah hlan a ni. Middle School hi kum 1986 ah private a din a ni a, kum 2003 ah Govt. ah hlan a ni. High School hi kum 1993 ah private a din a ni a, kum 2023 ah provincialize a ni. Heng bakah hian Private English Medium school a awm baw. Tun dinhmunah Anganwadi centre I leh II a awm mek.

SAKHUANA LAM: Dulte khuaa mi chengte hi Christian sakhaw vuantute vek niin Kohhran hrang hrang, Presbyterian Church, Isua Krista Kohhran, Seventhday Adventist Church leh United Pentecostal Church an awm. Tin, heng bakah hian kohhran a lawina bik nei lo mi tlemte an awm baw.

HRISLNA LAM: Tun dinhmunah Health & Wellness Centre pakhat awmin Heath Worker pakhat leh ASHA pakhat ten an vil mek. JJM hnuaiah chung tinin tui connection an dawng kim tawh baw. SBM hmalaknain chung tinten inthiarna mumal leh rintlak tak an nei vek tawh baw a, ODF Plus a puan khua a ni. Hriselna leh thianglimna kawnga hmalatu WATSAN committee te hmalakn in mumal taka bawlhhlawh paih thin a ni a, khaw chung thianglimna kawngah theihtawp chhuaha hmalak zui zel a ni.

NGO HRANG HRANG

YMA: Young Mizo Association (YMA) hi kum 1935-ah a ding a, kum 2023 khan Golden Jubilee ropui taka lawm a ni. Tun thlengin nung takin a kal. YMA Branch hnuaiah hian section pathum, Vanapa Section, Khuangchera Section leh Taitesena Section te a awm a, chhiat that a Mizo tlawmngaihna keng nungtu, khawtlang innghahna bul ber an ni.

MUP: Mizoram Upa Pawl, Dulte Unit (MUP) hi kum 1937-ah a ding a, kum lama upate tan a tangkaiin chhiatni thatni leh hun pui hrang hrangah khawtlang tan a tangkai hle.

MHIP: Mizo Hmeichhe Insuihkhawm Pawl (MHIP) hi din a ni a, he pawl hian khawtlang siamthatna kawngah a thawh hlawk hle a, khawtlang nun siamthatna kawngah te, zirna lamah te, ruihhlo dona kawngah te leh hmasawnna kawng hrang hrangah hma a la nasa hle. Dulte MHIP Branch hi section thumah an then leh a ni.

Khawchhunga tlawmngai pawl hrang hrangte hi khawtlang inngahna bulpui berte an nih avangin khawtlang hruaitu Village Council tan a thlamuan thlak hle a ni.

POLITICS: Village Council hi kum 1954 atanga neih tan a ni a, VCP hmasa ber chu Pu Haulera a ni. Tunah hian VC neih atangin kum 70-na hman mek a ni a, tun thlengin Village Council term 18 hman tawh a ni. Tun dinhmuna political party unit hrang hrang awmte chu BJP, INC, MNF, ZPM. Political party hruaitute hian khawtlang hmasawnna turin an phak tawkah sawrkar fawng vuantute an thlawp tha a, inlungual takin khawtlang tan ke an pen za thin a, khawtlang hruaitute an thlawp tha hle.

KHAW CHHINCHHIAH TLAK BIKNA LEH LANSARHNA: Dulte khua hian kangmei ven kawngah nasa takin hma a la thin a. Lo atana ramtheh pawn hal niah mei chhuak a awm ngai lo va, district chhunga kangmei veng lawmman 2-na a lo dawng hial tawh a ni. Tin, nungcha humhalh kawngah mipuite an tangrual hle bawk a. Khawtlangin Hauhuk a enkawl chu an hmingthan puiin vanduaia a tawh hnuah pawh Mizoram huap a nungcha humhalh inzirtirna urhsun takin hman a ni nghe nghe. Dulte khua hi taima khua, kut hnathawktute awmna a nih angin Sawhthing chin an lo hmingthan pui tawh hle. Balhla that duhna khua ni bawkin thlai tharte hi hmun dang aiin a tui bik nia sawi a ni. Dulte hi tunhma atanga thlarau pur chawkna khua an lo tih thin a ni bawk a, a khaw piangphung pawh hi Kross angin a awm. Tun kum 2 kal ta khan NH-06 kawngpui bula Quarry hmantir chu lung lakna a hman a nih tak loh a chinah tui a lo chhuak a, dil mawi takah a lo chang ta mai hi a mak hle. Dil dang zawng aia he dil danglamna chu a tui hi van dumpawl angin a paw raih mai hi a ni. Dulte dilmawi hian tlawhtu a ngahin hriat a hlawh hle a, hmun hla tak atang pawhin intihhlim nan an rawn pan vang vang thin a ni. Picture : Dulte khua.



HMUNCHENG CHANCHIN

Hmuncheng khua hi Zuchhip Lal Khualthangnghina remtihain kum 1939-ah a khaw hmun hi sah chhuah a ni a, chutah chuan Lal Khualthangnghina nau Lalthangvunga chu lalin a thu ve a, chuta tanga awm chho zelin kum 1967-ah Zuchhipah khawm chhoh leh a ni a. Zuchhip ah kum 2 tling lo deuh awmin kum 1969 kumtawp lamah Khawzawlah khawm chhoh leh niin Khawzawlah chuan an awm ta rih a, chuta tang chuan politics lo ding chhoin PC Party a lo sawrkar khan mahni khaw hmun hlui luah leh duh ten a luah leh theih tiin, kum 1971-ah Hmunchengah let thla lehin an awm leh ta a ni.

Chuta tang chuan hetah hian awm chho zelin kum 1972-ah private school din a ni. Tichuan, hun a lo kal zel a, sawrkarahle dil chho ve zelin sawrkar chuan Khawzawl Kawnzar school atangin a hmu chho ta zel a, kum 1989-ah sawrkar school nghet a awm ve ta a ni. School hi tun dinhmunah Government Primary School leh Government Middle School a awm a, Anganwadi Centre pakhat a awm baw.

Kum 1973 khan Hmunchengah YMA a ding a, kum 1984-ah VC a ding ve leh ta a ni. Kum 1986-ah motor kawngpui, jeep road laih tlang a ni a, chutianga hma la chho zelin kum 2005-ah Electric pawh lakluh a lo ni ve leh a. Kum 1985-ah sawrkar hmalakna hnuaiah khawtlang tui in tur Zotui atangin lak a ni a, tunah hian sawrkarin PMGSY hnuaiah kawngpui tha tak metal road in a siam tlang a, mupui tan a hluin a lawmawm tak meuh meuh a ni. Chuti chuan Hmuncheng khua chu kum 1971 atanga kum 2024 thleng hian mei mit lovin a awm chho ta zel a ni.

...oooOooo...

KAWLKULH CHANCHIN

Dr C. Lalhruaithanga

Kawlkulh khua hi Mizo history-ah hian a lam tam lo em em a. Mahse, Mizoram chung khaw hrang hrang zingah hian pawimawhna tam tak nei pha a ni. Mizo History a Kawlkulh lanna chanchin tlem lo tarlang ila. Lalsavunga fate'n chhak an nawr laiin Vanlalnuaiana Saitual atangin Puiloah a kai a, a nau Lalphunga Tualbung atangin Kawlkulhah a kaia sawi a ni. Tun thlengin Lalphunga hmun (Govt. Kawlkulh High School hmun vel hi) a la awm. Kum 1900 hma lama Chin Hills atanga Survey map British in an siamah 'kolkul klang' tih a lo awm ve bawk a, hei hi Kawlkulh tlangdung an sawina ni ngeiin a lang. Chubakah RB McCabe (North Lushai Hills Bawrsap) Mizote'n 'Lalmantua emaw Lalman Sap' tia an koh in kum 1891 february thlaa Mizoram khawchhak lam khua a fan tumin Kawlkulh hi a kal thleng a, Lalruma Sailo khua Kawlkulh chu In 203 leh mihring 1,015 awm angin a ziak a ni. Tin, Kawlkulh khua hi Meitei hote lo awm tawhna hmun pahnih kan hriat theih zinga pakhat niin K Zawla (Mizo Historian) chuan a sawi bawk. Vanhnuaiana Saitual kai tum chuan Saitual ram 'Lamzawl' chu lo atan an theh a, chumi lo vat lai chu Pawihoin an bei thut mai a, Pahnih (2) an that a, midang erawh an tlan haw hlawm a. Vanapa te, Chawngduma te, Tawktiala te hoin an um a, Kawlkulhah tanhmun siamin kulhte an lo siam a, tang leh ngam lovin Vanapate thlen chhoh hmain an tlanche leh ta zawk niin a sawi.

Kawlkulh khua hi Khawzawl District huam chhunga khaw sawmhni leh pasarih (27) te zinga mi a ni a. District Headquarters Khawzawl tih lohva khawlian ber a ni. Kawlkulh awmna hi 23°36'57.9" N Latitude leh 93°04'58.9" E Longitude a ni. Kum 2011 chhiarpui atanga a lan danin, Kawlkulh khuaah hian In (House) ding lai/ luah lai 700 lai awmin, mihring 3094 lai an cheng a. Chung zingah chuan Hmeichhia 1563 awmin, Mipa 1531 lai an awm bawk. Kawlkulh khuaah hian ziak leh chhiar thiam hi 82.42% lai an tling. Kawlkulh atanga District Headquarters Khawzawl hlat zawng hi km 30 niin, Mizoram khawpui ber Aizawl hi km 122 vela hla a ni. Heng khua - Puilo, Dulte leh Vankal te hi Kawlkulh thenawm khaw hnai berte an ni.

KHAW HMING PUT CHHAN: K Zawla (Mizo Historian) chuan, hmanlaiin Kawl Sipai ram hauh tur leh ram chinchang hriat tumin tam fe an lo kal a, helaiah hian an inkulh a. An haw hnu chuan an inkulhna hmun chuan Kawlkulh hming a pu hlen ta niin a sawi.

JF Hmuliana chuan, "Kan naupan lai chuan awmpui leh melveng paho te leh dawrveng paho te pawhin Saihumkawn, melveng peng bul hi kawlo inkulhna hmun a ni an ti thin" a ti. Amah vek hian Kawlkulh Val Upa PC Lalhmachhuana Dairy-ah chuan Saihumkawn, RD Godown hmunah hian kawlo an inkulh a, an Lal In chu tlangah an sa a, Hnapen tui hi an tlan a. Chutih lai chuan Sipai Camp tlangah hian Meiteiho an inkulh ve thung a, an ram chuan chuan an inhre pawh ta tlat mai a, an insaseng leh ve ve ta a ni tih thu a lo ziak niin a sawi.

KHAW AWM TAN DAN: Tuivawl ral chhak lam (Dulte ram, Mualpheng ram, Tawizo ram, Saichal ram, Puilo ram, Vankal ram leh Kawlkulh ram) leh Tuichang inkar ram te hi Lalruma Sailo (Lalphunga fapa) ram a ni a. Lal leh a khua leh tui te pawh hi hmun nghet/awm hmun nghet an nei lo va, kum 5 atanga kum 7 a vei hi chuan khaw thar an sat mai thin. Mahse Mizo Lalte'n ramri chungchangah buaina an neih loh nan Bawrhsap J. Shakespear chuan Land Settlement chu kum 1898-ah Mizoram (Lushai Hills) ah a hmang tan a. Tlangsamho (Survey) an lo chhuak a, Mizoram Map an siam nghal bawh a. Bawrhsap J. Shakespear chuan Lalram chin tur Chiang Takin a siam fel a, Lalram chin tur chu document fel taka siamin 'Ramri lehkhah' tih a ni a, chu chu lal tinin an lo nei ta. Lushai Hills (Mizoram) chhung a ramri buaina chu Bawrhsap hnenah zel chin fel a ni ta a ni. British-ho chuan Mizoram hmun hrang hrangah Inspection Bungalow an sa a. British Officer zin veivakte chawlhna leh riahna tur a sak a ni ber a. Sakawr nikhat kal dan velah zel Bangla hi dah a ni.

Kawlkulh khua pawh hi Bangla thut hmun niin Aizawl atanga Champhai inkara Bangla Pangana (5) a ni. A tirah chuan Kawlkulh thlen hma km 5 vel tuna Banglakawn kan tih takah hian sak a ni a. Remchan zawkna avangin tuna I.B tlangah hian Bawrhsap Maj. J. Shakespear thupekin sawn chhoh a ni ta a ni. Kawlkulh Bangla hi kum 1903 atanga sak tan niin kum 1908 velah sak zawh niin an sawi. Lalruma ram chhungah Inspection Bungalow sak a nih avangin Chawkidar emaw Mohurer emaw awm a lo ngai a, ramngaw chhah tak a la nih avangin sa hlauhawm a tam bawh nen Bangla awmpui dah a ni a. Lalruma fapa upa ber Mualpheng Lal Hrangkungah khua leh tui a mi Chhuhngrengah chu Chawkidar awmpui turin koh chhuah a ni a. Awmpui hna hi tuichawi, bangla vel tihfai a ni ber a, a hautak deuh avangin sawrkarin midang a lak belh leh ta a, chungte chu :- 1. Thangchema 2. Kulha 3. Hrawnga 4. Saieka 5. Chalruma 6. Bawka 7. Ropuia (Thirdeng) 8. Zamanga leh 9. Thangliankhuma (Puithiam) te an ni.

Bangla awm hnu deuh lawk, Kum 1913 velah Lal Dolura'n tuna Kawlkulh Vengthlang hmungah hian dawr a siam a, Ex C. Lalhluna (L) In hmun vel hi niin an sawi. Dawr nghaktu atan Satlana dahin, Dawr nghaktu awmpui turin heng mite : 1. Darchhuma 2. Khawmeka 3. Tlangduha leh 4. Laltawma te a awmtir ve nghal bawh a. Lal Dolura chu Bevuakah a khua leh tui te nen an la awm a ni. Bawrhsap in hei hi a lo hriatin, khawper anga awm a phal lo va. Mahse, Lal Dolura leh Luseia (Chhungte Lal) ten nasa takin Bawrhsap hnenah an dil a, zin mite tan riahbuk pawimawh tak a nih bakah Bangla awmna hmun a nih thute thlen a ni. Hemi hma deuh hian Bangla Awmpuite hnenah Bawrhsapin 'Lal khua hi hnawh in tih chuan mel 5 pawnah ka sawn ang e' a ti a. Mahse, Bangla awmpuite chuan hnawh an tih loh thu leh an intihhlum zawk thu an sawi a. Bawrhsapin Dolura leh Luseia dilna chu pawmsakin In 16 lai an nih a phalsak ta a ni.

Bevuak atangin Dolura chuan Tawitawhawn a kai a. Lal Dolura khaw siam tawhah a ropui ber niin In (House) 200 dawn lai an tling a. Kum 1932 kum tir lamah Dolura chuan Saichal kai turin Bawh a khawhtir a, a tam zawk an kai hnuin a fapa Satdaia chu a thutir a. Tichuan, Dolura pawh chuan kum 1933-ah Tawitawhawn chu chhuahsanin a khua leh

tui tlem zawk te nen Kawlkulhah a khua leh tui lo awmsate thut nghet turin a pheii ta a. Pa pakhat pheii chu amahin kum 3 lai a chambang niin an sawi. Kum 1945 a lo herchhuah meuh chuan Kawlkulh khua chu In 70 lai an lo tling ta a ni.

Kum 1946 April ni 9 a Mizo Union Party lo ding chuan Zoram dung leh vangah India rama beh leh Lal ban chungchang chu nasa takin an tlangau pui a, vahchap kang ang duai duai in Mizote thinlungah Union thlipui chu a hrang a, mi tam zawk zuitu nei an ni. India ram in kum 1947 a zalenna a hmuh hnuah Mizoram pawhin Kum 1952 atangin District Council a lo nei ta a. Mizo Union ten District Council inthlannaah hnehna changin kum 1954-ah chuan The Assam Lushai Hills District (Acquisition of Chief's Rights) Act, 1954 hmangin Mizorama kum 300 chuang roreltu Lalte chu ban an ni ta a. Acquisition of Chief's Rights Amendment Act 1955 in a sawi danin Lalte chu Zangnadawmna pek an ni a. An buhchhun lak atanga siam rem a ni. Chutiang zelin Kawlkulh Lal Thanghuliana Sailo chuan Rs. 10,536 lai a hmu a, heng khua : Vankal, Saichal, Dulte leh Kawlkulh khaw mipui buhchhun zat atanga siam sak a ni.

Kawlkulh chanchina ziah hmaih theih miah loh pakhat chu Melveng chungchang hi a ni a. Kawlkulh Melveng hi Banglakawn chung Dulte hmun hluiah a awm a. Tuichang leh Tuivawl inkar lamlian tihfai an hna ber a. An hna a hautak em avang leh an hma a zauh em avangin Melveng-II siam belh a ni. Melveng-I in Kawlkulh leh Tuivawl inkar an vil a. Melveng-II enkawl ram hi Puilo Lal Khawtinkaia ram chhung a ni a, a khua leh tui ten enkawl ve tawh rawh se tiin dilna a thlen a. Chumi hnu atang chuan melveng-II enkawltute chu Khawtinkaia khua leh tuite an lo ni ta a. Mizorama Lal ban a nih hnuah Melveng-I ni thin chu Dulte VC tih a lo ni ta a, Melveng-II chu Puilo VC hnuaiah a awm thung. Mizo Union sawrkarin 1964 ah Melveng-II chu Kawlkulh VC hnuaiah a behtir leh ta a ni.

RAMRI: Office of the Mizo District Council Executive Department Order No. 1 of 1964 angin Kawlkulh, Dulte leh Puilo ramri siam fel a tul avangin Boundary Committee ruat a ni a. Boundary Committee chuan a hnuaia zia ang hian a siam fel a, chu chu Executive Committee Mizo District Council in a nemnghet ta a ni. Hetiangin -

“Saichal lui atangin Bangla lui a zawh chho a, vei lampanga kawrte a zawh leh a, Champhai lamlian Dulte peng kawnah a bang liam a, Pu Lalhmingthanga M.D.C vau kawrte a zawh chhuk a, Chhimluang lui a fin thlengin. Chhimluang lui a zawhthla a, tlangdung dinglamah Darhmingthanga leh Chaldinga inrina kawrlui a zawhchho a, ngil takin lungpui chawlhmun tlangdung sahmul thenah a zawhthla a, lungpui chawlhmun takah tlak lamah ngil takin Pu C. Pahlira khawthlir lui a man a, Ailui a fin thlengin a zawh a. Ai lui a zawhthla a, Kawnzar lui chhuah thlengin, Kawnzar lui a zawhchho a. Kawnzar lui kawnah a bang liam a, kawrte a zawhthla a, Zaupui lui a fin a, zaupui lui a zawhthla a, Serlui thlengin, Serlui a zawh chho a, zawngsih lui chhuah thlengin, zawngsih lui a zui chho a, dinglam panga luite a zawh chho zel a, Thuamthum kawnah Puilo leh Kawlkulh kar kawng atan liam a, kawrte a zui thla a, Kawlkulh lui chhuah thlengin, Kawlkulh lui a zui chhuk a, Tuichang thlengin, Tuichang a zui chho zel a, Falpuikawnah, Falpuikawn luite

chhuah thlengin, Falpuikawn luite a zui chho a, Falpuikawn leh khuai lui in khan tlangdung a zui phei a, Mangkutphira Lungdawh thlengin kawrte ziding ber a zawhthla a, Saichal lui thlengin, saichal lui a zawhthla zel a, Bangla lui thlengin ramri then tirhna a man leh a.”

Mizoram buai (1966) khan nasa takin Kawlkulh leh a chhehvel khua te ah nghawng a nei a. MNA te beihna hmanrua atan khawkhawm (Grouping of Villages) hman a ni a. S.K. Agnihotri IAS sawi dan chuan mipui za zela 80 zet chu an khua atanga sawn chhuakin, khaw lian deuhah sawikhawm an ni a. Mizoram khua 764 atangin khua 516 te chu Grouping Centre 110 ah an sawikhawm a. Chuti chuan, Kawlkulh khuaah pawh hian Khualen, Vankal, Dulte, Puilo leh Chhawrtui khua te sawikhawm niin, Kawlkulh khaw hmar lam pangah hian an awm khawm ta a ni.

Re organization Act, 1971 leh Government of the Union Territories (Amendment) Act, 1971 in a sawi angin Mizo Hills District chu UT-ah hlan kai a ni a. Kum 1972-ah chuan MNF volunteer mi 500 lai sawrkarah an inpe a. Chuvangin, Mizoramah Sipai (regular Army) chu Para Military Force ten an thlak zui nghal bawk a. Khawkhawmna hmun atangin mahni khaw bu hlui luah phalsak leh an ni a. Kawlkulh khuaa khawm khaw hrang hrang mipuite pawh an let leh deuh vek a, awm hlen ta tam tak an awm bawk.

KHAWTLANG: Lal ban an nih hnuin, July 23, 1954-ah Village Council inthlanna neih a ni a. August 15, 1954 atangin Village Council rorelna tan niin hengte hi VC member an ni.

President	: Liandinga
Vice President	: Kaphnuna
Secretary	: Darngailova
Members	: Raltawna, Lalchhinga, Liankhuma, Vanluta

Mihring lo pung zel leh hmasawna avangin kum 2010 atangin Kawlkulh VC pakhat ni thin chu VC pahnihah then a ni a. Kawlkulh VC leh Kawlkulh North VC tih a lo ni ta a ni.

Kawlkulh khua din a nih atanga tun thleng hian Non-Government Organization (NGO) pawl hrang hrang a lo ding chho va, pawl thenkhat a lo tawp chho bawk a. Kawlkulh Boy Scout (1936) te, Kawlkulh Youth Organisation (KYO-1981), Thalai Hnathawk Pawl (1942), leh Thiang Zau Pawl Kum 1959 a din te hian Kawlkulh khaw hmasawna turin theihtawpin hma an lo la tawh thin a, Kawlkulh chanchin a hmun pawimawh tak changtute an ni. Chubakah, YMA (Young Mizo Association) Mizoram Upa Pawl (MUP) leh Mizo Hmeichhe Insuihkhawm Pawl (MHIP) te nung takin tun thlengin a ding chho zel a ni.

Young Mizo Association (YMA) hi ni 21.02.1961-ah Kawlkulhah din a ni a. President hmasa ber chu RK Romana (Primary School Zirtirtu) a ni. June ni 15, 2011-ah Kawlkulh YMA Golden Jubilee hman niin, hlim tak leh ropui taka lawm a ni. Kawlkulh khua hi Kawlkulh Group YMA Headquarters awmna a ni a. Mipui lo pun chhoh zel avang leh

remchan zawkna avangin Kawlkulh YMA chu Branch 3 a then a ni a, chungte chu – Kawlkulh Branch, Kawlkulh North Branch leh Kawlkulh South Branch te an ni.

Sakhuana lamah pawh Kawlkulh khua a din tirh atangin Bangla awmpuite Hrangkung, Chalthianga leh Darchhunghluta te hi Kristian tha tak an ni a. Kum 1906, Mizoram a harhna thlen hmasak ber kum hian Pathian thuawih tanin, ni 11, November, 1909-ah Rev. D.E. Jones kutah baptisma an chang tih Synod archive-ah hmuh a ni a. Chuvangin, Presbyterian Kohhran hian kum 1906 hi Kawlkulh Presbyterian Kohhran din tan kumah an pawm a ni. Tunah hian Pastor Bial thut hmun pahni a awm mek. Tin, United Pentecostal Church (UPC) hi kum 1950-ah ding tanin, Pastor Zakamlova kutah mi tlem tein baptisma an chang a. Inkhawmna pawh a hrangin an nei nghal baw. United Pentecostal Church (NEI) Pastor bial thut hmun a ni baw. Heng a chung a Kohhrante bakah hian Salvation Army, Isua Krista Kohhran, Seventh-day Adventist Church leh Roman Catholic te an awm baw a, heng bakah hian Judaism sakhaw vuantu Bnei Manashe mi tam vak lo an awm baw.

Zirna lamah Kawlkulh khua hi a tirin lal thuthmun a nih loh avangin sikul pawh hawn a ni har hle a. Chuvangin, Mission Primary School pawh Tawitawkawn (Lal Dolura khua) ah kum 1925 an din tan a. Zirtirtu hmasa ber chu Lianvela a ni. Kum 1933-ah Lal Doluran Kawlkulh thut nghet tura a pheikhan Primary School pawh chu 1933 kum tirah Kawlkulh ah sawn a ni ta a. Tunah chuan Zirna pawh in hma sawn chho zelin Higher Secondary School thleng zirna a lo awm ve ta a ni.

Kawlkulhah hian sawrkar department hrang hrang a awm a, chungte chu –

1. Administration. Administrative Officer (AO) in awpin, kum1969 -1993 thleng a awm.
2. Food Civil Supplies & Consumer Affairs Dept., Inspector in a enkawl.
3. Health Dept. Kum 1959-ah Dispensary hawn niin Primary Health Centre-ah hlankai a ni tawh a, Doctor pakhat in a thutchilh.
4. Forest Dept. Range Officer in a awp mek.
5. AH & Vety Dept. Kum 1980-ah bul tanin, VHA in a thutchilh mek.
6. P&E Dept. Kum 1985-ah bul tanin 1990-ah 33 KV Sub-station dah a ni a, JE in a vil.
7. Agriculture Dept. Kum 1961-ah bul tan niin Gram Sevak in a enkawl thin a, kum 1974 atangin AEO a awm.
8. Horticulture Dept. Circle Horticulture Officer in thutin 1990 atangin bul tan a ni.
9. PWD Dept. Kawlkulha dept. awm hmasa ber a ni. Tunah SDO (PWD) in a thutchilh.
10. Postal Department. Kum 1949-ah din niin, tun thlengin BPO a la ni.
11. Soil & Water Conservation Dept. Soil Demonstrator a awm thin a, tuna Kawlkulha far hmun te hi an kuthnu niin tunah chuan a awm ta lo.

Kawlkulh khua hi Mizorama Centenary lawm thei khua tlem te zinga mi a ni a. Mei mit lovin kum 1903 atangin a lo ding chho tan a, tun thlengin harsatna nasa tak karah pawh a la ding ta reng a ni. Tunhma atang rengin hmun pawimawh tak a ni a. Bangla

awmna hmun a nih mai piah lamah zin mite tan rahbi pawimawh tak a ni a. Zoram buai avangin Grouping Centre a ni a, mihring pawh an pun phah nasa hle. Hmanlai atanga khualbuk awmna reng thin a ni a. Chuvangin, tunhnu deuhah pawh Hotel, Restaurant leh Thingpui Dawr te chu mi tam tak eizawna a lo ni chho ta a. Hei hi Kawlkulh economy inngahna pakhat a ni ve bawk. Loneitu ten thlai thar, thei leh hnephnawl hmun dang pan ngai lovin dehralna tha taka tan kawngpui kam an hmang thin bawk. Amaherawhchu, khawvel changkang zel leh hmasawna avangin NH-06 bypass road thar siam a ni a. National highway 102B tha taka hnathawh mup mup a ni bawk a. Chuvangin, Kawlkulh in hmanlai atanga a pawimawhna a hlauh chho mek a, mi tam tak eizawna leh inngahna chu a lo tawp chho tan ta bawk a ni. Mahse, khaw taima, rilru sang tak leh Pathian tih khua an nih avangin beidawng mai lovin an thawhrim rah thlum tak an la seng leh ngei ang a, Zoram khawvel hmun pawimawh takte zinga mi a ni reng bawk ang.

Lehkhabu Rawnte

1. K. Zawla, "To Bul" Hmar Arsi Press, Sikulpuikawn, Aizawl, 1st Edition 1981.
2. K. Zawla, Mizo Pi Pute leh An Thlahte chanchin, Gosen Press, Aizawl 5th Edition, 1989.
3. Rev. Liangkhaia, Mizo Chanchin, LTL Publications, Aizawl, chhut ngana, 2002.
4. Vanlalhuala, "Vanapa chanchin, R. Laltawna, Aizawl, 1993.
5. Kawlkulh Kohhran Souvenir" 100 Years, "Lois Bet Print & Publication, Published by Kawlkulh Kohhran, 2012.
6. Kawlkulh 100 Years Centenary Jubilee Souvenir, Kawlkulh Centenary Souvenir Committee, 2011.

Article rawnte:

1. C. Lalhruaithanga, Kawlkulh Lal Lalruma. Kawlkulh 100 Years Centenary Jubilee Souvenir, 2011.
2. JF Lalhmulliana, Kawlkulh History laktawi. Kawlkulh 100 Years Centenary Jubilee Souvenir, 2011.
3. B. Pawlthanga, Kawlkulh khuaa zirna intan dan leh kal zel dan. Kawlkulh 100 Years Centenary Jubilee Souvenir, 2011.
4. Upa F. Lalchawiliana, Kawlkulh Kohhran Chanchin. Kawlkulh Kohhran Centenary Souvenir, 2012.
5. Lalhmingliana Saiawi, Kawlkulh khaw Chanchin. Kawlkulh Kohhran Centenary Souvenir, 2012.

...oooOooo...

KAWLKULH NORTH CHANCHIN

Kawlkulh khua hi Aizawl atanga khawchhak lam, Champhai kawng km 122 vela hlaa awm a ni a. A khaw awmna hi hmun thengthaw nuam tak, tlangsang vak lo, hmun rem lutuk lo lai a awm a ni a. Luipui pahnih Tuivawl leh Tuichang inkara awm a ni. Tuifinriat zawl atanga tehin 1,116m (3661 ft) a sangah a awm. A geographical coordinate chu latitude 23.6152651°N leh longitude 93.08392°E intawhna laia awm a ni. Hmar lamah Hliappui a awm a, chhim lamah Puilo niin, thlang lamah Dulte, chhak lamah Khawzawl leh Vankal te a ri.

A TOBUL: Kawlkulh khua hi khaw hlun tak a ni a. Kum 2003 khan a kum 100-na lawm a lo ni tawh nghe nghe. Mizo history ziaktu lar Rev. Liangkhaia, Dr. Lalthanliana, K. Zawla, Vanchhunga, C. Chawngkunga ten an lehkhabu ziaakah Kawlkulh hi an dah upa hle. An lehkhabu ziaak hrang hranga a landanah chuan kum 1840 atanga kum 1892 inkarah pawh hian Kawlkulh hming hi a lo chuang daih tawh a. Aizawl Bawrhsap McCabe pawhin a political record-ah Kawlkulh hi kum 1890-1892 khan a lo chhinchhiah tawh a ni. Engpawhnise, Vanhnuailiana Sailo lalna kal zelah Kawlkulh hian hmun pawimawh tak chu a luah ngei a ni tih a hriat. Kawlkulh khua hi sawi tawh angin khaw upa leh hlun tak ni mah se tun dinhmun mei mit lova a awm tan hun hi chu kum 1903 ni a chhut a ni a. Vanhnuailiana Sailo nau Lalphunga Tualbung atanga Kawlkulha a pem chhoh hnuah a fapa Lalruma chu Kawlkulh lal a lo ni a. A thih hnuah Lal Dolura chuan a pa lalna chu rawn rochunin Lal Dolura chu Kawlkulh lal tih a lo ni ta a ni. Tun thleng hian Kawlkulh lal in dinna hmun leh lal awmna hmun chu Kawlkulh North-ah hian a la awm a. A lungdawh pawh hmuh theihin a la awm baw.

Tun dinhmunah hian Kawlkulh hi Kawlkulh leh Kawlkulh North a Village Council rorelna hran a lo nih tak avangin Kawlkulh North dinhmun chauh kan thlur bing ang.

POPULATION: Kum 2011 chhiarpaia a landan chuan chenna in 294, mihring 1037 niin tunah hian mihring awm zat hi 1238 a ni thung. Tun dinhmunah voter hi mipa 369, hmeichhia 378 an awm a. Ziaak leh chhiar thiam zat hi 98% vel a ni.

SAKHAW LAM: Kawlkulh North Kohhran hrang hrang atang hian Mizoram huap pawha Pastor langsar takte pawh a nei ve tawh a. A veng ang pawhin eng Kohhranah pawh rawngbawlina thawh hlawk tak khua a ni.

- 1. Presbyterian Church of India (Mizoram Synod):** Rambuai avang khan khaw tam tak sawikhawm a ni a. Kawlkulh pawh Grouping center a ni. Heng khua Dulte, Vankal, Puilo, Khualen te hi sawikhawm an ni a. Chung khua atanga lo kalte chuan rambuai karah pawh rawngbawlina chhonzawm zel duhin September ni 02, 1969 (Thawhlehi) zanah Pu Zanghaka, Dulte inah inkhawm tanin, Kohhran committee chuan Biak In hlata awmte in dan chu tihmakmawhah ngaiin inkhawm hrang turin a rel a. Bialtu Pastor Tlanglawma'n Hmarchhak Presbytery, Ngopa Kohhrana neihah inkhawm hran

tulna chu thlenin, pawm a nih hnuah Kawlkulh North kohhran chu lo dingin, a lo din tan ni atan October ni 01,1961 (Nilaini) chu pawm a lo ni ta a ni. Tunah hian Kohhran in 130 chuang an awm a, member 570 chuang awmin, dan zawh kim hi member 430 chuang an awm mek baw a ni.

- 2. United Pentecostal Church of North East India (Aizawl East District):** Mizorama UPC Kohhran a lo din tirh khan Kawlkulh khuaah pawh nasa takin nghawng a nei a. Ni 16.04.1950 (Pathianni) khan Pastor Zakamlova hnenah mi tlem tein baptisma changin, member pawh an pung hret hret zel a. A tirah chuan Arro atanga awp nia hriat a ni a. Mahse, kum 1967 atangin District remtih nain Aiduzawl bialah a awm a. Hun lo kal leh hretin kum 1960-ah Biak In nei tanin kum 1985 thleng a hmun ngaiah an awm a. Kum 1975 khan Pastor Vankhuma'n a bial laiin Kawlkulh North Kohhran hi Kawlkulh Venglai tia vuahin, chu chu tun thlenga Kohhrana a hming vuah dan a lo ni ta. Tunah hian Kohhran in 49 awmin, member 221 vel an awm mek.
- 3. Isua Krista Kohhran (Kawlkulh North):** Isua Krista Kohhran (Kawlkulh North) hi a var tia sawi an ni a. A din tan hun hi ni 25.1.1975 a ni. Bialtu hmasa ber chu Tirh Koh Lalhleia a ni a, ral atangin a rawn vil thung. A tirah chuan Pu Lianlerha (L) te inah an inkhawm thin a, mahse, an din atanga rei lovah Pu Zairema(L) in hmun chu Rs. 500 a leiin kum 1976 khan tuna Biak In hmunah hian an sa a. Tun thleng a awm ta a ni. Kohhran in 46, member 205 an awm mek.
- 4. Seventh Day (Church of God):** Kum 1980 velah mi tlem te kalkhawmin Pu Tlangkhuma(L) in, Kawlkulh North-ah an din a. A dintute hi hmun hranah an awmdarh hlawm avangin Kawlkulh North(Tawitawkawn) ah kum 1983 khan an thar thawh leh a. Local Chairman hmasa ber chu Pu Thangkunga(L) a ni a, bialtu Pastor hmasa ber chu Pastor Biakkunga a ni. Champhai in a bial a, tun thleng hian Champhai bialah an la bet ta zel. Kum 1984-ah Biak In chu thlipuiin a tichhe vek a. A kum leh 1985-ah Pathian thuawih tlangah an sa leh a, chupawh chu kum 1999 khan lo halin a tichhe leh a. Kum 2000 khan sa tha lehin tun thleng hian chutah chuan an lawi ta. Kum 1996-ah pawl hniah an awm a, an vaiin member 50 vel an ni.

ZIRNA LAM: Kawlkulh North-ah zirna in hi tunah Primary School – II leh Middle School – II a awm. Kawlkulh khua in zirna in a neih hmasak ber chu tuna Kawlkulh North-a veng pakhat anga awm ta Tawitawkawn a din Missionary Primary School a ni. A din atanga kum 8 hnu kum 1933-ah Kawlkulh khaw hmunah sawn pheiin Primary School – I tih tak hi a ni.

GOVT. PRIMARY SCHOOL – II (Estd. 1971): Rambuaiah khan Dulte, Vankal, Khualen, Puilo leh Chhawrtui te chu Kawlkulhah sawikhawm niiin, hmar lamah an awm deuh ber a. School din belh chu a lo tul hle mai a. Chutichuan, kum 1971-ah Govt. PS – II din niin, Headmaster hmasa ber chu Pu Lallula Sailo a ni a, pension in he school atang vek hian a chhuak ta a ni. He school hi kum 1992 khan Govt. Middle School – II nen kaikawpin, Govt. Comprehensive Middle School-ah a lo bet leh ta a ni.

GOVT. MIDDLE SCHOOL – II (Estd. 1986): He school hi kum 1986, February thla atanga hawn tan a ni a. Headmaster hmasa ber chu Pu R Laldika a ni. He school atang vek hian a pension. Building a neih nghal mai loh avangin Community Hall-ah class an kal thin. Hemi kum vek September ni 29-ah permission hmuh a ni a. Kum 1987, August ni 13-ah recognize niin, hemi kum vek September ni 1-ah deficit-ah hlan kai a ni. Kum 1992-ah Govt. PS – II nen la kawpin Govt. Comprehensive Middle School – II tih a lo ni ta.

GOVT. PRIMARY SCHOOL IV (Estd. 1998): He school hi a tirah chuan Kawlkulh tlak lam ruam, Aizawl kawtchhuah lama awm a ni a. Khuanglak veng tih a ni. School dang atanga a hlat deuh avangin khawtlang tangrualin an din a ni. Amaherawhchu, hun lo kal zelah school naupang an tam tawh loh avangin Govt. PS - I ni thin nen an inchhunfin leh a. Govt. Primary School – V ti a kum 1998 a lo din tho, Tawitawkawn a mi te nen kaikawpin tunah hian Govt. PS – IV tiin Tawitawkawn hmunah hian a lo awm ta a ni.

RORELNA LAM: Sawi tawh ang khan Kawlkulh North hi Kawlkulh atanga ro inrel hranin kum 2015 khan a lo awm ve ta a. Kawlkulh North Village Council tih a lo ni ta. Tunah hian VC-ah general seat 4 leh reserved seat 1, a vaiin VC member 5 an awm mek. Rorelna hran neia a awm hnu hian INC leh MNF te'n Village Council-ah rorelna an chelh ve ve tawh a. Khawtlang tana thil tha leh hmasawna tam tak an thlen tawh a ni.

PRIMARY HEALTH CENTER (PHC): Kawlkulh North-a damdawi in neih mek hi a tirah chuan Subsidiary Health Centre tih a ni a. A building hmasa ber hi kum 1959 a sak a ni a. Sapho sulhnu mawi tak a ni. Amaherawhchu, kum 1980 a Primary Health Centre a hlan kai a nih khan a building chu sak that a lo ngai ta a ni. Doctor awm hmasa ber chu Dr Lalnunthara a ni. Tun dinhmuna hian thawktu nurse 3, driver 1 leh group D 3 an awm mek. Damdawi inah hian khum 10 awmin, a huam khua Vancheng, Chhawrtui, Dulte, Pawlrang, Hliappui, Saichal leh Kawlkulhah te hian Health and Wellness Officer leh Health Worker awmin, Vankal, Puilo, Changzawl leh Kawlkulh North-ah te Health Clinic a awm bawh a ni.

ADMINISTRATION: Rambuai hnu lawk kum 1969 khan Administration Officer-in a awp a. Rei tak a awp hnu, kum 1993 khan AO hi sawrkara a dinhmun siam danglam a lo nih khan a chhuahsan ta a ni. AO office leh staff quarters awmna hi hmun nuam tak a ni a, tunah hian an Office hmun hlui chu BSNL (Telecom Dept.) in an luah mek.

SEMI-GOVERNMENT AGENCIES:

- 1. BSNL (Telecom. Dept):** BSNL hian kum 2000 atanga hma rawn la tanin, AO hmun hlui, tlang theng thaw nuam takah office sain, a bul maiah tower an bun nghal. Tun dinhmuna erawh mumal takin an thawk tawh lem lo.
- 2. Airtel:** Telecom lama tangkai tak, Airtel hian kum 2006 khan hma an rawn la tan a. BSNL Tower hmar lam hret, hmun zawl remchangah tower bunin, hei hi security 1 leh Technician 1 in an awmchilh mek.

3. **Aircel:** Kum 2008-ah inbun tanin sum lama harsatna avangin an chhunzawm ta lo.
4. **Jio:** Kum 2015 velah an rawn inbun tan a. Aircel Tower an rochun a. Security 1 awmin, thildangah chuan Khawzawl atangin an rawn vil thung.

NON GOVERMENTAL ORGAMISATION

Kawlkulh North-ah hian tlawmngai pawl pathum a awm a. Chungte chu -

YMA: Kawlkulh North khaw chanchin sawi dawn hian Kawlkulh chanchin atanga kan sawi hmasak zel a ngai a. A chhan chu a bul tannaah hian Kawlkulh tih hlira sawi a nih thin vang a ni. Kohhran leh Tlawmngai pawl dangah pawh Kawlkulh tiha lo record tawhna hi sawi hmasak zel a ngai a ni. YMA hi ni 21.02.1961 ah Kawlkulhah din tan a ni a. President hmasa ber chu Pu R.K. Romana(L) a ni. Ama sawi dan takin chutih lai chuan chhim lamah hian in a la ding mang lo zawk. Kum 1996 khan Kawlkulh Branch atangin Kawlkulh North chu a in dang chauh a. President hmasa ber chu Pu T Thanmawia a ni a, Secretary chu Pu R Biakenga a ni. Tunah hian member hi mipa 319, hmeichhia 111 an awm mek.

MHIP: MHIP hi kum 1974-ah Kawlkulhah din a ni a. Kum 1998 khan Kawlkulh atangin Kawlkulh North Branch hi a in dang a. President hmasa ber chu Pi Hrangthangi a ni a, Secretary chu Pi Tlangmawii a ni. Member hi 317 tunah an awm mek.

MUP: MUP hi Kawlkulh North-ah hian kum 1974 ah din a ni. A dintute zinga thenkhat heng Pu Chaldaia(L), Pu Thangvela(L), Pu Patea(L), Pu Thira(L), leh midangten mual an liam tawh a. Upa tawh taka la dampuite pawh an awm. Tunah hian (report chin) mipa 49, hmeichhia 49, an vaiin 98 an awm a. Amaherawhchu, boral leh member ni thar an awm leh thin avangin member zat hi a danglam ve reng a ni.

HMUN LEH RAM HMING THENKHATTE:

Chhura Thlalak: Kawlkulh North atanga hmar lam km 2 vela awm, lung bang sang takah Chhura lem ziah a ni a. hei hi khuarel chhiatnain nasa takin a tihmelhem tawh. Hmarho sulhnu nia rin a ni. Puilo, Vankal leh Khualen tihte hi Hmar hnam peng hming vek a ni. Helai tlang velah hian Hmarho an lo awm tawh thin ngei a ni.

Dama Lungchawi: Makpalen hnuai a ni a. Mizo pa chak Damvea lung chawi a awm a, dah that reng a ni thin a, BRTF-hovin an nawr lum ta a ni ang, a ram hmingin a pu ta a ni.

Dardah puk: Pial Mual kawng, Nuihruk ram chhung tlang kham a ni. Hmanlaiin lalten an ro an thukru thin a. Bevuaka awm laia kangmei leh ral laka a him nan dar an dahna a ni.

Far hmun: Soil & Conservation Dept. in far an chinna hmun a ni. Kumpinu hunlai khan survey hovin Tawi tlang nen degree lak nan an hmang thin. Kawlkulh sub town Cadastral Survey-in an plan pawh khan, helai atang hian degree lak a ni. A sang lai atangin Aizawl a lang thei. S hoten darthlang hmanga inbiak nan an hmang thin an ti.

Lal lungdawh: Hetah hian Kawlkulh lal Dolura thlan a awm a. Chumi avang chuan a hmingah a pu ta a. Veng hming angin a pu hlen ta a ni. Hei hi hmuh theihin a la awm.

Kanhlum: Mi pahnih, Lalliana leh Lalnawka (Saizinga, Ngurchhawni te pu) te an kan hlum avanga phuah a ni. Tunhnai lawkah pawh mi pakhat chu lo kang chhuak a venna lamah a kang hlum leh.

Maikhawli Pumbawh: Maikhawli hi Tawitawkawna awm a ni a, a raipuar si a, a ram lo awih chhia nen, bungbuin a kal a, chuvanga phuah a ni.

Nuihruk: Ram kheng tak, tha si, a ruka nuih ver verna a ni.

FAINA LAM: Veng hrang hrangah faina lam mawhphurtu insiamin tawngka mai bakah social media - whatsapp group-te siamin faina pawimawhzia leh thatzia inzirtirna a theih ang anga neih a ni thin. Dumping ground neiin chutah chan Inrinni apiangin motor-a bawhlawh thiar khawmin paih a ni thin. Tin, khawtlang hruaitute remruatnain veng chung thenfai hnatlang neih thin a ni baw. Hmasawna tam tak hmuh tur a awm lain tan lakna tur erawh a la tam em em.

EIZAWNNA LAM: MPC sawrkarah khan garden colony kalpui niin chungkaw thahnem takin Serthlum an ching a. Kawlkulh ram hi Serthlumin a ngeih hle a. Chhungkaw engemaw zatin inngah nan an hmang hman tawh a. Vanduaithlak takin Serthlum tam hri a lo thleng tlat mai a, Serthlum chu a tam zo deuh vek ta a ni. Tunah hian chungkaw thenkhat chuan ching thar lehin hma an la leh mek. Tin, Dragon fruit ching engemaw zat an awm baw a. Tunah hian a puitling tan mek a, chungkaw thenkhat chuan inngah nan an hmang tan mek baw. Kawlkulh North-a mi cheng tam zawk hi lo neih lama eizawng an ni hlawm a. A tlangpui thuin Buh, Sawhthing, Hmarcha, etc an ching hlawm a. Chutihrualin, sawrkarin scheme hrang hrang a siamte bawhzui a, hlawhtlinpui a, eizawna tlaka siam mekte pawh an awm baw.

...oooOooo...

KHAWHAI CHANCHIN **(Khawhai rohlute)**

Lalhmunsanga
PHC Quarters, Khawhai North
Ph - 9862726017

Khawhai khua hi Khawzawl District chhunga Census town pakhat niin, in 600 vel a ni a. Khawzawl atanga chhim lam km 30 a hlaah awmin, Mizoram State Capital Aizawl atang hian km 184 a hla a ni. Khawhai hi khaw upa tawh tak niin, pi pute sulhnu leh hmun pawimawh tak tak pawh a tam hle a ni. Zohnahthlak hnam hrang hrangin Khawhai tlang hi lo luah tawhin, Lal hrang hrang an lo inbengbel tawh a. Khawhai tlangah hian eng hnam nge lo cheng hmasa bera, engtik hunah khan nge an lo awm tan tih chu hriat phak rual ni tawh lo mah se, kan hriat theih china lo luah hmasatute chu:

1. Mirawng, kum 1700 vel
2. Rangte(Gangte,) kum 1750-1800 vel
3. Hmar Zote, kum 1830 vel
4. Vanhnuaailiana, kum 1850 vel
5. Kairuma te nufa, kum 1880-1890
6. Darkungi (Zataia nu), kum 1895
7. Zataia Sailo, kum 1908

Heng hi kan hriat theih china Khawhai tlang lo luah tawhtute leh an luah hun lai a ni a, heta tang hian Khawhai khua hi khaw upa tawh tak a ni tih kan hre thei awm e.

KHAWHAI KHAW HMING PUT CHHAN: Sawi dan hrang hrang awm karah, ni-a lang ta deuh ber chu, Lal Kairuma pasalthate chhak nawr tum ram ena kal chuan, Chalrang tlangah Hmar pa Se zawng an hmu a, "Ka pu, khawi khua nge i nih?" tia an zawhna chu, Hmar pa chuan, Khawhai tlanga khaw awm chu kawh pahin, "Ka khua a hai" tiin a chhang a. Chu chu Kairuma pasalthate chuan, 'Khawhai' tiin an sawi zui ta a ni. Khawhai tlanga Hmar hnam lo cheng hmasate chuan, "Demdum" tiin an sawi thung a, chu chu, 'Chirhdum hmun' tihna niin, Khawhai tlanga Dil awm hming chawia phuah ni a sawi a ni.

KHAWHAI LAL LEH AN THLAHTE CHANCHIN: Khawhai tlang hi hnam hrang hrang leh Lal hrang hrangin lo thutin lo chenchilh ve tawh thin mah se, heng hnam leh Lalte hian tlang dang zuanin hmun dangah an insawn san leh thin avangin, Khawhai tlang pawh hi luahtu awm loin a han awm leh renrawn thin a. A lo luah hmasatute tlang danga an kai zawh tak hnuah Kairuman a thut ve leh a, Kairuma chu kum 1891 khan Karmualah a insawn leh a, Zataia Sailo chuan Khawhai tlang a rawn thut ve leh ta a ni. Ani hian he tlangah hian a hun zawng zawng hmang zoin, he Khawhai tlang hi a chhuahsan ve ta lo a, churang chuan, Zataia Sailo hi "Khawhai Lal" ti a kan chhui zui tur chu a ni ta a ni.

Zataia Sailo Khawhai Lal chanchin: Zataia Sailo thlahtute hi Mizo hnam pum ang pawha thlahtu chhuinaah, chhui hlat theih berte zinga mi an ni a. A bul tak erawh hi chu thawnthu ang deuha ngaihna te a awm tawh a, sawi dan hrang zeuh zeuh awm bawh thin mah se, upate thu inhlan chhawn dan hriat theih ang ang dah tel erawh a tha ang. Mizo chanchin chhuinaa hriat hlat theih dan ber atanga chhuia Zataia lo chhuah dan chu hetiang hi a ni -Noa, Dongula, Niguitea, Bawklua, Sihsinga, Ralna(Galna), Chhuahlawma,

Zahmuaka, Thangura, Thangmanga, Sailoa, Chungnunga, Rohnaa, Lallula, Lalthangvuta (Vuttaia Sailo), Lalvunga, Zataia Sailo.

Zataia Sailo hi kum 1864-ah khan Lungpho ral, Chhingchhip khaw bul 'Arbawm' khuaah (Tunah chuan khaw ram mai a ni tawh) a lo piang a. Kum riat (8) mi chauh a nih lai 1872-ah khan, a pa Lalvunga chuan Ngentiangah a lal tir a, Mizo Lal tlang chang zingah a naupang ber pawl chu a nih ngei a rinawm. Kum 1890 chhoah khan Vai lo lian chu, naupang te ni chungin theihtawpin a lo do let ve thin a, mahse, vai lian meuh chu hneh mi rual ni hek lo, Zataia pawh ramhnuaih te a upa thenkhatte nen an han tlanche leh rap rap thin a, hetia an tlancheiatna hmun pakhat, Vangtlang khaw rama puk pakhat chu tun thleng hian, "Zataia ral tlan puk" ti a hriat a la ni ta reng nghe nghe a ni. Tichuan, Vailian chu hneh rual an nih tak si lohah chuan, Zataia Sailo pawh chuan North Vanlaiphaia vailian inkhuar hnenah chuan, a silai tungin a inpe ta a ni. Zataia hian khaw hrang hrang pariat (8) a siam kual hnuah kum 1908-ah khan Khawhai hmun hlui ram hi a luah nghet tan ta a ni. Zataia hian unau mipa pahnih, Ralthiaua (Vangtlang Lal), Liandawra (Lungpho Lal) bakah farnu pakhat Thanrumi (Khuangpuilam Chenkual Lal, Lalthiaua nupui) a nei a, nupui pariat 8 neiin fa hi 35 lai a nei a ni.

Zataia Sailo hi pa lian, ruakhau leh awm khauhpuoi mai a ni a. Mi chak leh huaisen a ngaisang em em thin. Amah ngei pawh hi naupangte ni chung, a pa pasaltha ten chhak Pawi ral nawr pah a "Chhawn zawnga" an lo hruai tawh kha a ni nghe nghe. Helai thu hi tlem han tar lang lawk ila. Kum 1850 chho leh a hma lam kum za tel atang tawh khan Lusei Lalte leh Tiau chhak lama Pawi hote chu an indoin an lo inrun reng tawh thin a, Pawi lam pawh hian Pasaltha huaisen tak tak nei ve reengin, Riangtlei thleng hian an rawn inkhuar thla a, an inbei nasa hle thin. Hei hi Vuttaia thlahte pawh hian Pawi ral chu doin khawchak lam chu an nawr chamchi a, chutianga an ral nawrnaah chuan, tumkhat chu Zataia, naupang te chu an hruai ve a. Hetianga rawlrala chhuak rammute hian ral thah tur an hmuh chuan an that a, mi huaisen/ pasaltha tih an lo ni ta thin a; chutianga chhuak chu, "Chhawn zawng" an ti nghe nghe a ni.

Tichuan, Zataia leh Lusei pasaltha te chu Dawn khaw thlengin an han rawl ta a, ral lu lak tur zawng an nih avangin an hmuh hmasak ber, Tiau lui kama pafa thing tei lai chu an that ta a. An mi thahte chu Zataia chu an sah tir ve a, chuta tang chuan rawlrala chhuak ngam, mi huaisen, Chhawn tawn thei chin a lo ni ve ta a ni. Heng hunlaia an ngaihsan leh ropui tih zawng te ngaihtuahpuoi chuan thil ropui tak niin, Zataia chu naupang tein Lal fapa mi lu la a ni ve ta reng mai.

Zataia hi Vailian kuta a inpek hma hian, vailianin an nawr phak lohna tur hmun nia a hriat lam hmun hrang hrangah a kual ve nasa hle a. Kum 1892-1893 chhoah chuan Zataia pawh kum 28 vel mi a lo ni ve ta. Hetih lai hian, a pu Vuttaia leh a pa Lalvunga te pawh an boral tawh a, a nu Dari ho chuan Khawhai chhehvel tlang hrang hrang hi an zuan kual ta a ni. Mahse, hetih lai hian, Lal man sap an tih mai, RB McCabe chu sipai 400 lai hruaiin a lo lian zel nen, a pi, Neihpuithangi (Vuta nupui) Sialhawk khuai hnuai rama awm chu a va bel a. Mahse, helai pawh hi Bawrsap, Tarmita bial fangin a rawn tlawh leh dawn tih an hriat avangin, Zataia pawh Riangtlei leh Vangtlang khaw inkar ram Chhinlungah a insawn leh a, hetah hian in ruk (6) emaw lek an awm a. Heta tang hian, a upa min te thurawn angin, a u Vangtlang Lal Ralthiaua chu kum 1894 favang khan a bel leh ta a, hetah

pawh hian a la him tawh loh avangin khua atanga hla tak, Tuipui kama puk chu a upate nen an bel leh ta a ni.

Hetia a khua leh tuite pawh awpkhawm thei lo a, hmun hrang hranga an vakdarh ta mai hi hrehawm a tiin a ingaihtuah ve nasa hle a, a tawpah chuan Vailian kuta inpek mai chu tha bera hriain, North Vanlaiphaia inkulh, sipai ho kutah chuan an inpe ta a. Hei hi 1895 kum niin a lang. Tichuan, vaiho chuan Silai khen loh (Sawrkhar chhinchhiah loh) paruk(6) pe turin an lo ti a. Chu chu a tihhlawhtlin theih chuan, pawisa pek a, Rahsi hlawh ang pek bawh an lo tiam a, Zataia tan chuan, a khua leh tuite awpkhawm thei loa a awm reng avang chuan, vailian thu chu hnial theih ni ta hek lo le, Silai khen loh paruk chu pein vailian kutah chuan a tlu lut ve ta a ni.

Hetia, a tana vailian an hlauhawm tak loh chinah hi chuan, a u Ralthiaua belh reng pawh chu thil tih chi a ni ta lo a. A nu Dari nen chuan kum 1895 kum tawp lamah, Ngentiang leh a chhehvela a khaw mi leh sa tlandarhte chu khawm lehin, Chalrangah an kai leh ta a. Heta an awm chhung hi kumkhat emaw vel chauh a ni chungin an pung chak hle a, Thangchhuah dan chihnih zinga pakhat, "In lama thang chhuah" chu hlenin khuang a chawi hial a ni. Tichuan, Zataia pawh Thangchhuah pa leh Zawhzazo pa lo niin, Tukverh zau tak a hawng thei ta a, Bahzar a siam thei tawh a, Vanlung a siam thei ta bawh a ni.

Chutia raltlan reng renga an kual hnua Khuang hial a han chawi leh ta chu an hlimin an lawm hle mai a, a raltlanna zawng zawnga zuitu, a upa pakhat hlaphuah thiam, Thansanga'n (Pu Bana), a fanu Thangchungnungi paw chungin heti hian hla a phuah a:

Thangchungnungi tahlai bang la.

Lalsanglur, i len nan e,

Rangpui Zodai, Chinlai khawtlang kan la e, a ti ta hial a ni.

Chalrang ramah hian kum 1900 thleng an awm a. 1901-ah Lungtana kamin, hetah hian a khua an pung nasa a, in pawh 206 lai an lo awm ta a ni. Lungtana an awm lai hian Khuang a chawi leh a. A nupui hmeltha tak mai, Lalpuithluaii chuan fanu hlii a hrinsak avangin a then a. Zataia chu a lung a leng hle mai a, Puithluaii chu koh leh a, tlang hial thut tirta a han rawt leh ut ut thin. Mahse, Lal fanu meuh hmeithaia tlang thuttir ngawt thu awm ta lo chu, nula fel tak Lalkungi a nei leh ta a. Lalkungi hian fanu a hrinsak hnu lawkah a boral leh ta mai si a, tichuan, Zataia chuan nula ngaihnohei tak, Zazawni a nei leh ta a, ani nen hian Lalhangkima Chalrang Lal leh Lalkhuma Hriphaw Lal hi an nei leh ta a ni.

Lungtana a awm lai hian, Zosaphara chu kum 1903-ah lo zinin Pathian thu a sawi a, Sikul a din a, Zirtirtu chu Lalhuta Sailo a ni. Sikul din a nih takah chuan, Zataia pawh khaw chhiar tura an ruat, Satruma nen chuan lehkhah te zir ve lehin, ziaik leh chhiar pawh a thiam ta mai reng a. Hetia ziaik leh chhiar a thiam hnua hi chuan, a khaw chhehvela lehkhathawn han thawn chhuah te a uar hle a, "Mizo leh Vai Chanchin Lehkhahu" thlakip chhuak pawh kha lain, hei phei hi chu tun thlengin a thlah ten an la vawng tha tlat a ni.

Lungtana kum 7 zet a awm hnu, kum 1908-ah chuan, tuna Khawhai tlangah hian a kai chho leh ta a. Heti lai hian zirtirtu Bawktea hoin sikul pawh an nei a, thenkhat sawi dan phei chuan, Biak in pawh an neia sawi a ni. Kum 1915-ah chuan khaw thar kai relin, Saichal ramah insawn an tum a, in 30 vel an kai hman ang tihah chuan, Niawn ramah(Khawhai ram tho) hian an kai leh ta zawh a ni. Heta an awm lai hian, Zataia

hmingthanna pakhat, a remhriatna a rawn lanchhuahna hmun a ni ta a. Khaw lu a Zotui, tui leh thianga em em mai chu rawphelin khaw chhungah an la a, khawlaiah an dirtir to to a, hetiang a tui lak hi Mizoramah a hma pawl tak a nih a rinawm. Chu chu Pu Bana bawh in hlain heti hian a chawi leh a,

*Tui in tih leh Zotui thianga khawmual kan la!
Sial in tih leh Tumpang khua mawiah leng e,
Tinrenga thangkima Hminglian pa! a ti leh ta a ni.*

Niawna an awm lai hian Tumpang chal lian zet, khawi atanga lo kal nge tih pawh hriat loh hian, Khawhai dil tui al tlan turin Khawhai ramah a rawn lut hlawl a. An chhui dawn dan chuan, Ralvawng lam atanga lo kalin Lungpum ramah a lo kai a. Chalrang tuikhur Lui rawn zawhin helaiah hian Bawlliana hnah la chuan a hmu hmasa ber a, a tukah No-a vate vengin, se rual zinga a awm chu a hmu leh a, hemi hnu lawkah hian, Neihzika Se pachal nen inbein a nak a pir thler sak duai nghe nghe a ni. Se pa dang pawh a tlawm zui zel a, heta tang hian Raifan ruamah tla thlain Luithuam dung a rawn zawh leh a, Khawhai Dil ruamah kai chho lehin, hetah hian a cham hlen ta a ni. Chutia a khuaa Tumpang cham ta mai chu Zataian a ngaihven hle a, a khawhar hmun danga a kal leh mai hlauin a kawm tur sial, Changpawla tla chu, naupangho a um chhuah tir a, Dil ruamah chuan khalh lutin tlaitin hian naupangte chu chi a thlah leh thlah loh en turin a tir thin a, chuta naupanghoin an va en thinna hmun chu tun thleng hian "Se en tlang" tih a la ni. He Tumpang hi Pu Bana bawh hian hla a chawi lehin,

*A khaltu Chawngtinlerin a tir em ni?
Khawhai Zopui vanhnuai khuatin lang tlangah!
Tumpang sial D ngai a cham reng e! a ti leh ta a ni.*

Tumpangin chi a thlah ta tih an hriat hnu chuan kahhlum zai an rel a, khaw pasalthaho chu a kap turin an chhuak a, mahse, an chhuah hmasak ni chuan Savawm nen an intawh hlauh mai a, savawm zawk chu an kap lo thei ta si lo, hemi ni hian Tumpang aiah Savawm lu zawk an hawn ta a ni. A tukah thawk nawn lehin, Pasaltha paruk vel nena thawk chhuak, Zataia fapa Thangkima Chalrang Lal chuan a kaphlum ta a ni. He Tumpang ki hi an roh hle a, tun thlengin Zataia thlahte hian an la vawng tha reng a ni.

Kum 1921-ah Niawn atangin Khawhai tlang sang lai, Zataia pa nau Kairuman kum 1881-1890 vela a lo thut tawh hmunah an kai chho leh a. Hetah hian kum riat (8) vel an awm hnu, kum 1928-ah khaw tlak lam Phaibawh ram atangin Kangmei rawn chhuakin, Khawhai khua chu a kang ta vak mai a, heta tang hian tuna Khawhai hmun pangngaiah hian an kai leh ta a ni.

Zataia nupuite leh an fate:

1	Lalpuithluaii	I. Laltinchhingi II. Lalsuaknguri
2	Lalkungi	I. Hmeichhia hringin a pian hnu rei lo teah a boral
3	Zazawni	I. Lalthangkima, Chalrang Lal

		II. Lalkhuma, Hriphaw Lal
4	Mankungi	Ani hian fa a hring lo.
5	Rokungi	I. Lalhminglana, Lungtan Lal II. Selbuangi III. Sangkhuma (Khawhai Lal hnuhnung ber) IV. Lallianvunga V. Lallianpuia VI. Lalrikhumi VII. Lalnguaua VIII. Lalmari IX. Lalzamliani X. Lalhlunchhungi
6	Kapthangpuui	I. Tlangrawti II. Thanseia III. Lalnguri IV. Vanpuilala V. Lalthangliani VI. Lalthanzama VII. Laldingi VIII. Lalthangpuia.
7	Kaithangpuui	I. Lalhmingthangi II. Lalthanzaua
8	Thatlemi	I. Lalchungnunga II. Darlakthangi III. Darrivungi IV. Rohnaa V. Lalthangthluaii VI. Lalthawmvunga VII. Darchungnungi VIII. Lalchawngpuui IX. Laldingliana X. Ngunliandawnga.

Lal Zataia hi Lal fing tih takah, a khaw insawh ngheh zelnah tur pawh a thlir thiam hle a. A fapa Thangkima chu, a khaw bul mai Chalrangah Lal tirin, a fapa tho Hminglana Lungtanah a thut tir bawk bakah, khawnbawl upa Denghminga fapa Thanglunga chu ram tang ei turin mi engemaw zat hruiin a inbawl hrantir ve bawk a, Tlangpuite pawh hi Tlangmawi ti a hming thlakin tun thlengin an luah ta a ni. Kum 1947-ah chuan Zataia pawh kum 83 lai lo ni ve tawhin a lo upa ve ta hle a, khawtlang awp turin chak tawh tawh lo a inti a ni ang e, a fapa Sangkhuma kutah a Lalna chu a hlan ta a, Sangkhuma hian kum 7 chhung ro rel ve lehin, Lal ban an nih takah khan Khawhai Lal Zataia leh a thlahte rorelna chu a lo tawp ve ta a ni. Lal Zataia hian kum riat a nihin Ngentiangah ro a rel tan a, kum 83 a nih thleng ro relin, kum 75 chhung a lal a, Mizo Lal zingah chuan Lal rei ber zinga mi a

nih a rinawm. Tin Lal Zataia hi Mizo Lal zinga fa ngah ber a ni bawk. Thil mak ve deuh chu, Zataia hi kum 80 a nih khan a ha bal tawhte rawn to tha leh vekin, kum 100 mi ni a, kum 1964-a a thih thleng khan a ha hi a la kim vek a ni.

PASALTA LEH AN CHANCHIN

VANGA RALTE KAWLNI : Lal Zataia khua, Khawhaiah hian mi hrat leh huaisen tak tak chu tam tak awm ve bawk mah se, a bikin ralpui han su tur emaw rawlrala mihrang han hmachhawn turin, Leido nei lo khua an nih avangin heng mite hian, intar lanna tur hun tha an nei lo kan ti thei ang. Chutih rualin, do lak te awm lo mah se, mi bik leh mi chung chuang bik erawh thup bo tak tak theih an ni lo thung. Lal Zataia khua, Khawhaiah pawh hian, mi bik a awm ve a, a hming chu Vanga a ni. Vanga hi Ralte KawlNi hnam niin, mi tlawmngai leh pasaltha huaisen zet mai a ni a, Sapuiin mi in hnuaia ran a rawn khawih ni khuaah reng reng, tlangvalho inhawr khawm chhungin, Vanga hian amah maiin sapui hi a lo hnawt bo leh hman mai thin. Khua ve ta riang ruang chu khaw dang nen inhmuhmawh ni-te an han nei ve thin a, Khawhai khaw chung lungni lo deuh khua leh Chemsen lena do lak hial duh khuate pawh han awm ve thin bawk mah se, Vanga a awm tlat avangin tu khua mahin Khawhai laka chemsen len hi an duh tak tak ngai lo.

Tuk khat chu Vanga zing buh phur tur chu Fei hawlin a kal a, Savawm a tawh phut a, Savawm nen chuan inbei nghalin Savawm chuan a hnar ngulah a seh a, Vanga pawh chuan savawm chu a chhun hlum ve bawk. A hnar ngul chu a thi duh kher mai lehngal a, Buh phur tura kal ve dang ten an va hmuh chuan, "E kha, i inhliam e lo?" tiin an han zawt a, ani chuan, "Sawlaiah sawn Savawm nen kan inelh deuh alawm maw le" a lo ti ve mai a, mite chuan," Khai a! i inhliam nasa a nih hi enkawl vat i ngai ang" tia an phili viau lai chuan Vanga chuan, "Kei chu ka tha e, a na zawk chu, saw, sawlaia saw a leh reng saw" tiin a piah deuh chu a kawh a, mite chuan, Vanga kawhna hmun an va en nak chuan, Vawmpui than kin zet hi a lo let reng mai chu niin!. Vanga chu zawn haw an tum a, ani lah chuan a lo duh lo nasa mai a, Savawm hlado chu thi per sung sungin a chham a ni an ti.

Vawikhat pawh, vawmtlakah savawm lian zet mai hi a tla a, a huk dum dum mai a, feh kal tur hoin an va hnaih deuh chuan, seh tumin a lo hai zuau zuau mai thin a, feh kal turte pawh kal tlang ngam loin an lo ding khawm tuau a. Chutihlai chuan Vanga chu rawn thleng vein, savawm awmna lam a va pan ve chu, savawm chuan, seh tum chu sawi loh, rum pawh a lo rum khum ngam reng reng lo mai a, "a khup zul mai e" an ti. Ramsa kawlh tak take pawh hian mi huaisen mit meng hi an lo tuar thei der lo mai a lo ni awm e. Lal leh upa te meuh pawhin an zah der thiam hle a, a thu hi an kalh ngai meuh lo an ti. Hetiang, mi bik leh khawtlang muantu pasaltha hi kum upa lo tein a boral ta hlauh mai a, khawtlangin an uiin khawtlang pawh a ngui nghuai mai. A pa Kawla KawlNi thlan(Lung mak tia tun thlenga hriat tak) bulah, Vanga Ralte kawlNi chu a zal ve ta a ni. A thlanlungah he thu hi an ziaak,

TLANGVAL HOTU THA BER
VANGA KUM 50
MITIN PHAW A NI FO. MI A ITSIK LO.
PUANTIAL

CHAWNGLUTA: Chawngluta hi Dawn pasaltha Ralbila lu la a, Mizorama Lusei leh Pawi indo tawp khartu kha a ni a. Ani hi, a hun hmasa lamah chuan Chawngtlai Lal Nikuala pasaltha a ni a, a hun hnuhnung lamah erawh Khawhai Lal Zataia hi rawn belin, Khawhaiah hian a lu pawh a phum nghe nghe a, a thlahte pawh tun thleng hian Khawhai leh a chhehvel khuaah an la awm nual a ni. Heng a fate hming atang ngawt pawh hian pa ropui tak chu a ni tih a lang thei awm e: 1. Zakunga, 2. Vawmkungi, 3. Hmarkili, 4. Khawchhani, 5. Biakveli, 6. Thangrawia, 7. Ralthatkungi, 8. Vanhnuaithangzoa. A thih kum chiah hriat a ni lo nain, pa ropui tak a ni tih chu a thlanlung he thu zia atang hian a hriat.

HRIATRENGNA
CHAWNGLUTA
THANGCHHUAH
KUM 80
2 A THAT. RUAI 60
A THEH. BUH 1000
A THLO. SIAL 10 A TALH.

ROTHANGA: Ani hi Lal Zataian tlang hrang a chan hnuah a pa Sailo Lal, Lalvunga pasaltha huaisen a chhawm zui tak zel a ni a. Lal khawnbawl upa ni zuiin, Khawhai Kanghmun awm laiin a boral a, a thlan lungah he thu hi a inziak.

MIHUAISEN PASALTHA
RAL 16 A THAT, SA 27 A KAP.
KUM 94 A DAM.

TINHRANGA: Tinhranga hi kum 1860 ah a piang a. A pa hi Darphunga Chhangte Darchhun hnam niin Lal upa a. Amah hi mi danglam tak niin, Taivang bu chawh darhah, a mawng hlima thut ngam lohna a nei lo. Vawk chaw chhuma thil dang an thlak te, chhawhchhi kan te thleng hian, a kutlawng ngawtin a chawk thin a, "Mei sa pawhin a kang ngam lo" an ti hial thin. Vawikhat pawh, Niawn ep, Lungtan pangah Sakei huai an zim a, ani chu hual lutah a tang a, Sakei chuan ngawi zawn lam pan loin a hualtu mipui lam chu a pan ta mai a, mipui seh tumin rawl nen a rawn rum ta hem hem mai a. Chutia sapui inhrosa ang sen huam lai tak mai chu, Tinhranga chuan a fei chuan a kaah a lo chhun siah mai a ni. A chhun lai hmutu, pu Chalthanga chuan, " Sakei mit meng leh Tinhranga mit meng chu a hlauhawm dan a inang rengin ka hria" a ti. He a Sakei chhun hming chawi hian a tupa hmingah pawh, CHHUNCHIANGA a sa nghe nghe. Khawhai khawtlang tana thih tih lo, mi huaisen chu kum 1917 khan a boral ta a ni. A thlanlunga thu zia hi han dah ve leh ila:

TINHRANGA A PA DARPHUNGA
LAL KHUA LEH TUI CHHANTU THA TAK A NI. MI A ITSIK LO.
HLAUHAWMAH MITIN PHAW NIH A PEIH FO.
A PIAN 1860. THIHNA 1917

NGAIVUNGA: Sa leh ral hma a zam ngai lo a ni. Vawikhat chu, a hoin Sakei kara tla hliam an um a. Sakei chu thawk lekhatah a rawn huk dum dum mai a, an inhnaihchilh deuh tawh bawk nen, sapui lah chu a huk ring nasa mai si a, a hruaite chu hlauin an tlu ta pheng phung a, ani erawh a ding khawh to mai a, sakei lo ang sen huam mai chu a fei chuan a chhun vak mai a, a chhun hlum ta der mai a ni.

Vawikhat pawh, Chalbengpeha (Chalkunga) leh a thianpa chu, Tualte Benvawn ram chul thlamah sazu chhun turin an riak a. Chutia an han mu chu sakei a lo kal thut a. Chala chuan a hlau hle mai a, thlam bang kilah siksilin a inkhuh a. Sakei chuan a thianpa chu a la ta a, thlam tlaitlanah chuan a han thing nawk a, a seh ri ta buaih buaih mai a, hnuah an haw kawng tur vau lamah chuan a pu ta daih a. Chala chu a mang a angin a hlau hle a. A haw dawn leh a haw kawng tur lamah sakei chu a awm si, a awm reng dawn leh sakei chuan amah chu a rawn la ve leh mai ang tih a hlau bawk si. A tawpah chuan hlau chung chungin meichher a buatsaih a, chak takin a tlan haw ta a. Khua a thlen chuan zawlbuka tlu lut rawkin an thil tawn chu a han sawi a. Tlangval rual chu Chala thianpa ruang la tur chuan an chhuak nghal sung sung a. A hmun a hlat tham deuh avangin an duh ang pawhin an thleng hma thei lo. Chala te riahna ram an hnaih ta deuh tihah tlangval rual chuan hla deuh taka silai ri fiah lo deuh tak hi an hria a, hmanhmawh takin silai rikna lam chu an pan nghal a, an han thlen meuh chuan, Ngaivunga chuan ruang chu amah chauh chuan a lo thutpui a. Sakei chuan a lo ei zo thelh hi a lo ni a, a mal bawr tlemte chauh a lo dah tawh a, chumi a va hmuh chuan, Ngaivunga chuan a thiante chu chin hrih nan a silai a lo hmet puak a lo ni. A thiante hma feah, amah chauhin sapui chu a lo um tawh chu niin! Hetia a fala sapui a chhui hi a lar zui ta bawk nen, a tupa hmingah chuan, Thangfala a sa ta nghe nghe a ni.

THANGBUAIA: Thangbuaia hi buan chak leh tlangval huaisen a ni. Tumkhar chu Sakei an zim a, a meiah a man a a chaih hrep mai a ni. Ani hi nupui a neih hnuah Lal khawnbawl ni zuiin, Lal chhungkaw humhima vengtu leh Lal chhantu ti a sawi zui fo. Kum 72 mi niin 1983-ah khan a boral.

K RANGKHUMA: Vawikhat chu karin sakei a kap hliam a. Tukthuan ei hmain, Rangkhuma chuan amah chauhin chemtum nen a chhui zui a. Leipui fing zeta thui a chhui zui hnu chuan sakei hliam chu a hmu ta a. Chemtum nen chauha thawk chhuak a nih avang chuan, sakei, a kawlh tawh leka hliam chu beih zui miah a ngai lo a, haw lehin Lal hnenah a va thlen a. Mahse, Lal chuan, "Chhui zui leh ngam lo tur ten mahniin kar en tur em ni?" tiin a lo kamkhat ta tlat mai a. Rangkhuma chu a lai a na hle a. Sakei hliam awmna thleng a chhui tawh a, chemtum nen chauha kal a nih avanga bei zui lo mai a nih laia chhui zui ngam lo ang hiala Lal meuhin a lo chhuah chu, a thin a kheiin, tukthuan ei khama an han thawk chhuak leh zet chu, sakei meia mana chaih a tum ruh hle. "Vawiin chu sakei meia ka chaih loh a takah, sakei seh" tiin a phun a phun ta mai a. Sakei awmna an han thlen chuan, midang tlan khalhin sakei awmnaah chuan a zuang lut rawp a. Sakei meiah chuan manin thingtuaiah a vet nghal a, mahse, chutia a meia man ngawt chu sakei chuan a lo duh bik I khaw lo mai a, a vir kual thut thut a, Rangkhuma chu a seh thawi ta thuak thuak a. Amaherawhchu, sapui meuhin a hap thelh thuak thuak chung pawh chuan, Rangkhuma chuan, tlan a tum der lo, nghet zetin sapui mei chu a chelh tlat a, chutia an inchaih buai lai chuan, sakei chu Thangbuaian a lo chhun a, midangin an rawn pui zui ve ta bawk a, sakei chu an chhun hlum thei ta a ni. Rangkhuma pawh chuan a lo tum lawk leh sawi lawk ang ngeiin sakei mei chu a chang ta a ni. He sakei mei hi Rangkhuma fapa, K. Vanlalngenan Khawzawlah a la kawh a ni.

KHAWHAI MI BIK CHANCHIN

ṬHUAMA (ṬHUAM CHAKA): Ṭhuama hi a chak em avangin Ṭhuam chaka ti a sawi ṭhin a ni. Kum 1887-ah Arthlawr khuaah a piang a, kum 1901 velah Lungtana Zataia kai tir chu a rawn bel a. A chaka a len em avang hian Zataia chuan a upa atan a ruat a. Khawhai leh a chhehvel khuaah hnehtu tumah an awm lo. A pianzia hi a danglam ve hrim hrim a, a hnung lam aṭanga en chuan a kul khuau a, a hmalam aṭanga en lehin a eu ulin a lang leh bawk si! A mut zangthalin a awm chu sum thum pil a ni. Heti taka lian leh chak ni si hian, inbuanah mi a hneh hmasa mai ngai lo, a inphawi tir phawt zel a, an uan zui loh pheih chuan, chak lo zawk anga awm mai a hreh ngai lo. An uan zui deuh erawh chuan a vawrh hrep zel. Vawikhat pawh Lal Zataia zuia hmar lama an zin ṭumin, an thlenna Lal ina an zu khawn chu, chu khaw buan chak chuan, Lal Zataia nen chuan inbuanah a cho tlat mai a (Zataia pawh hi inbuan thiam leh chak a ni a, feet 6 zeta sang palian pui a ni). Zataian, "Min cho tlat si chuan a te zawk hi i han bei chhin phawt dawn em ni ang?" (Ṭhuama hi a dungah chuan, Zataia aiin a hniam hret) a han ti a. Tichuan, Ṭhuama nen chuan an han inbuan ta a, Ṭhuama chuan a hneh ta reng reng lo mai a. A buanpui pa lah chu a ṭawng nuam tawhin a chapo viau mai lehngal a, Zataia chuan tlawmah a la a, "Ṭhuama i hneh lo tak tak em ni?" a han ti leh ngat a, Ṭhuama lah chuan, "Hneh a hneh loh pawh a awm nang, khawtual mi hian hnehna han chang se ka ti mai a nia" a lo ti sam et si. Zataia leh an thlenin Lalpa chuan, "A nih leh naktukah Lal mualah hian favai chhun vum chungah ngei inbei ṭha leh rawh u" an ti ta a. A tuka an han inbei leh zet chu, Ṭhuama chuan, Favai chhun vum pel zawk zawkin, a duh hun hunah, a vawrh a vawrh ta mai a, Chu khaw buan chak chuan, "E khai, mihring tha pawh a ni lo e, keini buan mi rual a ni lo" a ti hial a ni.

Vawikhat pawh, Hmar Khawlianah Zataian a hruai a, he khua hi in 1000 zeta inchhal niin an Lal chu Vanphunga a ni. Hetah hian, Ṭhuama leh an khaw chak ber chu an inbuan tir a, a chak zawk chuan "Chak no" an dawm dawn a ni. Chawhtawlhah Hranden zu an siak eng kung a, mipui chu Lal mualah an rawn pungkawm luih luih a. Inhlahthlem lo a ṭang turin an Lalte ve vein an fuih nasa bawk a, an han ṭan phat chu an innawr ri ngal phat mai reng a. Chutia inhnehtawh hmel deuha an awm hnuah chuan, Zataian, "Khai le, Ṭhuama thapui han chhuah teh le" tia a han fuih zet chu, Ṭhuama chuan, a tha a han thawh ve ta tak tak a. Hmar Khawlian buan chak chu a vawrh zawk mai a, Vanphunga khaw buan chak chu a tlawm ta a ni. Vanphunga chuan Zu chu Sekiin a han theh a, "Hawh awi, in rawh, Awm lian!" A ti a, tichuan, Ṭhuama chuan chak no a dawm ta a ni.

Vawikhat pawh, Tlangpui leh Thinglian khaw inkara chi khura mi chi teng turin, Thangzanga nen an kal a. Khaw hrang hrang aṭanga chi teng tura kal tlangval rual chu chi khurah chuan an lo awm khup a. Khaw tina inbuan chakte chu inbuantir an rawt a, a chak lo lo chu vut saa intheh an ti a. An han inbuan ta chu, Ṭhuama chuan a paih ta zawt zawt mai a. A bulah chuan a ṭhianpa Thangzanga, Ṭhuama aia lian zawk lo awm ve chuan, "I hneh loh apiang ka bitum zel ang" a lo ti ve chher chher bawk a (ani hi chuan inbuan a thiam ve lo), mahse, an hlau hle a ni awm e. Ṭhuama chuan a tumte chu dimna nei hauh loa a paih tak zawt zawtah chuan, a bula mite chuan, "Naua, i thin a rim em ni?" an ti hial a, Ṭhuama lah chuan, "Rim lo e, vut saa intheh ka duh lo alawm" a lo ti sam et mai a ni.

Kan sawi tawh ang khan, Lal Zataia pawh hi inbuan chak a ni a, amah a lianin inbuan pawh thiam tak a ni. Ṭhuama nen hian an inbuan fo a, Lal a nih vang nge ni, inbuan fangah chuan Ṭhuama hian a hneh ngai lo. Mahse, Lal Zataian belpui inchawi a han rawt ṭumah erawh, sam tein Ṭhuama chuan a phawi leh mai thung ṭhin si a ni.

Ṭhuam hi a pianphung rengah a chak tih a hriat ang chiah hian, inbuan chauh loah pawh a chak hle a ni. Vawikhat chu Lal nen an inel leh a, Lal kawt zawlah chuan mihring pil tawkin lei an lai khuar a, chutah chuan an ṭhu a, kawtah chuan se chal dintirin a nghawngah chuan hruiin an hling a, hrui hmawr lehlam chu khur chhunga ṭhu chungin, an vuan a. Se chal chu an vaw ta vak a, se chal thinrim chu a tal ta vak vak a, hetia se chal meuh a han tal takah chuan, hnuh beh tlat chu a har bawk a niang, Lal chu a kang zuau zuau a, Ṭhuama hnuh ve ṭumah erawh, a lu a lawr ve zeuh zeuh chauh a ni.

Chemfawng leh Hreiha a zawnin Chem leh Hrei rawih a ngai ve lo, a kutin mau bulte chu a pawt phawi zung zung zel mai a ni. Vawikhat pawh chhim lam buan chakin a rawn cho a, Ṭhuama feh chu, mikhual pa chuan lo zaupui aṭangin a rawn luh pawh rawih mai a. Ṭhuama a han hmuh chuan lian a ti hle mai a, mahse, a cho tum Ṭhuama chu a ni tih erawh a hre lo. Khawhai kalkawng zawtin, Ṭhuama buan tura kal a nih thu a han sawi chuan, Ṭhuama chuan, "Kan vauah sawn, chul hlui hruih a awm a, lo va pawt fai la ka hman veleh ka rawn pawhpui dawn che nia" a ti a, mikhual pa pawh chu a kal ve ta mai a. A hnu a, Ṭhuama a va thlen phei ve chuan, mikhual pa chuan, hruih hlui maute hmun chu lo pawt faiin, mau bul pawh a lo pawt phawng ve nual a, a pawh phawi zawh loh tlem erawh a lo zuah a, chung a pawh bang ho chu, Ṭhuama chuan sam tein a pawt phawi zung zung mai a, mikhual pa chuan, Ṭhuama chu beih mi niin a hre ta lo a, a buan ta lo a ni.

Ṭhuama hian, rua a sah chhum hmawh hian, a chang zawl leh zawl loh enin a duhtawkin a lek kang vel thei tlat! A pian phung renga chak tura piang, Zawlbuka an han mu pawh hi, an chep deuh chuan, "Ṭhuama zangthal teh kan chep deuh e" an tih ṭhin khawp a, awm tut, a zangthal aia a saisira hmun awh hnem zawk kha a ni.

Hetiang taka chak leh lian hi nimah se, thihna meuh chu tu sual hneh rual ni bik hek lo le, Kum 1932-ah khan, kum 55 mi chauh niin Khawhaiah a thi ta a ni.

ZATAIA SAILO: Khawhai Lal Zataia hi Khawhai mi bik huang aṭanga nek chhuah rual loh a ni ve tlat mai! Lal a nihna hi chu thu hran ni se, amah hi pa lian, feet 6 zeta sang a ni a, inbuan a thiamin thahrui a nei bawh a, buan fangah phei chuan Ṭhuama meuh pawh phawi ve fo thei kha a ni ve reng a. Belpui chawiah erawh Ṭhuama a khan lo deuh ṭhin a. Inbuanah hian, Ṭhuama hi hneh lo mah se, lung denah erawh Ṭhuama hian a tluk lo thung. Tin, amah hi a huaissen hle a, vawikhat chu a u Ralṭhiaua vangtlang Lal nen, Vangtlang kawnga an kal laiin Savawmin a rawn bei thut a, a u Ralṭhiaua chu Savawm chuan a bawhbet tlat mai a, Zataia chuan, an bula Fah tuai banpuam tiat ṭeltawl chu ulhtliakin Savawm chu a vawhlum ta a ni.

Vawikhat chu, Hmar lam Lal Hrangchhuana khuaah an zin a, Lalho chuan Lung inden siakin Zataia chuan a deng thui ber a, Hrangchhuana chuan, "Kan Pachuau tlangval chuan a deng thui mang e" a ti nghe nghe a ni (Zataia nu Dari hi Pachuau a ni). Ṭhuama nena Sechal an inhnuh siak chungchang chu kan sawi tawh kha.

Lal dangte lakah pawh a duai lo hle a, kum 1920-1950 vel lai khan, Mizo Lal zinga chak ber a ni. A lungphunah pawh, "LAL ZAWNG ZAWNGAH A CHAK BER" tih a inziak nghe nghe. Hei hi finfiahna neih har deuh tawh mah se, April ni 30, 1942 a Lushai Hills Superintendent-in Mizo Lalte leh an ṭhuihruai 300 chuang Lammuala a kohkhawma Union jack hnuaia rinawmna thutiam a neih tir ṭum khan, Lalte kha a inbuan tir a, hetah

hian Zataia hi a chak ber a, lungdenah pawh a chak ber baw. Zataia hi a chak a ni satliah mai lo a, Lal a nihna zawnah pawh a ropui hle. Khuang vawithum chawiin, heng khuang chawi nan hian Tumpang hli a hmang nghe nghe. Ruai vawi tam buatsaihin heng tlang hrai nan hian, Sial 110 leh Bawng pali (4) a talh a ni. Tin, Zataia khua hi an tam ve ngai lo a, tawngka lamah pawh, "Zataia kuaah buh bua an rut ngai lo" an lo ti hial thin.

MAM-EKA (HRANGKAPTHUAMA): Pu Hrangkapthuama hi Mam-êka ti a hriat lar a ni a. Hmanlai chuan, lo neih hi Mizote eizawna ber a ni a. Hnathawh chak deuh leh thawk thei lo deuh an kar a hla hle thin. Pu Mam-êka hi chu, hlo thlawh chaka Zoram tlang tluana lar pha a ni a. Tuichang rala awm ni mah se, khawthlang tlangdungah meuh pawh, tlangval an lawmnute nena hlo thlo tang tak tak chuan, "Khaw'nge, keimah Mam-êka" tiin pu Mam-êka hming hi an chhal lauh lauh thin. 'A hlo thlo hi, hnim nung lai chek pawh a ang lo, a awmsa la hi a ang ber' an lo ti hial thin.

HMUNLIANI: Hmunliani hi a pa chu Hranghleia a ni a, nula hmeltha lar tak a ni. An hunlai chiah erawh hriat a har deuh tawh a, kum 1920 hnu lam mi a ni tih erawh an sawi hmang atangin a hriat theih. Ani hi khual kai nula hmeltha kan tih ang chi kha niin, khual ral hla tak tak atang pawhin amah en turin anrawn zin hial thin. Titi-ah pawh, "A bulah chuan pa tar sen zet tawh pawh hi thisen a lum thar leh a, naupang leh ta riaua inhriatna kan nei hial thin. Tlangval leh rawlthar mai ni loin, mipa naupang chen hian a hu sual hian kan awm engemaw ti surh zel e" an tih hial chu!

LUNGPHUN LEH HMUN HMINGTHANGTE

LUNGVANDO: Lungvando hi Khawhai ramah hian a tamna bik hmun hnihah a awm a. Mualkhang ram, Kawnpui hla leh Kawnpui hnai inkarah te, Dampui tlang sangah te, tlang dung nuam lai takah Lungvando hi a awm thluah a. Heng lungvando te hi tlu bung tawhin, a tlu bung ringawt pawh hi a sei pawl chu feet 12 lai an la ni a, a chhah lam hi 6 inch atanga 10 inch vel an ni tlangpui. A bung hrang hrang hi 50 vel zet a ni a, tlangdung sahmul thenna lai takah a inphah zur a, kal nan tak an hman avangin a lung pawh hi a keh sawm nual tawh nghe nghe. A lung pawh hi a chang tha hle mai a, a hmunhma en chuan, helai velah hian hetiang lung tha han lakna tur hmun a awm si lo a, a lung hian lui lung lam a ang bawk nen, a phuntute hah dan tur leh an lakna hlat dan tur han chhutpui phei chuan, hetiang lung sei leh rit tham an lo phun thluah thei mai hi thil mak tih loh rual a ni lo. Tin, hemi ang tho pianhmang nei hi, Khawhai leh New Chalrang inkar tlangdung te tak teah a awm baw a, heta mi hi chu Mualkhang rama mi ai chuan a tlem zawkin, khawlai lun laite a lo ni bawk nen, in sakna atan an la darh zo ta a ni. Tin, heng hmun hnih bakah hian, Khawhai ram chhung hmun engemaw zatah Lungvando hi hmuh tur a la awm baw. Hmundanga kan hmuh danah hi chuan, a hlawma Lungvando phun teuh hi a awm ngai meuh lo a, heti taka Khawhai rama Lungvando a tam mai hian ngaihtuah a ti thui hle. Lungvando hi tute phun leh tute hnuhma nge tih hriat a har hle a, kan pipute pawh khan, van chim tur dona a ni a, a hming pawh Lungvando a ni, an lo tih daih tawh avangin, Mizo nawlpui thlang tlak, 1750 hma lama lo awm tawh ni ngeiah a ngaih theih awm e.

LUNGZEH KAWN: Helai hmun hming hi mi thenkhat chuan, Lung ziah kawn, tiin an sawi bawh thin. Helai hmunah hian, lungphun feet 8 vela sang feet khat vela hlai a awm a. He lungah hian, milem lianpui mai inkerin, thi a awrh buai a, a sirah ramsa lem leh dar bu lem niawm tak tak a awm nual bawh. He lung pawh hi, lui lung ngei niin a lang a, he lai hmunah hian hetiang lung han lakna mai tur hmun hi a awm loh avangin, he lung an phun chhan hi mi pawimawh tak a nih ngei a rinawm a, hla taka atanga hetiang lung lian lak a ngaih phah hialna khawp chu, mi satliah a ni hauh lo ang. He lung hi chu an hnuhma atang hian, Mirawng emaw Gangte emaw Hmar ho emaw hnuhma ni a ngaih theih a ni.

PASALTHA LUNG: Khawhai tlang sang lai, Kanghmun Lal mual (tuna Lal in dinna) hrulah hian, lungphunah milem a pawnga ziaak(Vangchhiaa mi ang hi) a ding a, milem inziahna hi lung pakhat niin, lungphek lian tak, engmah inziah lohna nena phun dun a ni. He Pasaltha lung phei hi chu, a pawnga inziak, an hnuhma pawh mam tak a nih avangin, a hun pawh a rei tawh hle ang tih a Chiang a, mi ropui chungchuang tana phun a nih a rinawm. He lungah hian, mi lem lian tak a pawngin a inziak a, a tukkhumah sam zialin, fei a keng a, chem sei a kawngah a pai bakah, a kut lehlama mi pahnih khai chungin, vaibel a zu a. A sirah ramsa lem chi hrang hrang awmin, mipuiin amah chu an hual vel a. Lungphun hnunglamah hian, satel lem ni ngeia ngaih theih a inziak teh bawh. Kan sawi tawh ang khan, he lung hi engtik laia lo phun nge, tunge a phuntu tih chu chhui har tak a ni tawh a, helai tlanga hetiang lungphun upa leh a pawng ngata milem ker lo awm mai hian ngaihtuah a ti thuiin, he lungphuntute themthiam dan tur min ngaihtuah tir thin.

CHAWNGLUTA THLAN: Mizorama thim leh eng inthena, thimin Zoram khawvel a tuam mup mupna lak ata min hruai chhuakba, enga kan luhna. Tiau thlang lama cheng Zohnahthlak ten, Tiau chhak lama cheng Pawi ral kan hlauh a lo tawpna hun, Mizorama Lusei leh Pawi ten lu an inlaksakna hnuhnung ber thlentirtu, Dawn Pasaltha Ralbila lu la a, Seifate tana Pawi ral hlauh titawptu Chawngluta thlan hi Khawhai Kanghmun phulah tun thlengin a la ding.

ROTHANGA THLAN: Pasaltha mi lu 10 khai mah ropui tiin hahipa kan sawi thin a nih ngai chuan, Zataia pa Lalvunga pasaltha Rothanga, mi lu 16 ngawt khaitu hi a ropui lo bik dawn em ni? A thlan hi tunah Khawhai phulah hmuh theihin a la awm.

CHHURA CHENGKEK LAWHNA: Thawnthuah chuan Chhura hi Tiau chhak Surbung khua niin, a faten tuna Champhai bul Zote khua khi an rawn luah a, chu chu a hnu deuhah Chhura chuan rawn zawm vein, Zote atang hian hmun hrang hranga an kai hnuah, Lungtan leh Lungphoah te an kai leh a. Heta an khawsak lai hi Nahaia nena an vanglai kha niin an sawi. Hetih hun lai hian, Lungtan emaw Lungpho emaw atanga an ramvak chu Khawhai tlangah kaiin Chengkek hi lawh a tum ta a ni awm e. Heng khua atang hian, hmar lam nawr zelin, Mizo mi hmingthang Chhurbura chu Manipur-ah a va thi ta a ni. Helai hmun chhinchhiahna lungphun lo awm sate chu, Khawhai Historical Association ten chei thain tlawhtute tana awlsam zawka chhiar theih tur ziahna lung an phun nghe nghe.

SIALIN SAKEI A SIK HLUMNA : Khawhai Kanghmun panna kawngchhak lam, Daibawl kawn thlen phei hma deuhah hian, Sialin Sakei a sik hlumna hmun a awm a. Helaiah hian,

Sechalin Sakei ko pangah a si bet a, rei ngial a sik beh hnu leh sakei pawh a thih chian hle tawh hnuah chuan, Sechal chuan a thil sik beh chu thlah a han tum a, chutia a han thlah dawn chuan, Sakei thi tawh ko panga Sechalin a sik beh chu tang thei bik ta hek lo, a che ve leh hrut thin a. Chutia Sakei a chet leh zel avang chuan Sial chuan Sakei chu la thi loah ngaiin a si bet leh zel a, Sial neituten an va hmuh meuh chuan, Sial pawh chu tui leh chaw loa a awm rei tawh avang chuan a lo thi khawng reng tawh mai a ni. Helai hmun hi, Lal Zataia fapa Lalnguaua te thin dun chuan chhinchhiain, chu ko pang lungah chuan, Sialin Sakei a sik hlumna hmun a ni tih hriat nan, Sialin Sakei a si lai lem an zia ta a ni.

LUNG MAK: Lung mak kan tih hi, Kawla Kawlni thlanlung niin, a fapa pawh, a chanchin kan sawi tawh, mi huaissen Vanga kha a ni a. He lung hi, zung thum beng awrha chhah ni siin, a sir hmalam deuh atanga thlir chuan, hnunglamah a kul deuh dunin a lang, a hnung lam sir deuh atang han thlir leh chuan, hma lamah a kul leh deuh dun baw si. A lung tlang hek dan hian, hetia a lan dan hi a hriat, lung pan te ni chung si a hetia a lang tlat hi thil mak tak chu a ni ve awm e.

LAL LUNGDAWH: Mizo Lal zinga Lal rei ber, kum 75 zet lal, Mizo Lal zinga fa ngah ber ni baw, Lal zawng zawng zinga chak ber ni baw, Khawhai Lal Zataia thlan hi 'Lal lungdawn' tih niin Khawhai tlang chhuah lamah sang leh lian bik taka phun a ni.

MI CHAK LUNG: Khawhai Kanghmun tlangah hian, Zoram deng chhuak khawpa mi chak Khawhai khuain a neih, Thuam Chaka leh Khawhai Lal Zataia te pualin 'Mi Chak Lung' feet 7 zeta sang chu, Khawhai Historical Association-in a phun a, he lung hi kil thum nei niin, kil khatah Khawhai chanchin, kil khat leh chu Lal Zataia chanchin, kilkhat dang leha Thuam Chaka chanchin te zia a ni. Mi chak lung hi Khawhai chhehvel atanga tanin, Mizoram puma mi chak ho huap kim tura phun belh zel tum a ni.

KHAWHAI DIL: Hmun hmingthang zingah Khawhai Dil hi hmai h rual a ni tawh awm lo e. He dil hi Mizorama Dil hmingthang dangte anga thawnthu sei tak nei a ni ve lo a. Tuna Khawhai dil chhak chiaha dil dang awm, Puaka Dil kan tih chia hi tunhma lamah chuan a awm thin a. Hei pawh hi dum hmun mai niin, tui dawlin a bawh khat chuk thin. Hei hi Khawhai hming hmasa atana Hmar hnam lo chengten an phuah chhan, "Demdum" (chirhdum hmun) an tih takna chhan pawh a ni. Hetihlai hian Khawhai khuah chuan, mi pakhat, mi pha chia lo deuh hi a awm a, a hming chu Puaka a ni. Ani hian a kut leh keah kaw a bun avangin thui tak a thleng ngai lem lo a. He lai dila dum hi nitin haiin a koah chuan a hai chhuah sa chu a khuah nan a hmang ta zel a, tichuan, tuna dil chhak zaw, 'Puaka dil' kan tih hi a lo piang ta a ni. Khawhai Dil tlang zaw leh kan sawi tur ber zaw pawh hian ropuina danglam tak a nei hran lo. A ropuina awm chhun chu, tlangsang laia Dil awm tlat hi a ni kan ti thei ang. Khawhai Dil chaw tur hian Khawhai tlang phul hmun mawi zet mai chu a ding luah a, he dil hi tlangsang laia awm e ti loin, tuihna awm thatna a ni tlat a, a sirah hian, tunhma deuh khan, helaia awm thin sipai hoin tuikhur an siam nghe nghe. A tirah chuan he dil hi dil lian a ni lo a, tlemte chauh tling thinin a khuahna lah a awm hek lo. Chu chu, Lal hmathlir thui tak nei, Zataia khan, Khawhai tlang a thut hnuah a khuah tir a. Thingtuaia hungin a laia lei an chung mai a, mahse, furpui lo thlengin tuihawk tlingkhawm a tam nasa mai si a, chu chu daw loin a khuahna chu a chim leh a,

chu chu Zataia ho chuan an siam tha leh a, Khawhai dil chu lian zawkin a lo awm theih phah ta a ni. Dil an khuap hi Khawhai hla kungpui Pu Bana'n hlain heti hian a phuah a:

*Kan siam tak e, Laldang pa'n a rel sual lo,
Dilpui hmingthang khua thalah kam lo nang e,
Chhailai lung di nena leng bualna*

Tichuan, hun lo kal zelin, kum 1960 vel khan a khuahna lungrema tihthat a lo ni leh a, kum 1995-ah pheih chuan sawrkar sum hmangin sang zawka khuah a ni ta zel a ni.

DAIBAWL KAWN: Zataian Khawhai Kanghmun a thut lai hian, Christian an la tlem hle a, mi pali emaw vel chauh an la awm awm e. Heng hunlai hi chuan, an natnate tidam turin, tui huai, tlang huai leh huai hrang hrang an be thin a. Chutia an natna tidam tura an inthawina kawn chu, tun thleng hian, 'Daibawl kawn,' tih niin helai hmunah hian Khawhai Historical Association ten Lung an phun nghe nghe a ni. Hetih laia, Puithiam Bawlpu hnuhnung ber hi Bawithanga niin a thlahte pawh Khawhaiah hian an la cheng a ni.

ṬAWNGṬAI TLANG: Khawhai Kanghmun atanga tuna Khawhai khaw hnaih lam, Khawhai Kanghmun atanga Daibawl kawn pelhah Ṭawngṭai tlang a awm a. Christian hmasate khan an Lal leh Puithiam te an hlau si a, khaw chhungah an inkhawm ngam si lo a. Bawlpu inthawina Daibawl kawn chu kham pangah helin zanahte he ṭawngṭai tlang hi an pan thin a ni. Helai hmun chhinchhiah nan hian, Khawhai Branch KṬP ten lung an phun nghe nghe.

SIALI LUNGLÉN TLANG: Siali kan tih hi a hming tak chu, Siallutvungi niin Siallukawt khua a cheng thin a ni a, Khawhai tlangval Vungdailova nen inneiin, an fa pahnihna chu kum thum mi awrh a nihin a boral hlauh mai a, chutia fa sun lungleng khawhara a van ruai chu, a pasal Vungdailova (a hnuah Zataia khawnbawl upa niin, Vai lian laka Zataia raltlanna zawng zawngah khan a zui tluan parh) chuan hrethiamin, "Hna tul reng reng chu ngaihtuah duh suh, nuam i tih ang ang khan awm tawp mai rawh" tiin a hnem a. Siallutvungi pawh chu, an khaw bul tlangchhip thawveng tak, Daibawl kawn leh Hruk kawn inkara mi-ah chuan chuang thinin, nitin maiin an khaw hlui Siallukawt lam a thlir thin a. Heta tang hian, 'Siali lunglen tlang' tih a lo pu ta a ni.

BAWNGTEA KAI: Bawngtea hi Khawlailung khua a ni a, a huaisen leh tuan ran em avanga Lal Zataian Khawhaia pem tura a sawm ngat a ni. A tuan ran leh huaisen zia an sawina hi han tarlang ila. Vawk note lak hran rual an han chhuah hian, patling pen hnih vela hla an thlen hmain a man hman zel. Sa leh ral hran nikhuaah pawh chhan hman loh a nei lo. Mihring dinhmun hlauhthawnawm deuh chu a chhan hman zat zat an ti thin. Hetiang taka tuan rang leh huaisen a nih avang hian Lal duhsak pawh a hlauh a, a lawmman atan tuna Kawlkuma kai pia deuh a, kawrte chu a hming chawiin Lal Zataia chuan, 'Bawngtea kai' tih hi a vuah ta a ni. A fanu Kaichhingi fate pawh tun thlengin Khawhaiah hian an la awm.

LUNGSUM: He lung sum hi eng hun laia siam leh tute siam nge tih hriat a har tawh khawp mai. He Lung sum hi, Hruk kawn chhak lawk, Chhura chengkek lawhna bul maiah a awm.

KHAWHAI TLANG: Mizorama tlang kan neih zingah chuan a mawi ber a nih loh pawhin, a mawi ber pawl chu a ni pha ngei ang. Tlang hrang hrang inzawm khawm hlawm lian tak

niin, phul hmun mawi tak mai, Khawhai parin a bawm chekna hmun a ni. A tlang a sangin a thengthaw nuam em em a, khaw thlir a remin khaw thian ni pheih chuan, he tlang atang hian khaw 50 vel zet a hmuh theih a ni. Hah taka tlang tlawhtute tan, inchiah daih nghalna tur Dil lian leh mawi em em maiin a chawi tel zui bik tlat mai te hian he tlang mawina hi a belhchhah zual bawk. Heng tlang hlawm zingah hian, Tlangsang bik pathum awmin, a sang ber hi Patetar tlang tih a ni a, a dawt chiah a awm hi Rangte tlang(Gangte ho lo chenna hmun) a ni ve thung a, khaw lam hnaih ber hi Helipad tlang ti a koh a ni bawk. He tlang hi Dil mai hian a chawi lo a, heng hmun danga kan sawi, pipute sulhnu pawimawh tak tak hian a bawm vel bawk a ni.

PAWI THAH KAWN: Tun hunah hi chuan hnam inpumkhatna lamah kan harh tak avangin he hming pawh hi lam a hrehawm ta lek lek mai. Mahse, a hunlai boruak thlir chungah hriatthiamna nena kan thlirpui ve erawh a ngai tih hria ila, a hming hian tu hnam pawh mah sawi suh se. Helai hmun hi Mizorama mi lu lak tawpna, Lusei leh Pawi indo tawpna hmun a nih avangin, Mizote thinlungah hmun pawimawh a chang kumkhua tawh ang. Helai hmunah hian, Chawngtlai run tuma rawn thawk chhuak, Dawn Pasalṭha, Zohnahthlakte chenna tlang tluan thang chhuak, Ralbila leh a hote chu, Chawngtlai Pasalṭha Chawngluta hmaah tluin an lu an hloh a. He hmun hi, Khawhai khua hian humhalhin, Historical Association chuan lung an phun nghe nghe a ni.

HISTORY HMUN LUAH THEI THIL THLENG PAWIMAWH

SELBUANG DAR:

*Lal dang thlafam khua a har mang e,
Kawllen phuar vel Lal dang run chung hnuaiah;
SELBUANG DAR ṭap e*

He hla hi Lal Zataia pa Lalvunga a thih, kum 1889 a an sak kha a ni. Zofate zingah Selbuang Dar kher hi chu a mikhual lo hle mai awm e. He dar neitu hmasa ber ni a hriat chu, Selbuanga a ni a, mahse, amah hi eng hnam nge tih leh eng hun laia mi nge tih erawh hriat a har tawh hle. He dar hmingthang tak hi Run lui kam vela an awm lai, AD 1240-1400 velah khan an lo hmang daih tawh a ni. Tichuan, Sailo Lalho kutah a lo lut a, a lo luh dan chiah erawh hriat a ni tawh lo. Kum 1870-1880 inkar velah khan Vuttaian lo kawh tawhin a roh hle a, a thlahte zinga tlang chang upa berin kawh zui zel turin thu ro a chhiah nghe nghe. Chutianga thu ro meuh chhiah chu ni mahse, Zataia leh a pa nau Kairuma fapa Sialhawk Lal Liankangloa chuan an inchuh ta tlat mai a. Aizawl Bawrsap beng hial thlengin Bawrsap chuan a hren sak ta a, hun engemaw chen a rial vang vang hnua thubuai chu an sawi ta a. Zataia chu Liankangloa aia a upat zawk avangin Selbuang Dar hmingthang chu a chang ta a ni. Vuttaia kuta a lo luh danah hian ṭhenkhat chuan, Chhim leh hmar indo (1849 - 1856) kha a nih an ring a, hetah hian Vuttaia leh a tupa Thawmvunga chu an che na hle tih kha kan hre hlawm awm e.

Kum 1915-ah khan Zataia hnen aṭangin Ṭiau ral lawka Chawnghawih khaw Lal Khuangṭhiaua chuan he Dar hmingthang tak hi a lei a. He dar man atan hian Zataia chuan Sepui 10 a chhiar chungin, a hu tawh ₹300 leh sakawr pa chak tak mai chu, Se sawm aiah

Zataia hian a dawng ta a ni. Selbuang Dar hming chawi hian Zataia chuan a fate hming pawh a phuah nual a; Selbuangi, Darrivungi, Darlakthangi, Darchungnungi te a sa hlawm a ni. He dar hi Burma ram lama hun engemaw chen a thang bo vang vang hnuah tunah hian, Khuangthiaua tupa Buta (Vulmawi) chuan uluk takin a kawl tha mek a ni.

KHAWHAI KANGHMUN KAN THU: Lal Zataia chu kum 1912-ah Niawn atangin Khawhai Kanghmunah hian a kai a. Kum 1928-ah chuan khaw tlak lama Phaibaw ram chu loah an nei a. March ni 25 Pathianni chu lo halna ni turah an ruat a, kangmei chhuah thulh a venpui turin Zataia chuan a fate khua, Lungtan leh Chalrang chu a sawm nghe nghe baw a ni. Nimahsela, hemi ni takah hian Lungtan hian lo hal an lo tum ve avangin Chalrang chauh chuan an venpui ta a ni.

Lo an hal dawn tukah chuan, Khawhai pa pakhat pu Suakkhuma chuan," Vawiin chu Ramhuai ho hal kawm ngel ngul mai ang aw" a ti a ni awm e. Hei hi Khawhai Kanghmun kan chhana an puh zinga pakhat zawk a ni. Kanghmun kan chhan nia an puh deuh dang leh chu; Lal Zataia fapa, Lalkhuma khaw thar sahna Hriphaw kai tur chu, Zataia fapa tho, Thangkima(Chalrang Lal) leh Thansinga te chuan an zui ve a. An haw lamah sa pel haw nghalin, Thangkima chuan Tumpang a kap a, Thansinga chuan, "Sele ki ther" a kap thung a. Sele ki ther kah hi hmanlai leh zual atanga thianga loa ngaih a ni. Chu an sa lu chu hawnin, Sele ki ther zawk chu, tuna Thansinga seluphan hmun tihah khian Seluphanah an tar a. Mahse, hetia Sele ki ther seluphana an tar atang hian Thansinga chu a dam thei ta reng reng lo a, a na a ta ruai mai a, kawlbun ngai hial khawpin a awm zui ta mai a. Hei hi Sele ki ther vangah ngaiin Phaibaw ramah chuan an paih ta a. Mahse, Lal Zataia chuan, Sele ki ther chu naupangho chhar tir lehin, khawchhak sumdawng hnenah ₹2 in a hralh ta a, heta tang hian Thansinga pawh chu a lo dam chhuak leh ta a ni. Hetia Thansinga lo dam chhuak leh ta hi, Zataia fapa, Lungtan Lal, Lal Hmingliana chuan Lungtanah a hruai thla a. Hetia Lungtana a chhuk dawn hian, Thansinga chuan, "Ka awm lohna khua zawk chu a kang ang" tiin a sawi nghe nghe a ni.

An lo hal ni tur pawh a rawn thleng ta a, mipa ralkai chin chu lo halna lamah an thawk chhuak veka, nunau leh tar chak lo zawkte chauh chuan khua chu an nghak ta a ni. He an lo halna hmun hi, Phaibaw ram, Thansingan a Sele ki ther lu a paihna hmun kha a ni nghe nghe a. Tichuan, lo an han hal ta chu, thawngaleivir rawn thawkin mei chu an tum lohna lamah kalin, khua chu a pan ta hlup hlup mai a, khaw chhungah lah mei veng tur khawp mipa awm tawh hek lo, meipui chuan khua chu a tuam ta hlup hlup mai a. Khua a roin a alh tha duh baw a, tuala suk an tun thleng chuan a kang fai leng mai a ni. Mit ngeia hmu phakte sawi dan chuan, "Tualahte chuan mei si hi arbawm tiat tiat hian a sawt thurh thurh mai a ni," an ti zuk nia! Hetah hian thil mak tak mai a lo thleng a, chu chu, khatia khua a kan takah khan, Pu Saiduha (Manthang pa) chu a chhek inah a zuang lut a, ani hi ringtu hmasa niin, Khawhai khua a Christian tlemte zinga pakhat a ni nghe nghe. Tichuan, meipui alh vut vut karah chuan a tawngtai ta ngat ngat a, mak deuh maiin, khawlaia arbawm leh suk an tun thlenga a kan fai vek laiin, Pu Saiduha tawngtaina hmun, a chhek in chu a him pial mai a nih chu! Hei hi Pathianin ama bungrua a vennaah pawh kan ngai thei awm e. Hemi tumah vek hian, ramhuai pawh a lo awm mai mai bik lo tawp mai. He kangmei nasa tak karah hian, Thansinga seluphan chu, sele ki ther awm tawh lo mah se, a tarna hnu a nih vang emaw ni dawn ni, a him ve pial tlat mai! Pathianin a ta a veng ang

chiahin, Ramhuai paw'n a ta a lo veng ve tihna emaw ni? Hetia an khua ber a kan takah chuan, an khaw hmunhlui tho tuna Khawhai hmunah hian an insawn zui leh ta a ni.

PAWI LEH LUSEI INDO TAWPNA: Tuna Khawzawl district headquarters Khawzawl khua aṅanga chhim lam km 10 velah hian, Lal huaisen tak, Lusei Lalte leh Lusei tlang zawng zawng Pawi ral laka huma muantu, Zahau Lal Nikuala chuan khua a siam a, a khaw hming chu Chawngtlai khua tih a ni. An Lal hian chhak Pawi ralho chu vawi tam a do a, Ṭiau thlang lama lalte tan an phaw sial ber a ni ṭhin. Hengte avang hian, Ṭiau chhak lama hnam chak tak, Pawi hnamte chuan, Nikuala hi an haw hle a. Nikuala khaw run tum hian, 1890-92 bawr velah khan, Ṭiau chhak lama mihrang, ral hrat khawkheng, Lusei tlang tluanin an hlauhrawn ni hiala sawi ṭhin, Dawn Pasalṭha Ralbila chu a hote nen anrawn thawk chhuak ta a ni. Ralbila te hian, Darzo kai aṅanga Ṭiaurawn kanin Chawngtlai khua chu anrawn pan vang vang a. Lusei lalna khaw tam takrawn kal pelin, Karmual Lal Kairuma khua an lo thlen chuan, Kairuma chuan, a lo chelh a, a chelh chhung hian, Chawngtlai lamah lamtham a tir a, Ralbilan run a tum thu chu a va hrilhru ta a ni. Tichuan, Nikuala pawh a pasalṭhate nen an inbuatsaih nghal a, a pasalṭha pakhat zawk Chawngluta leh a hote chuan, Ralbila leh a hote chu, tuna Khawhai Pawi thah kawhmunah hian lo changin, an lo that mang pak a, an lu lain, Sahlamah an tar a, an khai uai fer fur mai a ni. Khawhai Pawi thah kawna Ralbila a tluk aṅang hian, Chhak Pawi ralte pawh chuan, Lusei Lalte an run ngai ta lo a, Sapho thu hnuaiah Mizoram a kun zui tak baw avangin, Mizorama mi lu la a inrunna chu a lo tawp zui ta a, Zoram hun thim chu, he Khawhai Pawi thah kawnah hian tawpin, ralmuanna tlangah Zofate kan lo chuang ve ta. Mizorama hun thim kianna hmun, thim leh eng inṭhenna hmun chu helai Pawi thah kawh, ti a kan koh hi a lo ni ta a ni.

Thu laknate:

1. Khawhai Lal Zataia Sailo Chanchin. By Kima Sailo.
2. Kum za lamtluang. Khawhai Centenary Souvenir.
3. Pu Suakhnuna Kawlni. Headmaster Govt. Khawhai M/s.
4. Pu Khawlrumlana, Founder President Khawhai Historical Association.
5. Pu. Lallungmuana Chaltlang Aizawl.
6. Pu RD. Chama Phuaibuang.
7. Siamliani D/O Mam-eka.

KHAWZAWL ARRO VENG CHANCHIN

Khawzawl Arro Veng chanchin ziaik tur hian a pawn lam han kai thuak thuak leh tunhma a Arro khaw hunlai nena ziah pawlh remchang riau leh, mimal hming ziah tul tamtak pawh a awm anga. Kan hrethiam a ni ang chu. Tin, ziah sual leh belhchian dawl lo deuh pawh a awm thei ang, fimkhur taka mirawn pawh engemaw zat neih neiin kan infinchhuah nasa a. Pu R Kaphranga, Pu R Rinmawia, Pu R Vanlalthanga, Pu R Sawmliana, Pu K Zohmingthanga, Pu Rampuia Sailo, Pu K Hrangnawna leh Pi Rangkhumi te min finchhuahna tam tak ka dawng bawka, ka lawm hle mai. Khawtlang hruaina pawl hrang hrang leh sakhuana/Kohhran chanchin tlangpuite kan ziah lan tur tlangpui chu ni se. Arro veng hi Khawzawl veng thenah chuan a te ber a ni a, engemawa top 10 chin kan lan vena awm ang angte pawh kan ziaik lang a nih pawhin hriatthiamah kan ti a ni ang chu.

KHAW KHAWM ARRO KHUA ATANGA KHAWZAWL: Mizoram chu rambuai a lo nih khan India vai sipai chakna hmangin Arro khua chu ni 20.11.1968 khan Khawzawl khaw hmun ruakah khawm luh an ni a, ramhnuai thing leh hnim karah chhawl bukah kan lawi lut a, electric eng a awm lo a, a nei pawhin diesel bati chhit an en a ni mai a, khaw tha hnuaia thla en hun hi a nawm hun lai tak a ni ringawt mai.

Ram buai karah hnathawh a harsa a, mipui kan tam nasa a, ram bahra te kan lai a, fanghma, vaimim, bal leh anhnachte chaw atan rin hun lai awm a, vai buh leh atta a lo chhuak a, a chhe em em a. A rul/lung leh bawlhhlawh, sehrep a tam em em a, ei a harsa bawka si. Mikhual nei ila anhnah buhchiar emaw fangra emaw kilpui a ngaih hun lai a awm. Hnathawka chhuah a ngai a, vai sipaiin chaw fun an phal si lo, khawdai gate ah an duty a, eitur kan ken min man sak chuan ramhnuai mi, MNF kan pe turah an ngai tlat thin. Duty helna awm lovin, mipui thain khaw dai hualin an hung tir a, feet 6 a sangin an thua bakah mau phelsep a hmawr zum an thiat chuk mai a, sut luih chi lohin an hung tlat si. Hetih hun lai hian loh theih loha dinhmun phet leh zualten chaw an khawn fo bawka. Thalaitan a ralmuang lova, vai sipai leh mizo sipai rinhlelh tawn karah, tuboh leh dolung karah kan khawsa a ni ber mai.

Mizoram ram buai a nih khan Arro khuaa chhungkaw 20 zet chu Champhai khuaah an pem a. Kum 1987 thleng vel kha chuan Champhai Arro veng an ti thin a, tunah chuan Champhai PHE veng an ti tawh. Champhai veng hrang hrangah sakhaw hnar kaitu, rawngbawltu pawimawh leh khawtlangah pawh mi chhawr nahawm tak tak journalist thlengin an awm a ni. Tuna Khawzawl Arro veng dinhmun chu:

Chhungkaw zat	110
Mipa	200
Hmeichhia	225
Total	425

RAM LEH HNAM TANA NUNNA HLANTE: Arro khua hi rambuai tuarna pawlah a tang a tih theih a, a khaw phu tawkah ram leh hnam tana nunna hlan an awm nual a, chungte chu – R Dengthuama, Satinkhama, Chawiliana, Lalhlira, Thanpara, Savunga, Kamlinga, Lalthankima, Sanghleia, Zothansanga, Khualluna, Halruma, Aikima, Lalsipaia leh Dawhsungi te an ni.

KOHHRAN LAM: Khawzawla khawkhawm hlim hian Biak In a la awm loh avangin Kohhran hrang hrangin inkhawm lailawkna neih a ngai a, hetiangin inkhawm lailawk a ni.

Presbyterian Kohhran: Presbyterian Kohhran chu puitling lam Pu Liansata inah inkhawmin, naupang lam Upa Saikhuma inah an inkhawm.

Salvation Army: Salvation Army Corps Puitling lam Pu Khawmpuia inah inkhawm phawtin, Pu Lalzinga inah an insuan leh. Naupang lam chu Pi Aikhiangi inah an inkhawm.

United Pentecostal Church Kohhran: UPC Kohhran hi Upa R. Tlanglura inah an inkhawm a, Pu Taimanga inah an lengkhawm fo baw. Pu Taimanga hi tawnghriatloh zai thiam a ni.

YOUNG MIZO ASSOCIATION ARRO VENG BRANCH CHANCHIN : Kum 1968-2024 thlenga YMA hruiatu lo ni tawhte - C Vaikalkhama(L), Tlanghmingthanga, R Kaphranga, K Hrangnawna, Tawklina, K Tlanglawma, Zonunkima Ralte(L), PC Zakhuma(L), R Lalchawimawia(L), Rohmingliana Colney, T Thangliantluanga(L), J Roenga(L), K Lalduhzuala, C Vanramnghaka, K Lianhela, K Hmingthankhuma, R Lalrinmawia, C Ramhluna, K Runlinga (L), KT Chianga(L), K Hrangherha(L), Biaklawma Ralte(L), Rokhuma(L), Lalkhuma Sailo(L), PC Remliana, PC Hmangaihazuala, Lalsiama(L), R Sawmliana, C Lalhunmawia, R Lalmuanpuui, Zonuntluangi, T Thangsiam, Chhuanvawra, Lalhmingthanga Sailo(L), R Laltanpuia, C Lawmthanga, C Lalnuntluanga, C Hmingthanzauva, Rampuia Sailo, Malsawmkima, K Laldusaka, T Lalringliana, VL Daniela, T Lalmuanzuala, PC Lalnunkima, K Vanlalsiama, Lalrinthangi, Zathangpuia, B Zairemthangi(L), VL Thazuala Colney, Lalfakzuala, SB Pahaia, T Laldinchhuaha te an ni.

LIFE MEMBER : SB Pahaia, R Lalchawimawia (L), T Lalchhawnzova leh T Lalringliana.

HRUAITU HLUN CHAWIMAWINA DAWNGTE : Runlinga (L), Tawklina, R Kaphranga, K Hrangnawna, J Roenga (L), T Thangliantluanga, Rohmingliana Colney, T Thangsiam, R Lalrinawma.

ARYMA, BRANCH YMA CHANCHINBU, KARTIN CHHUAK : YMA Arro Veng Branch hian chawlh kartin chhuak chanchin bu (ARYMA) chu kum 20 zet a lo kalpui ve tawh a, veng chhung mipuiten an bengvar phahin, an tangkaipui hle. Kum 2024 Editorial Board-te chu:

Editor	: A Ramdinsanga
News Editor	: Lalmuanzuala
Asst. Editor	: Lalrinzuala, K Vanlalhriatrenga, David Lalnunmawia

KUM 2024 BRANCH YMA HRUAITUTE:

PRESIDENT	: K Hmingthankhuma
VICE PRESIDENT	: T Lalringliana
SECRETARY	: Lalmuanzuala
ASST.SECRETARY	: PC Lalnunkima
TREASURER	: K Laldusaka
FIN.SECRETARY	: VL Daniela
ADVISER	: Rohmingliana Colney & R Zadingliana

Hruaitu tang reite : Pu R Kaphranga kum 1966-2023
Pu Rohmingliana Colney Kum 1977- 2024.

Pu R Kaphranga hi a taka YMA nun pui leh a tul anga chak taka hma la thin a ni a, a kum alo tam ve tain a hriselna a lo tlahniam ve ta a, kum 2024 hian YMA- a a rawngbawlina chu a chawlhsan ta a ni.

YMA CHET VELNA LEH NIHNA TLANGPUI: Group YMA Conference-ah tel thinin, inelna chin hrang hrangahte lawmman an dawng ve fo thin a, hun engemaw chen kha Volleyball-ah bik phei chuan Branch dang in tluk loh ena an en hun lai pawh a awm a ni. India Independence Day leh Chapchar kutah, Khawzawl in a huhua hman a nihin an tihur chanvot hlen turin phur takin hma an la ho thin.

1. Miss Chapchar Kut: Miss Chapchar Kut hengte hi an ni.

- 1) Irene Zodinpuii d/o R. Kaphranga – 2013
- 2) Marina Zothanmawii d/o R. Zadinglana – 2019

Mizoram Information Service (MIS): Dr Lallawmzuala S/o T Lalngaizuala an nei.

2. ZAI THIAM: Arro veng in zaithiam hengte hi a lo nei tawh.

- 1) Jenny Lalthlamuani d/o Major Thansiam (L).
- 2) Chhuanvawra s/o Major Thansiam (L): An unau hi an inkawp thain an in tawiam tha a, puipunna hmunah sawm an hlawh hle thin a, Mizo hla leh English hla an sa thei ve ve. Jenny Lalthlamuani hi Ex. MLA/ Minister PC Zoramsanglana (L) nupui a ni a, MHIP General Hqrs. President pawh a lo ni tawh bawk. Dawrpui Vengthar Aizawlah an khawsa mek.
- 3) Darchhawnkima S/o Lalzinga (L) hi a zaithiam mai ni lovin a sang a tlin a, hla khat sakah hian a key hi 1,2,3,4 thlengin a san thei. Tunah hian Pastor pension in Bawngkawn, Aizawlah a khawsa mek.
- 4) Rokhuma (Rka) S/o Lalzuala (L) hian Mizo hla mai ni lo, ABBA leh CCR hlate a sa thin a, Band an din a, an Band Party hi Beat Contest neihna hmun khaw dangahte pawh an tel ve thin. Band party member chu hengte hi an ni. R Rokhuma (L), R Rinsanga, T Lalthlana leh Liantluanga te.
- 5) Zohminglani H/o J Lalzela. A ni pawh hi solo leh group zaia tel thin a ni a, AIR Shillong-ah hla a record tawh bawk.
- 6) Hmingthanpari H/o C. Lalhunmawia. A ni pawh hi zaithiam zai tura sawm hlawh tak a ni a, AIR Aizawlah hla a record tawh bawk a ni.
- 7) VL Daniela S/o Rohminglana Colney. Ani hi chhaktiang Lelte 2011-ah Top-7 a ni a, function lian tak tak, YMA General Conference thlengin a zai a, AIR Lungleiah hla a record tawh bawk.
- 8) K Lalhriatpuui (L) D/o K Thanthuama(L): Ani hi YMA Branch aiawhin a tulna hmuna zai thin, zai thiam tak, inelnaah pawh lawmman lo dawng fo thin a ni. Beat contest Champhai District in a buatsaih Gospel hla sakah lawmman pakhatna a lo dawng tawh. AIR Lungleiah hla a record tawh bawk.

Heng kan ziah ho bakah hian zai thiam dang, thangthar zingah puipun ni khuua sawm fo mi engemaw zat an awm bawk. DDK sponsor in Khawzawl District chhunga pa chak zawnnaah, pa lai hawl inbuanah chak 2-na dinmun VL Danielan a hauh tawh bawk.

MHIP ARRO VENG BRANCH CHANCHIN TLANGPUI: Kum 1998-ah Vengsang Branch
MHIP atangin a in dang a, Office Bearer hmasa ber chu,

PRESIDENT	: Lalrinthangi
VICE PRESIDENT	: Hrangliani Ralte
SECRETARY	: B Zairemthangi (L)
ASST.SECRETARY	: Lalmuanpuii Sailo
TREASURER	: Sawichhungi (L)
FIN.SECRETARY	: Vanlalhlimpuii
ADVISER	: Rohmingliana Colney

2018- 2024 THLENGA HRUAITU CHANVO CHELH TAWHTE: Lalrinthangi, Hrangliani Ralte, B. Zairemthangi (L), Lalmuanpuii Sailo, Sawichhungi (L), Vanlalhlimpuii, B. Thangkhumi (L), C.Lianmawii, Lalduhzuali, Thangzuali, Sanghlupuii, R. Lalmuanpuii, Hmangaihzuai, Zothanmawii, Zomuanpuii, K. Lalvenhimi, Lalnunnemi, C.Lalramthangi, Lalrinengi, PB. Nguni, RVL Tlansangi, Chanchinmawii, Sangzuali Varte, lalfakawmi, Lalhrulaitluangi, Rinengi Renthlei.

KUM 2024 -A HRUAITU NI LAITE

PRESIDENT	: Sanghlupuii
VICE PRESIDENT	: Hmangaihzuai
SECRETARY	: Lalhrulaitluangi
ASST.SECRETARY	: Lalsangzuali Varte
TREASURER	: C Lalfakawmi
FIN.SECRETARY	: Lalrinthangi
ADVISER	: Rohmingliana Colney leh YMA President ni lai zel.

SUM TUAK DAN: Thingphurh, Chawhmeh zawrh, Executive meeting a thawhlawm dawh, Vengchhak, Venglai leh Vengthlang Section YMA 3 atanga budget siam.

CHHIAT THATA INRELBAWLNA: Member thi an awmin, ruang awm laiin chanchin leh sunna thusawi a ni a, ruang chung a pangpar dah leh ralna sum pek a ni. Tin, vengchung atanga ruang chhuak a awmin, Branch MHIP hmingin tuamna puan pek thin a ni. Biak In hawnga pasal nei an awmin lawmpuina thilpek hlan a ni a, mi hmingtha chawimawi phu an awmin chawimawina pek a ni baw a ni. Damlo kan te, Mi harsate tanpuina pek te, District Hospital poor fund pek te leh Krismas hunpui a lo thlenin kum upate hnenah Lal piang chibai bukna thilpek hlan thin a ni thin baw.

MHIP DAY HMAN DAN TLANGPUI: Arro veng Branch MHIP hian ni 6 July hian harsatna a awm a nih loh chuan MHIP Day an hman thin a, member infuih tharna hunte hmangin item hrang hrang hmangin an inel thin a, miss contest an tih pheichuan nasa takin hlimna a siam thin a ni. Kum upate hnenah chawimawina an hlan thin a, inelnaah lawmman an siam thin a, tlaiah ruai an kilho thin baw a ni.

MHIP BLOCK CONFERENCE LAM: Arro veng branch MHIP hian branch thar an nihin 1999 kum khan Neihdawn kuaah Block Conference an hmachhawn tan a, “Branch te tak, ding thar kan ni a, kan zam loh nan, kan adviser Pu Rohmingliana Colney in min ho se” an ti a. Member 50 lai mahni mutbu leh thuamnaw phurin ke in Neihdawn chuan Block

Conference chu an hmang ve ta a, a pumpuiah pakhatna an ni ta nghe nghe. A hnu zelah pawh lawmman hi an la fo thin a, an lawmman dawn Dekchi, No leh Ketli- te phei chu sumah an chantir a (an hralh then) nghe nghe. Conference palaite tihlim thintu fiamthu thiam em em Pi B Zairemthangi awm ta lo chuan an khua a tihar hle thin a ni.

MHIP BRANCH DIN CHAM KUM 25 NA (SILVER JUBILEE) LAWM: MHIP Day vawi 49-na, ni 6.7.2023-ah Arro veng Branch hian an din champha Silver Jubilee chu lungrual taka inbuatsaih chungin hlim takin an lawm a. Khuallinah Pu Tawnluia, Deputy Chief Minister tangin khual zahawmah Pu K Lalrohlua, Deputy Commissioner Khawzawl a tang a. Lawi, Vawk, Ar leh Sangha ten tlaiah ruai kil ho a ni. Special Award siam a ni a, Adviser kum 25 chhung tang Pu Rohmingliana Colney leh hruaitu kum 25 chhung tang Pi Lalrinthangi hnenah hlan a ni. Tin, mi hmingtha chawimawina neih niin Chapchar Kut Miss Irene Zodinpuui- 2013 leh Marina Zothanmawii – 2019 hnenah chawimawina hlan a ni. Hruaitu tang rei ber 2-na hauhtu chu Pi B Hmangaihzuai niin, kum 24 chhung zet a chelh a ni.

MIZORAM UPA PAWL, ARRO VENG BRANCH CHANCHIN TLANGPUI: MUP Arro Veng Branch din kum – 1985. Kum 1985- 2024 thlenga hruaitu (OB) lo ni tawhte: Pu R. Tlangliana(L), Pu Saikhuma(L), Pu Sawivela(L), Pu C. Lalsawma(L), Pu R. Kaphranga, Pu Zosanga(L), Pu Lalsiama(L), Pu R. Rinmawia, Pu R. Zadingliana, Pu Thangruaia(L), Pu Hrangluta(L), Pu Farneihduma(L), Pu PC Remliana, Pu Romawia Sailo(L), Pu Chhuanvawra, Pu Remthanga, Pu Rohmingliana Colney, Pu Lalthlana, Pu Rampuia Sailo, Pi Thangzuai, Pi Zoramthangi.

KUM 2024-A HRUAITU NI LAI:

PRESIDENT	: R. Zadingliana
VICE PRESIDENT	: Remthanga
SECRETARY	: Rampuia Sailo
ASST. SECRETARY	: Lalramthangi
TREASURER	: Thangzuai
FIN. SECRETARY	: Chhuanvawra
ADVISER	: Rohmingliana Colney
Hruaitu tang reite	: R. Rinmawia Kum 14, R. Zadingliana kum 6.

Chhiat ni a insawngbawl dan: MUP member a thih in a ruang awm laiin, a chanchin leh amah uina thusawi thin a ni. Thlan nghah ni-ah a ralna hun hman a ni bawh.

MUP Day hman dan tlangpui: Upate Ni hi Joint anga hman a nihin, an chanvo neihte hlen turin lungrual takin hma an la thin. he Ni hi Branch-ah hman a nihin, a hlim thei ang bera an hman theih nan an tih theih tawh inelna siamin hun hlim awm tak an hmang thin a, lawmman pawh an insem thin. Thingpui ruai emaw zanriah emaw an buatsaih thin. Tin, Khawtlang a lo thianghlim zawk nan khawlai thenfai hna an thawk bawh thin. MUP Rising Day erawh an hmang ngai meuh lo. MUP Arro Veng Branch-ah hian member an tam ngai lo a, 30-35 vel an ni thin. Hruaitu hmasa mi 10 laiin chatuan ram an pansan tawh a, khawharthlak an tiin, lunglenthlak an ti.

ZIRNA LAM

Kum 1974-ah Khawzawl Arro Vengah hian English Medium School din a ni a, Managing Board Member hriat theihte : Major PC Thansanga(L), Major Thansiam(L), R Sawmliana, Lalrithanga(L), Thangchianga (KT Chianga)(L), Major Buaia, Major Lalrotluanga, Lalbuaia Sailo(L), T Lalsiam, Hrangnawna. Tin, School din kum, 1974-a zirtirtute chu KT Thangchianga(L) Aizawl, K Lalzika Zaingen veng, Hauhmingthanga(L) Aizawl, Chhawnkimi (L) Aizawl te an ni.

KUM 1976 HNU LAMA ZIRTIRTUTE: Lalhlira(L) Aizawl, R. Vanlalthanga Darngawn veng, Thanghnuna (L) Aizawl, K. Hrangherha (L) Khawzawl Arro veng, K. Zohmingthanga Darngawn veng, Hranglawmi Champhai Bethel, Zalenhnuni (L) Zuchhip veng, Ronghaka Champhai, Biakliana Khawzawl Vengthar (an chenna hmun ziah hi an chenna/ hun tawp an hmanna hmun zel a ni).

Kum 1974-1980: English Medium School hi 1974-1980 thlengin SA Khawzawl Corps hmalakna a din a ni a. Board Member pawh SA Corps member an ni. Principal Pu KT Chhinga hian a in luah kawngka sirah ‘Sana ka siam thei e’, tih thu a tar a. Vawikhat chu pa fiamthu duh tak Pu Kaizawna hian bawngnhute bur ruak hi a chhir lut a, “Pu Chhing, Sana ka siam thei tih i tar a, he bur ruak hi Sana tha tawkah min lo siam ve ta che” an ti mai chuh, Pu KT Chhinga chu a hawihaiin a nuih a za hle a, “Ka pu, Sana chhia ka siamtha thei e, ka tihna zawk a ni” tiin an inhrilhfiah nghe nghe a ni.

School hi 1980 kum atangin khawtlangin a enkawl zui a, school tan in tinin cheng 1 thawh ni se tih leh mau thingtlawnte pawh school building thuam that nan an thawh khawm bawk thin. Hetih hun laia zirtirtu hlawh hi cheng 300/200/160 te a ni thin.

TLANGAU: Hetih hun laia tlangau Pu Dochungnunga hian chhungkaw tinin an thawh tur heti hian a au va, “Khaih khaih khaih, tun thla chhungin in tinin school ban, hlam leh mau pum 15 theuh neih tur,” tiin. School mau, hlam leh bana sei pum 15 theuh tihna a ni. Hemi hnu hian school hi a tawp a, naupang pawh school remchang dangah an lut zo ta a ni.

KUM 2024-A KOHHRAN DINHMUN MEK LEH CHANVO CHAN MEKTE: Presbyterian Kohhran hian Arro vengah Biak In a nei lo va, Vengsang Prebyterian Kohhran member 1250 zingah member 20 zet awmin Vengsang Kohhranah an lawi a ni. Khawzawl Vengsang Kohhrana Arro veng in ber nihna a hauh ve awm chhun chu:

1. Vengsang Branch hruaitu OB ni rei ber: 1978 – 1997 (Kum 19 chhung).
2. Vengsang Kohhrana Buhfaitham tham tha ber, tun thlengin kum 1 chhungin kartin kg 11,12 thamin, kum 1 chhungin quintal 6 vel.

UNITED PENTECOSTAL CHURCH OF MIZORAM: UPC Mizoram hian Arro vengah Biak in an nei lo va, Zuchhip vengah Biak in an nei a, chutah chuan Darngawn, Arro, Zaingen leh Zuchhip te an lawi a, Khawzawl Dinthar veng atanglawi an awm bawk. An vaiin member 158 niin, Arro veng atangin member 70 vel an awm.

UNITED PENTECOSTAL CHURCH OF NORTH EAST INDIA: UPC(NEI) Biak In hi Arro vengah a awm a, Arro, Zaingen, Darngawn leh Lungvar atangin an lawi a, member 60 awmin Arro veng atangin chhungkaw 3 an awm.

THE SALVATION ARMY CORPS: An dinhmun hetiang hi a ni:-

1. Soldier (Sipai puitling awm zat)	163
2. Junior Soldier (Naupang awm zat)	30
3. Cradle Roll (kum 6 hnuai lam)	47
Total	- 240

Commanding Officer – Aux. Capt. Lalbuatsaiha
Aux. Capt. Lalhmingmawii

FUNDAMENTAL BAPTIST CHURCH: FBC Kohhran hian Zuchhip vengah Biak In an nei a, Arro veng, Darngawn, Zaingen, Lungvar leh Zuchhip veng atangin an lawi a, an zavaiin member 310 an ni a, Arro veng atangin member 20 an lawi a ni.

KOHHRAN PAWN LAMA RIN HRAN NEITE: Pu PC Remliana – Nunna Lal Hnam (Rorelliana Pawl), Pi Vankungi – Pawl Chhuak, Pu Rinsanga – ‘O’(Zero).

THU BELH: Kum 1997-ah Khawzawl Venglai Pastor Bial zaipawl chuan zaipawl cassette siam turin a inbuatsaih a, zaipawl camp pawh 1997 thla laihawl velah Pu Tlanghmingthanga (L) in Zuchhip veng leh ZOHANCO building-ah te an nei a. Hla an zir ngawrh khawp mai. Ni 14.11.1997 (Inrinni) ah nilengin ngawrh takin Pastor Quarters ah hla an zir a, hemi ni hian bialtu MLA in thuruk, ‘Khawzawl khawpui chu District ah puan a ni e’ a rawn ti mai chu kan hlim tlang teh e, mahse official a la ni tlat lo.

Ni 10,11,12,13 December 1997 (Ningani- Inrinni) thlengin Synod Music Studio-ah hla 13 an record a, Pu Lalhmunsiana SDO(PWD) in, Bawngkawnah awm hmun khuarin, hla pasarih vel an record tawh tihin, ngawrh taka hla an zir laiin Pu Lalhmunsiana chuan, “Lo ngawi lawk ula, thu lawmawm ka hrilh angche u, nangni tan erawh thu lawmawm a ni kher lo thei baw. Khawzawl chu Sub-Division ah puan niin, Champhai chu District a puan a ni ta e,” an ti chiah mai chu boruak a chhe zo a ni ber mai (amah hi Champhai khaw chhuak a ni). A hnu zelah Khawzawl mipui lungawi lo chevelah Khawzawl tlangval pasarih chu an man tawh tihte kan hre zel a, zaipawl member zing atang chuan haw chhoh va, Khawzawl tan chuan Jail a tan ve ngei a ni ka duh te an ti ta nawk mai.

An hruaitu zinga Pu Rohmingliana Colney Khawzawl Arro veng chuan fuihna thu hetiangin a sawi, “Lo ngaithla ula, kan hla record hi a chanve a ni chauh va, rawngbawl na pawimawh tak a ni a. Record zo turin rilru insawrbing hram ang u,” tiin. Hla chu an record zo hram a, Zozam studio-ah hla pathum an record nghal baw a ni.

KHAWTLANG HRUAINA VILLAGE COUNCIL MEMBER LO NI TAWH LEH NIH KUM:

Pu Rithanga VCP – 1974, 1975

Pu Lalbuanga Member- 1976-1980

Pu Thuamluaia Member – 1984- 1987

Pu R Kaphranga Member/Secretary – 1990, 1997, 1998, 2012, 2015, 2016

Pu Rohmingliana Colney- 1999- 2002, 2002-2006, 2020-2025

Pu J Roenga Vice President – 2006- 2009

Pu K Lalduhzuala Treasurer – 2009-2012

Pi Lalnunnemi Treasurer – 2015-18, Member- 2018-19, Vice President- 2020-2025

Kum 2018 leh 2019-ah Village Council Court Darngawn atanga Arro veng in dan chu, Arro veng hian dil a, Darngawn hian ui tak chungin in dan dilna hi a remtihpui a, ramrite siam felin sawrkarah thlen a ni a, sawrkar lam pawhin a lo remtihpui a. Kum 2020 VC thlan chu Arro veng hian YMA Hall, Arro vengah an thlang ve ta a ni.(27/8/2020). Chuta thlan tlinte chu: Pu Rohmingliana Colney, Pu K Vanlalsiama, Pi Lalnunnemi te an ni.

Thlan tlinte chu 2020- 2025 atan hetiang hian nihna inbel a ni:

President	: Pu K Vanlalsiama
Vice President	: Pi Lalnunnemi
Secretary	: NI R Lalhminghsangi 2020-2024 : Tv C Hmingthanzauva 2024-2025
Treasurer	: Pu Rohmingliana Colney

R Lalhminghsangi hi eizawna avangin a chawl a, a aiah Hmingthanzauva dah a ni. VC sitting neih hmasak berah Treasurer Pu Rohmingliana hian VC term kum 5 lai a nih tawh dawn avangin a hun a rei dawn a, thawhhona tha tak nei thei turin leh tluang taka term hmang zo turin fuihna leh sawmna thu a sawi. VC sitting chuan khawtlanga chhiat thata chet dan tur hetiangin a siam: (1) Zirlai pass te chawimawina hlan, (2) Mi bik/hmingtha chawimawina hlan, (3) Damlo kan, (4) Mitthi ral.

VC leh khawtlang tanrualnain – DRO Office Arro vengah dah a ni a, building sak hi VC in hma an la a. Ni 8.9.2023(Zirtawpni) ah ropui takin Pu Tawnluia Dy. CM, Bialtu MLA in a hawng a, Office chu a mamawhte tan dawr theihin, District chhunga khaw kilkhawr ber thlang pawha Arro vengah DRO Office ka dawr dawn an tih tur alo awm ta a ni. VC leh sawrkar tangkawpin veng chhungah tuikawr, zun in, vawh in, lungrem, kawng PCC, tuikhur siam leh waiting shed an siam a, VC Hall chhawng tha tak siam leh Health Clinic Centre Building tha taka sak zawha ni tawh bawh. Tin, Arro vengah hian Anganwadi Centre 1 a awm a, chu chu a tul anga thuam changtlun thin a ni bawh.

Tin, ramhnuai, mimal huanah sangha dil, tuikhur, terrace engemaw zat siam a ni tawh. VC leh khawtlang mipuite thawhhona a tha a. VC term khat em pawh ala zawh hmain veng chhungin kawng engkimah hma a sawn nasa em em a. Sumdawng vak vel pawhin 'Arro veng chu motor kawngin a hual vek tawh si a' an ti a, nuam an tih thu an sawi thin. Tun hmaa Arro veng mi ni thin Pi Kaiveli vanduaia avanga khaw hmu ta lo, tuna Zuchhip veng a awm ta kha Arro veng an awmna laiin, an in bul velah motor kawng tha tak awmin, an tlan reng tawh tih leh step tha takin a tlang riah tawh tawh thu an hrilh chuan, awih har a ti khawp a, mit var neih a, a taka hmuh a chak em em a ni.

ALL-NGO CO-ORDINATION COMMITTEE: Arro vengah hian All NGO Co-ordination committee tha takin a ding a, tuna hruiatu (2024) ni mekte chu:

CHAIRMAN	: Pu Rampuia Sailo
VICE CHAIRMAN	: Pu R Zadingliana
SECRETARY	: Tv Lalmuanzuala
ASST.SECRETARY	: PC Hmangaihzuale
TREASURER	: Pu T. Lalringliana
FIN.SECRETARY	: Pu VL Daniela

All NGO Committee hian veng chhung hmasawnna turin hma ala reng a, ruihhlo hluar zel tur vennaah te, nun sual chi hrang hrang a lo zia awm theihna turah te in lungual takin hma an la ho thin a ni.

Awareness Campaign: All NGO Co-ordination Committee hian veng chhung in kawng hrang hranga hma a sawn theih beiseiin, naupang pual, thalai pual leh nu leh pate pualin, resource person atan mi bik/mi thiam pathumte sawmin, Branch YMA Hall ah programme hman thin a ni a, hlawkthlak hlein an hria. December 2024-ah hian Awareness campaign neih leh tumin Committee chuan ruahmanna a siam leh mek.

GAME AND SPORT ASSOCIATION: Khawzawl Arro vengah hian infiamna lama hma latu Game and Sport Association a ding ve reng a, chak deuh chang leh fual deuh chang an nei a, tunah hian hmasawn tumin tan an la mek. Kum 2024-a Game and Sport Association hruaitu ni mekte: -

PRESIDENT	: Pu K Laldusaka
VICE PRESIDENT	: Tv Lalmuanzuala
SECRETARY	: Pu PC Lalthakima
ASST.SECRETARY	: Tv MS Dawngzela
TREASURER	: T Lalmuansangi
FIN.SECRETARY	: R Lalrinkimi
ADVISER	: Pu K Vanlalsiama & Pu K Hmingthankhuma

Arro veng G&SA tournament atanga tournament an telna a an chet thatna hriat chian deuhte chu - Capt. Sanghnuna Memorial Football tournament – 1973 ah (KZL) ah Arro veng G&SA team chu an champion a ni a. Rothangpuia buatsaih Football tournament Dulte khuaah Arro veng G&SA 'A' team chu champion an ni leh a ni.

VOLLEYBALL LAM : Volleyball a sulhnu lo neih tawh dan chu hetiang hi a ni:-

1. April 2023 Volley Ball Tournament-a Men & Women champion.
2. June 2023 Bawihtea Volleyball tournament-a Men & Women champion.
3. October 2023 J Volleyball tournament-a Women First Runner Up
4. 2015 LTM Filling Station Tournament Men & Women champion.
5. 2017 LTM Filling Station Tournament Men First Runner Up

G&SA Arro veng A team Dultea an champion chungchanga tlangau thu dangdai, “Khaih, khaih, khaih, Arro vengin Dulte kawn an la a, a hmuak turin nula leh tlangval zawng zawng kal vek tur a ni. A hmun: Dar 11;00 AM, A hun: Chalthai kawn (a thu a sawi letling). A hmuahna a kal lo chu lenlai an chan duai a ni mai.” (Pu Dochungnunga, tlangau)

HUN TAWN DANGDAI: Kum 1978-ah Chhawrtui khuaah Football tournament buatsaih a ni a, chuta tel tura sawmna lehkhah G&SA Arro vengin a hmu ve ngei mai a, an kal theih leh theih loh tur thu an comt. a, kal ngei tha an ti a. Arro ram lam atangin ke hlirin Chhawrtui khua chu an pan a, intum tur an pawt a, G&SA Arro veng chu pawh ve an phalsak ta hauh lo mai. “In mi sawmna kan hmu ngei a, kan lo kal a ni. Ngaihtuah tha leh teh u,” tiin an ngen a, an chhanna chu “Arro veng Khawzawl chu kan chah lo che u a, Arro ‘B’ zawk zawk a ni kan chah,” tih hi a ni. Heti hian an ti ta a, ‘tournament hawnna atan Chhawrtui khuaa player tha thlan nen friendly match inkhel ila, Ar pachal kan inchawi ang’ an ti a. A tukah

chuan an inkhel ta a, 8-5 in Arro an chak ta a, zanah Arpa chal lian taw chu NI. Zamawii inah sawhchiarin, tlai taka ei ho a ni ta a ni. A tukah Kawlkulha football tournament-ah tel tum in kan chhuak leh a, an final ni a lo ni si, Puilo khua atangin Demdum Aizawl road kan pan a, ke hlirin Khawzawl kan thleng ta a ni.

VAWI-3 NGAWT CHAMPION, VAWI KHAT ERAWH FIRST RUNNER UP: Kum 2000, 2001, 2002 leh 2003 chhung khan Kawlkulh khuaah Ex Minister Laldenga Memorial Cup/ Inkhelhpui an tih baw, sub junior (under 45kg) chu buatsaih a ni a, Captain ni-te:

2000-ah Captain – T Lalhruitluanga (Champion)

2001-ah Captain – Saingura Sailo (Pahnihna)

2002-ah Captain – Saingura Sailo (Champion)

2003-ah Captain – B Lalhmingliana (Champion)

Inkhelhnaa kalte : T Lalhruitluanga, Lalfakzuala, Zosanglura, Lalrinmawia, C Lalduhawma (Zaingen), T Lalrinchhana, PC Laldusaka, Zodinsanga, Lalzuithanga, Lalhlupua, Lallawmzuala, B Lalhmingliana, Phairozama, PC Lalthakima, Vanropua Colney, H Laldinmawia (L), C Lalrotawma (Zaingen), Laldawngliana, B Ramngaihawma, Lalfakawma, Laldingngheta (Arro Village), Vanlalthlanga, Zairemmawia, Lalengzauva, Lalduhawma, H Lalrochhara(L), Saingura Sailo, Lalzuithanga (L), Laltlanzova, Roluahdawnga (Zaingen), Lalthangzuala (Darngawn).

INELNA CHI HRANG HRANGA CERTIFICATE DAWNG HRIAT THEIHTE:

2007- ah Kum puan ‘RUIHHLO DO’ bawhzui tha lawmman 2-na.

2013-ah fai inelna – Lawmman 2-na

2014-ah fai inelna – Lawmman 2-na

2015-ah fai inelna - Lawmman 2-na

2016-ah fai inelna – Lawmman 1-na

2017-ah fai inelna – Lawmman 3-na

2021-ah Video making competition for disaster prevention & response-Lawmman 3na

2022- ah fai inelna – Lawmman 2-na

2023- ah fai inelna – Lawmman 2-na

Certificate dangdai- 2012-ah BSI Patron member

DEBATE COMPETITION: Kum 1972 khan Khawzawl pum huap debate competition Govt. Primary School -1 ah buatsaih a ni a. Chuta lawmman dawngte; Pu K Runlinga(L) leh Pu K Hrangnawna an ni.

Veng hming thlak: Kum 1980 khan Khawzawl Joint Action Committee din a ni a, chu chuan ‘mahni khaw hming put hi thlak ni se’ tiin thu a pass a, Khawzawl Arro veng YMA Committee chuan thu awih takin Arro veng hming thlakna turin ‘Venghlun’ tih chu thlen a ni a. Mahni khaw hming chhawm dangin hming an thlak ve thei lo va, a ngaiin kal zel a ni ta a ni.

TLIPNA: Khawzawl Arro veng hi Khawzawl veng thenah veng te ber a ni a, veng chanchinah pawh a ropui lo hle ang, chanchin tlangpui kan rawn ziah ve hi inthlathlung tak chung a ziah a ni e.

KHAWZAWL DARNGAWN VENG CHANCHIN

Darngawn khaw chanchin kan sawi dawn hian, Khawzawl khaw bul tan dan nen sawi pawlh nawk nawk a ngai a, a chhan chu tuna thangthar ten Khawzawl ram leh khua kan sawite hi Darngawn Lal ram hnuaia awm, Sawrkar lamlian enkawl tura awm (Melveng ho awmna a ni a.) Khawzawl (Rambuai hma) ami khan ram an nei lo. VC erawh chu kum 1963 atang khan an nei ve chauh a ni.

Darngawn Lal ram hian a huam chin chu Zopui khua Zahau Lal Khenchhuma awmna nen (Neihdawn chhak tlanga awm a ni a, Khawzawlah 1969 kum tira khawm luh a nih atang khan he khua hi a rem hlen ta a ni. An Lal Khenchhuma hi rambuai hmain Champhaiah a pem tawh a, chuti chung chuan Zopui khua hi Lal awmna a nih avang in LAL VENG tiin an sawi bawk thin. Khawzawla an awmna chu LAL VENG tih a ni a, Neihdawn khua hi chu khatih lai khan sipai thutchilh a nih avangin khawm an ni ve lo. Neihdawn khua hi tun hma chuan Awmpui tih te, Melveng tih te, Neihdawn tih te hi an hming a ni). Tuimukupui lui, Lungtlanghing kawr chhuah atangin Mukpui zawh thla zelin PWD Road in a kanna thleng in an inri a, heta tang hian Chawngtlai nen an inrina chu, PWD road Khawzawl lam hawia zawh chhoin Damdawi in peng kawn kawrte PWD road atanga rawn zawh chhoin tlak lamah a liam a, chhim thlang hawia Kawrte zawh thlain phaisen lui a zu fin a, hei hi Chawngtlai nen an in rina a ni. Heta tang hian Phaisen lui zawh chhoin Chaltheikawn thlengin Zuchhip ram nen an inri a, heta tang hian Sakawr Lung thlengin PWD road-ah Arro ram nen an inri leh a ni.

Tuisen phaizawl atanga khawchhak lam Zaingen kawng Demdum kawn chhaka kawn hmasa ber thlengin kawn atang hian tlangdung kawng zelah chhim zawnga let leh in Sedaikawn bul thlengin Tuira lui a zawh thla leh a, (Tuna JNV School tlang dunga an inri dan hi tlak lam Darngawn ram chhuah lam Zaingen ram a ni a, ramri kal dan hi a mak em avangin Thiakkhan mual tiin sawi thin a ni). Tuichang lui a fin thlengin Zaingen ram nen an inri a, Tuichang lui zawh chhovin Raltawh lui chhuah thlengin Khualen ram nen an inri leh a, Tuichang lui zawh chho zelin Khuailui chhuah thlengin Tualpui ram nen an inri a, chuta tanga Tuichang hnar la zawh chho zelin ramri kawrah a chho va, Ngaizawl ramri kawnah a chhuak a, kawn atang hian Mukpui lui hnar pawh thla turin kawrte a zawh thla a, Mukpui lui zawh zelin Lungtlanghing kawr chhuah thlengin Ngaizawl ram nen an inri a ni.

Kum 1830 hma lamah kha chuan henglai chhehvel hi Hmarho hian an lo luah tawh niin hriat a ni a, entir nan :- Biate, Tualte, Khawzawl, Thiak, Darngawn, etc. heng an lo chhuahsan hmuna awmte hian khaw hming atan kan lo pu hlen ta niin a lang. Kum 1830 — 1850 velah chuan Pu Sawngbana Pachuau Lianngawr leh a thurualpui mi tlemte chuan Khawzawlah hian awm hmun an khuar niin an sawi a, an chhuahsan hnu hian Pu Sathawhuaua leh a thurualpui ten Vanchengpui atangin Khawzawl chu an rawn luah ve leh a, Modern MIS tlang (tuna SP Office) velah hian Tuisen phai leilet siam tuma lo kal niin an tuma anga alo awlsam mai loh avangin an pamtul san leh ta a ni.

Kum 1905 velah Pu Taibeha Fanai a lo lang a. Ani hi Pu Lalburha Sailo Lal in Vancheng a thut laia Lal thirdeng fapa tih te, a chhiahhlawh fel pawl tite a sawi a ni. Pu Lalburha chuan Khawzawl tlang thut turin a ruat a, a hma pawh hian Pu Taibeha hian Champhai bul Chhungte tlangte pawh hi Pu Lalburha remruatna in alo awp tawh niin a lang. Pu Taibeha hian Khawzawl Phunchawng awmna zawl (tuna DC Office thar Dt 2.10.2023 a hawn kawtzawl phei)ah hian an awm a, Kum 1912 chawhnu lamah chuan Chawlhmun tlang (tuna IR Bt. hmun)ah hian an insawn phei leh a ni. Sawi dan dang lehah chuan Pu Lalburha Vancheng a Lal laiin a chhiahhlawh zinga pakhat Taibeha Fanai chu Khawzawlah khua sat turin a tir a, hemi kum hi Taibeha thirdeng Chin Saidova Fapa Vailiandanga tuna Aizawl Republic a awm mek sawi dan chuan 1901 a ni tiin Upa Pachhunga Khawzawl vengsang in a sawi (Khawzawl Dinthar Presbyterian Kohhran chanchin 1894-1994 Pg No 2).

NIH TANNA: Pu Taibehaho hi Chawlhmun tlangah hian rei awm lovin kum 1914 kumtir lamah Darngawn hmun ah an kai chho va, hemi kuma an kai hian Darngawn thlanmual chhak lamah hian an awm ni a hriat a ni a, vanduaithlak takin kum 1916-ah Pu Taibeha chu a boral a, hemi hnu hian Pu Lalburha'n a fapa Lalhuta chu Darngawn tlang thut turin a tir chho ta a, Darngawn hmunah chuan rei awm lovin kum 1922 kumtir lamah Mualvawm hmunah an kai thla leh ta a (Mualvawm hian tuna Helipad te, Field te, Martar thlan te hi a huam), Pu Lalhuta chu a hriselna a that loh avangin Shillong Damdawi in pan pui a ni a, heta a hruaitu hi Pu Laiawrha (Pu Hmuzuala, Khawzawl Dinthar pu) a ni. Ni 21 November 1930 khgan Pu Lalhuta chu Shillong-ah a boral a, a ruang pawh hawn lovin Shillong-ah an phum ta a ni. Tuna Mualvawm field chhaka a lung awm hi a hriatrengna lungphun a ni.

Mualvawma an awm lai hian khawtlang an hrisel lo a, thihna a tam avangin kum 1935-ah chuan Darngawn hmunah an kai chho leh ta a, hemi tum hian kum 1914 a an kaina chhim lam tlangdung hi an bawh ta a ni. Pu Lalhuta a boral hnu hian a fapa Pu Tawngburha chuan Lalna a chang zui a, ani pawh a hriselna a tha loin kum 15 chauh rorel hmanin kum 1945-ah kum 35 mi niin Durtlang dawmdawi inah a boral ve leh a, heta hruaitu hi Pu Hrangzika (Pu Zulawma Pa) a ni. A ruang pawh Darngawnah hian hawn niin Darngawn Lal thlanmualah phum a ni. Pu Tawnga a boral hnu hian a fapa neih chhun Lalluaua chu naupang mai la niin Aizawlah lehkha a zir a, Pu Lalhuta nupui Pi Thanseii thlazar hnuaiah Pu Lallana (Pu Lalluaua patea) chuan ro a rel veleah a, British Lal ram politics in lumlet vel avangin Pu Lalluaua chuan a lehkha zir bansanin lalna chu a rawn chuh veleah ta a, ani hi kum 1953-1954 chhung Darngawn Lal niin Lal Compensation pawh ani hian a dawng ta a ni.

Kum 1952 khan Mizoramah District Council alo piang a, a hming hmasa chu Lushai Hills District Council tih a ni a, hei hi Assam Chief Minister Bishnuram Mehdi-a'n ni 25 April 1952-ah Pawnpuite In (Reid House) ah a hawng a(Reid House tih a nihna chhan chu Assam Governor Sir Robert Reid a'n hemi hma hian Mizo hmeichhe Pawnpuite tah ramdanga thawn chhuah a nih theih nan a leikhawmna hmun leh dahkhawmna a nih avang a ni).

Mizo Lalte chu ban an ni chho zel a, kum 1954-ah chuan Mizoram pumah Village Council inthlanna hmasa ber neih a ni ta a ni. Darngawna V/C hmasate chu:

- | | | |
|--|-----------------|------------------------|
| 1) Pu Thangthuama | 2) Pu Ropianga | 3) Pu Engmawia Pachuau |
| 4) Pu Remthanga | 5) Pu Pachhunga | 6) Pu Biakmawia |
| 7) Pu Lianbula (ani hi Khawzawl aiawh ang deuh a ni) | | |

Kum 1912 laia Chawlhmun an kai chhoh leh Chawlhmun atanga kum 1914-a Darngawn an kai chhoh hian Khawzawl hmunah Melveng lamlian enkawltu in tlem te hnutchhiah an ni a, hemi tuma Darngawn kai hi Darngawn khaw hming a put tanna niin a lang. Chawlhmun awm lai te, Mualvawm awm lai te hi chuan an awmna hmun hming chawi hian awm lai tiin an sawi mai thin a ni. (eg. Chawlhmun awm lai, Mualvawm awm lai). Tin, Khawzawl hmuna Melveng an awm hian a then chuan Awmpui (Bangla Chowkidar awmpui hming an pu). Khawzawlah hian Melveng leh Awmpui an awm lai tho hian Arro ram Kawihthuang hmunah Melveng leh Awmpui chu an lo awm ve tho va, Melvengte chuan lamlian enkawl hetiangin an insem thin: Kawihthuang ami ten Chalthaikawn bul (mel 69 dinna) atang Tuichang lam an enkawl a, Khawzawl Melveng ten Chalthaikawn bul atanga khawchhak lam Neihdawn ram mel 74 dinna thlengin an enkawl a, a chhak lam chu Neihdawn Melveng enkawl a ni.

Bangla enkawltu hi Sapho hian an dah zel a, kan hriat theihthe chu hengte hi an ni:

Jog Bahadur: Mizoin Telma-i Pa kan tih kha a ni. Ani awmna tak hi Arro ram lamah a ni chungin sawifiah deuh a tha awm e. Chalthaikawn thlang Arro kawng thlang Lungin lui nena a inkarah lungremin in a sa a, Kum 1958-ah pawh khan khup thleng vel a la inrem chu a zia tupa pawh hian a hmu ve a, a bula kawrt pawh hi tun thlengin Lung in lui tih alo put phah ta a ni. Chawkidar dangte chu – (1) Seleta (2) Chala (3) Lianchhunga (4) Thanghuta (5) Chakthanga leh (6) Hrangchhuana

DARNGAWN RAM LEILUNG LEH EIZAWNNA : Darngawn khua hi Pu Lalhuta te hunlai atang khan chhungkaw tlem te awmna a ni reng a, a ram tlangdung leh leilung hi a remin a nuam a, Buhbal pawh a tha duhin an hausa thei hle thin a, churang chuan, Darngawn an kai hnu mai atangin khawdang atanga pem lut an awm chho reng a, kum 1937 - 1944 lai vel phei chuan pem lut an tam a, kum 1950 chhoah in 75 vel lai an tling ta a ni.

BUH LEH BALAH HARSATNA: Buh leh bal that duhna ram leilung nuam leh rem tha tak ni thin chu kum 1954 chho atang chuan buh leh balah kan intodelh thei ta reng reng lo mai a, hei hi a chhan hriat a har hle mai. Sakhaw lam la run deuh chuan roeltute an mawh chhiat hial. Ram leilung a danglam chuang lo, kan lo neih a kum leng a nau chuang lo, mahse, Loah hnim har a tam a, July thla atanga a seng tlengin buh a thi a, buh thar a tam thei lo. Hemi avang hian Burma ramah te, Hnahlan khuaah te leh khaw dang dangah te an pem nual hlawm ta a ni. Chung harsatnate chu District Council hotuten lo hriain kum 1965 favang laiin Agriculture hotu Pu Lalhmachhuana leh a hote Darngawn ram leilung

zir chiang turin kal a, mual hnan hrana leilungte an zir chiang a, lei a thur a, buh zung rah a tam bawktih an hmuchhuak ta a ni. Pem chhuak an tam vanglai chuan khawtlang a ngui em em a, he thu ziaktu phei hi chu a thiante mi pariat (8) lai an pem chhuah avangin a khua a har tak meuh thin a ni. Pem chhuak turte chu YMA ten an thlah hial thin a ni.

Pathian remruatna avangin Darngawna buh leh bala harsatna awm thin chu kum 1980-a Thanghnai ram theh kum atangin buh thi leh lo har lutuk a reh duak a. Buh leh bal a lo hlawk leh ta a. Tun hnu hian Darngawn ram theh a nih phawt chuan manganthlak khawpin lo neih kan inchuh leh ta a. Engkim mai hi Pathian thu thu a lo awm a ni.

VANGTLANG NUN HMASAWNNA: Darngawn khua hian hetiang taka harsatna a tawh hma hian vangtlang nun hmasawnna kawngah tan an lo la nasa hle thinin heng pawlte hi mumal takin alo ding tawh a ni - Boys' Scout, Signal Pawl, YMA, Games & Sports.

OLYMPIC: Kum 1951 October thla vang laiin YMA leh Game hruaitu ten Darngawnah Olympic hman turin ruahmanna an nei a, he hunah hian an thiam thil leh theihna chi hrang hranga intihsiakna an buatsaih a, chungte chu: -

MIPA ITEM – Football, Long Jump, High Jump, Inhrupawh, Intlansiak, Arbawm tah, Paikawng tah, Chingal thlawr bur tah leh Suvel siam.

HMEICHHE ITEM - Intlansiaka hriau hrui thil, Sairawkerh perh, Inhrupawh, Rawmawltlang phiar leh Lukham case thui.

Olympic-ah hian Group thumah an then a, chung hruaitute Chu: (1) Pu Lallana (2) Pu Engmawia Pachuau (3) Pu Lallianthanga te an ni. Olympic hman tur hian khawtlang an in puahchah nasa hle a, khaw danga School kalte pawh an lo haw vek a ni. Champhaia MES kal Pu Rozama te ho haw dil thu hi in tarlang hram teh ang. Pu Vanlallawma Headmaster a nih lai a ni a, Pu Rozamate chuan Darngawna Olympic hman tur chuan hawn an dil a, an zirtirtu pakhat Pu Lalthankima (Dawrpui Vengthar upa) chuan lo dawngsawngin a chhan vawi hnih lai lo zawt nawnin Pu Rozamate chuan Darngawn-ah Olympic kan hman dawn ti in an chhang a, Pu Lalthankima chuan Olympic a ni! Olympic hi Asia khawmualpuiah pawh dawng thei kan la awm meuh lo a, India phei chuan kan la huam lo hrim hrim a, chutiang chu Darngawn khuain in dawng dawn a nia, haw lul ang che u, a lo ti ta a ni.

Darngawn khua hi helai chhehvelah chuan football lama hmasawn hmasa leh field pawh nei hmasa kan ni a, kan VC hmasate hun laiin football thiam thlanna an nei a, chungte chu: - 1) Dengkhuma 2) Manzika 3) Robula te an ni. Kum 1956 vel atang chuan Darngawnah hian khaw chhehvelte chah khawmin Football tournament an buatsaih thin a, a hnu deuhah phei chuan Pi Nithangi Aizawl Cup inchuhin khaw thenawm, Ngaizawl, Tualpui, Zopui, Tuisen, Zaingen, Tualte etc. an lo kal thin. Hetih hun laia football pet entu putar pakhat Pu Lalzenawna pu chuan "E! E! E! an tih dan khu depde thiltih a ni, thiante chan that lai chhuhsak an tum a, ka en duh lo tawp" tiin a hawsan daih.

Hetiang vangtlang nun changkanna Darngawn khua in an lo neih theihna chhan hi Indopui II na kum 1939 - 1945 chhunga British sipaiah engemaw zat an lo tan vang te, kan mithiam hmasa heng mite hi an pawimawh hlein a lang a, chungte chu: -

Pu Lalhmingliana s/o Rev. Kaplunga kum 1948-ah BA a pass (Tuichang rala BA pass hmasa ber), Pu Lianngghaka, Pu Vanhela, Pu Vaivenga, Pu Lalringa, Pu Selluaia, Pu Laltanpuia, Pu Laltawnga, Pu Lalthanzaua, Pi Kawlchhungi, Pu Zahiira, Pu Hnudala.

ZIRNA LAM: Zirna lamah hian kum 1935 hma lamah chuan Biak Inah A AW B zirin bul an tan a, Darngawn kai hnu kum 1935 atang chuan Lalin Primary School tur a saktir a, chuta zirtirtu hmasate chu: (1) Pu Kapthianga Tirhkoh, (2) Pu Darkhuma, (3) Pu Buangchhunga, (4) Pu Thanthuama, (5) Pu Saichuana leh, (6) Pu Khawkhama, (7) Pu K Lalsanga.

Kum 1935 - 1939 vela school an sakna hmun hi Darngawn hmun chhim lam tlang (Pem veng) an tih thinah an sa a, chumi hnu kum 1940 — 1945 velah Darngawn Field-ah an sawn leh ta a, kum 1946 —1957 velah chuan Muallungthu bul tlang khawthlang lamah an sawn leh a, kum 1958 — 1968-ah Darngawn Field chhakah Rangva in in an sa leh a ni. Pu Buangchhunga hunlai hian chhun nisat vanglai takin thlipui hlau apiang tlanchhuah tur a ti thin a, tap an awm hma chuan chutiang chuan a tlan chhuah tir thin a, a tihna chhan a hnua an sawi leh danin school building kha a chhe tawh lutuk a, Lal hnena sak that a nawrna kha a lo ni awm e. Kum 1937 velah hian zirtirtu an awm mumal loh avangin Pu Darkhuma Chawngtlai (Upa B Lalsanga Kawnzar pu) chu roreltu ten zirtirtu atan an sawm pheii a, vanduaithlak takin Kum 39 mi chauh niin Ni 15.12.1939 khan a boral a, hemi hnu hian Pu Buangchhunga a thawk leh a, ani pawh hi kum rei awm loin a insawn leh tak mai avangin Rev. Kaplunga te, a fapa Lalhmingliana te chu roreltute'n an ngenna avangin zirtirtu hna hi an thawk bawh thin a, hemi hnu kum 1948 atang chuan Pu Thanthuama a rawn awm leh ta a ni.

PRIVATE MIDDLE SCHOOL: Kum 1951-ah khan Private Middle School an din a, Muallungthu bul chhuah lam tlangah sak a ni a, a bul tlangbawkah hostel sak a ni bawh. Hostel hi a awmna a ramhnuai deuh avangin zanah Sakeiin a lo rum khum thin a ni awm e. Hetih hunlai hian Aizawl pawn lamah Middle Shool a la tlem hle a, khawchhak lamah chuan kum 1945-ah Champhaiah leh Sialhawkah din a ni. Thingtlang khaw lian lo tak, in 75 vel chauh awmna a an lo din theihna chhan hi kan Lalte thatna leh kan lekhathiam hmasate thawh rah pawimawh tak a ni. Chutih hunlai chuan heng khua Zaingen, Arro, Zuchhip, Tualte, Chawngtlai, Neihdawn, Ngaizawl, Tualpui, Khualen leh Khawzawl khua ten Darngawnah School an lo kal thin. He Private Middle School a lo thawk tawhte chu (an thawh hun indawt dan ni chuang loin) : *Pu Lianngghaka, Pu Vanhela, Pu Lalzama, Pu Lamliana, Pu Thansiamia, Pu Zahiira, Pu Laltanpuia, Lalthanliana, Pu Lalenga, Pu Robert-a, Pu Lalhlira, Pu Hnudala, Pu Zachhunga, Pu Hauthangvunga, Pu Lalbela, Pu K Zakunga, Pu Lianthuama, R Rozama, Bobe Chhetri, Pu Tawnluia, Pu H KL Thanga.*

KOHRAN LAM: Darngawn kai chhoh hmasak hma pawh hian ringtu tlem an awm ve tawh a, kum 1914 - 1922 vel chhung Darngawn tlangsang thlanmual chhak deuh zawl zimte Theipui awmna lai hi an Biak In hmun a nih thu leh heng hunlai hian Arroah chuan

Kohhran an mumal tawh khawp mai tih Upa Pachhunga'n a sawi a ni. Mualvawm awmlai kum 1922 - 1934 hian Biak In te nei in hei hi school-ah an hmang thin bawk ni a hriat a ni. Darngawn kai chhoh tum hnihnaah chuan hun rei tak chhung Presbyterian Kohhran chauh hi a ding a, field awmnaah hian Biak In an sa phawt a, chumi hnuah tuna hmun hlui Senior Inhabitant ten tawngtaina in an sakna hmunah hian Biak In chu a chung dap chihin an sa leh ta a ni. Kum 1951-ah chuan thiatin a chungah thingphel an chih a, (thingphel hi 10 inches a hlai 18 inches vel a sei Saphukawr anga inbawhthuah in an hmang a ni) kum 1965-1966-ah Biak In chu a chung Rangva in sak that leh a ni.

Presbyterian Kohhran hruaitu hmasa te: Pu Suakliana , Pu Phira, Pu Lalruanga, Pu Taivela, Pu Haukhawchhana, Thangchiaua (Upa), Pu Zazinga, Pu Laldawla (Vaivenga Pa), Upa Rangkhuma, Upa Pachhunga, Upa Remthanga, Upa Kawlkhuma.

UPC LAM: Kum 1950 June thlaah UPC a lo ding a, Biak Inte pawh an nei a, heng mite hi an hruaitu hmasate an ni:- Pu Siamkunga, Pu Ropianga, Pu Hnuntawia, Pu Vanthuama. Pu Siamkunga hi hun engemaw chhung chu an Pastor-ah a tang a ni. Kum 1968 velah chuan an zuih ral tep a ni.

SALVATION ARMY: Kum 1950 velah Salvation Army a lo ding a, an hruaitu hmasate chu Pu Sehnawka, Pu Taivela leh Pu Laldawla, rambuai hnuin sawi zui tur vak an awm lo a ni.

ROMAN CATHOLIC: Kum 1927 velah Mualvawm awm laiin an ding a, an hruaitu hmasate chu: - Pu Darthuama, Pu Thathuama, Pu Dokhaia. Rei ding loin an ni pawh hi an tiliak leh thuai a ni.

Presbyterian Kohhran lamah chuan Rev Kaplunga Arro Kohhran atangin a pension a, Chawngtlaiah a pem chho a, kum 1941 vel atangin Darngawnah lo pem ve lehin Darngawn Kohhran enkawltu a ni zui a, Pastor Zawna kum 1944-ah Zaingen atangin min bialtu a ni chung hian Baptisma leh inneihtirtu rawngbawlna chu a chhunzawm ve zel a, ani hi kum 1958-ah a boral a, Darngawn Biak In compound chhungah phum a ni a, a thlan pawh tun thlengin hmuh theihin ala awm a ni. He Biak In hmun hluiah hian Senior Inhabitant of Darngawn tia invuah ten tawngtaina in 24x12 ft a sain a duh apiang tan tawngtai bethel neihna atan hman theih a ni.

Presbyterian Kohhran lamah chuan kum 1916 atanga kum 1924 Presbytery pakhat chauh kan la ni a, Mizoram hmar chan (Mizoram chhim lam chu BCM chan a ni) ah kum 1937 hmalam kha chuan Presbytery pathum chauh, khawthlang, chhim chhak, hmarchhak tiin an then a, kum 1937-ah Hmar pheii Presbytery a pian belh a, keini lai bial chu Saitual leh Ngopa lamte nen kum 1959-a Zaingen in Presbytery an thlen thleng khan hmar chhak Presbytery ah kan bet a, kum 1960-ah khawchhak Presbytery alo pian khan keini Zaingen Pastor Bial chu khawchhak Presbytery ah kan bet a, Kum 1986 Tuichang Presbytery alo pian khan tun thlengin Tuichang Presbytery ah kan awm ta a ni.

KHURBING: Naupang hoten kan hriat dan chuan UPC Kohhran atanga chhuak mihlim pawl tlem te awm khawmte chu khurbing kan ti mai a, hun rei an daih ta lo a ni.

SAKHAW HLUI VUAN PAWL: Darngawn khuaah hian eng Kohhranah maha tel tha duh vak lo zu leh sa te chen a, kumtin Chapchar Kut leh chai ti duh pawl tlem te an awm a, mual zawlah an Zu belte chawi chhuakin Zu nena lamin an chai ve thin a. Mahse, heng ho hi kum 1960 hnu lamah chuan Kristian na avangin hmuh tur an awm ta lo a ni.

KHAWTLANG INRELBAWLNA KAWNGA MI PAWIMAWH DANGTE

1. Khaw chhiar: - Anni hi Lal puitu, (Lal Secretary) engkim chhinchhiah a ziaak feltu an ni a, khawtinah an awm a, Darngawn khuaa khawchhiarte chu:- i) Pu Zahnuna ii) Thangkawka.
2. Thirdeng: - Lal thirdeng an ti bawk thin. Pum a kai zawng in sa an kah apiangin sa an hleh a, tin, kumtawpah in tinin bituk zat ang zelin buh an pe thin a ni. Darngawn khuaa thirdeng te: 1) Pu Laiawrha, 2) Pu Thiahleia, 3) Pu Taivela, 4) Pu Zazinga, 5) Pu Lalmana, 6) Pu Kawlkhum.
3. Lal Upate: - Khawtlang in awpna kawnga Lal puitu an ni. Darngawn Lal upate chu:-

- | | | |
|-------------------|------------------|--------------------|
| 1) Pu Thavela | 2) Pu Chhonzova | 3) Pu Suaklana |
| 4) Pu Hrangzika | 5) Pu Siamkunga | 6) Pu Laldawla |
| 7) Pu Vaithata | 8) Pu Kaithanga | 9) Pu Liantuvela |
| 10) Pu Dosata | 11) Pu Thangvela | 12) Pu Neklaia |
| 13) Pu Thangkunga | 14) Pu Taivela | 15) Pu Thangthiaua |

RAMCHHANNA LEH SAWRKAR HNA LAM: Abawr (Tuna Arunychal) Runa kalte: Abor ho hi British sawrkarin an thuhnuiaia dah tumin kum 1912-ah an bei a, Mizo tlangval sang rual pawh an hruai tel a. Chung zingah chuan Darngawn tlangval atangin mi 2 an kal ve a, chungte chu :- 1) Pu Zaia (Pu Dosailoa pu) 2) Pu Chhonzova (Pu Thanhkira Khawzawl Dinthar pu). Pu Zaia hi Abor run chanchin an zawta. Ani chuan "Ngaihban tlang leiverhah kan lut a, a hmasain kan lut an ti a, a hnunung pawhin kan lut kan ti ve mai" a ti a, hei chiah hi an chanchin a sawi a ni.

German run (Indopui I-na (1914-1918): He huna Indo ram langsar zualte chu : 1. Central Power (German lam tang) Austria, Hungary, Bulgaria, Turkey te an ni 2. Allied Power (British lam tang) France, Italy, Belgium, Greece, Russia, Serbia, Japan, Portugal, Montenegro, Rumania, USA. He indopuia hian German run turin Mizo tlangval 2100 te chuan ni 20 June 1917-ah Mizoram an chhuahsan a, June thla 1918-ah an lo haw leh a, German leh a thurualpuite chu ni 11 Nov, 1918-ah an tlawm ta a ni. Mizo tlangval zingah hian mi 71 in nunna an chan. Hetah hian Darngawn tlangval pali an kal ve a, chungte chu: 1) Pu Haukunga (Upa Hauhmingthanga (L) pa) 2) Pu Vanzuana (Upa K Lalzika pu) 3) Pu Taihiaua (Pu Lalhumhima pu) 4) Pu Dosata (Pu Zarzoliana pu)

British Sipaiah: Pu Sawithuama, Pu Thiakiaua, Pu Tesena, Pu Hauthangvunga, Pu Pachhunga, Pu Chhunthuama, Pu Thangkhaia, Pu Tawklana, Pu Akripa, Pu Lalsiama (IAMC Hav), Pu Biaktluanga.

Biate Sipaiah: - Indopui II-na hun laia sawrkarin Mizoram venghim tura Mizo a lakte an ni a, an headquarters-ah Biate an hman avangin Biate Sipai an ti ta a ni. Pu Engmawi, Pu Thangluaia, Pu Kaphnuna, Pu Vanthuama, Pu Taithiaua, Pu Sehnawka, Pu Lalmana

Burma Sipaiah: Pu Chalmara, Pu Kapthuama, Pu Manliana, Pu Zarliana, Pu Vanlalzara, Pu Chhunthanga, Pu Rodenga, Pu Hrangluta, Pu Dariuta, Pu Dengthuama (ani hi Burma sipai zinga lung deng thui leh football thiam tia hriat lar a ni.), Pu Sawiluaia, Pu Vanlalsiama, Pu Vanlalbiaa, Pu Laibata, Pu Bawra, Pu K Pachhunga.

Assam Police-ah: Pu Lalthanzaua, Pu Thangluaia (Driver).

Assam Rifle & Assam Regiment-ah: Pu Senluaia, Pu Dosailova, Pu Hnundailova, Pu H Parmawia, Pu Thuamlia, Khawvelthanga.

MNF/MNA-ah:

- | | | |
|------------------------|---------------------|----------------------|
| 1) Pu K Lalsanga | 2) Pu Lalbela | 3) Pu F Lalrosiama |
| 4) Pu K Zakhuma | 5) Pu K Vanlallawma | 6) Pu K Biakhnuna |
| 7) Pu Laltuma | 8) Pu H Lairinliana | 9) Pu Lahnuna |
| 10) Pu Khuangchagliana | 11) Pu Lalvuta | 12) Pu Zokhuma |
| 13) Pu Lailuaia | 14) Pu Dengbuaia | 15) Pu Lallianthanga |
| 16) Pu K Pakunga | 17) Pu Lalthangzova | 18) Pu Sanghluna |
| 19) Pu K Edenthara | 20) Pu Sangliana | 21) Pu Thanghnuna |
| 22) Pu Lalhlira | 23) Pu Rosiama | 24) Pu Lalngheta |
| 25) Pu Zonuntluanga | 26) Pu R Rammawia | 27) Pu F Rothuama |
| 28) Pu Zoramdina | 29) Pu Biaktluanga | 30) Pu Ralthangpuia |
| 31) Pu Lalchhuanthanga | 32) Pu Dokima | 33) Pu Vanhela |
| 34) Pu R Sanghnuna | 35) Pu Lalromanga | 36) Pu Thangrikhuma |
| 37) Pu Lalropuia | | |

Mizoram buai laia Darngawna Vai Sipai kut tuara boralte: Sangliana Darngawn, Lalbela Darngawn, Hrangailova Tualpui, Ralkhuma Khawbung, Lalnunchanga Baktawng.

Khawzawla khawm luh hnua Vai Sipai kut tuara Khawzawl leh hmun danga boralte: Pu Dengbuaia, Pu Zokhuma, Pu Lalropuia, Pu Lalzapa.

Kum 1951 leh 1966 inkara zirna lama hmahruaitute: Pu Zokawnga, Pu Neklaia, Pu Hrangkhuma, Pu Kelleta, Pu Chawngchhunga, Pu Dengthuama, Pu Lallianthanga, Pu Lalthanzaua, Pu Lalchhandama, Pu H Thansia, Pu Pakunga, Pu Vanlalaua. A hnuaah Pu Kapruma, Pu VL Biakenga, Pu Lalluaia, Pu Lalchhandama, Pu Vanlallawma, Pu C Malsawma, Pu C Lalhmachhuana, Pu R Laldawngliana, R Sanghnuna leh Lalrinmawia te.

Sa kap tam ber - Pu Senluaia. Sa lama huaisente - Pu Haukhawchhana, Pu Dokhaia, Pu Thanhnuna. Khawtlang insem tura Sanghal tlangzamtu - Pu Thangkhaia leh Pu Biakmawia. Sial hlin leh Vawkte mana mi chhuanawm bik - Pu Chalngkhaka

Mi chhuanawm thenkhatte: Rev Kaplunga a pension hnuin Darngawnah Baptistma leh Inneih rawngbawlina kawngah. Kohhran tan mi tangkai tak a ni a, a fapa Lalhmingliana chuan kum 1948-ah BA a pass a, Tuichangral chhak lamah BA pass hmasa ber a ni a, a tunu Kawlchhungi chu sapho hnuiaia nurse zir chhuak hmasa niin hmun hrang hrangah a thawk a, kum 1999 khan sister in Aizawlah a pension. Tin, a tupa Pu Lalthanzauva tupa Lalnuntlana chu Doctor chhuanawm tak a ni mek bawk.

- 1) Pu Vanhela BA niin MNF ramhnuai sawrkarah speaker a ni a, Tin, a fanu Pi Parsiami w/o C Lalsawmliana Aizawl College Veng chuan fa paruk MA (Economics) vek a nei a, tunah hian MCS- 1, MPS - 1, College Lecturer -1, Research Officer -1 leh Account Officer - 1 an awm mek a ni.
- 2) Pu Vaivenga BA niin Mizoram sawrkarah Education Minister te, Speaker te a ni a, fa Doctor a nei bawk a ni.
- 3) Pu Thanthuama Darngawnah Primary zirtirtu kum 1948 — 1962 chhung a thawk a, hetihlai hian Mizorama school 16 a lak zingah Darngawn Primary School hi a tel a, chuta thawk tura sawrkarin a rawn dah chu a ni. A tu leh fate zingah hian MCS -I, Doctor - 4 hmeichhia vek, leh BA chin chunglam 4 an awm a, heng zinga pakhat Pu Lalhmachhuana fanu phe chu Doctor Senior Residency a nih hnuah MZU atangin Ph.d (Hnute cancer chungchang) tunhnai lawkah a hmu.
- 4) Pu Selluaia BA, B.Ed, M/S Headmaster pension hi a tu leh fateah heng hi an awm; Doctor-2, MA-I, M.sc-I, LLB-I, M.com-I, MCA-2, BA-3, B.sc-I.
- 5) Pu Ngurchhina hi a tu leh fateah Pastor-1, Kohhran Upa - 3, MPS - 1, MSS - 1, M/S Hdm -1 an awm.
- 6) Pu Hauthangvunga hi Indopui II naah Sap sipai zingah Havildar Clerk a ni a, Sap tawng hi Mizo tawng ang thoin a thiam.
- 7) Pu Lalrinmawia MLA niin N Vanlaiphai bialah kum 1987 -1989-ah thlan tlin a ni.
- 8) Pu Thatburha hi Zawlbuk tlung a zawh chhuak ngam a, a chung bakah pen khat a pen leh ngam lo.
- 9) Pu Zaia hian a thianpa thing atanga tla lei a thlen hmain a lo dawng.
- 10) Pu B Lalthethanga BA. B.Ed, ani hian kum 2004-ah State Award for teacher a dawng.
- 11) B Lalthanhanimi, Pu Lalzenawna tunu Weighlifting-ah Mizoram aiawh leh India ram aiawhin a fehchhuak tawh thin a, Gold Medal leh Medal dang tam tak a hawn tawh.

HMUN PAWIMAWH LEH RAM HMING

1. Darngawn kham khuai (Kham khuai lakna thin) an tih thin chu Ngaizawl ram Khuailui hnarah a awm.

2. Tuisen Bungalow:- Aizawl to Champhai lamlian Sabengtung kal theihna tura laih hunlai hi kum 1890-1900 vel niin hriat a ni a, khual pawimawh leh zin veivakte riah nan leh Bawrsap in Lalte a kohkhawmna hmun remchang laiah Bungalow an sa a, Aizawl atangin Bangla chu Bungtlang, Seling, Lumtui, Khawthlir, Kawlkulh, Tuisen hnar, Neihdawn, Champhaiah te a sa a, Tuisen hnar Bungalow hi Darngawn ram chhung, Tuisen phai bul maiah a awm a, rambuai lai khan hal chhiat a ni.
3. Thanseia Puk :- Chawlhmun tlang tuna IR awmna tlang, Office pui awmna tlang chhuah lam kham a awm a ni a, a chhhunga luh theih mi paruk(6) vel din len theihna a ni. Thanseia Puk tih hming a putna chhan chu kum 1912 -1914 vela Chawlhmun tlang an awm lai hian Pi Thangchhungi (Pu B Lalzenawna Darngawn veng pi) damlo hnenah ramhuaiho in an sawi dan a sawi chhuah a ni. Hetiang hian "He lai Pukah hian kan awm a, kan kalna dal in Balhla te in phun a, kit vek rawh u, kan naute tual chaina in dal a, Tin, Ar in rawn inthawi ula, mahse hun rei lo teah Khawpuitanah kan pem dawn a, kan Lal chu Thanseia a ni" an tih atangin a hming hi a pu ta a ni.
4. Sertuk hmun, Sertuk tuikhur, Sertuk kawn :- He lai hmun hi Singzawl road Khawzawl atanga KM 12 vel a ni a, Tuichang phai leh Tuira phai peng awmna kawn hi Sertuk kawn a ni. Kawn chhak lawk hmar lama tlangzawl nuam tak hi Hmarho awmna thin a ni a, an awm hun lai hi kan Chiang lo nain Kum 1850 hma lam niin a rin theih. Kum 1953 vel kha chuan Darngawnin lo a kan neih pawhin khaw awmna chin lei rut leh lei chhun pawn (kulh ang deuh) te pawh a la hriat theih a, lo atan neitute pawhin hmanlai thil hlui Bellam chhia te, Thimkual te, tuibur lai te an hai chhuak fo a ni. Hemi hmar lam chiah ruama tuihna kang ngai lo tui tha tak hi Sertuk tuikhur tih a ni. Singzawl road atanga pen chhohna lai hi Sertuk kawn tih a ni a, kawn nuam tak a ni.
5. Lalzovi Dil:- Kum 1945 velah khan Darngawn hmun peng chhohna piah lawka kawn zawl nuam tak fur laia tuihna tha tak awmna thin chu Pu Ropiangate thianho in Lal hnenah khuah an rawt a, Dil zau tha ve tak niin Darngawn khua in tui kan thiam phahna pawimawh tak a lo ni ta a ni. He lai hmun hi Pi Lalzovi'n leipuah a nei a, a hming chawiin Lalzovi Dil tih a ni ta a ni.
6. Mualvawm (Darngawn Sipai Camp awmna):- Kum 1953 March 4-7 vel khan 1st Assam Rifles in Darngawn Lal hnenah Sipai Company Hqtr awm nan an rawn dil angin an awm tan a, chutih laia Lal Pu Lallana Sailo chuan Darngawn Camp tiin a hming vuah tur a ti a. Rambuai hma deuh atang khan tuna DC Bungalow awmna hmun tlang (kungsang tlang) ah hian Sipai awm darh nuai chu an in sawikhawm ta vek a, a hnuah chuan 6th Assam Rifle te pawn an luah leh a, Kum 1993 velah chuan an chhuahsan zo leh ta a ni. Sipai awm lai kum 1953 — 1964 chhung vel hian August Ni 15 (Independence Day) hian kumtin Khawzawl chhehvel khua zawng zawngte an chahkhawm a, inelna chi hrang hranga intihsiakna leh Inbuanpui te an buatsaih thina, Sipai 60 vel lam hmuhawm tak tak en turte a awm thin.
7. Lungdawh kawn leh a lungphun:- Hei hi pengpui atanga chhuah lama kawng phei zela kawn va chhuah chiah in kawng hrulah Lungdawh zau tak leh lungphun sang tak a awm a, tun hnuah chuan a lungte hi bung then tawhin hmuh theihin ala ding a

- ni. Heng lungphuntute hi Hmar hnam Sertuk hmuna an awm lai a, an Lal Pu Zakhama'n a fanu hming koh hriat reng nana a phun a ni a, a lung hi Leipui lui ami an zawn chhuah a ni. He thu kan hriatna hi kum 1951 velah Darngawn pahon hnenah Khawlek khaw putar pakhatin "Hetih hunlai hian naupang te ka la ni" tiin alo hrih a, chuvang chuan kum 1850 vel a nih kan ring a ni. Heng lai tlangdung hi Lungdawn kawn ram tiin a hming alo pu a ta a ni.
8. Pu Chema Tui:- Lungdawn kawn tlak lamah kawrte a awm a, kawn atanga hnai teah thalah pawh kang ngai lo tui a awm a, chu chu Pu Chema Tui tih a ni. A thlanglam chu a ro vek zel a, tunlai thangthar ten Singzawl Road kawng chhak lama tui awm Pu Chema Tui an tih hi a ni lo a, he tui hi chu Pu Chema Tui lem kan ti mai a ni.
 9. Sakei Trench:- Darngawn leh Ngaizawl, Zopui khuate inkar kawngah hian Sakei a awm duhin Bawng leh Sialte a seh fo thin a, Kum 1950 chho velah khan Pu Hauthangvunga leh pathlawi rual ten Sakei channa tur Sabual kawn pia lawk remchangah an siam a, Kawng hrul chhak lamah khur an lai a, mihring tleng luh theih tura siamin a chung thing leh lei in an chhilh leh vek a, zanah Sakei an chang fo thin a, mahse, kah theihin an chang chhuak ta lo a ni.
 10. Naute thuhrukna:- Darngawn khua atanga Kawnpui kawng chhak Darngawn ral mai ni kang laiah sawn kham ko chhete leh puk chhete a awm a, chu chu Naute thuhrukna an ti a. Hmanlaiin Mura hian in chhunga naute awm hi a la thin a, chumi an hlau chuan he hmunah hian naute an thukru ta thin a ni.
 11. Thatburha Tui: - Darngawn hmun thlanmual thlang hmar lam khamko hnuaiah a awm a, thal lai chuan a kang fo va, a kawng hi Darngawn field hmar lam kilah a peng.
 12. Lungphun/Thlanmualte: - Pu Lalhuta Sailo Mualvawm awm laia a thih hnua a lungphun hi Martarte thlan thlen phei hma kawng thlangah a awm a, Kum 14 ro a rel a, Ni 21.11.1930 khan Shillong-ah a boral a ni. Tin, a chhak lawkah hian Pi Hrangdailovi, ringtu hmasa (Pu Vanhnuaithanga (L) ni) thlan a awm a, Ni 18.12.1922 a boral a ni. Ani hi an Luhkapui hnuaiah an phum a, hetih hun laia an thlanmual chu field thlang tlangdung pang thing lian awmna vel hi a ni. Mualvawm awm lai atang hian inphum hi Kristian danin an ching tan ni a hriat a ni a, Darngawna an kai chhoh (kum 1935) hian an thlanmual chu hmar lam khaw hrul mai ah an siam a ni.
 13. Lungdawn dangte: -
 - 1) Lal lungdawn: Darngawn Lal in kawta lungdawn hi Lal lungdawn an ti a, Pu Tawnga damlai lung phun a ni.
 - 2) Jubilee Lung: Darngawn Biak In Compound chhunga Mizoram Presbyterian Kohhran Kum 50 tlin lawman, kum 1944 a phun a ni a, tun thlengin a la awm.
 - 3) Signal lungphun: Darngawnah hian Signal pawl an ding a. Kum 1950 velah Khawzawl lam kawtchhuahah lung an phun a, muh tur erawh a awm tawh lo.
 - 4) Pu Denga Lung: Darngawn thlen dawn Ngaizawl peng awmna kawng hrulah lungphun a ni a, he lung hi Pu Dengthuama Ni 11.2.1952 a kum 65 mi nia boral ta hriat reng nan a tu leh faten an phun a ni. Helai hmunah hian midangte pawhin

an chhungte hriatrengna lungphun an nei baw a, chungte chu: - a) Pu Darkhuma
b) Pu Sangkhuma c) Pi Zukdengi

- 5) Lawmlung: Hei hi Pu Denga lung thlen hma kawnah lung Satelah a awm a, Lungrual lawmlung an ti baw.
- 6) Vanlalzara lung: Lawmlung atanga kawng hluia kalin chhim lam deuh kawng hrul ah a awm. Vanlalzara hi Burma Sipai a ni a, a thih hnuah a chhung ten amah hriatreng nana an phun a ni.
- 7) 7) Vanlalngaii lung: Vanlalzara lung atanga chhim lamah a awm. Vanlalngaii hi Pu Hrangkhumate fanu neih chhun a ni a, Kum 8 mi a a boral hnuin amah hriatreng nana phun a ni.
- 8) 8) Pu Thangkhaia memorial shed: Pu Denga lung bul Ngaizawl kawng lama Waiting shed hi a tu leh fa ten an siam a ni.

MIZAWN INCHUH/ INNUAI: Darngawn khua hi kan vanglai pawhin In 75 chauh kan ni a, khawper Khawzawl nen pawh In 100 kan tling ngai lo a, kan Sailo Lalte leh Kan VC te rorel thiam vang nge khaw inlung rual tak kan ni a, hruaitu hmasate hi an lo rorum deuh nge ni dawn kan chhehvel khua Tualpui, Zaingen, Arro, Zuchhip leh Chawngtlai za nufa khuate pawh hi Mizawn inchuha nuai ngam loh tumah an nei lo. Tualpui khua nen hian an innuai ngun deuh bik a. Arro khua nen hian kan ramri a tawi teh lul nen mizawn inchuh hi sawi tham takin tum hnih thum an nei baw a ni.

Mizawn inchuh/Innuai tih hi mitthi emaw damlo emaw khua atanga zawn chhuah an nih dawnin an va pek tur khuate hnenah zualko an tir lawk a, an va pek tur khuate chuan ramri kan a, mizawn chu lak an lo tum thin a, a zawntu lam in ramri pela zawn an tum thung a, hetiang tlawmngaihna avanga ruang/hlang changtu nih an inchuh hi Mizawn inchuh/ innuai tih a ni.

Darngawn khua hi chuan hetiang mizawn inchuh/innuai hun a thlen dawn hian kawng remchangah chawl khawmin Val Upa ten fuihna thu an sawi thin a, hnahchhawla kan vuak che u in kan vuak nat dan ang zelin tanlak kan ngai tiin an fuih thin a, a tawp hunah tak tak chuan Lal leh Upa ten ban an phar thin.

KAWNG LAM: Hmanlai chuan kawng hi tlangsang sahmul thenah kawn pawh turin an kal thin a. Mel veng atanga Darngawn kalna kawng hi hetiang a ni. Mualvawmah chhoin Chawlhmun tlang a phei a, chuta tangin Darngawn an kai chho leh thin a ni. Kawng hi tun hnuah a danglam nasa tawh a, hetiang hian an siam tha ta a ni.

- 1) Chawlhmun tlang helna:- Chawlhmun tlang chhuah lam tun hma a zinkawng ang khan a helna hi kum 1951 velah laih tlang a ni.
- 2) Ngopa road (Pu Keua kawng):- Ngopa road hi Jeep road in Khawzawl atanga Ngopa thleng in kum 1959 atanga kum 1963 chhungin laih a ni.
- 3) Singzawl road:- PWD in Ngopa road zul zuiin kum 1982 atanga 1986 vela laih a ni.
- 4) Seling - Champhai road:- Seling - Champhai road hi pioneer in kum 1968 atanga kum 1977 vela an laih tlang a ni.

MEL VENG (KHAWZAWL): A hma lama kan lo sawi tawh ang khan Khawzawl hmun leh a chhehvelah hian Zohnahthlak thlangtla hmasa Hmar hnam, Thiak hnam peng pakhat Khawzawlho hi an lo awm tawh niin hriat a ni a, Khelte hote, Kawlni hote pawhin an luah ve leh a, chumi hnuah chuan Pu Sawngbana leh a thurualpui ten kum 1830 — 1850 velah an thut ve leh a, chumi hnuah chuan Pu Sathawhuaua hoin kum 1851 — 1858 velah chhungkaw 5 lekin Vancheng atangin leilet siam turin an rawn luah ve leh a, an tum anga a lo awlsam mai loh avangin an chhuahsan leh ta a ni. Pu Lalburha Sailo Lal chuan a chhiahhawh pakhat Pu Taibeha leh mi engemaw zat Khawzawl tlang luah turin a tir chho ve leh a, hei hi kum 1905 vel nia hriat a ni. Pu Taibeha leh a hote hi helai tlangdung velah hian an insawn den den niin a lang. Chawlhmun leh Darngawnah te an kai chhoh hnu pawhin Sawrkar lamlian enkawltu turin (Mel veng) Pu Neihthawma hoin In tlem te Khawzawlah hian an awm reng a, Bangla chawkidar awmpuitu tur ten an rawn belh chho zel a, hei hi Khawzawl khua bul tanna tak a tih theih awm e.

Darngawn nen hian Lal ram pakhat hnuai a awm kan nih avangin sawi pawlh loh theih kan ni lo va, veng bil anga an awm kum 1963 VC an neih hnu pawhin ram hrang an la nei chuang lo. Melveng an nih tanna tak hi hriat chian a har hle a. Kum 1930 Darngawn kai hnuah pawh Mel ven hna chu an la thawk zel a. Kum 1944-ah Pu Tlangliana f/o Pu R Malsawma Vengthar a borat khan sawrkarin a fate an la tet avangin a chhungte chu Mel veng tur in awm tawh lo tiin ban an tum a, Pu R Malsawma nuin theihtawpa a dil leh hnuin Melveng Phaltu in ni ang tiin an lut leh ta tih a fapa Pu R Laldawngliana Aizawl Chawnpui chuan a sawi a ni. Melveng kan tih mai chin Khawzawl hian hma alo sawn dan hi Darngawn nen inkaihnhawih tlat a nih avangin chu hmasawna bul pawimawhte chu hengte hi a ni:

- a) Kalkawng: - Aizawl - Champhai lamlian laih kum 1890 - 1900 vel.
- b) Seling: - Champhai Jeep Road hawn Ni 12 Nov. 1958.
- c) Khawzawl: - Ngopa Jeep Road (Pu Keua kawng) laih kum 1959 - 1963.
- e) Khawzawl: - Sinzawl PWD Road laih kum 1982 - 1986 vel.

Chhak leh thlang, chhim leh hmar zawnga kawng kal tlangna nuam leh hmun rem tak niin 1st Assam Rifle Company Headquarters (March thla tir 1953-ah an awm tan) awmna hmun a ni bawka, Kum 1953 vel atang chuan a chhehvel khua atangtein an pem luh belh zel a, Kum 1958-ah phei chuan Bazar leh dawr hmun te siam a ni a, tuna chhim veng Kohhran Biak In kawtzawl thla hi Bazar leh Dawr hmun a ni a, henga dawrkai hmasate hi Darngawn khua deuh vek an ni a, chungte chu:-

- 1) Pu Sairuma (kum 1960 kumtirah Jeep a nei a, a registration no. chu AS 0357
- 2) Pu Thangthuama (kum 1961 velah Jeep pahnih a nei)
- 3) Pu Lalruanga
- 4) Pu Liankiauva
- 5) Pu Biaktluanga
- 6) Pu Liandailova
- 7) Pu Pasina (Khawzawl)
- 8) Pu Lianchhawna (Puanthui)

Kum 1960 atangin Village Committee an din a, chuta member-te chu: -

President : Pu Thangthuama
 Vice President : Pu Chawndenga
 Member : Pu Liankiauva, Pu Chawntuaha, Pu Chalkhuma (Pasina).

Kum 1963-ah Village Council hmasa ber kan nei a, chungte chu:-

President : Pu Darngaia
 Vice President : Pu Rangthanga
 Secretary : Pu Kapthuama
 Member : Pu Chawndenga, Pu Chalkhuma, Pu Chawntuaha.

Khawzawlah hian Kohhran lam pawh tlem te an nih lai pawhin mumal takin a ding chho ve reng a, Presbyterian Kohhran chauh an ni thin a, Rambuai hmaa Kohhran hruaitute chu - Pu Vanbawiha, Upa Thangluaia, Pu Noliana, Pu Chawndenga, Pu Ningula, Pu Lalbuaia, Upa Thathuama te an ni. Khawzawl Kohhranah hian Bial Khawmpui pawh Mualvawm awm lai atang khan an lo thleng tawh thin a, hetiang hian:

BIALTU PASTOR

1. Rev Thangkuma
2. Rev C Zawna
3. Rev C Zawna
4. Rev C Zawna

KHAWMPUI THLEN HUN

- April 13.1929
 March 6-8.1953
 March 30.1958
 March 2-4.1962

Pem lut an tam tak zel avangin kum 1960-ah Darngawn VC ten In hmun an theh belh a. Kum 1964 vel atangin Bazar hmun leh dawr hmun pawh Dinthar veng Volleyball Court awmna phei (Sasaw thelh)ah hian an sawn a, dawrkai an lo pung ta zel a ni.

ZIRNA LAM

PRIMARY SCHOOL: Primary School hi kum 1950 hma lam atangin a awm a, chung a thawktu hriat theihthe chu: Pu Lalbuaia, Pu Lianhleia, Pu Parliana, Pu Thangkunga, Pi Sanglianthangi te an ni.

MIDDLE SCHOOL: Mizorama School lama hotu ber Pu Lalchungnunga'n Khawzawl hi a ngai pawimawh hle a, heng Middle School, Darngawn, Arro, leh Zaingen khua a mite hi kum 1958 chuan Khawzawla sawikhawm vek turin tan a la a. Kum 1958 hian Pu Lalhlira Darngawn Headmaster hovin keini Darngawn Middle School pawh hun rei lo deuh chu Khawzawlah hian an zu kal nghe nghe a ni. Arro khua leh Zaingen khua te chuan Sawrkar thu chu an zawm mai a, keini Darngawn khuate erawh chuan khawm mai chu remti loin Shillong-ah Pu Hauthangvunga, Pu Chhilarauva leh Pu Lalluaua te chu kum 1959 velah School Director leh Deputy Director Pu Rynjah te zu hmuin School Khawzawla sawikhawm kan rem tih loh thu an zu thlen a, Pu Rinzaa chu Darngawnah kan School en turin a lo kal a, ani hi hetih lai a Gandhi Memorial High School Champhai Headmaster Pu Thanseia'n a rawn hruai a ni. Zirlai 48 vel kan ni a, Pu Rinza-a chuan in

School a tha a, chuang chuan a ngaiin in kal leh ang a ti a, kan lawm hle a, mahse Pu Lalchungnunga te hian kum 1961-ah pawl ruk exam an phal ve lo a. Kum 1962 ah erawh chuan a hma angin kan exam ve leh thei ta a ni.

Khawzawlah hian kum 1959 atangin Private Middle School an din chho ta zel a, chunga zirtirtute chu: Pu Thanchhuma, Pu H KL Thanga, Pu Hmingthanga, Pu Bawbe Chhetri, Pu Aichhinga, Pu R Dawngliana, Pi Sanglianthangi, Pu R Vanlallawma te an ni.

HIGH SCHOOL: Kum 1963 atangin Private High School a awm tan a, Headmaster bul tantu tha tak Pu Lalchungnunga Delhi BA in ti ngat Saitual khua chu rawih a ni a, School thang duang tak a ni hman a ni. Zirtirtute: Pu Lalchungnunga, Pu Thuamluaia, Pu Lianhnuna leh Pi Thansiami te an ni.

HMASAWNNA DANG: Health Sub-Centre hi kum 1960-ah a ding a, Heta Health Worker chu Pi Kawlchhungi Nurse a ni. Branch Post Office (BPO) hi a ding hma hle a, Postmaster kan hriat theihte chu: Pu Lalkhuma leh Pu Lalpianga. Gram Sevak-ah Pu Darrozama dah a ni bawk. Tin, CI Pu Tesena a awm bawk. Tin, Home Guard Training Centre nghah niin hemi an training lai hian an zawh hmain rambuui in a nang zui ta a ni.

Khawzawl khua chuan chak taka hmasawnin rambuui Ni ni 1.3.1966 (Thawhlehi) ah chuan In za nufa zet ni tawh in rambuui chawlhkar hmasa khan Jet Fighter in Ni 5.3.1966 ah khaw chhung ah Bomb thlakin in a kang darh ta vek a, a mi chengte tumah a hmun nghak awm loin khaw chhehvelah an tlan darh vek a, Kum hnih(2) vel zet chu tuma luah lovin a awm zui a, ni 19 Nov, 1968 atang chuan a chhehvel kuate sipaiin min khawm lut ta a ni. Hetih laia min awm tirna hmun hi tun hmaa Khawzawl khaw hluiah khan ni lovin Khawzawl leh Sipai camp inkar ramhnuaiah min dah ta vek a, Chung kuate chu, 1) Darngawn 2) Zaingen 3) Tuisen 4) Arro 5) Tualpui 6) Khualen (In 10 vel). A kum leh kum 1969 kumtira an rawn khawmte: 1) Zopui (Lal veng) 2) Ngaizawl 3) Zuchhip Hmuncheng khua hi a hranin Zuchhipah an awm tawh avangin Zuchhip angin sawi a ni ta zel a ni.

Hetia khaw 9 lai sawikhawm kan nih takah hian Sawrkar in Khawzawl chu PPV centre-ah min dah a, AAO in min awp a, sawikhawm zangnadawmna dawng hi chhungkaw 615 vel kan ni. 24th BRTF99APO (kawng laitute) te kum 1969 kumtir lam atangin an lo chhuak a, Aizawl - Champhai kawng laitute an ni. Chungah chuan labour-ah nitin mi 400 — 600 vel nikhata 4.5 hlawhin kan inhlawh thin a, hei hian compensate nena tangkawpin riltama thihna lakah min chhan thui hle. Kum 1968 - 1969 chhung hian tukluh hnatlang leh Kuli hna a tam em em a, kan khua hi sipaiin Sakuh se daiin min hung chhuahtir vek a, a khat tawkin gate an siam a, sipai an duty thin a, hnatlang leh Kuli a tam avang hian tuman thlawh hma kan la mumal thei lo va, MNF lam ten thawm an rawn neih deuh chang phei chuan ni sensa hnuaia mipui khawm leh nghaisakte kan tawk thin a, kan retheihna a sang hle. Ei chhiat avangin Santen leh hri dang a leng reng a, riltama thi em chu kan awm lo chungin nikhatah mi pahnih pathum in vui chang kan nei a ni.

Kan rethei em em chung hian khawtlang hruaituten zirna lamah bul tanin kum 1969 Primary School hmasa ber Vengsang Biak In kawtah hian an sa a, an sak lai chuan Vengsang Biak Inah school an kal thin a, Tin, High School pawh Pawl 7 leh pawl 8 an hawng a, tuna Darngawn Venga Pu B Lalzethangate in hmun hi High School hmun hmasa chu a ni. A hnuah Lal vengah Ngaizawl Biak Inah High School hi an kal a ni. Kum 1970 kumtirah Middle School an din a, School chu tuna Pu Sangtea (VLAA Pasal Zaingen veng) in chhak zawla UPC Biak Inah bul tan niin Venglai Biak Inahte pawh an kal a, chumi hnu kum 1971-ah tuna an awmna Zuchhip veng PHED tuikhuah awmnaah hian an awm ta a ni. Heta zirtirtu thawk hmasate chu:- 1) Pu PC Zakhuma Headmaster 2) Pu Vulliana 3) Pi B Laltlanthangi 4) Pu B Lalzethanga te an ni.

Rambuai nasa tlema a lo dul deuh hnu kum 1973 vel atangin Vengthar kawngpui kamah pemthla an awm tan a. Kum 1975 velah chuan Kawnzar lamah pawh pemthla an awm tan a. Kum 1977 velah chuan Dinthar Veng lamah pawh pem an awm tan zel a, Kum 1982 atang chuan Hermon veng lamah pawh Chawngtlai lam atangin an lo pheii ve zel a, Chhumliamkawn vel hi Chawngtlai ram a nih angin an VC ten Chawngtlai AO Pu K Sanghnuna hovin In hmunah an theh a ni.

Khawtlang rorelna lamah pawh khawtin atanga VC khawm luhte kha kum 1969 kumtir lamah ban vek an ni a. Kum 1969 June thlaah Pu Kamliana Primary Head Teacher kaihhraina(RO) hnuaiah VC thar inthlan buatsaih a ni a, ni 19.7.1969-ah Pu Biaktluanga Zuchhip veng inah VC chu form fel a ni a, chuta VC nite chu:

President	: Pu Darleta (Zuchhip)
Vice President	: Pu Thanchhuma (Tualpui)
Secretary	: Pu B Lalzethanga (Darngawn)
Member	: 1) Pu Biakmawia (Darngawn)
	2) Pu Runlinga (Arro)
	3) Pu Lallawma (Arro)
	4) Pu Selthanga (Lal veng)
	5) Pu Biaktluanga (Zuchhip)
	6) Pu Thanbuka (Zaingen)
	7) Pu Thangluaia (Zaingen)

KHAWZAWL DINTHAR VENG CHANCHIN

Village Council
Khawzawl Dintar (2024)

KHAWZAWL KHUA HI; Khawzawl hi rambuai (1966) hma Khawzawl leh Grouping Centre-a hman a nih hnu Khawzawl tia sawi theih a ni awm e. Khawzawl khua hrim hrim din a lo nihna chu a rei tawh hle a, kum 1525 vel lai khan Hmar hnam peng zinga Khawzawla tih hming chawi a phuah a ni awm e. Zoram buai avangin Khawzawl chu hal a ni a, a kan fai vek avangin tumah cheng zui an awm thei ta lo va, khawram a lo ni ta a ni.

Kum 1968-ah Khawzawl chu Grouping Centre-ah hman a ni a. Tichuan, a chhehvel khua heng: Hmuncheng, Arro, Zaingen, Tuisen, Tualpui, Ngaizawl, Zuchhip, Neihdawn, Zopui te hi khawm leh an ni ta a. Tuna Khawzawl field No. 1 hmar lamah vek hian awmtir an ni a, mahni khaw hming kha veng hming atan pawh chhawm nghal a ni deuh vek a ni. Ngaizawl leh Zopui awmna bik erawh chu Lal Veng tih a ni a, Tuisen pawh Darngawna behtir niin, Hmuncheng chu Zuchhip Vengah an behtir a ni. Hun a lo kal hret a, mahni khaw hluia kir leh theih a nih takah chuan Hmuncheng, Arro, Tualpui, Ngaizawl leh Neihdawn te chuan an khaw hmun hlui lam an luah leh ta a, engemaw zat kir leh ta lo pawh an awm baw a, hemi hnu hian Tualpui Veng chu Darngawnah betin, Lal Veng pawh Zaingen vengah a awm ta a ni. Kum 1972-ah chuan Aizawl-Champhai motor kawngpui laih tlang a lo ni ta a, heng kawngpui kama awm duhte tan hian Khawzawl VC chuan in hmun a theh a, mi tam takin kawngpui kama awm hi thlahlelin veng tam tak Vengthar, Kawnzar, Electric veng leh Hermon veng te a lo piang chho ta zel a ni.

DINTHAR VENG PIAN DAN: Rambuai (1966) hma Khawzawl kha chu tuna Field No.1 kan tih chhim lamah vek hian an awm a, Khawzawl Dintar veng pawh hi khatihlai kha chuan Sasawthelh Veng tih a ni. Khawzawl chheh vel khua khawm a nih khan helai velah hian tumah an awm loh avangin Aizawl – Champhai motor kawngpui siamtu BRTF-te chuan awm nan an hmang a. Kum 1977-ah chuan BRTF-te hi tlem te chauh an awm tak avangin Khawzawl VC-te chuan in hmun an theh ta a, tunhma khawzawla lo awm tawhte tan pawh mahni inhmun ngaiah awm theih a lo nih takah chuan mi tam takin an hmun ngaihah an inbengbel leh ta a ni. Kum 1977 chuan Pi Sapneli leh Pu Lalhuzama ten in sain an luah nghal a, a kum leh 1978-ah chuan chhungkaw 24 zetin an belh ta a ni. Hemi kum hian vengchhung inpumkhat nan Krismas leh Kum thar hmun khatah hmangin hlim takin ruai an kilho a ni. Veng chhung paho chuan veng hming mumal nei lova awm chu thil fel lo takah ngaiin, Pu Lalhuzama inah veng paho inhmuh khawm a ni a, kalkhawmte chuan hruaitu an inruat nghal a, chungte chu:

Chairman	: Pu K Hrangnawna
Secretary	: Pu Chawngkhuma
Treasurer	: Pu Selthanga(L)
Fin. Secretary	: Pu H Chalkhuma

Hruaitu kaihhruaina hnuaiah veng hming tur chu ngaihtuah a ni a, veng paho kalkhawm chuan ngun taka an ngaihtuah hnuin 'Khawzawl luahtu ber kan nih avangin kan veng hi 'KHAWZAWL DINTHAR VENG' ni rawh se, tiin lungtual takin he veng hming hi an lo phuah ta a ni. Kum 1980-ah chuan chhungkaw sawmli zet an lo ni ta a, chutiang chuan he veng hi an pung chho ta zel a, tunah hian in 200 chuang zet a lo awm ta a ni.

KHAWTLANG ROELNA LAM (Village Council) : Hun rei tak Khawzawl hi VC pakhat hnuaiah kan awm thin a, chuvangin khawtlang roelna leh inawpna lamah pawh heng vengchhung hruaitu inruatte hi vengchhung thilah chuan sulsuttu ber an ni a, chhiat thatah pawh mawhpurhna an koah a inngat tak meuh a ni.

VC pakhat hnuaia Khawzawl kan awm chung hi kum 21 chung zet a ni a. Kum 1982 khan Khawzawl Dintar veng chuan Pu K. Hrangawna VC member pakhat a nei ve ta a ni. Khawzawl VC pakhat kan nih lai hian VCP Pu Taiirha leh VC Secretary Pu PC Zasiama te pawh Dintar veng hian alo nei ve tawh baw. Kum 2009 khan Khawzawl VC panga a then a nih khan Khawzawl Kawnzar nen VC pakhat hnuaiah dah a ni a, VCP atan Pu Lalbiakenga Khawzawl Dintar veng chu thlan a ni a, Kawnzar leh Khawzawl Dintar in VC hran an neih hnuin VCP hmasa berah Pu Lalbiaksiam (L) a awm leh ta a ni. Tunah hian VC mala kan din hnua term thumna hman mek a ni.

KHAWTLANG HRUAITUTE HNA THAWH: Khawtlang hruaitu VC te hian veng chung hmasawna chi hrang hrang an lo thawk tawh a, a langsar zual chauh tarlan lo tum ila.

Veng ramri chungchang: Kum 1982-ah Zuchhip veng nen VC pakhat kan awm laiin veng chung ramri, a bik takin Zuchhip veng nena inramrina lai hi siam fel a ni a, hetiangin ramri chu then fel a ni; Khawzawl main road kawng bula awm tuna Pu Hrangzuala in bul kawr atangin thlang lamah Taidawnkawn – Kawnzar kawngpui a su thla ang a, kawngpui (main road) chhak lamah thung chuan Pu Lengsiau (L) in kawr zawh chho in Pu Liankung (L) kawmtlang kawng zawh pheii Pu Lalchhuanga in bul kawrah a chhukthla ang. Hei hi ramri siam dan Lt. Governor Gazette chu a ni.

Vengchung kawngpui siam: Khawtlang roelnu VC ten hmasawna hna an thawh zinga langsar tak pakhat chu kawngpui tha siam leh vengchung step siam te hi a ni. Khawzawlin VC pakhat kan neih chungin Khawzawl Dintar veng chungah kawngpui tam tak lai thar a ni a. Tin, internal main road pawh tihzauh a, blacktop a ni. A tlangpui thui VC te hian ni za inhlawhna hmangin kawngpui sir chu (pcc concrete) a siam leh tuikawr siam te, culvert leh retaining wall siam te an thawk nasa a, thlanmual kawng tihzauh leh siam pawh an thawk baw.

Zirna in (School) din: Khawtlang roelnu VC te hian Khawzawl Dintar Veng chungah hian zirna in pawh an lo din ve ta nual a, mi thahnemngaite zarah leh VC puihnain LITTLE FLOWER SCHOOL hi Khawzawlah chuan English Medium hmasa ber a ni. Modern Middle School pawh din a ni. Tin, mimal school, Grace Foundation School a awm baw a, tunhma

chuan Primary School II pawh Khawzawl Dinthar veng chhungah a awm thin a, tunah chuan Kohhran School PES pawh a awm a lo awm leh ta zel a ni.

Thlanmual ram pek: VC hnathawh zinga pawimawh tak pakhat chu thlanmual ram pek hi a ni. Kum 1982-ah VC member Pu K Hrangnawna hoin Khawzawl VC hnenah thlanmual ram tur dil a ni a, an dil angin pek a ni a. Kum engemaw zat ral a hnuin ramri hi felfai zawkin VC ten an siam ta a ni. Thlanmual kan neih hnu hian Vengchhak lamah kan inphum ta lo.

Thildang thawhte: VC-te hian vengchhung hmasawnna leh inrelbawlna kawng hrang hrangah tha an thawh nasa hle a. Veng chhunga department office awm theih nan te, ran khuahkhirh chungchangah te, vengchhung kawngpui blacktop a nih theih nana office dawr te, thianghlamna lamah te, in leh lo nei lote tan in hmun te thehin hma an la thin a ni. Khawzawl Dinthar Village Council hian faina kawngah hma ala nasa hle bawh a. Fai intihsiakna lawmmawn pawh vawi duai lo alo dawng tawh thin a, hetiang hian fai intihsiakna lawmman dawnte ziahlan a ni.

2016 - Cleanliness week Khawzawl town	3 rd Prize
2018- Khawzawl Town Faina intihsiak Swachh Survekshan	2 nd Prize
2019- Cleanliness week Khawzawl town	1 st Prize
2020- Cleanliness week Khawzawl town	2 nd Prize
2021- Khawzawl Town Faina intihsiak Swachh Survek shan	2 nd Prize
2022- Cleanliness week Khawzawl town	1 st Prize
2023 - Cleanliness week Khawzawl town	3 rd Prize
2021- Swachh State Award (Best Village Council)	3 rd Prize
2022- Swachh State Award (Best Village Council)	1 st Prize



NGO LO INDIN TAN DAN: Non-Government Organization(NGO) te chu veng chhunga hmasawnna leh changkanna thawktu, mi hausa leh mi retheite kar zau lutuk tur vengtu pawimawh tak an ni a, Khawzawl Dinthar veng chhungah pawh veng bil NGO din engemaw zat a awm ve a, chungte chu din tan a nih dan leh an hnathawh hrang hrang langsar deuhle tarlan kan tum dawn a ni.

YMA din tan dan: Khawzawl Dinthar veng hi kum 1977-79 chho thleng kha chuan YMA branch nei lovin veng thenawm Zuchhip vengin hmuin, chhiatni thatniah pawh min tawiawm thin a. Kum 1980 January ni 3 Inrinni zanah Pu Rokhuma (L) inah YMA branch hi din a ni ta a, kalkhawmten hruaitua an thlante chu:

President	: Pu Hmingthanga Varte
Vice President	: Pu K Hrangnawna
Secretary	: Pu K Thangzuala
Asst. Secretary	: Pu Chawngkhuima
Treasurer	: Pu H Chalkhuma
Fin. Secretary	: Pu Zathuama

Kum 1980 – 1981 chhoah hian Khawzawl Dinthar veng chu in 70 bawr vel an awm tawh a, chhiat thatah pawh mualpho loin intawiawm tham an awm tawh a ni. Tunah hian YMA member hi zathum dawn an ni.

YMA HMALAKNA

Chhiatni thatni hmalakna: Young Mizo Association chuan a hnathawh lian ber leh langsar ber chu chhiat that nia intawiawm tlan dial dial hi a ni. Mitthi an neihin tawrhpu nei an tawrhpu a, thlan an lai a, kuang tur ngaihtuah leh siam te, lengkhawm thingpu lumsak te hi an tih langsar a ni a, Khawzawl Dinthar vengchhunga chhiat alo awm pawhin chutiang chuan theihtawp chhuahin hma an lo la thin a ni. Inphumna tur thlanmual kan la neih loh avangin kum 1982 chuan YMA hian thlanmual tur VC hnenah dilin vengchhunga VC member Pu K Hrangnawna hoin VC-ah dil chhuah a ni ta a ni. Bungraw dahna tur Thlanmual in hi 1989 kum khan 12x12 square-a sak a ni baw. YMA member tlangvalte khawhar in riah hi an thiltih langsar tak pakhat ala ni awm e. Tin, YMA hian nupui pasal innei te, zirna lama pass thar te lawmpuina siam pawh tun hma chuan an lo tih thin dan a ni baw.

Vengchhung hmasawna hna: YMA hian vengchhung hmasawna hna pawh theih ang angin an lo thawk tawh thin a, awm dan mawi te, zirna lama hma kan sawn zel theihna atana infuihna te, ruihtheih thila thalai fihlim tura infuih te, ram leh hnam humhimna tura hnamdang neih loh te, Kristian nun chawisan te, thianghlimna lam uar tura infuihna te hi, YMA chuan a theihna hmun hmunah a kalpui thin. Kumtinin kumpuan an nei a, chumi bawhzui chuan nasa takin hma an la thin.

Hmalakna thildang: Khawzawl Dinthar YMA (Branch) hian vantlang inhmuhkhawmna in hall 54X30X20 area a nei a, Library-in pawh neiin, chhiat that a hman theih gas thuk pawh pahni an nei a, bungbel hawh theih pawh eng emaw zat an nei baw. Tunah hian Khawzawl Dinthar veng hi Section thumah then a ni a, chhiatni thatni inkaihhraina fel tak nen chak takin an kal chho mek zel a ni.

MHIP DIN TAN DAN: Khawzawl Dinthar veng Mizo Hmeichhe Insuihkawm Pawl (MHIP) hi 1991 ah din a ni a, Hruaitu hmasa thlan chhuahte chu:

President	:	Pi Lalruali
V. President	:	NI Chuahmingliani
Secretary	:	Pi Lalthanzami
Asst. Secretary	:	NI Zoramawii
Treasurer	:	Pi Biakthuami
Fin. Secretary	:	Pi Chalhuni

Heng pawl hruaitu hmasate hian hun lo kal zel tura pawl hmalak dan tur te, pawl thil tum tihlawhtling tur te, an kal zel dan turah te sul an lo su a, NGO dangte nen inpawh takin hma an la thin. Vawin thlengin pawl nung takin an la kal chho zel a ni.

Hmalakna lam : MHIP hian hmalakna kawng hrang hrang an nei ve a, an thil tum pui ber chu Mizo hmeichhiate chawikan a ni. Hmasawna atana zirna lamah te, Mizo hnam nun incheina chawisan te, hmeichhe dinmun tleu tawh laklawh chawikan leh te, hmeichhiat mipatna lama inzirtirna tha inpekte hi an hmalakna langsar zual a ni. Khawzawl Dinthar veng MHIP pawhin heng an thil tumte hi tihlawhtling zel turin hma an la reng a, veng chungah ruang a awmin kuangah pangpar mawi takin an dahsak thin a, veng chung tuikawr leh khawlai bawhlhlahw thian faiin vawi tam an hnattlang a, mi retheite an tanpui bawh thin. Rising day uar takin an hmang thin a, MUP te football an khel pui bawh thin.

MUP DIN TAN DAN : Khawzawl Dinthar Veng Mizoram Upa Pawl (MUP) hi kum 1985 March ni 9 khan YMA hall-ah din a ni a, hetih hunlai hi kum 50 chin member nih theih hunlai kha a ni a, kalkhawmte chuan MUP din relin hruaitu tur an thlang nghal a, thlan chhuahte chu:

President	:	Pu Biakthanga (L)
Vice President	:	Pu Vailuta (L)
Secretary	:	Pu Lianchhawna (L)
Asst. Secretary	:	Pu Lalbuanga (L)
Treasurer	:	Pu Thangzuala (L)
Fin. Secretary	:	Pu Thangluaia (L)

Heng hruaitu thlante hian vengchung Upa Pawl inkaihhruaina turah sul an lo su a, member turte zawngin, sum tuak nan Kho, Chhihri, Khochhuan, Paikawng leh Arbawm te tahin hnattlang an nei thin a, MLA hnenah inhlawhna tur sum an dil thin bawh.

HMALAKNA LAM: Mizoram Upa Pawl (MUP) te hian thil tum tha tak an nei a, chu chu ‘Mite tan malsawmna nih’ a ni. Khawzawl Dinthar Veng MUP hian kawng hrang hrangin hmalakna an lo nei tawh thin a, hnattlang inkoa vantlang kawngpui tur zawng te, vantlang hmun pawimawh tihfai te, chhiat thata intawiam te, an member thi te ina Darkhung vuak te, Flag tar leh vuina programme- a chanvo neih te, inral te chu an tih turah ngaiin tlin takin chung chu an hlen chhuak thin. Tin, hnattlanga hnathawh ho an uar a, MUP run pawh neiin,

a luah man pawh thlatin an dawng thin. Member chauh lo pawh, damlo leh chhiat tawk te ina len hi an tihtur bera ngaiin an kal taima hle a, Mizo nun dan mawi vawngtu ber, kan hnam rohlu an ni hial awm e. Khawzawl Dinthar Veng MUP te infuihna ber chu 'intihfai' a ni a, tar rimchhiaa awm lo a, rimtui inhnawih fo turin an inchah fo thin a ni.

VDP DIN TAN DAN: Khawzawl Dinthar vengah hian Village Defence Party mumal tak a awm a. A din tan kum chu 1982 a ni. He pawl hian a tum bul ber chu vengchhunga misual leh awm tha duh lote thenfai/ nundan dika kaihhruai a ni. Hruaitu hmasate chu,

President	: Pu K. Hrangnawna
Vice President	: Pu H. Khualhnuna
Secretary	: Pu Lalsiama fambol
Asst. Secretary	: Pu H. Chalkhuma
Treasurer	: Pu K. Thangzuala
Fin. Secretary	: Pu Chawngkhuma

Heng hruaitute hian vengchhungah an theih ang anga chakin hma an la a, chanchin bawhzui ngai apiangah phur tak leh taima takin, an hnathawh lai pawh kalsanin hma an lo la thin a ni. Thlamuang taka vengchhunga awm theih nan awm tha duh lo te, thil ruk hmang te zilhin a tul pheichuan han zilh zauhte pawh an nei thin.

VDP HMALAKNA: Village Defence Party (VDP) hian vengchhunga thil ruk hmang te, zu leh ruihtheih thil dang damdawi leh Ganja zuar te an hriat leh an hmuh chuan a then thianghlim hna an thawk thuai thin a, vengchhung mipuiten hetiang thil an hriat apiangte chu an hnenah an report thuai thin. Tunhma deuh pheichuan khawlaia insual thawm hriat tur leh zurui buaina siamte hi an awm deuh reng thin a, heng ho hmachhawn tur hian VDP te chuan hmanhmawh takin hma an la thuai thuai thin. Chhungkaw pa ber buaina siama chhungkaw buai ta rum rum te, khawlaia zurui au vak vak hriat tur te hi a awm leh zauh thin a. Ar inruksak thlengin vawiin ni thlenga la awm reng a ni.

Heng sualna chi hrang hrang do hian VDP te chu an hmanhlel hle thin a, mutmu pawh tuah hlei thei lova awm tlaivar chang a awm fo thin ti ila a sual tam pui lo vang.

GAMES & SPORT ASSOCIATION: Games & Sport Association hi vengchhungah infiamna lam buaipuitu ber a ni a, ni 13.1.1981-ah Pu Lianchhawna(L) inah hemi lama tui mite inhmukhawmin Association an din a, hruaitu inthlang nghalin, chungah thlantlinte chu:

President	: Pu H Chalkhuma
Vice President	: Pu S Lalvuana
Secretary	: Pu K Thanhkira
Asst. Secretary	: Pu JH Rinthanga
Treasurer	: Pu R Thanhkira
Fin. Secretary	: Pu Vanlaldika

Heng hruaitu thlan tharte hian veng chhungah member turte zawngin hma an la nghal a, dan leh hraite pawh an hman tawh ang zela siamin sum leh pai pawh an ngaihtuah a, hun rei lote chhungin pawl chak leh nung takah an insiam ta mai reng a ni.

HMALAKNA LAM: Khawzawl Dinthar veng Games & Sports Association chuan a tum ber chu infiamna lama thalaite chher hriam a ni a, hetih hunlai hian football hi infiamna lar ber a nih avangin thalaite pawn an tuipui ber a. Hockey leh Volleyball pawh awm ve bawh mah se, Khawzawl pum huapa inelna erawh ala awm ngai lo va, Football-ah erawh inelna a awm deuh reng avangin veng chhung thalai, a tui rualte chuan nuam an ti hle thin. Veng hrang hrang inelnaah pawh lawmman pakhatnaa leh pahnihna lak ve fo a ni a. Kan changkan chhoh ang zelin infiamna pawh chi hrang hrang alo chhuak zel a, tunah phei chuan sawrkar hmalakna zarah Volleyball khelhna tha tak phullem(turf) phah, Zoram hmundanga la awm lo Khawzawl Dinthar vengah a awm ta hial a ni. Infiam mi pawh an lo chhuak tam ve zel a, Association hrang hrang vengchungah alo awm zel a. Teakwando intihsiaknaah Zoram pumah Khawzawl Dinthar veng chu Champion an lo ni ta hial a ni.

SAKHAW LAM DINHMUN : Khawzawl Dinthar vengah hian Sakhua, Pawl(Denomination) hrang hrang paruk a awm a. Chungte chu Presbyterian Kohhran, The Salvation Army, Baptist Church of Mizoram(BCM), Reform Church, UPC of Mizoram, Church of God te an ni. Heng Kohhran pawl hrang hrangte chanchin tlangpui chu a hnuaia tarlan ang hi a ni.

PRESBYTERIAN KOHHRAN: Khawzawl Dinthar vengah chuan Presbyterian Kohhran hi Kohhran lian leh ding hmasa ber a ni a, ni 16.1.1980 Chawlhni zanah veng paho inhmukhawm in Biak In sak an rel a, building committee atan heng mite hi an ruat nghal.

Chairman	: Pu Lalhuzama
Secretary	: Pu Hmingthanga Varte
Treasurer	: Pu Rokhuma

Committee member mi 11 ruat nghal a ni bawh a. Building Committee chuan tuna Khawzawl Dinthar Presbyterian Kohhran bial Pastor Quarters hi Rs 550 a leiin, nitin hnattlang an ko thin a. Tichuan, Biak In chu ni 4.3.1980 ah sak tan a ni a, ni 13.12.1980 atangin luah a ni ta a ni.

Khawzawl Dinthar Presbyterian Biak In, a thara sain tuna an Biak In hi an sak vawihnihna a ni. Kohhran Upa nemngheh hmasate chu Upa Rokhuma, Upa Lalhuzama, Upa R. Vanlallawma te an ni a, Upa Thangluaia leh Upa Laltluanga chu pem niin Upaah nemngheh an ni bawh. Pastor biala dah a nih hnuin Khawzawl Dinthar Presbyterian Kohhran chu Pastor thuthmun (Bial Station) a lo ni ta a, Pastor hmasa ber Rev Laltharzuala'n ni 22.12.2001-ah Pastor Quarters a luah a, Khawzawl Dinthar Presbyterian Kohhran hi member zariat leh sawmruk chuang tunah hian an ni.

THE SALVATION ARMY : Khawzawl Dinthar Veng Salvation Army hian bul an tan hma viau mai. Kum 1983 January thlaah Pu Chhonzika inah Hall(Biak In) sak dan tur rel tan a ni a,

Biak In chu a dung feet 30 leh a vang feet 15 a sak a ni a, a chung rangva niin, a bang dap hman a ni. He an Biak In ding hmasa hi kum 1988 khan RCC-in sak that leh a ni a, hei hi vawiin thlengin an la hmang a ni. Khawzawl Dinthar Salvation Army Biak Inah hian Zuchhip Veng leh Kawnzar lam te pawhrawn lawiin tunah hian member za chuang zet an awm. Commanding Officer (CO) awm hmasa ber chu Lieut. C Dawngliana a ni a, Biak In thlangah mai hiam Quarters awmin hetah hian Commanding Officer(CO) a cheng thin. Tin, Khawzawl Dinthar Salvation Army Kohhran hi sakhaw puithiam thuthmun a ni bawh.

BAPTIST CHURCH OF MIZORAM (BCM) : Khawzawl Dinthar Baptist Church of Mizoram (BCM) te hi kum 1997-ah awm tanin, Biak In chu ni 27.12.1997-ah sak tan a ni a, ni 8.2.1998 ah sak zawh niin Rev Lawmsangan a hawng. Kohhran hruaitu hmasate chu :-

Chairman	: Pu K.Lalduhawma.
Vice Chairman	: Pu T.Lalmuankima.
Secretary	: Pu VL Hmangaihchhnga.
Asst. Secretary	: Pu Ngunvenga.
Fin. Secretary	: Pi Chawmawii

Kohhran Upa hmasa berte chu Upa C Laltlanmawia leh Upa F Rohmingthanga te an ni a, tunah hian member 115 bawh vel an ni a, Pastor thuthmun neiin an awm.

REFORM CHURCH: Khawzawl Dinthar veng Reform Church te hi a tirah chuan UPC Reform tih a ni a, hun engemaw ti lai a liam tak hnuin Reform Church (Reform Kohhran) tia hriat ani ta a ni. A tirah chuan Biak In hi rap in in an sa phawt a, tuna an luah lai hi ni 24.3.1987-ah sa tanin vawiin ni thlenga sa tha tawh lovin an la luah ta zel a ni. Kohhran puipa hmasate chu Pu Biakthanga (L), Pu Lalvuana, Pu Biakthuama te niin, tunah hian kohhran member sawmsarih bawh vel an awm mek.

UPC OF MIZORAM: Khawzawl Dinthar Veng UPC of Mizoram te hi Kohhran ding zingah chuan a hnuhnung ber an ni awm e. Mizoram UPC a phel khan UPC of Mizoram a lo piang a, chu mi Kohhran kal zel chu an ni. Ni 20.3.2011 khan rap in-in Biak In sak tan a ni a, hun engemaw chen an luah hnuah kum 2013 khan RCC in sak that leh a ni a, Biak In thar chu 2018-ah Pastor Zionramngaia'n ropui takin a hawng ta a ni. He an Biak In hi vawiin thlengin an la luah chhonzawm zel a, Kohhran member hi sawmsarih bawh vel an awm.

CHURCH OF GOD (Seventh Day): Church of God (Seventh Day) hi Khawzawl khua hrin hrina a lo pian chhuahna chu a rei tawh hle a. Kum 1975 khan Pu Lalsiama(L) leh Pu Lalhmangaiha te kaihhruainain Lungvar vengah he Kohhran hi din a ni a, inkhawmna hmasa ber chu April ni 13,1975-ah Pu Lalsiama Lungvar inah neiha ni. An Kohhran Biak In hmun hi Rs 3000 a leiin a chung rangva, a bang dap a sain, ni 17-4-1999 ah Bawng talh meuhin, Elder Lalhmangaiha'n a hawng ta a ni. He Biak In hi vawiin thlengin an la luah a, Kohhran member sawmsarih bawh vel an awm a, Upa pathumin an enkawl mek a ni.

POLITICS LAM DINHMUN: India ram hi Democracy ram kan nih angin kan inthlang thin a, inthlan chuh turin political party pawh tam tak an awm a, chutiingin Mizoramah pawh National Party mai bakah Regional Party an awm a. Heng party lian leh langsar deuhthe chu Khawzawl Dinthar vengah pawh din a ni hlawm a, chungte chu ZPM, MNF, INC an ni.

Heng political party-te hian MP, MLA, VC te thlangin an inchuh thin a, party tinte hian unit neiin hruaitu an nei vek a, ram leh khawtlang, vengchhung inrelbawlina leh hmasawna turin an thawk thin a ni. Roreltu(ruling) nih hi an tum ber leh vengchhung rorelna, hmasawna tura thawh hi an tum a nih avangin opposition lamte pawhin tha tawh lo leh fel tawh lova rorelna chu a siamtha zawngin an lo bei ve thin. Heng political party te hian hunbi neiin inthlan thatna an nei thin a, pawl tichak turin theihtawp an chhuah thin. Veng chhung rorelna leh hmasawna thilah ruling party an inrawlh tlukin, mipuite pawn an kaihruaina hi kan thlir leh en ber a ni.

ZIRNA LAM: Khawzawl Dinthar Vengah hian zirna sikul heng – LF School, PES, Grace Foundation School te a awm a, Primary School – II leh Modern Middle School erawh chu thildangah hman a ni ta a ni. Zirna hi Khawzawl Dinthar Veng mipuite hian kan uar viau a, tunhma chuan YMA hian HSLC pass tharte lawmpuina buatsaihin, YMA(Branch) ten awareness campaign te pawh alo nei ve tawh thin a ni. Tunah hian Graduate leh a chung lam pawh tih tham tak veng chhung thalai zingah an awm a, ram chung leh pawnah pawh an awm ta nual bawh. Veng chhung literacy rate chu 100% a ni a, hei hian zirna lam an ngaih pawimawhzia a tilang awm e.

KHAWZAWL DINTHAR VENG PAWIMAWHNA: Khawzawl Dinthar veng hian pawimawhna a nei hnem hle a, a awmna hi Khawzawl hmun laili lai a nih avangin Deputy Commissioner (DC) Office awmna hmun a ni a, District Horticulture Office te, DRDO te, BDO Office te leh Quarters te, Sub-Hqrs. YMA Office te, MHIP Sub-Hqrs. Building te, Khawzawl Bazar hmunpui tur te, Volleyball Court Phullem(turf) phah te leh chenna in nei lo awmna in(shelter) awmna hmun a ni.

VENG CHHUNG THIL CHHINCHHIAH TLAKTE

1. MLA/Minister ni hmasa ber :- Pu Tawnluia leh Pu Aichhinga(L).
2. BA hmasa ber :- Pu R.Vanlallawma(L).
3. MA hmasa ber:- Pu Zohmingliani.
4. Headmaster (Primary) hmasa ber :- Pu H Khualhnuna.
5. Village Council Member hmasa ber :- Pu K Hrangawna.
6. Certificate exam(CL-III)a Zoram puma pakhatna ni hmasa ber:- Pu Tawnluia
7. Sawrkar Department Officer-a lut hmasa ber :- Pu JH Rimawia (BDO).
8. Bachelor of Engineer hmasa ber :- H Zahmingliana.
9. Thlanmuala phum hmasak ber :- Pi Zakungi (90)

KHAWZAWL ELECTRIC VENG CHANCHIN

Electric Venga awm hmasate hi kum 1972-73 velah khan mi tlemte awm tanin, a tirah chuan Electric Veng hi ramhnuai a ni a, Motor kawngpui kamah hian chenna In tlem te a ding ve a. Electric Vengah hian Lungtan, Khawhai leh khaw chhehvel khawdangte bakah, Khawzawl veng dang atangin chhungkaw engemaw zat rawn pem lutin an inbengbel chho ve ta zel a ni. Zawi zawia lo pung chho ve zelin, Kohhran leh khawtlang inrelbawlna kawngah Electric Veng a pian hma zawng khan Khawzawl Vengthar huam chhungah a awm thin.

KOHHRAN LAM : Tuna Electric Veng huam chhungah hian zawi zawiin mihring an lo pung chho ve zel a. Kum 1993 khan, Kohhran lian ber Presbyterian Kohhran, Khawzawl Vengthar Pastor Bial Inkhawmpui Chawngtlai Phaiveng Kohhran Biak Ina neihah chuan, kum 1994 Gospel Centenary lawm zawhah Vengthar Kohhran atangin, Electric Veng Preaching Station siam ni se tia rel a ni a. Tichuan, ni 25.6.1994 khan Vengthar Presbyterian Kohhrana Upa Bial then pakhat ni thin huam chin chu Preaching Station-a hawn niin, a hmingah 'Electric Veng Presbyterian Kohhran' tiin alo ding ta a. Hemi kum vek, ni 26.11.1994 khan Kohhran puitlinga dah ngheh a ni zui ta a ni. Electric Veng chhungah hian Kohhran hrang hranga lawi awm mah se Biak In erawh, Presbyterian Kohhran leh Salvation Army Biak In chiah a awm.

YMA BRANCH DIN TAN DAN : Kohhran lamah Electric Veng Presbyterian Kohhran chu ding tawh mah se, YMA leh NGO dangte inrelbawlna kawngah chuan Vengthar huam chhungah kum 2003 thleng khan ala awm zel a. Kum 2003 khan Vengthar Branch YMA hi a lianin a zau ta deuh a, Branch pahniha inthen tha zawka hriatna alo awm a. Vengthar Branch YMA huam chhunga NEUVA SECTION chu YMA Branch hranga ding tura ruahman alo ni ta a ni. May ni 6, 2003(Thawhlejni) zana Vengthar Branch YMA hnuaia Neuva Section YMA huam chhunga Kohhran hrang hrang (Presbyterian, Salvation Amy, Roman Catholic, UPC(Mz) aiawh theuhte bakah, Section MHIP leh VDP Unit-II aiawhte chu inkokhawmin, Veng ramri atan Neuva Section ramri awmsa chu veng ramri turin an pawm tlang ta a ni. Ni 17.7.2003(Ningani) zana Neuva Section YMA Committee chuan Branch YMA din tan hun atan August ni 2 (Inrinni), 2003 chu a ruat a, hemi ni hi Branch YMA din ni atana pawm alo ni ta a ni. Branch YMA a din atanga rei vak lovah NGO dang(MHIP, MUP etc.) Branch/Unit a ding zui ve ta zel a ni..

VENG HMING PHUAH DAN : Khawzawl Vengthar atanga Electric Veng alo pian/indan dawn hian Veng hming turah inlungtural tlanna ngeia phuah ni se an duh avangin, Section YMA hmalaknain veng chhung In tinah lehkhah semin, veng hming atana an duh ber thlantir an ni a. Veng chhung In 147 atanga rawtna lutkhawm zinga In 114(77.55%) laiin 'ELECTRIC VENG' tih an thlan avangin veng hming atan hman alo ni ta a ni.

KHAWTLANG INAWPNA LAM : Kum 1987 a Sorkar-in Khawzawl Village Council hi Village Council pali a a then khan, tuna Electric Veng hi Vengthlang Village Council huam chhungah dah a ni a. Kum 1990 a Khawzawla Village Council pali(4) te Village Council pakhata sawikhawm kan nih leh hnu, kum 2006 a Village Council panga(5) a then kan nih leh khan, Village Council -I hnuaiah Hermon leh Electric Veng pahnih te chu dah an ni a. Tichuan, kum 2012 khan, Village Council-I hnuaia awm thin Hermon Veng chu Village Council-7 hming puin alo awm hrang ve leh ta a ni. Kum 2012 atanga vawiin ni thleng hian Electric Veng erawh chu Village Council-I hming puin ala awm chhunzawm ta zel a ni. Tunah hian Electric Vengah chhungkaw 265 vel awmin, mihring 1200 vel an cheng mek a. Electric Veng chhungah hian heng Sorkar Department Office hrang hrangte hi a awm:

- 1) Executive Engineer (P&E), Khawzawl Power Division
- 2) Executive Engineer (PHED), Khawzawl WATSAN Division
- 3) District Agriculture Officer
- 4) District Sericulture Officer
- 5) SDO(PHED), Khawzawl WATSAN Sub-Division
- 6) SDO(P&E), Khawzawl Sub-Division
- 7) District Project Manager, FOCUS
- 8) Health Sub-Centre, Health & Family Welfare Department.

.... oooOooo....

KHAWZAWL HERMON VENG CHANCHIN

Apuia Tochhawng
Hermon veng, Khawzawl

Khawzawl Hermon veng hi Khawzawla veng chhim tawp ber niin tunah hian In 350 vel awmin mihring hi 1690 vel kan ni a, vote nei zat hi 909 kan ni. Kum 1977-a Pu Ch. Chhunga Mizoram Chief Minister a nih lai khan shifting an ti a, Mizoram khaw sawm vel tur zingah Chawngtlai khua chu tuna Hermon veng 'Kawng pheiram' an tihah hian insawn pheirak turin an thlem a, an insawn pheirak duh a nih chuan rangva bandle li theuh pek an ni ang an ti a, Chawngtlai VC te pawhin tha tiin number pawtin in hmun chu an theh ta a, number pawt tha apiangin VC te peg khen chu an duh lai an thlang a, VC te hian Biak In hmun tur leh sawrkar department hmun tur te an thlang sa vek a.

Tichuan, engemaw harsatna neuh neuh avangin In hmun thlan fel vek chu thiah leh a ni a, Mahse, mi engemawzatin insawn pheirak chu an la duh avangin Pu Sanghnuna AO a nih laiin Pu Hawihlana(L) inah public meeting an la a, mi engemaw zatin Chhumliamkawn pheirak insawn pheirak chu an duh avangin number pawtin In hmun chu thlan leh a ni a, hei hi kaltlangpui a ni ta a ni. Biak In hmun leh sawrkar hmun tur pawh kaltlangpui a ni zel bawk.

Kum 1981-ah Chawngtlai chuan kawngpheirak ram hi Lo-ah an theh a, Tlak lam leh chhuah lam zawng zawng chu thlawhhmaah neih vek a ni a, hemi kum hian chhungkaw engemaw zatin an In hmunah chuan Bawk tē an khawh nghal a, a thenin In ang maiin an luah lum nghal bawk. Kum 1981 Krismas pawh hmang nghalin Forest Department Complex-ah ruaite an theh a, ruai an thehna pawh hi hemi hunlaia Forest Department-a thawk Pu C. Zatluanga'n a tumsak a ni nghe nghe. Kum 1982 kumthar pawh an hmang nghal bawk a ni.

Tichuan, kum 1982 kumtirah Chawngtlai atangin chhungkaw tlem an pheirak belh a, an vaiin chhungkaw 20 vel an awm tling ta a, Vengthar Presbyterian Kohhran Biak Inah an inkhawm chho thin a, naupang tan a hlat tham deuh avangin Kohhran din zai an rel ve ta a, School leh Biak In atana hman kawp tur sak phawt mai chu tha an ti a, Febuary ni 15, 1982 ah sa tanin ni thum chhungin an sa zo vek a, Biak In chu naupangin chhun lamah school kal nan hmangin Kohhran inkhawm hunah inkhawm nan an hmang leh thin a, Pulpit-ahte pawh naupang lehkhazirna thil vel pawh a awm rem rum thin a ni awm e. Biak In neia an inkhawm hran takah chuan Chawngtlai Presbyterian Kohhran atangin indan an va dil a, mahse in dan mai chu an lo remti rih lo a, mahse, mihring an pun chhoh zel avangin in dan chu tul an ti tlat a, Khawzawl Pastor Bial hruaitute hnenah an sawi thin a.

Chhumliamkawn Kohhran hruaitute Pu KT Parmawia(L), Pu F. Laldela(L), Pu Haukhawthanga(L) te chu Khawzawl Bialtu Pastor Rev. Kaphuliana an han kawm a, Kohhran hming tur an sawi khawm a, Rev. Kaphuliana chuan, "Sipai pastor-a ka awm laiin room hming atan Hebron, Zion, Hermon tihte an tar a, chungte chu a inhmeh tho lo maw?"

a lo ti a, tha an ti hle a, Thlasik laia chhum leh dai tla a tam thin em avang chuan Hermon tih chu Kohhran hming atan an thlang a, an rilruah Hermon daifim tih a awm vang a ni awm e. Kohhranin Hermon Kohhran tih hming a put chu a lo rei deuh hnu chuan veng hming atan hman a lo ni ta a ni.

Hermon veng hi in hmun rem tak a nih avangin sawrkar pawhin hmun pawimawh a dah chho mawlh mawlh a, Damdawi in, Khawzawl Police Station, AH&Vety Department, Government Middle School, Primary School IV, Forest Department, P&E Dept(132 KV sub station) te awmin tunhnaiah SDPO Office, Wildlife Division, DCSO, CMO te sawrkarin a dah belh leh a. Khawzawlah chuan sawrkar hmun pawimawh tamna ber veng a ni hial awm e.

Kohhran lamah hian Presbyterian, Mizoram UPC, UPC NEI leh Kohhran thianghlimte awmin Hermon veng tlak lamah Roman Catholic Father Quarters leh Roman Catholic Middle School leh High School a awm bawk.

Eizawna lamah hian lo neia eizawng an tam ber a, mipui an taima in chhunah pawh thalai hnathawk loa awm mai mai an awm meuh lo. Veng thang chak tak niin in leh lo pawh a tha chak hle. VC leh Tlawmngai pawl thawhhona a tha thin hle bawk. Veng fai intihsiaakah pawh a tawp bera awm thin kha Top three ah kan lang chho ta zak zak a ni. Tin, Hermon veng atang hian mi chhuanawm tak tak, Theology lama Doctor te, Medical Doctor, Lecturer, Mizoram puma Zirtirtu tha ber lawmman dawng thei te, Mizoram Civil Service-a tling thei te awmin huaisen lawmman dawng te pawh an awm tawh bawk.

...oooOooo...

KAWNZAR VENG CHANCHIN

KAWNZAR VENG AWM HMAA A AWM DAN CHANCHIN: Kawnzar veng hi kum 1974 kumtir lamah luah a ni a, veng anga awm hrna hian mi tlem a zawngin ram an nei a, Chung an ram neihte chu kawnzar veng a awm hmasate hian hmun atan an leisak hlawm a ni. Kum 1969 atangin Aizawl to Champhai kawng hi Jeep Road a laih a ni. Naupangho phei chu leilaitu Bulldozer hnathawk thlirin an kal luih luih thin a ni.

KAWNZAR VENG AWM TAN A NI: Kum 1974 February-ah Kawnzar veng hi a awm tan ta a, Kum 1973-ah Pi Saihnunin thingpui dawr siamin Zuchhip veng atangin a zu nghak thin.

VENGCHHUNGA AWM HMASATE: Kum 1974 hian Pu Chuaihnaawkate an awm hmasa ber a. An awm tuk lawkah Pu Zahlunate an awm leh a, a lo awm hmasa in sawm (10) te chu: -

1. Pu Chuaihnaawka
2. Pu Zahluna
3. Pu Thangruma (uisa eia)
4. Pu Lalhnuna
5. Pu Lalzawna
6. Pu Thangruma
7. Pu R. Thanzauva
8. Pu Liandawla
9. Pu Chhunthuama
10. Pu Thanghuama, te an ni.

An awm hun inkar hlat lam hi ni hnih thum, kar leh thla hnih khat lek lek te a ni.

VENG HMING PHUAH A NI: Veng hming hi kan nei mai a, Vengchhak panna kawng (thlanmual kawng) hi tam hoin inhlawh nan an lo hman lai a nih avangin TAM PENG/TAM VENG min ti thin. Pu Zahluna tualzawlah zing nilum ai pahin paho chuan veng hming nei loa awm chu a tha lo e mai tiin a hming tur an sawiho a. Hei kawnah kan inzar pharh bawk a, KAWNZAR VENG I ti mai ang u, an ti a, chu chu a pu hlen ta a ni.

KOHRAN CHANCHIN: Vengchhunga Biak In neite chauh tarlang ila'

1. Presbyterian Church of India — 01.09.1979
2. United Pentecostal Church (NE) — 01.02.1978
3. United Pentecostal Church (Mz) — 23.08.1994

Kan awmthlak tirh hi chuan UPC hi Arro vengah an inkhawm chho thin a, Presbyterian hi Venglaiah an inkhawm chho bawk thin a ni. Kumhnih chhung zet chu

christmas a hu hoa hman niin, Pu Chuaihnawka'n a thleng thin. Mahni Kohhranah inkhawmin banah mas thlen inah kan kalkhawm mai thin. Naupangho chu pawngsen tlaivar turin kan kal thin a, Pu Chuaihnawka buhzemah kan mu dul thin a ni.

VILLAGE COUNCIL NEIH DAN: Kum 1979 atangin VC pakhat kan nei ve tan a, kan VC member hmasa ber chu Pu Chhunthuama niin kum 95 a ni tawh a, tun thleng hian min la dampui a ni. Hetih hunlai hian Khawzawl pumpui hi VC pakhat hnuaiah kan la awm a, ruat seat in VC pakhat kan chang ve a ni. Kum 1987 ah MNF sawrkar lo dingin heta tang hian VC hran kan lo nei ve ta a, VC member-te chu: -

1. Pu K. Kapmawia, VCP
2. Pu Lalhnuna, Vice President
3. Pu Chhunthuama, Treasurer
4. Pu C. Liandawla, ruat seat
5. Pu K. Kapruala, Secretary

VC hran kan lo nei ve ta chu a ni a, amaherawhchu, INC sawrkar alo piang a, khawzawl chu VC pakhatah min dah leh ta a, kum 2015 khan INC sawrkar vekin VC hran min pe lehin tun thlengin VC hranin kan kal ta zel a ni.

Tuna VC tang laite: -

President	: Pi Vanlalduhi
Vice President	: Pu Thangchungnunga
Treasurer	: Pu Zothansiam Colney
Secretary	: Pu R. Lalhmunsanga

NGO-ah hian YMA, MHIP, GSA leh MUP te an awm a. Sawrkar office hi Soil & Water Conservation Department, Krishi Vigyan Kendra (KVK) leh Supply Office te an awm. Zirna lamah Primary School leh Middle School bakah Anganwadi Centre te a awm.

Kawnzar veng hi veng lian ni lo mah se a mi chengte inlungual leh inngeih takin an awm a, Pastor te, MPS te leh mi hmingtha dang pawh an chhuak ve nual tawh a ni. Tin, khawtlang enkawl na lamah pawh veng hmasawna tur leh thatna tur ngaihtuahin khawtlang hruaitu ten theihtawpin hma an la thin a ni.

...oooOooo...

LUNGVAR VENG CHANCHIN

A din tan dan: Lungvar veng hi kum 1979 April thlaah Pu Lalengmawia (L) leh Pu Zotuawnga ten huan siamin an awm chilh tan a, chuta tang chuan mei mit lovin hun lo kal zelah chhungkaw eng emaw zat an lo awm ve ta a ni. A tirah hian veng hran a awm lovin Darngawn veng branch YMA hnuaia section pakhat (Khuangchera section) angin a awm phawt a ni.

Lungvar veng than chhoh dan: Darngawn veng Branch YMA hnuaia Section pakhat ni thin kha 1, 6 February 2009-ah Lungvar Branch YMA a lo ni ve ta a ni. Tichuan, Game & Sports Association, MHIP leh MUP te pawh a hrangin a lo ding ve ta zel a. Kum 2015-ah Village Council hran hial lo nei ve tain tunah hian Villlage Council term 2-na a hmang mek a ni.

Lungvar veng hming put chhan: Lungvar veng tih hi a chhunga chengte inphuah ni lovin, tumah an la awm hma atanga a chhunga thil awmin a hrin chhuah a ni a, tuna Lungvar Branch YMA Hall atanga Mualvawm panna tlangdung kawng chho (Joint YMA ten lei an siamna a chhuak) ram hi Lungno var hmun a ni a. Chu kawng chu 'Lungvar peng' ti a sawi thin a ni a, mihring kan lo chen a; veng hming pu tham hial kan lo awm takah chuan LUNGVAR VENG hming hi a lo pu ta a ni. Tunah hian In 170 vel lai ding ve tawhin a mi cheng pawh 750 bawr vel a ni tawh a, tun hmaa Khawzawl khuua veng naupang ber leh veng hmawr khawhar tak ni thin kha tunah chuan National Highway-06 in paltlangin Khawzawl kawtchhuah pawimawh leh veng nuam tak a ni tawh a ni.

Veng chhunga Department hmalaknate: Lungvar veng chhungah hian Department hrang hrang hmalakna hmuh tur a awm a; kum 1984-ah PWD hmalaknain Khawzawl to Sinzawl (Manipur) road laih tlang a ni a, kum 1995-ah Black top a ni a, hmasawanna rahbi pawimawh tak pakhat a ni. Veng mipuite rualawhna leh mamawhna te hriain Electric Department in kum 1989-ah electric pe lutin hemi kum vek hian PHE Department hmalaknain tui pek luh a ni leh bawh a ni.

Veng chhung naupangten zirna lama hma an sawn theihna turin Pre-Primary kum 1994-ah din a ni a, hei hi veng chhunga zirna rahbi hmasa ber leh kailawn pawimawh tak a ni. Kum 1994-ah ICDS hnuaiah Anganwadi Centre No. XVIII a ding tan a, ni 6 February 1998-ah Education Department hnuaiah Primary School din tan a 139il eh139. Tin, kum 2001-ah 2nd IR Battalion sawrkar hmalaknain din a 139il eh a, veng leh khawtlang tan an thlamuanpui awm hle. Tunah hian sawrkarin Khawzawl Tourist Lodge chu Lungvar vengah a dah leh ta a ni.

...oooOooo...

KHAWZAWL VENGTHAR CHANCHIN

THUHMA: Kum 1966-a Mizoram buai avanga Khawzawl rauhsan a nih hnu, kum 1968-a luah nawn leh a nih khan Khawzawlah mihring an pung chho ve leh hret hret a. Khawzawl chhehvel khua, Khawzawla khäwm luh hote erawh mahni khaw lamah an kir leh hlawm a. Kir ve ta lo chhungkaw engemaw zät chu Khawzawlah inbengbel zuiin veng hrang hrangah an awm a. Hetiang hi ni mah se, Khawzawl Field No 1 atanga tuna Khawzawl thlang/chhim lamah erawh chuan kum 1973 kum bul lam thleng khan mihring chéng an awm lo a ni.

KHAWZAWL VENGTHAR PIAN DAN: Samthang khaw chhuak Tv. Lalhlira BA (tunah Upa Lalhlira) chu Khawzawl High School Headmaster ni turin lak a ni a. September ni 1,1971-ah a hna hi a zawm a. Khawzawla amaha awm chu fin turin a u, Pu Laiawrha Samthang khuua awmte chhungkua chuan January ni 23,1973 khan Samthang chhuahsanin Khawzawl an pan a. January ni 25,1973 ah Khawzawl thlengin Khawzawl Zuchhip Venga Pu Kamnâwna (L) inah an thleng a. Hemi hnu hian Zuchhip Venga Pu Dokima in ruakah an khawsa ve ta a. Heta tang hian tuna Upa Lalhlira te chenna hmun Artlangpéngah hian kum 1972-a Khawzawl Village Council-in in hmun an lo theh tawh, Khawzawl VC te pek an in hmunah chuan In an sa ta a. He an in sak, a chung di, a bang dăp chu March ni 15,1973 khan an luah lut a. Hei hi Khawzawl Vengthar In ding hmasa ber leh, chhungkaw awm hmasa ber an ni ta a ni.

Pu Laiawrha chuan an awmna hmun Artlăngpéng tih ngawt mai chu tha ti lovin, Khawzawl Vengthar hming put thaa a hriat avangin March Ni 21.1973-ah Khawzawl VC hnenah Khawzawl Vengthar hming put chu a dil ta a. Khawzawl VC sitting chuan Pu Laiawrha'n Khawzawl Vengthar hming put a dilna chu March Ni 22.1973 khan a ngaihtuah hnuah rem a ti ta a. KHAUZAWL VENGTHAR chu a lo piang ta a ni. Hemi kum vekah hian tuna Vengthar thlanmual ram hi Khawzawl VC sitting chuan Vengthar tan a pe leh ta a ni.

VILLAGE COUNCIL INDIN CHHOH DAN: Khawzawl hi VC pakhat hnuaiah kum engemaw chen a awm hnuin kum 2006 atang khan Khawzawl Vengtharah Khawzawl Village Council - II tiin Village Council din tan a ni a. Khawzawl VC- II (Vengthar) hmasa berte chu :-

Kum 2006-2009 chhunga member-te:

President	- Pu T Kaphranga.
Vice President	- Pu R Lalenga.
Treasurer	- Pu JR Dangliana.
Member	- Pu JH Lalrikhuma.
Secretary	- Pu H Zodinthara.

Kum 2009 - 2012 chhunga VC member-te:

President	- Pu H Lalbiakliana.
Vice President	-Pu R Lalpara.
Treasurer	- Pu Lalbiaknia.
Member	- Pu JR Dangliana.
Secretary	- Pu R Zaitluanga.

Kum 2012 - 2015 chhunga VC member-te:

President	- Pu Lalbiaknia
Vice President	- Pu R Lalpara.
Treasurer	- Pu R Biakremzuala.
Members	- Pu JR Dangliana. Pu Darchhinga.
Secretary	- Pu R Zaitluanga.

Kum 2015 2020 chhunga VC member-te:

President	- Pu JR Dangliana.
Vice President	- Pu R Zakunga.
Treasurer	- Pu T Kaphranga.
Members	- Pu Lalfakzuala. Pi Lalpianthangi. Pi FH Kapngengi. Pu Malsawmdawngliana.
Secretary	- Pu H Zodinthara.

VCP Pu JR Dangliana hi a thih avangin March ni 20, 2017 atanga August ni 29, 2020 thlengin hetiang hian Executive Body siam a ni.

President	- Pi Lalpianthangi.
Vice President	- Pu R Zakunga.
Treasurer	- Pu T Kaphranga.
Members	- Pu Lalfakzuala. Pi Lalpianthangi. Pi FH Kapngengi. Pu Malsawmdawngliana.
Secretary	- Pu H Zodinthara.

August 2020 – April 2024 chhungin:

President	- Pu Lalfakzuala.
Vice President	- Pu H Vanneihthanga.
Treasurer	- Pu R Lalthasiamia.
Members	- Pu Thangrosiamia. Tv. C Lalrindika. Pi Lalhmachhuani. Pi Lalengvari.
Secretary	- Pu R Malsawmtluanga.

KOHRAN HRANG HRANG AWMTE

Presbyterian Kohhran: Khawzawl Vengthara awm chhungkaw sawm vel chuan kum 1973 krismas an hmang ho va. Ni 21.4.1974 ah Véng paho kalkhawmin Kohhran din an ré a,

hruaitute insiamin hmalak zui a ni a. Kum 1972 January Ni 25-a Khawzawl VC ten Biak in hmun an lo pek tawhah chuan thingtuai hmangin a bang dăp, a chungdi a sak Biak in chu May Ni 25.1974 ah Khawzawl Bialtu Pastor Liandawla'n a hawng a. Hei hi Khawzawl Vengthara Presbyterian Kohhran din tan hun atan pawm a ni ta a ni.

Khawzawl Vengthar North Presbyterian Kohhran: Kum 45 emaw lai Khawzawl Vengthar Presbyterian Kohhran a din hnuah he Kohhran atang hian indangin, October Ni 10. 2020 khan Khawzawl Vengthar North Presbyterian Kohhran din a ni ve leh a ni.

United Pentecostal Church (NEI): Kum 1976 July Ni 25 khan Khawzawl Vengtharah United Pentecostal Church (UPC) din tan a ni a. Pastor thut hmun a ni.

United Pentecostal Church of Mizoram: Kum 1995 April Ni 1-ah UPC of Mizoram hi Khawzawl Vengthar ah din a ni a. Pastor Bial thut hmun a ni.

Roman Catholic Church: Kum 1976 ah Khawzawl Vengtharah hian Roman Catholic Church hi din a ni a. St. Joseph School an din bawk a ni.

Fundamental Baptist Church: Kum 1983 June Ni 12-ah Khawzawl Vengtharah hian Fundamental Baptist Church din tan a ni a. Hun lo kal zelah Pastor Quarter (Building) sain, FBC Pastor Bial thut hmun a ni.

Zomi Baptist Church: Kum 2003 March Ni 30 khan Khawzawl Vengtharah hian Gospel Baptist Church din a ni a. Pastor bial thut hmun a ni.

NGO HRANG HRANGTE

Young Mizo Association (YMA): Kum 1974 June Ni 2-ah Khawzawl Vengthar Branch YMA din a ni a. Hruaitu hmasa berte chu –

President	- Pu B Ralkhuma.
Vice President	-Tv. F Lalhlira.
Secretary	- Pu H Lianzuala.
Asst. Secretary	-Tv. Lalbiakliana.
Treasurer	- NI. Lalremtluangi.
Finance Secretary	-Tv. H Zaitluanga.

Mizo Hmeichhe Insuihkhawm Pawl (MHIP): Kum 1991 May Ni 1-ah Khawzawl Vengthar Branch MHIP din a ni a. Hruaitu hmasa berte chu –

President	- Pi Lalkhumi.
Vice President	- Pi Lalrinngheti.
Secretary	- Pi PC Lianziki.
Asst. Secretary	- Nt. Zoramthangi.
Treasurer	- Pi Rokungi.
Finance Secretary	-Pi Ro!huami.

Vengthar Games & Sports Association (G&SA): Kum 1975 January Ni 4-ah Khawzawl Vengthar Games & Sports Association din a ni a. Hruaitu hmasa berte chu - Chairman -Tv. F Lalhlira. Secretary - Tv. Zaiawna.

ZIRNA IN AWMTE:

Govt. Model High School: Kum 1990 January Ni 1 atangin hawn tan a ni a. Hawn tan a nih hian Vengthar Presbyterian Kohhran Sande Sikul Hall-ah sikul hi kalpui a ni a. Sikul hmun a neih hnuah tuna an luah mek hi an luah zui ta a ni. Kum 2003-ah Lum-sump grant-in-aid ah hlan kai a ni a, kum 2008-ah Adhoc grant-in-aid ah hlan kai a ni leh a, kum 2023 khan provincialize a ni.

Presbyterian English School: Khawzawl Vengthar Pastor Bial enkawl Presbyterian English School hi kum 2001 May Ni 1 khan hawn tan a ni a. A tirah chuan Vengthar Kohhran Sande Sikul Hall-ah kalpui a ni. Vengthar Field kiangah hun engemaw chen an awm leh hnuah tuna an awmna hmunah hian kum 2015 atang khan an awm nghet ta a ni.

Govt. Middle School - II (Vengthar): He Sikul hi Kum 1975 January Ni 16 khan Khawzawl Vengchhak lamah din tan a ni a. Tuna an luah mek ram hi Pu B Sawiluaia (L) pek a ni a. Kum 1981 atangin an luah tan a ni.

Govt. Primary School - II (Vengthar): He Sikul hi Kum 1990 February a din a ni a. Vengthar VC bul tumin voluntary zirtirtu 2 rawih mek a ni.

St. Joseph School: St. Joseph School hi kum 1992 January Ni 15 khan hawn a ni a. Primary Section Nursery atanga Class -V thleng kalpui a ni.

SORKAR OFFICE AWMTE:

Public Works Department (PWD): Kum 1973 June Ni 9-ah tuna PWD Complex chhungah hian PWD Sub-Division hawn a ni a. Kum 1984 March Ni 9-ah Khawzawl PWD Division hawn a ni.

Integrated Child Development Services (ICDS): Social Welfare Department hnuaiah ICDS hi kum 1986-ah Khawzawlah hawn a ni a. Pu Lalsiama Building (Artlangpéng bul) an luah hmasa ber a. Hermon Venga RL Building-ah an insawn leh a. Hemi hnu hian Pu H Lianzama (L) Building an luah leh hnuah tuna ICDS Complex-ah hian an inbengbel nghet ta a ni. Tuna Building hi kum 2023 April thlaah an luah a ni.

Mizoram Rural Bank (MRB): MRB Khawzawl Branch hi kum 1983 khan Pu Hmingthanga Building Khawzawl Dinthar Vengah hawn a ni a. Hemi hnu, kum 1998 khan Vengthara Pu K Rinliana Building luahin an insawn leh a. Hemi hnu hian kum 2017 November thla atangin Pu PC Lalzarliana Building hi an luah a ni.

Block Horticulture Office: Kum 1994 August Ni 3 khan Vengtharah Khawzawlah Horticulture Division Office hawn a ni a. DHO Office hi Dinthar vengah sawn a ni a. Tunah hian Block Horticulture Office a la awm a ni.

Mizoram Co-Operative Apex Bank: Kum 2017 June ni 20 khan Khawzawl Vengthar Kohhran Building luahin hawn a ni.

State Bank of India (SBI): Kum 2010 August thla khan Pu K Ziona Building luahin SBI Khawzawl Branch hawn a ni.

District Education Office: Kum 2008 August Ni 21 khan Sub-Divisional Education Office hawn a ni a. Kum 2020 December Ni 15-ah District Education Office hawn a ni.

District Child Protection Office: Kum 2022 April thlaah Office inrelbawlina bul tan a ni a. Kum 2022 August Ni 13-ah Dy. Chief Minister Pu Tawnluia'n Office a hawng a. Chhangte Rün Building an luah mek a ni.

District Treasury Office: July 1, 2022 khan Pu WC Thandawla Building luahin hawn a ni.

Sub-Post Office: Kum 1980 September Ni 24-ah Pu Tawnluia In (Assam Type Building) luahin hawn a ni a. Hun engemaw ti chhung he in hi luah a nih hnuah Pu R Lalenga (L) Building-ah an insawn leh ta a ni.

...oooOooo...

KHAWZAWL ZAINGEN VENG CHANCHIN

Khawzawl District-a Deputy Commissioner Pu K. Lalrohlua hnen atanga lehkha V/C-in a dawn angin, Ni 4.7.2019 atang khan Khawzawl District chu lo piangin, Ni 12.8.2019 atangin a takin a lo function ve ta a. Kum 2024 hi kan District-in kum 5 a nih champhaphak lo thleng tur thlirin, Khawzawl District Chanchin hi a bua siam tum a ni a. Chuta chuang ve tura Zaingen Veng chanchin ziaak tura tih kan nih angin ziah a ni ta a ni.

Zaingen Veng chanchin ziaak tur hian Zaingen khaw chanchin atanga tan loh chuan a famkim thei dawn lova, chuvang chuan Zaingen khaw chanchin han sawi hmasa ila, a dawtah Zaingen Veng chanchin chu kan sawi leh dawn nia.

ZAINGEN KHAW CHANCHIN TLANGPUI: Zaingen khua hi Khawzawl atanga hmar thlang 12 km vela hlaa awm a ni. Khawhmun rem leh nuam, zo thlifim tamna ram a ni. Tuipui (sea Level) atanga tehin metre 1470 vela sang a ni. Khawzawl atangin motor kawng tha tak, LPK lenga zauin a pawh a ni.

Zaingen khaw lal hnuhnung ber chu Lalmakthanga Sailo a ni a. An inthlah chhawn dan hetiang a ni. Lalmakthanga Sailo pa chu Kaihranga, Kaihranga pa chu Dothiauva, Dothiauva pa chu Vanhnuaailiana, Vanhnuaailiana pa chu Lalsavunga, Lalsavunga pa chu Lalpuiliana, Lalpuiliana pa chu Lallula, Lallula pa chu Rohnaa, Rohnaa pa chu Lalchungnunga, Lalchungnunga pa chu Sailova a ni. Sailo lal thlah ziding dik tak an ni.

An lo awm tawhna hmasa hmun indawt dan hi a kim chang chuan a sei deuh dawn avangin, Baktawnga an awm atang hian chhui ta mai ila a tha ang e. Baktawng atangin Dothiauva hovin Khawhrenchah kum 1884/1885 velah an kai a, Khawhrenchah atangin Maiteah an kai leh a. Maiteah kum khat emaw chauh awmin Bunghmunah an kai leh a, Bunghmunah hian lal Dothiauva chu 1887-ah a thi ta a ni.

A fapa Kaihranga chu a pa aiawha lo lalin, Bunghmun atangin Arro ram Kawihthuang hmunah a kai a, chuta tangin Hrianghmunah a insawn leh a, Hrianghmun atang hian Arro ram vek 'Kaihranga hmun' an tihah hian a awm leh a. Heta tang hian Hnahlanah chho lehin kum khat lek hnuah Bunghmunah an let leh ta a ni.

Bunghmun atangin kum 1906 vel khan Likkawn bul Zaingen hmunah hian an kai chho leh ta a, hetah hian Zawlbuk pawh an nei hman an ti. Kum 1912-ah Khualenah an kai chho leh a, hetah hian Biak In pawh an nei nghe nghe a ni. Heta an awm lai hian HRIPUI a leng a, a rapthlak hle a ni awm e, naupang rual khat chu a mang deuh thak an ti. Khualen atang hian kum 1919-ah Thiak Khawhmun hnuai, Thelret phunna, tun hnu deuha Saikah hmun an tih takah hian an kai leh a. Helaia an awm lai 1921-ah Kaihranga fanu Saihlupuii a thi a, a thlan bulah Thelret an phun nghe nghe. Helai hmuna an awm lai, 1922-ah Sai pachal an kap a, kum chhiar nan Sai kah kum, hmun sawi nan Sai kah hmun te an ti thin.

Thiak khaw hmun hnuai, Thelret phunna, Saikah hmun an tih bawh atang chuan kum 1924 ah Thiak (Kanhmun) ah an rawn in sawn leh a. Vanduai thlak takin kum 1928, May thla chawhnu lamah Thiak khua chu a kang ta a, hei hi Zaingen khuain 'Kan kum' an tih thin chu a ni. In 95 lai niin an inchhal a, khaw kan kum hian In 21 leh Biak In chiah a

kang lo a ni. Kum 1929 hian lalnu Lalthuami a thi a, a ruang chu hmanlaia an tih thin angin kuang ur a ni a, a ruhrote chu dah thain 'Lal Thlan Ro/Thlanpui' an tihah phum a ni. Thlanro/Thlanpui hi Thiak tlang hmawr lam tlangdung hmun rem laiah siam a ni. Hetah hian Lalthuami, Dothiauva, Siallamthangi leh Kaihranga te phum an ni.

Thiak (Kanhmun) atang hian kum 1931-ah Khualen hmun damah an kai leh a, hemi tum hian kai ve duh lo in 12 lai an awm a, chungte chu Liantawna, Phirbawra, Dophunga, Lianchhunga, Thatbuta, Thuambawnga, Thanzinga, Haudala, Kutdenga, Selkhama, Lianchhingpuii leh Vanzuana te an ni (Vanzuana hi Mualvawm, tuna Mualvawm Field atang hian Hmunnghakho awmnaah a rawn pem phei a ni). Hmunnghak, kai ve duh lo ho chu Zaingen hmun Field velah khian an lo insawn phei a. He lai hmunah hian Arro atanga lo awm phei in 4 te nen infinin an awm ho ta a ni. Kum 1938-ah Khualen atang chuan Zaingenah an rawn kai leh a, Hmunnghakho hi an rawn fin a. Thiak hmun pelin Zaingen hmun pawh thlang si lovin a inkarah an awm ta a ni.

Hetih hun lai hian Thiak khaw dang Aizawl pia deuhah a lo awm ve baw a, Sawrkar leh Kohhran lehkhah a kalsual fo avangin, THIAK khua kan lo nih thin chu thlak in ZAINGEN tih hming alo pu nghet ta a ni. Kum 1942-ah Kaihranga hovin chhungkaw engemaw zat Khualenah an kai chho leh a, Zaingen khua chu a fapa Lalmakthanga'n a awp ta a ni. Kaihranga hi 1945-ah a thi ta hlauh mai a, ani a thih takah chuan a fapa Laltuma chu Khualenah chhovin a han awp ta a ni. Hetih hunlaia Lalmakthanga rorel pui (Upa) te chu Hrangkhupa, Saptawna, Kamlova, Telrawka leh Hahmawnga te an ni. Lal leh roreltute hian Khawchhiar (Ziaktu) Sawrkar hriatpuiin an nei thin a, chung hna lo thawk tawh thin te chu Piangthuama, Rualzakhuma, Thandailova leh K.Lalzuia te an ni.

Zaingen khuaa Kohhran, Zirna, Party, Games, YMA leh Rualchhuak Party chungchang tawi te tein han chhui ila:-

Kohhran: Kum 1906-a Bunglemun atanga Likkawn bul Zaingen hmuna an rawn kai hian ringtu Ralkhuma leh Thanglawra an rawn kai tel ve a, an khawhar thei hle. Lal Kaihranga hian ringtute hi nekchep a tum hle laiin, Pathian remruat a ni ang chu, a fanu Sairengpuii chu ringtuah alo inpe hlauh mai a, nekchep leh tihduhdah an ni ta lo.

Kum 1912-a Zaingen atanga Khualen hmuna an kai hian ringtu heng mite hi an awm belh leh – Piangthuama, Vaitlaia, Dobanga, Hrangthuama leh Hrangthawma te. Ringtute hian Biak In an sa a, an Biak In chu 1915-ah Presbytery-in a nemngheh sak. Kum 1919-a Thiak khaw hmun hnuaia an kai lehin Tirhkoh Kapthianga a rawn awm a, Zirtirtu Haubawiha an rawn dah baw a. Sunday School-ah A-AW-B te an zir thin a ni.

Tirhkoh Kapthianga hi Tirhkoh Lalthima'n a rawn thlak a, Pastor Thankhuma'n Pamchung atangin a rawn enkawl baw a. Pastor C. Zawna chuan Theological School kum 1928-ah a zo a, heta tang hian Tirhkohah awm nghalin, tirhkoha a awm chhung hian Tualpuiah a awm a, kum 1944-ah Pastor atan nemngheh a ni. Zaingen khua chu Bial thuthmunah an hmang ta nghal a ni.

Zaingen khuaa Kohhran Upa lo ni tawhte leh an nemngheh kum: -

1) Upa Piangthuama- 1924	2) Upa Zadala	- 1926
3) Upa Dobanga	4) Upa Surawia	- 1930
5) Upa Thandawla	6) Upa K. Lalzuia	- 1958
7) Upa Laldawla	8) Upa Rokima	- 1964

Serial No 4-na atanga a hnuai lam zawng hian Khawzawla khawm luh kan nih khan dam takin min la ho a ni.

Zirna: Zirna lamah chuan 1919-ah zirtirtu Haubawiha alo awm a, kan lal fanu Sairengpuii pawhin Lower Primary School a pass a ni. 1948-ah Pu Kamliana a rawn awm leh a, 1953-ah Zaingen lal Lalmakthanga fanu NI Lalengzami a rawn thawk a, 1954-ah Tv H. Khualhnuna, 1957-ah NI Malsawmi, 1962-ah Tv C. Valkunga te an thawk.

Zaingen khaw Primary School atang hian Lower Primary School-ah Mizoram pumah kum 1953 khan Lianhnuna chu pangana a ni a, 1955-ah Tawnluia chu pakhatna a ni. Middle School ah 1956-ah Lianhnuna hi pakhatna a ni a, 1958-ah Tawnluia hi pakhatna a ni leh baw. Kum 1956-ah Primary School behchhanin ME School chu private-in din a ni a, class IV chauh hawn ala ni. Pu Kamliana leh Tv Khualhnuna te chu zirtirtuah ring nghalin, Tv K. Lalsanga chu zirtirtuah lak a ni. Kum 1957-ah class V hawn belh a ni leh a, 1958-ah class VI thleng hawn a ni ta a ni. MS hi PS liam tlangdung hmun remah awmin Building pawh a hranin a nei tawh baw. Kum 1958 hian Tv K. Lalchhawna leh Pu Laihnuna te chu zirtirtuah lak an ni leh baw. Kum 1959-ah Tv Lianhnuna chu Headmaster turin lak a ni a, kum 1964-ah Pu K. Vulliana chu Headmaster atan lak ngheh a ni a, Zirtirtu atan Tv H. Lianzuala leh NI Lalhmingmawii te lak an ni leh baw.

Party leh rorelna: Ni 9.4.1946-ah Mizo Union Party a ding a, Ni 4.1.1952-ah District Council siam a ni a. Ni 4.7.1954-ah Village Council siam a ni leh a. Ni 16.8.1954-ah lal rorelna a tawp ta. Mizo Union Party bakah hian Zalen Pawl (UMFO) Party a ding. Ni 4.7.1954-a Village Council inthlan hmasak berah Mizo Union chakin, thlan tlinte chu heng mite hi an ni - Pu Vanthawma, Pu Tuankhama, Pu Kapthuama, Pu Surawia leh Pu Manliana (Mantea). Kum 1957-a Village Council term hnihnaah chuan Zalen pawl chakin, thlan tlinte chu Leiphunga, K. Lalzuia, Sangthuama leh Zathata te an ni. VC Secretary ni thinte chu Lalvuana, Dokhuma leh Hmingdailova te an ni.

Games: Kum 1943 vel atangin Zaingen kuaah hian Games & Sports Association din a ni a, hruaitu hmasate chu heng mite hi an ni - Thanghuta, Zahlira, K. Lalzuia, Sailianhranga, Aibuaia leh Lalvuana te an ni. Zaingen kuaah Games lamah hma a sawn zel theih nan kum 1953 khan Hav. Chuaukunga'n a pa Pu Zuanga hmingin Football Tournament a buatsaih. Tin, Games hmasawn nan Pu Thangthuama'n football size 5 a lei a. Pu Lalzuala leh Pu Thankima ten Party Cup atan 1956-ah Istiri (puan nawhna) an lei baw. Zaingen kuaah inbuan chak kan neihte chu hengte hi an ni - Behzuta, Kamlova, Za-auva, Hrangdawla, Rozinga, Hrangbawiha, Zialmawia, Zosanga leh K.Lalchhawna te an ni. Mizorama inbuan chak ber thin chu Chhundenga a ni a, Tualpui kuaah a rawn zin a, hetihlai hian Zaingen lal Kaihranga pawh Tualpuiah hian a zin ve a, lal kaiha vengin Pu Rozinga pawh a zin ve a, hemi tum hian Pu Chhundenga leh Pu Rozinga chu an inbuan tir ta a, Pu Rozinga hi a chak hlauh a ni awm e. Pu Rozinga hian fiamthu ti takin 'Mizoram inbuan chak ber nge chak ang a hnehtu' a ti thin.

YMA: Kum 1948-ah Tualte atangin Pu Kamliana chu Zaingen khuaah zirtirtu atan sawrkarin a rawn dah a. Ani ho hian Ni 16.9.1948 Chawlhni chawhnu Inkhawm banah, Thalthlithaw venga Primary School-ah Zaingen Branch YMA hi din a ni. A hnuaia mite hi a din tirha hrutute an ni:-

President	: K. Lalzuia
Vice President	: Vanthawma
Secretary	: Kamliana
Asst Secretary	: Sailianhranga
Treasurer	: Siamliana
Fin. Secretary	: C. Siamliana

Rualchhuak Party: Zaingen khua hi khaw nuam leh khaw inlungual tak kan ni a. A chungga chengte hi pian kum inang tlang deuh leh thian inkawp tlang deuh ten hun rei deuh tawh atang khan tleirawl/rawlthar chhuah velah, “Rualchhuak Party” tiin party hmingte inphuahin, chhuahbuk (tu in emaw) neiin kan lo awm tawh thin. Chhuahbukah hian zanriah eikhamah mipaho chu kan chhuak khawm phawt a, chuta tang chuan nula rim tur emaw, hmun danga leng tur emaw chu kan kalchhuak chauh thin. Kal chhuak peih lote pawh men chung chu chhuahbukah titiin hun kan hmang bawh thin a, thil kan tikhawm pawhin chhuahbukah vek kan tikhawm thin. Chhuahbuk hi mi zau chungkua tan lo chuan han tlin sen chi pawh a ni lo.

Kum 1948-ah Pu Kamliana chu Zaingen khuaah zirtirtu in alo awm a. Mi huikhawm thiam leh zau tak a ni a, ama kawm rualte huikhawmin hun hlimawm tak an hmang thin a, kum 1950-ah chuan thian inkawm rualchhuak ho chuan Eitawh Party tih hming inphuahin an lo tikhawm tan ta a ni awm e. Hei hi rualchhuak party lo intanna chu a ni.

Zaingen khawlai takah hian zawl (field) a awm a, chutah chuan infiamna chi hrang hrang an ti thin. Football phei chu an uar hle a, tlai tin feh haw hmasa atanga lo pet tanin thim thlengin hah pawh hre chang lovin an pet thin. Kum 1956 khan Pu Thangthuama, sipaia tang chhuti-in football a rawn hawn a, Pu Thankima leh Pu Lalzuala ten ISTIRI (Puan nawhna) leiin Party Cup atan an pe a, chu chu kumtin rualchhuak party zawng zawngten an inchuh thin a. Tun thlengin Zaingen vengah hian kan la inchuh ta zel a, harsatna deuh a awm kum chuan Volleyball-in an thlak thin. Istiri kha awm tawh lo mah se, Games lam hrututen Bel emaw, Dekchi emaw, thildang lawmmanah siamin, hlut takin kan la inchuh zel a ni.

Hun kal tawh engemaw ti chung khan zan lama khawhar ina tui/thingpui sem thin te kha rualchhuak party kut vek a ni a, zing lama khawhar chungte tui chawisak leh tih tur dang tihsakte pawh an kut vek a ni thin. Khawtlang inenkawlina kawngah pawh rualchhuak party-te hi an tangkaiin discipline siamtu tha tak a ni. A hnuaia mi ang hi rualchhuak party lo indin tawh dan a ni a, mihring chu an tam tham deuh avangin tarlang lo mai ila, an party hming chauh tarlang mai ang:-

- | | | |
|-------------------|----------------------|--------------------|
| 1) Eitawh Party | 2) Chawnghawih Party | 3) Nuihiuau Party |
| 4) Lemhleih party | 5) Zawlrillo party | 6) Thlerkawi Party |
| 7) Chuailo Party | 8) Vulreng Party | 9) Vulmawi Party |

10) Vullai Party	11) Dintar Party	12) Hmanamiaianuam Party
13) Chhuakthar Party	14) Hlimreng Party	15) Chuailo Party
16) Zoawi Party	17) Runmawi Party	18) Zonun Party
19) Lungrual Party	20) Thangmawi Party	21) Zomawitu Party
22) Thazual Party	23) Zobawmtu Party	24) Sawirem Party
25) Perhkhuang Party	26) Chiangsa Party	27) Sawhkeh Party
28) Zunzam Party	29) Tuakthar Party	

Zaingen khuua thil thleng langsar deuhthe :-

SAKEI KAH: Zaingen khua (Kaihranga khua) ah hian chhan hrang hrang avangin Sakei hi kah a lo ni thin, a vaiin pasarih lai an kaphlum a ni. Hetih hun lai hian khawtlangin Silai (Laiphir) an nei a, hei hi Buh Silai tiin an sawi baw. Hemi hmang hian Kar an siam thin a, Zaingen khuua pa leh tlangval zawng zawng deuh thaw hian Kar siam hi an thiam a ni deuh ber mai. An kah hmasak dan indawtin han ziaak ila.

Sakei kah hmasak ber chu Biak In mualah a ni a, Sial a seh avangin kar hi siam a ni. Kar in a kah hliam chu chhui zuiin, Pu Hausuaka chu a hmasa ber a, Sakei hliam chuan rawn seh tumin a rawn zuan a, ani'n alo kap a. Vanduaithlak takin a Silai chu a tlawlh ta hlah mai a, mahse vanneihthlak takin a rawn zuang ang lai takah chuan leihruisenin a lo awk hlah mai a, chu chuan la kawin a seh ta lo hlah a, chu chu Pu Tlaupawla'n a lo kaphlum ta a ni.

KEICHERA: He Sakei hi a hming an phuah ang hian a cher hle a, pawl tuam ho hian an hmu fo mai a, an nin em avangin an hual a, an kaphlum ta a ni. A kaphlumtu tak hi hriatchian a ni ta lo. A kawchhungah engmah chaw pawh a lo pai miah lo an ti.

HNI AKHERI: He Sakei hi a hming ang lo takin a pa a ni tlat. A ke-ah kahhliam tawh a nih vangin a hniak pawh hi a her ta a ni awm e. Ran a seh fo avangin a ninawm ta deuh a, khawtlangin Thelret hmun peng chung, Haifavang kawn an tihah kar siamin an kap ta a, a chung tlang hnaiteah alo thi a ni.

HLAIBA: Sakei lian leh bak buk tak, han hmuh mai pawha hlauhawm tak a ni. Ran a seh fo mai a, mipui tan a ninawm tak em avangin Pu Kamlova baw zawl an tihah kar siamin an kap ta a, a hmunah hian a thi nghal a ni.

TLANGVALA NU: Sakei an kahhlum ve tho "Tlangvala" an tih nu/pui hi a ni. Thelret hmun pengah kar siama kah a ni. Kar hian a kap thelhah an ngai a, a kah atanga ni thum hnuah Pu Muala daikal turin kawng chung hnaiteah thiin a han hmu ta a ni awm e.

TLANGVALA: Tlangvala hi a nuin a thihsan atang hian a ninhlei ta em em mai a. Vawk, Bawng leh Sakawr te a seh ta fo mai a, tlangval zan lengte pawhin an hmu fo thin a ni. Mipui tan a ninawm tak em avangin kar hmanga kahhlum a ni ta a ni. Tun thlenga ram/hmun sawi nana kan la hman fo, Tlangvala thihna kawn/Sakei thihna kawn kan tih takah hian kar siamin an kaphlum ta a ni. Zana nunau leng ngam lova tiraltitu a thih takah chuan lungmuang takin an awm thei ta a ni awm e.

Sakei kah hnuhnun ber chu, Sedaikawn bulah Pu Thlukiana Sakawr a seh a, chu chu Kar an siam hnan ta a. Sakei chu a kap hliam a, a thlang kawrteah awm hmun khuarin a inhrosa a. Mi tam takin an kap a, an kap fuh hlei thei lo va, a tawpah Pu Suakzinga'n a kaphlum ta a ni. Hetianga kar hmanga Sakei an kah tak foah chuan Zaingen khua chu kar siam thiamah an lar ta em em a, an lar zia lanna pakhat han sawi ila - Pu Thankima leh Pu Lalzuala te thian dun Aizawl kal chu Seling khuaah an riak a, an khuain kar siam an thiam tih hriain kar an lo siam tir a. Hemi tum pawh hian vanneihthlak takin an kar siam chuan a kaphlum an ti a ni.

SAI KAH: Kum 1922-a Thiak khawhnuai Thelrethmuna an awmlai hian, Sai pachal (a pa dawp) lian zet mai hian Zaingen ram leh Aiduzawl ram hi a kar tawn chhen mai a. Lal Kaihranga chuan Bawrsap NE Perry-a hnenah kah phalna a dil a, ani chuan CI rawn tirin a kah phalna a rawn pe a. Ani pawh chu a kah naah hian a kal tel ve nghe nghe a ni awm e.

Lal Kaihranga chuan Arro khaw pasaltha Thangchhuma (Upa Saikhuma pa) chu chah pheiin, Zaingen khaw pasalthate nen chuan Sai kap turin tlangval tam tak nen an chhuak ta a. Kaihranga chuan a pasalthateho chu an Silai zen tam tawk takin a thun sak vek a, an pawrh then loh nan a hawlhna a laksak vek bawk a ni.

Aiduzawl lal Hrangkima pawh a pasalthate leh a khaw tlangval tam tawk tak nen an rawn thawk chhuak bawk a. Bawrsap thurawn angin hetiang hian thuthlung an siam - "Sai chu khawi khua zawk zawk pawhin kap se, a tlukna hmun kha ramri lai pawh ni se, a luin a delhna lam ram neitu zawk zawk khan a lu an chang ang" tiin. Pasalthaho chu Sai kap tur chuan an kal ta a, vanneihthlak takin Pu Thangchhuma hmaah chuan lo chhuakin a kapthlu ta ruah mai a. A kaptu pawh a Silai nghawng nat em avangin a tlu tawp a, a silai pawh a rek lai takah a bung hmawk a, ni thum lai a sil zui a ni awm e.

Sai chu Kaihranga ram lamah a tlu ta si a, Hrangkima chuan a naupang zawk nihna leh a kal tam zawk nihna chhuangin, ka han lawm hmasa ang e, tiin Sai lu chu a hawpui ta a ni. Tichuan, Sai sa chu an insem ta a, an vaiin mi 300 lai an ni an ti. Thenkhat sawi dan chuan, 'Sai lu an inchuh thu Kaihranga fapa, Hnahlan lal Saithuama'n a lo hriat chuan a thin a ur em em mai a. A rawn chhuk a, Hrangkima hnenah chuan Sai lu chu a laksak dawn a, Hrangkima chuan Saithuama hnenah, Kaihranga hian "Ka khaw rama mi Sai hi a khaw ram lamah a khalh a, a ti dik lo a ni" a ti a. Saithuama chuan, "Sai hi Bawng khalha khalh theih em ni? Chutiang ni se engatinge i kawtah i kah mai loh? a ti ve thung a, Sai lu chu laksakin apa Kaihranga hnenah a pe ta a ni,' an ti. He Sai kah chawia hming phuahte chu Thanmawii, Saikhuma, Saimanliana, Saithanhranga, Saisaeia leh Saituliana te an ni. Kum 1922 hi kum chhiar nan hmangin 'Sai kah kum' an ti thin.

SANGHAL SAH HUAL: Zaingen khua hi tun hma lal lal lai chuan Kaihranga khua tih a ni a, in za han tih ve mai tur hi an ni. A khawthleng a remin a nuam hle a, a mi chengte pawh an inlungualin tumah an ngai bik lo. Lal rorelna tihtawp a lo nih hnuah pawh Village Council (VC) tha tak ding chho zelin, rorelna tibuai khawp sual fal leh politics avanga buai pawh awm lovin hlim takin hun an hmang chho thin a ni. Kumtin ram theha thlawhhma nei thin an ni a, kum 1968 pawh hian Pialthleng leh Khuaihnuai ram neih a ni a. July thla alo nih chuan Pangen ruama in sawm lai lo a mi Vaimin chu zankhat thil thuah Sanghal rualin an ei zo vek mai a, hetiang a nih chuan kan tuar lo vang tiin lal upa pawh lo ni thin Pu

Hrangkhupa inah pa engemaw zat kalkhawmin Sanghal sahhual chu an rawt ta a ni. Sanghal rual awmna lo enthlithlai turin mi pali, Pu Lalauva, Pu Laluapa, Pu Lalkhuma leh Pu Lalthlamuana te ruatin a tuk zingah an kal ta a ni. Pu Lalauva leh Pu Lalkhuma te hi Likkawn lamah kalin, Pu Laluapa leh Pu Lalthlamuana te chu Zokawngchho lamah an kal ve thung a ni.

Pu Laluapa te thian dun chuan Pialthleng kawng thlang ngawpuiah chuan Sanghal tam tham tak chu an han hmu ta a. Lam kalte hi an lo ruahman lawk angin Kawnpuiah an inhmukhawm a, Pu Lalthlamuana chu in lamah chanchin hriattir turin tirh haw a ni ta a ni. Lam kalte ngai chang renga in lama lo awmten Pu Lalthlamuana an han hmuh meuh chuan awm ngaihna pawh an hre lo a ni ber mai. Val upaten tlangau tirin, mipa puitling awm zawng zawng leh rawlthar a thei apiang Sanghal sahhual turin kal vek tur a ni a, hmanrua neih ang ang kengin kawtchhuahah inngahkhawm vek tur tiin an puang a. Hetih hun lai vel hian pa sawmhnih rual vel chu kuli-in Vankal khaw lamah an thang bo mek a, an chan ropui ngei mai.

Nghal rual kawngthlang a mi chu sahhual remchan zawk nan kawngchhak lamah khalh chhoh an ni a. Val upate ruahmannain fel takin buh tin sawm hmun velah an hual ta phawt a. Pu Kapthianga, Tlangau chu thinglerah lawnin au rual tur a tih ve leh au rual dual dual chungin an zawna thangte telin an hual zim zel a, tin thum hmun vela an hual zim hnu chuan val upaten dai tha deuha theu turin an ti a, an dai theute a that leh that loh an endik leh vek hnuah a kalkhante siamin thang an kam ta a ni.

Tlai dar thum velah hual lut an kal tan a, hual lut atan hian pa fel leh viak tha mi pathum - Pu Sinanga, Pu Lalzawna leh Pu Khawdina te an ruat a. Anni hian Sanghal zahnih rual vela tam awmkhawm chu a darh thei ang ber turin an va um ta a. Chumi darh chuan dai an rawn su a, chu chu a remchan dan ang leh an hmanraw neih ang, a thenin feiin an chhun, chemin an sat, hmawlh tumin an lo vaw bawk. A then lahin a man in an man a, a thenin thangin an awk bawk. Hmun tin maiah chuan Sanghal chu an ngek ta chuah chuah mai a, mipui lah rawl nen an tang bawk, a rik hian a ri chur chur a ni ber mai. Kut lawnga lo man tan khan tih ngaihna awm hek lo, an in lehthal zak zak mai hlawm a ni. Hual luta kal Pu Sinanga chu Nghalpuuin a vawrh lawp lawp a, a thianten an chhan thuai a, vanneithlak takin eng em a ti lo hlahu a, a lawmawm hle a ni.

Sanghal tihhlum tak hi a vaiin 37 (Sawmthum leh pasarih) lai a ni a, hengte hi thiam thil hrang hrang hmanga an tihhlum a ni. Kan sawi hmaih hauh loh tur chu, hemi tum hian feia khawh phal a ni lo va, Silai phei chu a tir atangin ken an phal lo nghal a ni. Pu Lianzuala hian thang hnawka tang pathum lai hreipuiin a chek hlum a ni.

A hmun atangin khaw thim tanah haw a ni a, khuaa miten ropui taka lo hmuakin Thalthlithaw venga Sikulah a vaiin dahkhawm a ni. A tukah a kal pawh kal lo pawh thliar chuang lovin, in kawkipin Sanghal sa chu an insem ta a ni. Val Upaten ruahmanna fel tak siamin, pakhat aia tam lo tihlum pawh, a lu pakhat aia tam an chang thei lo va, a bawp pawh pakhat aia tam an man thei bawk lo a ni. Sanghal sah hualna hmunah hian a tukah mi tlem te an va kal leh a, an thangkam (Tungthlun) pakhata Sanghal lo la awk reng chu Pu K. Lalkhuma'n ava pal chhuak a, Sanghal chuan a lo bei ta mai a. Pu Doluta'n a chhan nghal thuai a, Sanghal chu a kap karah lutin ani'n a lo chep bet tlat a, chu chu Feiin an

chhun hlum ta a ni. Hemi tuma Sanghal sah hual hi Zaingen khaw chanchinah chuan nuam an tih leh an sawi nin theih loh a ni reng tawh dawn a ni.

CHINGHNE UM: Zaingen khaw dai velah hian 1959 kum hian Chinghne rual nghal em em mai an awm a. Bawng leh Sial te an seh fo mai a, han tih ngaihna tak erawh avang hle. Bawng nei ho chu inhmukhawmin umbo an rel ta ringawt mai a. Bawng nei ho zinga a khaipa deuh deuh - Pu Thansiam, Pu Lalhlira, Pu Saawka, Pu Zialmawia, Pu Pachhunga leh mi dang 30 rual lai chuan Hmunmual rama Chinghne awm chu um tanin Kawngsahmualah, Mel thum mual thlengin an um ta a.

Kawngsahmual peng, Thangtedawh kawnah chuan an awmkhawm a, tih leh zel dan turte an sawiho va. Chutah Pu Thansiam chu lo dingin, inaukhum hi thil huatthlala tak a ni a, lal ban laia lal an aukhum pawh khan an huat em kha, Chinghneho hi i aukhum ve ang tiin a rawt a. Tha dawna an hriat avangin an phur hle hlawm a.

Pu Thansiam chuan kaihruiin, 'Chinghnia,' ka ti ang a, nangni'n ring takin, 'Tlanbo rawh se' in ti ang. 'Engvangin maw?' ka ti leh ang a, nangni'n ring tak bawkin, 'Bawng seh an chin avangin' in ti leh ang. 'Tun chinah' ka ti leh ang a, nangni'n a aia ring leh zualin, 'Lokal tawh suh se' in ti leh dawn nia, a ti a. Chutiang tak chuan patling 30 rual chu phur leh ring takin, a ram hawk rum rum khawpin an han au rual ta a nih chu! Heta tang hian Chinghnia in ran a seh sak thin chu a reh ta a ni an ti.

Chinghnia an um tum hian Pu Lalauva chu hmasa berin, kawnglaia thingtang kulah chuan Pawmrem (Pangrem) lian tha deuh hi a lo bawk zur mai a, a han hmu thut hlau lutuk chu eng dang sawi lovin a tlan let phut a. A hmasa ber tlan let ta phut chu a thiante pawh chuan an um ve ta ringawt a, engemaw chen an tlan hnu chuan enge kan hlauha kan tlan tiin an han inzawt a, thingtang kula Pawmrem a ni tih an han hriat chuan ho an ti hle. Panggang hi a hlau tan chuan thil hlauhawm ve tak a ni reng a ni.

TLANGZAM: Tlangzam tih hi a lar lo hle a, awm pawh a awm zen zen lo a ni awm e. Tun tumah hian telh ve thaa hriain kan han telh ve a ni. A awmzia chu hetiang a ni :- Pasalthaten an sa kah chu rama a awm ang angin an rawn haw san a, chu an sa kah chu khawtlang tana an pek hi a ni. Ramhnuia mi chu tlangvalhovin zawn chhuakin, a sa chu an khaw in tinah an sem vek thin. Hetiang hi Tlangzam an tih chu a ni.

Zaingen khuaah pawh hian Tlangzam hi a awm tam lo hle a ni awm e. Kum 1962 January thla khan Pu Zathata (Nahaia) Zaingen khaw pasaltha khan Savawm a kah chu a Tlangzam a, a kahna hmun Mausin leh Mandarh inkar kawr hnara mi chu tlangval rualin an va zawn chhuak a, rin aiin a lo lian leh nghal a, sum 6 zeta lian a ni. A ram hi a awih em avangin a mar kaihna hrui an siam a, a hmalam atangin tlangval rualin an pawt kal tawp mai a ni. Hlim takin a in kawkipin an insem ta a ni. Hemi tum hian Pu Nahaia hian a kahhlum note pahni a hawn nghe nghe a ni. Hetianga ti thei tur chuan mi thilphal leh mi zau tak nih a ngai. Thil ropui tak a ni e.

PASALTHA CHANCHIN: Zaingen khuaah hian tunhma atangin Pasaltha Sa kap thei engemaw zat an awm ve a, tun tumah erawh chuan tlema pasaltha danglam deuh mi

pahnih chanchin han thlur bing ila, heng mi pahnihte pawh hi hmanlai pasaltha zinga mi ni lovin tunlai pasaltha zinga mi an ni nghe nghe.

Pu Lalnghaka Fanai: Pu Lalnghaka Fanai hi kum 1930 khan Pu Zadala leh Pi Chhunthiangi fate zinga a parukna niin Thiak (Zaingen) khuaah alo piang a. Amah hi a naupan lai atang rengin mi tawng tam lo tak, mi tumruh leh zaidam, tlawmngai tak a ni a. Hang lam deuh, feet nga leh a chanve vel a sang a ni. Sa chi hrang hrang a kap ve nual a, a zat chiah hriat erawh a har tawh hle a, sa chi hrang hrang za leh sawmriat vel ni a ngaih a ni. Sakei 2 a kap a, mahse, a sakei kah hi chuti ngawta pawngpaw kah/kap mai mai a ni lo. A theih chhung chu kah loh a tum hram hram a, mahse a kalna tur kawng a dal tlat avangin a kap ta chauh thin a ni. Savawm hi 53 a kap a, pakhat a chehin a chek hlum bawk.

A huaisen zia te, a tuarchhel zia te, a tlawmngaih zia te chu heng atang hian a lang Chiang hle. Vawikhat chu a thianpa nen an ramchhuak a, mual hran ve veah an kal a. Sa an hmuh tak mai loh avangin ani chuan thingthupui alo lo a, a thianpa chuan Hauhuk emaw tiin a kap ta a. A bek sam hi a thawi chho thuak mai a, zam hauh lo hian 'han ti leh rawh, ka lo het (head) per nelh nelh mai teh ang' ala ti thei a ni. A kap tupa erawh chu a khur nasa mai thung a ni awm e.

Vawikhat leh chu Sanghal hnu an chhui a, rei tawh an chhui hnuah a hnu alo tai darh tak avangin a thianpa nen chuan an chhui hrang ta a. Silai pu chung a Sanghal hnu chhuia a'n kun kat kat lai chu a thianpa chuan Sanghal emaw tiin a kap zawt mai a. A hnungzang khua bulah kapin a dar ruh khawih lovin, a ban puamah a mu chhuak lo deuhin a tang ta a. A kap tupa chuan Lalnghaka a ni tih a han hriat chuan, 'Nghaka, nang i ni maw! Ka fuh che em?' a han ti a. A ni chuan, 'E, min fuh Chiang kher mai, lo kal rawh khai,' tiin zaidam takin alo chhang thei a ni. Zawn an tum a, a duh lo va, a kal lui hram hram a. An inhliamna atanga mel 4 laia hla khua chu a kal thleng hram a ni.

In an han thlen chuan a ban puama silai mu chu phawrh thain an hria a, han zai mai thei damdawi lam thiam khuaah chuan an awm mai bawk si lo va, an buai hle a ni. Amah chuan, 'Chem han tat hriam ula, lo vuan rawh u, keiman kan zai chhuak ang e,' a ti ta mai a. Ni thei em a an hriat loh avangin, Pu Rinsanga (Sipai pension) chuan tlawmngaih chhuahin, damdawi pakhat mah hmang lovin, bilet (Blade) in a zai chhuah sak ta a ni. An zai chhung hian chair-ah thuin zial a zu a, na ti awm pawha lang lovin a titi vel mai mai a ni. Hemi tum hian vawikhat te pawh a rum loh thu leh, a kantute hnenah a na lo ve a lo tih theih zel avangin anu phei chuan, 'Lalngak, a na lo tak tak em ni?' tiin a zawt hial a ni. A na chu a dam that mai theih loh avangin Champhai damdawi in an pan pui ta a, hetah pawh hian a chhung hawlh fai tura hruihual an han pawh chhuah tawn thin pawhin rum lovin a tlakin a tlak bap bap an ti.

Vawikhat leh pawh a makpa Nghalchang kah hliam an um a, rei tak an um hnuah chuan Nghalchang hliam chu an bul lawk atang chuan a dawh hian a rawn dawh chhuak zawk a. A pawhin rang takin a kap a, mahse, Nghalchang hliam chuan a malpui tawp, mawngtam hnuaiah hian a bung zawnin inches 5 lai a seiin a tai sak ta hmuar mai a, a malpui lehlamah pawh chuan na tham takin a tai tel bawk a. Hemi tum pawh hian na ti awm lo takin meizial ala zu talh talh tho a ni. A thi duh khawp a, an zawnna hlangah thelret puan (tui puan) an phah a, kawng lakah chuan a thi tlingin a chim deuh thin chu tum hnih

lai an paihsak nghe nghe a ni. Hemi tum pawh hian vawikhat pawh a rum leh miah lo. Hetih hunlai hi Buh seng tul vanglai a ni a, ramriah an ngai hlawm si a. Khawtlang hruaituten a riahpui dan tur list an siam ta ringawt mai a, mi pahnih zela in kawpin zan engemaw zat an riahpui nghe nghe a ni. An riahpui zan alo thlen chuan, tlangval ramriak pawh tlawmngaiin an haw nal nal zel a ni an ti.

Vawikhat chu an lo vah ramriah naah Savawm no hruai nen an intawng hlahh mai a, an indang deuh rap rap a, a tawpah chuan amah rawn beih tum a an nufaa an rawn thawk phei chu a pui zawk luah tak chuan alo chek let tawp mai a, a thi ta a ni. Savawm lamah hian a tluang viau a ni ang, a ni zawn chu ni chiah lo mah se Savawm hi nikhatah pathum zelin ni 3 lai a kap a ni. Tin, nikhatah pahnih zelin ni hnih a kap baw. Pu Lalnghaka hian a nau hnenah, 'Savawm i hmuh chuan i tlansan tur a ni lo, chawhmeh tui tak a ni,' tiin a hrilh a ni awm e. Saza kawlh hlahhawm zia ti hian a sawi ve thung. 'Saza kawlh ka um a, mi rawn bei turin a rawn tlan phei puat mai a, ka lo per hman hlahh mai a, mahse, a rawn kawi zui zel a, chu chu chemin a nghawngah ka lo vai a, a nghawng a chhum thelh a, Savawm hliam chu nep te a ni a, Sanghal hliam ang vel a ni,' a ti hial.

Mizoram buai avangin kum thum lai chu Jail hrang hrangah a zu tang ve a. An tan pui pakhat, ruk ruk avanga tang ve palian pui sual em em mai hi a awm a. Mi chaw dawh aite hi alo dawh ru thin a, thildangah pawh a sual hle a ni awm e. Tumahin an khing ngam si lo va, a vawk lal len a ni ber mai. Paliana hnenah hian a thil chin hi a chin chhunzawm zel chuan amah dah that mai a tum thu chiang takin a hrilh a, chu vauna hlahhawm tak chu Paliana chuan tuar ngam lovin a nun sual a sim ta niin an sawi.

Pu Lalnghaka hian nupui a nei lo hlahh a, amaherawhchu, tlai khaw hnuah fapa pakhat a nei ve hlawl a, a lawmin a chhuang hle. Hun rei tak chhung asthma natna in a tlakbuak avangin a ramvak thei lo va. A natna chuan zual lam a pan zel a, a thih hma lawk hian a thianpa Pu Zakhuman a va kan a. A ni na tuar chau tawh tak chuan thawk a nawm zawk beiseiin vawi hnih a han rum ve a. Pu Zakhuma chuan, 'Lalnghak, engatinge i rum ve tak?' tiin a han zawt a. Ani chuan, 'Zakhum, a tul a nih hi' tih ringawtin a chhang a ni. Chu asthma natna chu pasaltha huaisen, tuarchhel tak hnuk pawh chuan a tuar zo ta bik lo va, ni 24.1.1998 tlai lam dar 3:40 khan a pasalthatna he lei ram chu chhuahsanin, chatuan ram min lo pansan ta a ni. YMA nula leh tlangval, nu leh pa ten a ruang chu tlaivar puiin a tuk ni 25.1.1998-ah duhsak taka a thlan thuk taka laihah zalhin kan thlah liam ta a ni.

Pu Lалуapa: Pu Lалуapa hi Pu Diauva leh Pi Tlauhnuni te inkarah lo piangin unau mipa 3 leh hmeichhia 2 an ni a, ani hi a upa ber dawttu niin tunah hian a nupui fanaute nen Khawzawl Zaingen vengah an cheng mek a ni.

Kum 1976-ah khan Zaingen ram Tuira lui kam zawl leilet, Pu Mangvunga'n a enkawlah chuan buhseng hun lai November thlaah buh hmunah chuan Sanghal alo chhuak vak mai a. Pu Mangvunga hian Pu Lалуapa chu a buh hmuna Sanghal chhuak chu chang turin a sawm a. Khua atanga hnai te mah nise ni tlak hma deuha a hmun thleng turin an kal dun ta a. Sanghal chhuah hun tur nia an la ngaih loh avangin thawm dim lem lovin an kal a, leilet an zuk thlen chuan Nghal rual chu an lo awm reng tawh a, an thawm hria chuan Nghalrual chu rangtakin an tlanchhia a. Chutiang a nih tak si-ah chuan anni pawh chuan an hawsan ve leh ta a.

Pu Lualuapa chu a meizial bur theihngihl lam paha Sanghal chang turin a tuk zingah a kal leh a. Sanghal chu an lo awm mai loh avangin a hma nia an hmuhte hnuchhui turin luikam chhak lam Mualkual ramchang hmunah a lut chho ta a, chutia fimkhur taka a kal lai chuan rin loh takin thingkungah Savawm no lian ve tawh tak awm a hmu a, chu chu a silai ulhbun thar tha tak mai chuan a kap thla tawp mai a. Savawm no kiangah chuan Savawm pa pawh alo awm reng mai chu niin, a note chhan tum chuan Pu Uapa chu beih a rawn tum nghal a, chak taka Pu Uapa a rawn pan lai chuan a vanneih a siamin alo kap thlu leh tawp mai a, chu mai la ni lovin Savawm pui pawh a no chhan tur chuan Pu Uapa bei turin alo lang ve nghal thuai a. Pu Uapa erawh thingkungah a lawn kai hman a, Savawm pui chuan lawn khung tuma thingkung a rawn pawm tan chiah chu chhuk zawngin alo kap leh a, vanneihthlak takin a kaphlum nghal a ni.

Hetia Savawm nupa leh note a kahhlum hnuah lawm leh thlamuang taka a thut hahchawlh mek lai chuan, Savawm no dang lian ve deuh a hmu leh a, chu pawh chu a kap hlum leh ta a ni. Mizo pasaltha zingah hian tum khata Savawm pali kap thei hi an awm ve ang em aw? Pu Lualuapa hian a vaiin Savawm 10 leh sa dang engemaw zat a kap tawh a, Sakhi pawh vawmhlum tawhin a nung chungin a man tawh bawk a, Sahram 2 a man tawh bawk. A Sahram man hman hian Pu Lualuapa hian mi hrawka sangha ruh tang a zut thlak sak thin a ni.

Kum 1989, October thlaah vaihlo lova an riah laiin Vawngthla thing, ban atan kitin fit 6 vela seiin a tan hlawm a, a hahchawl tur chuan a hreipui chu thingah a chek bur a. Meizuk a siam lai tak chuan savawmin a rawn bei thut mai a, tan pawh alo khawh nasa hle mai a, Savawm hi chhoh tanin a kawr ban pawt thlerin a ban pawh a ham thlur sung mai a. Savawm chu thlang lamah a nam thla thei ta hlauh va, Savawm hi thlang lama a tlak tawh chuan mi a bei zui ngai tawh lo tih a hriatin thlawhlaia a silai dah chu lain Savawm chu a veh zui ta a, vanneihthlak takin a kap thlu leh ta a ni.

ZAINGEN VENG LO IN TAN CHHOH DAN: Kum 1966, March ni 1-ah Mizoram chu a buai ta a. Mizo National Front (MNF) chuan Independent puangin India sipai te chu an kap ta a. Khawzawl camp pawh chu lak tumin nasa takin an kap a, an la mai thei ta lo va. Anmahni rawn pui turin Jet Fighter rawn thlawkin, Thlawhna lian Ration phur a rawn veng pah bawk a. Camp pawn leh a velte chu ni 5,6,8,9 leh 10-ah te Machine gun-in an rawn kap chiam a. Bomb engemaw zat an rawn thlak bawk a, Chenna in tam tak an kap alh ta a ni. Mipui tan awm ngaihna a awm tak loh avangin, ramhnuai leh remchangte belin an darh ta vek a. A vel khuaahte an tlanhhia a, a then phei chu Aizawl lamahte an tlanche nghe nghe a, Sipaiho chauh an awm ta a ni.

Khawzawl chhehvel kuate pawh chu sipaiho chuan an hal deuh vek a, Zaingen khua pawh ni 22.5.1966-ah halin ramhnuai remchangah leh thlawhlai thlamahte an tlanche zo ta a, hun engemawti hnuah khuaah Bawkte te khawhin an luah leh ta chauh a ni. Chutianga hlau leh khur, buai taka kan awm lai chuan Zoram hmun hrang hrangah khaw sawikhawm (Grouping) a nih tur thu chu kum 1967 chawhnu lam atang chuan a ri tan a. Khawzawl chhehvel kuate pawh chuan an khaw VC te leh Sipaiho kaihhruainain khaw hrang hrang awmna tur te ruahmanin, In hmunte siam rem a ni a. In sakna tur chakte chhuahin, a then phei chuan an sa tan mek bawk a. Kum 1968 chawhnu lama khawm tura

tih chu VC leh khawtlang hotute ngenna avangin, mahni khaw lamah Krismas leh Kumthar chu hman min phalsak ta a.

Mahse, vanduaithlak takin, Darngawn rama MNF camp awmna chu Sipaiho chuan an lo hre ru a, an inring lo lai chu kah chilhin Pu Lalbela an kaphlum a. Sipai thin thawk chuan Darngawn khua chu a tuk ni 19.11.1968-ah a zatve an khawm thut a, a tuk lehah a lehlam an khawm leh a. Keini Zaingen khua pawh chu ni 20.11.1968-ah min khawm ve ta a. Kum 1968 tawp lam leh 1969 kumtirah khawm luh kan ni. Khawzawl chhehvel khua Khawzawla khawm luhte chu Darngawn, Zaingen, Tuisen, Arro, Zuchhip, Tualpui, Ngaizawl leh Neihdawn (Lalveng) te an ni. Zoram buaiin a nghawng chhuah grouping policy avangin Mizoram khaw hrang hrang 516 chu khaw 110-ah sawikhawm a ni.

Chutia min khawm tak chuk chukah chuan chenna tur In sa zo pawh an la awm lo, a chhuat leh a bang nei, a chhuat chauh nei, a then phe chu a ban chauh phun te, la phun lote kan ni nawk a. Chhung khat lainate belin, buk sak chawpah kan cheng hlawm a. In lah chu a inhnaihin kan bit tlat a ni ber mai. Kan rethei em em a, ei a chhiain kan hrisel lo hle bawk. Chutia kan buai em em lai chuan ni 3.12.1968-ah kan veng chhunga mi Laldawngkima Khawlhing s/o KM. Lalzuala kum 16 chu Sakawr ek hrik natnain, rei pawh in enkawl hman lovin a thi zui a. A phumna tur thlanmual pawh kan la neih si loh avangin thlanmual zawn a ni ta a. Tuna Vengchhak thlanmual hman mek hi a ni ta a ni. Vengtinah VC ten hma lain, YMA, GSA leh Kohhrante pawhin an theih ang angin hma an la hlawm a, Sikul lamte pawh din chhoh nghal zel a ni bawk.

Kum 1968, November ni 19 atanga Khawzawla khawm luh khaw hrang hrang 8 te chu khua tih zel a rem ta lo va, veng hmingah kan pu ta hlawm a ni. Zaingen veng hi Khawzawl khawm hlimah chuan veng lai lum tak a ni a, Darngawn veng leh Zuchhip veng inkarah a awm a, a sir leh lamah Arro veng, a sir leh lamah Tualpui veng a awm bawk a ni. Veng nuam leh laili tak a ni a, a veng lai takah kawn zam nuam tak leh zau tak Taidawnkawn a awm a, khawm hlimah phe chu hman helai hmun hi insual tur pawhin an pan khawm zel emaw tih tur khawpin an insualna hmun ber a ni. Khaw hran hran awmkhawm kan nih avangin duh dan leh tihdante a inan loh hlawm avangin kan inngeih lo hle a ni.

Tuna Zaingen veng chanchin tlangpui chu a hnuaia mi ang hi a ni.

Veng then: Zaingen veng hian tun hma atangin veng then dan kan nei a, chungte chu – Vengchhak, Vengthlang, Biak In kawn, College veng, Lal veng leh Kawn veng te a ni. Heng veng inthennate hi YMA section then nan te, MUP leh MHIP lam te pawhin member lak leh thil khawn ngaiah pawh kan hmang nghal zel a ni.

A mi chengte: Zaingen veng chhungah hian mihring 1180 kan awm a, mipa 568 leh hmeichhia 612 kan ni. Vote nei chin mipa 386 leh hmeichhia 408, kan vaiin 794 kan ni. Kum 80 tling chin mi 10 an awm a, mipa 9 leh hmeichhia 3 an ni. Mipa upa ber chu Pu Vawmhranga niin kum 88 a ni a, hmeichhia upa ber chu Pi Lalnghaki niin kum 92 a ni.

In awm zat: Zaingen veng chhungah In ding lai 273 a awm a, Biak in leh School, Sawrkar in leh chenna in atana hman chi loh nen vek a ni. Assam type hi In 200 a ni a, Concrete building hi In 73 a ni bawk. Concrete in sak lai 15 a awm bawk. Chhungkua 276 kan ni a,

mi inluaha khawsa chungkaw 43 an awm. Zaingen vengah hian In chhawng li nei henge hi an ni :- Pu R. Lalnkima, Pu Hmingsangzuala, Pu Lalnunmawia, Pu V. Lalbiaktlinga leh Pu K. Lalzika te an ni a, sak lai mekah Pu K. Lalrohlua ten chhawng nga in an sa mek baw.

Eizawna: A tlangpui thuin kuthnathawka ei zawng kan ni ber a, Lo neia eizawng In 15-20 vel, huan neia eizawng In 10 vel an awm baw. Sawrkar hnathawk 54 leh a nget lo a thawk 15 an awm. Sawrkar hnathawk kan tih pawh hi Sipai/Police lam deuh vek an ni. Furniture lama eizawng hi In 5 niin heta thawk hi mi 15 vel baw an ni. Cement mistiri hi 10 vel an awm a, thing mistiri 4 vel an awm baw. A bak zawng hi chu mi hnuaia inhlawhaa a rem rem thawkte kan ni tlangpui.

Daw: Zaingen veng chungah hian a hnuaia mi ang hian daw chi hrang hrang an awm:

1) Wholesale – 2, 2) Hardware -1, 3) Granite daw – 1, 4) Aluminium daw – 2, 5) Damdawi daw – 4, 6) Rawng daw – 1, 7) Thingpui daw – 2, 8) Cosmetic daw -2, 9) Puan than daw – 1, 10) Photographic & Printing -2, 11) Eichawp daw – 17, 12) Second hand daw -2, 13) Phone repairing – 2, 14) Tailoring -2, 15) Beauty parlour -3, 16) Lu mehna -2, 17) Furniture work – 5, 18) Electronic daw -1 leh 19) Health clinic – 1.

Bazar: Khawkhawm atanga rei vak lovah kan thil neih ang angte hralhna atan Vengchhak lamah Zaingen leh Darngawn inrinaah Bazar siam a ni a, kum engemaw zat hnua tawpin Taidawnkawnah Bazar hmun hi siam leh a ni a, tunah chuan Zaingen YMA Hall hnuaiah seat engemawzat awmin siam a ni leh ta a ni. Hetah hian nilengin thlai hnah leh thil chi hrang hrang zawrh a ni a, Burma sumdawngte pawh engemaw zat an inzuar baw. Bawng, vaw, Ar leh Sanghate Bazarah hian zawrh a ni baw. He bazar hi tunah Khawzawla Bazarah chuan a lian ber a, tun hma chuan Trade & Commerce enkawl a ni a, tunah erawh Zaingen Branch YMA in enkawlin a neitu nihna pawh a nei tawh a ni.

RORELNA LAM: Khawzawl khuaa khawm luh kan nih hnu lawkah VC pakhat hnuaiah kan awm a, hun engemaw ti chen kan awm hnua VC engemaw zatah kan inthen ta a. Zaingen leh Zuchhip hi VC pakhat awmin VC-IV kan ni thin. Chuta tang chuan veng bila VC neih duhna a lo piang a, kum 2021 atang khan kan lo indang ta a, Zaingen Veng VC tih hming kan lo pu ta a ni. VC Hall (Panchayati Bhavan) pawh Govt. M/S ram, khawchhak lam kawngpui kamah a chhawngin sak a ni. Tuna VC tanglaite chu: -

President	:	Pu HP Chhawntluanga
Vice President	:	Pu K Thangliana
Treasurer	:	Pu HP Ramhluna
Members	:	Pu R Thangdela Pi Lalropuii
Secretary	:	Pu R Lalbiakthuama

Vengchung cheina kawng hrang hrangte thawkin, ni 100 inhlawhna an buaipui baw. Rorel tur hrang hrangah an thawk reng baw.

YOUNG MIZO ASSOCIATION (YMA): Zaingen Branch YMA-ah hian member 480 awmin, mipa 346 leh hmeichhia 134 kan ni. Zaingen khua a awm lai atang tawhin YMA inkaihhruaina tha tak nei thin an ni a. Khawzawlah pawh chu chu chhawm zelin, YMA nung

leh entawn tlak tak a ni ta zel a ni. YMA din champha hetiang hian ropui taka lawm thin a ni. Kum 1998-ah Golden Jubilee (kum 50-na), Kum 2008-ah Diamond Jubilee (kum 60-na) leh kum 2023-ah Platinum Jubilee (kum 75-na). YMA Hall pawh a nei hmasa niin vawi 3 lai sak that a ni tawh. Hall hi veng laili lai Taidawnkawnah sak a ni a, sak vawi thumna hi kum 1999-ah sa tanin, kum 2013 khan ropui taka hawn a ni. Mi 500 chuang lenga ngaih a ni. Khawzawlah chuan Hall tha ber niin thil tih khawm lian deuhah chuan an hmang zel a. Inthlan dawn phei chuan a rim thin khawp mai.

Junior YMA/YMA Chhang pawh hi a din hmasa veng kan ni a, hemi hma hian Mizo Children Association (MCA) tiin an lo din tawh nghe nghe a ni. An inhmukhawm zingin hnattlang pawh an ko ngawrh hle. Tuizemte tuakin YMA-ah chuan Tuizem nei hmasa ber kan ni hial ang. YMA chhang kaihruai tura ruat Pu Khiangliana phei chuan, YMA Chhang hla 2 mawi tak leh sak nuam tak a phuah a, kalkhawm nikhuate hian an sa thup thup thin. YMA Hla Bu-ah pawh a chuang thin. Vawiin thleng hian an la tangkai em em a ni.

Zaingen Branch YMA hi Hall nei hmasa, Tuizem leh YMA Thutthleng sei nei hmasa kan ni. Tuna Office Bearer ni lai mekte chu heng mite hi an ni:-

President	:	Pu B. Lalhmangaihtluanga
Vice President	:	Pu JH. Kaptluanga
Secretary	:	Pu Vanlalchuana
Asst Secretary	:	Pu HP. Lalrinkima
Treasurer	:	NI Lalruatdiki
Fin Secretary	:	Tv H. Lalropuia

MHIP: Hun rei tak Zuchhip Veng MHIP te nen inkawpin hma an la ho tawh thin a. Hun rei deuh tawh atang khan branch hniah an insiam ta a ni. Zaingen Branch MHIP-ah hian Member 413 an awm. Vengchhung tihfai leh an hma lakna awm dangachte an tangkai hle. Chhiania thlalakpui tur pangpar mawi tak takin an khawi thin. Vengchhung damlo leh harsatna tawkte an tanpui thin bawk. College vengah in hmun tha tak neiin Assam Type-in an sa a, mi an luahtir mek. Tuna Office Bearer ni mekte:-

President	:	Pi Lalrinsiami
Vice President	:	Pi Thanseii
Secretary	:	Pi R. Lalrinchani
Asst Secretary	:	Pi T. Ngaihluni
Treasurer	:	Pi Lalhmunmawii
Fin Secretary	:	Pi K. Lalramlawmi

MUP: Zaingen vengah hian MUP pawh nung takin ala kal ve zel a. Tunah hian member 134 awmin, Mipa - 61 leh Hmeichhia - 73 an ni. Vengchhung fainaah leh thildangah an theih ang tawkin hma an la ve thin. Taidawnkawm atanga College veng pan pheina kawng an thlang lamah, Concrete Building-in MUP Run tha tak an sa a. Ni 12.10.2022 khan ropui takin Pu Tawnluia, Dy. Chief Minister-in a hawng. Kan Run hi member-te in awm hlimna bakah pawl hrang hrangten Committee nan an hmang tangkai hle. Daihnaiah Rawhmun an siam a, National Highway-in a tan tlang a, sum tlem hmuh a ni. Pawimawh hrang hrangah an hralh bawk thin. Tuna Office Bearer ni mekte chu:-

President	:	Pu K. Lalzika
Vice President	:	Pu Khawpuingaia
Secretary	:	Pu K. Lianhela
Asst Secretary	:	Pu MS. Dawngliana
Treasurer	:	Pu HP. Ramhluna
Fin Secretary	:	Pu HP. Chhawntluanga

G&SA: Zaingen Games & Sport Association pawh Khawzawl kan awm hnuah chhonzawm zelin, wawin thlengin harsa tak chung pawn sports lamah theihtawp an chhuah zel a. Tournament hrang hrangah quarter final leh semi final te thleng ve thinin champion te pawh an ni ve fo thin a ni. Volleyball-ah pawh champion ve tawhin a tlangpui chuan quarter leh semi final te an thleng tlang pui. Tuna G&SA hruaitute chu:-

President	:	Pu Lalnunkima
Vice President	:	Pu Lalngaihawma
Secretary	:	Pu K. Lalhruaitluanga
Asst Secretary	:	Tv F. Hmingsangzuala
Treasurer	:	NI R. Lalhlimpuii
Fin Secretary	:	Pu K. Lalruatkima

VDP: Zaingen veng VDP te hi an chak viau thin a, hun engemaw ti atang khan an chak ta vak lo va, report an dawn erawh an bawhzui zel thung. An hna a rum deuh avangin hruaitu tur an invan deuh thin. VC kaihhruiin inthlan a ni deuh ber a, tuna hruaitu ni mekte chu:-

President	:	Pu K. Lianhela
Vice President	:	Pu Arsithanga
Secretary	:	Pu C. Laldingliana
Asst Secretary	:	Tv Laltlannilawma
Treasurer	:	Pu Zoremawia
Fin Secretary	:	Pu C. Lalramliana

Kohhran lam: Zaingen khua atanga Khawzawla min khawm luh khan heng mite hi kan Upate an ni - Upa Surawia, Upa Thandawla, Upa K Lalzuia, Upa Laldawla, Upa Rokima.

Khawm hlimah Biak In kan la neih loh avangin Upa Thandawla Inah Inkhawm thin a ni. Zaingen Biak In kha thiatin a chakte chhinchhiah vekin lak phei a ni a. A ang chiahin sak leh a ni a, a chung chih hma deuh hian Zuchhip veng Biak In sakna turah sipai in sak an phal tak loh avangin Zaingen Biak Inah lawi ho tura min tih angin a sir ve veah zauh leh a ni a, kan lawi ho ta a ni. Lalvengte pawn Biak In hran nei lovin minrawn fin ve bawka, Zaingen leh Zuchhip Upa hote chuan Kohhran an enkawl ta a ni. Kohhran hming tur hi sak alo ngai ta a, kan veng chhak lama awm Darngawn, Tuisen, Arro leh Tualpui te chu Kohhran pakhtah awmin, anni hi Vengsang Kohhran tih an ni a, keini hi Venglai Kohhran tih kan ni ta a ni. Pastor Liandawla hi Tualpui atangarawn lut ve a nih avangin, Vengsang chu Pastor thuthmun a ni a, hun lo kal zelah Vengtharah Pastor Quarters chu sawn a ni ta a. Bial khat atana kan len tak em avangin Khawzawl Bial chu Bial hnihah thenin kum 1987-ah chuan Venglai Bial leh Vengthar Bial alo piang ta a ni.

Zaingen veng chhungah hian Kohhran (Denomination) hrang hrang kan awm a, chungte chu: - Presbyterian Church, Fundamental Baptist Church (FBC), Baptist Church of Mizoram (BCM), United Pentecostal Church (UPC) (NEI), United Pentecostal Church (UPC) (Mz), Reform Church leh Church of God (Sabath) te an ni.

Heng Kohhran zingah hian Presbyterian Kohhran hi a lian fal hle a, member 1046 an awm a, in 211 leh Kohhran dang nena in awm pawlh in 12 an awm bawk. Presbyterian ni lo Kohhran dang chu in 21 an awm. Veng inlungual tak an nih avangin pawl hruaitu hrang hrangah inthliar hranna a awm ngai lo.

Zirna lam: Zirna lamah chuan, Zaingen khua awm lai kum 1919 atanga zirtirtu dahin zirna tan a ni a. Zaingen Primary School atangin Mizoram pumah kum 1953-ah Lianhnuna pangana, 1955-ah Tawnluia pakhatna. Middle School atangin Mizoram pumah kum 1956-ah Lianhnuna pakhatna, 1958-ah Tawnluia pakhatna. Kum 1956-ah PS behchhanin MS an din bawk.

Zaingen khaw chhuak a zirna lama tawng sang deuhte han tarlang ila:-

- | | |
|------------------------------------|---|
| 1) Rev Dr KM Vanlalpeka (Prof ATC) | 2) Pu Chuahnnuna (MCS), DC, Hnahthial |
| 3) Dr JT Vanlalnggheta (LLB) | 4) Pu Lalnunmawia (LLB) Ukil |
| 5) Dr Lalmuanawma | 6) Pu K Ziona, Principal, Govt Khawzawl College |

Zaingen veng hmun danga awm mek tel loin Zaingen veng chhunga awm mekah - MA -16, BA-65 an awm mek. Hmun danga awm tawhte nen pheichuan an tam ve tawh viau ang. Tun dinhmunah zirna in lamah kan hausa hle a, Anganwadi atanga MA thlenga zir zawh theihna hmun a awm a ni. Hetiang veng hi a vang ngawt ang le.

Zaingen veng zirna in awmte chu heng te hi a ni:-

Anganwadi Centre: Zaingen veng chhungah hian zirna bul ber Anganwadi Centre 2 a awm a, Anganwadi Centre V, Lalveng a mi leh Anganwadi Centre VI, Vengthlang a mi te an ni.

Govt. Primary School I: Tunhmaa Khawzawla Primary School III ni thin kha PS amalgamate a awm nual avangin PS I a lo ni ta a. Zirtirtu pali leh VC rawih pakhat awmin an vaiin panga an ni. Zirlai 61 an awm a, Cook pahnih an nei bawk. Tunah hian Pre-Nursery pawh hawn tel a ni. Inthlan apiangin Polling Booth-ah an hmang thin.

Govt. Middle School: Zaingen vengah hian Govt MS hi pakhat chauh kan nei a, tunah hian thawktu pariat an awm. Zirtirtu paruk, Computer instructor pakhat leh IV Grade pakhat te an ni. Zirlai 30 an awm mek. Middle School compound chhungah hian PHE in water reservoir/tank lian tak a nei a, tun hma pheichuan Khawzawl pum chawmtu ber a ni. VC lam pawhin tui dahna tur tank hmun hnihah an siam a, water tank tui liam rinchanin swimming pool an siam a, heta tang hian tui hleuh thiam engemawzat an chhuak tawh.

Compound chhungah hian Elementary Boys tan a thlawna awm theihna Residential Special Training Centre, Samagra Shiksha-in an buatsaih a awm bawk.

Enkawltu mumal nei lo leh harsa bik deuhte an dah deuh ber a. A bul lawkah Airtel tower a awm a, P&E Department transformer pawh pahnih lai a awm bawk.

Far East Experimental School (FEES): Zaingen veng then pakhat College veng mawng lamah hian Far East Experimental School a awm a, hetah hian Nursery atanga Class-X thleng a awm. He school hi private school niin zirtirtu 15 leh IV Grade pakhat an awm a, zirlai naupang 320 an nei mek. School tha tak a ni.

Higher Secondary School: He School hi FEES thlang lawka awm a ni a, Khawzawl khawtlang hruaituten kum 2002 ah dinin, 2003-ah class tan a ni. Kumin kum tawp lam khan Govt-ah hlan kai a ni a, Arts, Science leh Commerce Subject hawn a ni. Tunah hian thawktu teaching staff 25 leh non teaching staff 1 an nei mek a, zirlai 230 vel an awm.

Central sawrkar atangin Girls Hostel tur, Netaji Subhas Chandra Boss Avasiya Vidhyalaya atangin dawn a ni a, building hi peihfel thawkhat a ni a, a chung bungruate pawh peihfel a ni tawh. He hostel hi Secondary zirlai hmeichhia 30, a thlawna awmna tur a ni. He school-ah hian building pariat a awm a, a dang sak tan leh mek a ni bawk. He school-a thawk zirtirtute hi an thain result pawh an nei tha thin hle a ni.

Govt. Khawzawl College: Khawzawl College hi kum 1985-ah khawtlang tangrual in an din a ni a, teaching staff 23, non teaching staff 10 leh IV Grade 2 an awm mek. Zirlai 86 awmin, Subject paruk - English, Economics, Education, History, Political Science leh Mizo subject te a awm.

Khawzawl College-ah hian library tha tak a awm a, Volleyball court, Basket ball court, Badminton court leh Multipurpose Hall-te a awm. Building pawh pasarih lai a awm a, a compound pawh brick hmanga hung chhuah a ni. A compound chungah hian thing tam tak zuahin mawi leh tha taka enkawl mek an ni.

Khawzawl College-ah hian IGNOU hawn a ni a, hetah hian BA leh MA a zir theih. BA-ah hian Pol. Science, Public Administration leh History te a zir theih a, MA-ah hian Pol. Science leh Public Administration a zir theih bawk.

Sawrkar Office: Kan veng huam chungah hian sawrkar office a awm lo hle, Taidawnkawn bula UD&PA Office te, Biak in kawna Union Bank leh zirna in zawng zawngte hi an ni mai.

Sawrkar hnathawk: Zaingen veng chungah hian Sawrkar hnathawk an tlem hle a, tlema hna sang deuh thawk phei chu an awm meuh lo. Engemaw zat chu khaw dangah hnathawkin an awm a. Tunah hian hna nghet - 54 leh a nghet lo 15 thawk an awm a, a ngheta thawk zingah hian police an tam ber. Hmun dang atanga hna rawn thawk, Zaingen veng chungah in luahte pawh chhiar vek an ni. Pensioner hi mi 23 vel kan awm bawk.

Lirthei/Motor: Zaingen veng chungah hian lirthei 190 a awm a, chung zinga 117 chu two wheeller a ni a, Car 50, LPK(Tripper) 5, Sumo, Tata Ace leh Pick Up 10, JCB 4, Hitachi 2, Trailer (Truck) 1, Road roller 1.

Tuikhur: Zaingen veng huam chhungah hian tuikhur 3 a awm a, hengte hi chhuah chhawngah vek an awm. Lalveng huam chhunga awm vek an ni baw. Chungte chu:-

- 1) Khur thlang :- Tunah VC lamin motor kal theihin a kawng an lai tlang a, a hlat deuh avangin a tangkai tur angin a tangkai thei rih lo.
- 2) Kawngphei tuikhur :- Hei hi Sinzawl road kamah a awm a, a kawng a pheiiin tuihna a tha baw a, kan tlan ber a ni.
- 3) VC tuikhur :- Hei hi Lalveng atanga College veng kal pheina kawng chhak hrula awm a ni. Siam thar a nih avangin a tangkai tur angin ala tangkai chiah lo.

Kawngpui: Zaingen veng chhunga motor kawngpui awm dan chu hetiang hi a ni. Chhim leh hmar zawngin kawngpui pahnihin a tan tlang a, pakhat chu khawlai kawngpui ber a ni a, pakhat chu Sinzawl road a ni a, Lalveng mawng lamah a kaltlang baw. Kawngpui dangte chu Taidawnkawn point-ah hmangin - Taidawnkawn atangin College veng panna, Lalveng panna (Sinzawl road pawhin), DC Quarters panna, Mualvawm Field panna, Circuit House panna leh Kawnzar veng panna te an ni.

Ruihhlo : Tun hma chuan Zaingen vengah hian ruihhlo zuar an awm ve thin a, tunah erawh chuan a zuar han tih tur an awm lo a ni. A zuar awm lo mah ila, a in chi leh inchiu chi erawh chu a tam pawl tak kan ni.

THIL DANG

Taidawnkawn: A hming awmzia hi hetiangin an sawi, tun hmain helai kawnah hian zu fe/tai fe an paih thin a, chumi chawi chuan Taidawnkawn an ti ta a ni an ti. Taidawnkawn hi Zaingen veng laili takah awmin a lun thin hle. Taidawnkawn ropuina em em chu Mizorama kawng peng thuam tamna ber a ni hi a ni. Peng thuam sawm a awm a, motor kawng pariat leh step-a siam kawng pahni a awm a ni. A kawn lai takah traffic point a awm a, Khawzawla traffic point hmasa ber a ni. He point hi Pu Lalchamrenga te chhungkua in an nu Pi Rokami hriatreng nana an siam a ni. A senso pawh an tum vek avangin Rokami point tih hming hi phuah a ni a, kum 2017 a siam a ni.

Tower: Govt MS Compound-a tower awm kan sawi tawh bakah Pu Lianthuama kawmchhakah Airtel tower a awm a, PS I bul BSNL compound ah BSNL tower a awm baw.

Volleyball court: Volleyball court hi pahni a awm a, PS I bulah leh Darngawn veng nena kan inrina bazar zawl hmun hlui a mite hi an ni. Thalaiten an chhawr hle.

Futsal ground: Pu K. Lalzicate chhungkua in an kawmthlangah Futsal ground an siam a, kum 2022 tir lamah siam tanin, ni 16.1.2023 zanah tawngtaia Pathian hnena hlanna neih a ni. A hmingah LZ Futsal ground tih a ni a, Khawzawla awm hmasa ber a ni baw a, khawtlangin an lawmin an hlut hle. Nitin leh zantin inkhel an awm deuh reng.

Thlanmual: Kan thlanmual hman mek hi khawm hlim atanga hman tan a ni a, kan veng thlanmual bik a ni lo. Zuchhip, Zaingen, Arro leh Darngawn ten kan intawm a ni. Zuchhip veng mawngah a awm a, Vengchhak thlanmual tih a ni.

ZUCHHIP VENG/ KHAW CHANCHIN

Zuchhip khaw hming tobul: Mizo hnahtlak zingah Hmar hnam hi thlang tla hmasa leh Mizoram luah hmasatute an ni a. An chen tawhna hmunte chuan an hnam hming a pu zel a ni. Mizorama hmun leh khaw hming tam tak hi Hmar hnahtlak hnam hming chawi thahnem tak an awm a ni. Upate titiah chuan Zuchhip ram putu ber Zuchhip tlang velah khuan tun hmain Hmar hnam peng pakhat Zuchhip hnam an lo awm tawh a, Zuchhip-ho lo chen tawhna hmun chu hming atan a pu hlen ta a ni an ti. Engtiklai atangin nge Zuchhip chu an tih Zuchhip tak tih hriat theih a ni tawh lo na a, 'Zuchhip ram, Zuchhip tlang' tih a ni ta zel a ni. Kan pipute kha hmun hrang hrangah kaiin, awm hmun sawn kual thin mah se, Zuchhip chu a bul tumtu ber a nih avangin an khaw hmingah Zuchhip tih chu an pu ta zel a ni.

Titi pakhatah Zuchhip tlang chhipah hian Zuchhip pahovin zu an lo zu a, mikhual lo kal vein, 'E! in va zu chhip ve,' an ti a, chuta tang chuan Zuchhip tih hi a pu hlen ta a ni, an tih erawh hi chu a rin tlak lutuk loh hmel hle. A chhan chu, Zuchhip khua a din hma daih hian Zuchhip tlang tih hi a pu daih tawh a. Tin, Zuchhip tlang chhip hi mikhual han kal velna tur kawng a ni lo hrim hrim bawk a ni.

Zuchhip lalte pian leh mûrna: Zahau inthlah chhawn dân chu Phurhluma hian fapa pahnih Hauhulha leh Zahauva a hring a; hei hi Hauhulh hnam leh Zahau hnam lo pian chhuahna chu a ni ta a ni. Zahauva hian Thlachawnga a hring a, Thlachawngan Kipkuala a hring ve leh a. Kipkuala'n fapa pathum „Ngunkuala, Haudinga leh Chungnunga te a hring a. A naupang ber Chungnunga hian fapa pathum bawk - Thathrima, Liandinga leh Khukhnina te a hring a. A upa ber Thathrima hian Khawkimthanga a hring a. Khawkimthanga hian fapa pahnih Khuangcheuva leh Khawzaliana te a hring a. A naupang zawk Khawzaliana hian fapa panga Liantlira, Hniartlinga, Thangtura, Khuahrawla leh Nikuala (Chawngtlai Lal) te a hring a. Heta a fapa upa ber dawttu Hniartlinga hi Zuchhip lal thlahtu a ni. Hniartlinga hian fapa pathum - Thlahmunga (Zuchhip lal hmasa ber), Mangcheuva leh Zunhmunga te a hring a. Thlahmunga hian fapa pathum Thanherha (Tualpui lal), Thankhara (Zuchhip lal) leh Liankulha te a hring a. Thankhara hian a nupui Lahnuni Sailo lakah fapa pahnih Khualthangnghina (Zuchhip lal) leh Lalthangvunga a hring ve leh a ni.

Zuchhip lal Thlahmunga fa u ber Thanherha hi kum 1894 khân Neihdawnah a kai a, Neihdawn leh Tualpui sât chhuaktu niin kum 1906 atangin Tualpui a thut a, a thih ni thlengin Tualpuiah hian a lal ta a ni. Thankhara hian apa Thlahmunga a thih tâk avângin Zuchhipah ro a rêl zui ta a. A naupang ber Liankulha erawh hi chuan tlang chang lovin Kanghmunah khawper angin a awm a, a awmna hmun hi tûn thlengin 'Liankulha hmun' tih a ni ta zêl a ni.

Zuchhip lal ram a piang ta : Chawngtlaia Nikuala awm laiin Thlahmunga chu bel rawh mual nei hrangin, sangal khawng hrang tûrin Zuchhipah a kaitir a, a hun thua pawh kum 1890 vel niin a lang. Thlahmunga chuan pasaltha huaisen Hranghleia chhawm tel a dil a, Nikuala chuan a phal lo hle a; mahse a hnuah chuan a khawper tho a ni a, engmah pawina awmin a hre ta lo va, ui chung chungin Nikuala chuan Hranghleia chu a chhawmtir ta a. Nikuala hian a pasaltha huaisen liam tur chu a ui ngang a ni ang, heti hian hla a phuah a.

Tumpang, sai ral Romani pa,
Ka phawsial mual liam túr chu e;
Ka zua-pa fam ni nen,
Hlei an dang chuang lo ve,

tiin a thlah liam ta hrám a ni. Nikuala pasaltha huaisen Vawmkaia pawhin Thlahmunga hi a zui ve bawk niin a lang, Kangbur kawna (Khawhai zinkawng peng) lungphun lian tak ding khu pasaltha Vawmkaia lungphun a ni.

Nikuala upa Tuahpuia hova Zuchhip ram an zu sah chhuah hian Lalburha ram thalai leh a ui em em mai Chhiarpui ram chu an zu sat phel phawk ni túr a ni a. Lalburha leh Nikuala hi unau piang hmun ang maia lo khawsa ho tawh an nih avangin a ui zui ngam bik si lo va, a thinur in 'Pawite lam hawi hian ka zung tawh lo vang," a ti e an ti.

Chawngtlai atanga Zuchhipa an kai hian Zuchhip tlang bulthut Lungpui zawl hmunah hian awmin bul an tan a. He hmunah hian rei awm lovin Hmunchengah khaw thar an sat a, Hmunchengah hian rei tak an awm a, an theikung phunte pawh a rah an ei hman a ni. Hmunchengah hian kum 1913 thleng vel an awm niin a lang. Hmuncheng atang hian khaw thar an kai leh a, Hmuncheng chhak lam Zuchhip tlang hnuai Hmunchungah an awm a, Zuchhip Hmunchung tih a ni. Hmunchungah hian kum 1916 vel thleng an awm.

Hmunchung atangin Khawhriamah an kai leh a. Khawhriama an awm lai hian an lalpa Thlahmunga chuan a boralsan ta a ni. Khawhriama an awm lai (1916 - 1919) hi khawvel indopui pakhatna hun lai kha a ni a. Zuchhip khua atangin mi engemaw zat chu German ral beiin Feren (France) ramah an kal ve a. Zuchhip khua atanga German ral runa kal hriat theihthe chu (1) Pu ..., Pu Laia/Laithangpuia, Pu Ralbuna, Pu Vawmhleia, Pu Khuangpuichhinga, Pu Vaülinga leh Pu Hratkunga te an ni.

Apa Thlahmunga thih hnu kum 1919 khan Khawhriam atangin Thanherha ho hian Khawdamah an kai leh a. Vanduaithlak takin kum thum chhüing chauh ro a rél hman tihin lalpa Thankhara chu kum 47 mi chauh niin April ni 12, 1920 khân a thi ta mai a. A fapa Khualthangghina chu rorél tham a la nih loh avangin (Lalthangvunga pheih chu a nuin a la pai) a nupui Lahnuni Sailo chu a fate rorél theih hmaa ro lo rél rih túra ruat a ni a. Lal Thankhata nupui Lahnuni hi Khawhai Lal Zataia fanu a ni a. Thankhara hian fapa pahnih, Khualthangnghina leh Lalthangvunga te a nei a ni. Thankhara thlân hi tun thlengin Khawdamah hian hmuh theihin a la awm.

Kum 192 khân lalnu Lahnuni Sailo ho hian Kangbur kan (Tun hnua Hmunhlui tia lam thin) tihah hian an kai leh ta a ni. He hmunah hian kum 14 chhüing an awm. Hetih hun lai hi chuan an changkang tawh hle a, an thingpui huan siamte chu vawiin thlengin hmuh tur ala awm. Tin, Kristian pawh thahnem tak an awm tawh a, Kristian-ho hi veng hrang Pathian vengah an awm khâwm a, Biak in pawh an nei tawh a ni. Pu Khualthangnghina pawh kum 14 a lo tling a, sawrkarin Zuchhip lal atân a ruat ta a, a nu puihnain ro a rél ve ta a ni.

Kum 1936 khân Tumtuiah hian an kai a, Turntui tih a ni a. Hun lo kal zélâh Tumtui tih chu paihin Zuchhip khua tia koh a lo ni ta a ni. He hmunah hian rambuai avanga kum

1969 a Khawzawla khâwm luh an nih thleng khân an awm a ni. Lalnu Lalhnuni Sailo chu kum 62 mi niin February ni 5, 1941 khân a thi a, Lalhangvunga pawh hun engemaw chen chu Hmunchengah a zu lal ve nghe nghe a ni. Pu Khualthangnghina hian October ni 20, 1954 thleng khân Zuchhipah hian ro a rél. Kan lalpa Khualthangnghina hian rei tak min dam pui a. January ni 28, 2003 khan kum 85 mi niin min boralsan ta chauh a ni.

Village Council: Mizoramah politics inlumlet nasa tak a lo thleng a, Lal ban an ni a. Rorélna pawh mipui kutah a awm ta a. Zuchhip khuaah pawh Political Party pahni Mizo Union leh Zalen Party te a lo ding ve a, kum 1954-a tualchhung roréltu tür Village Council (VIC) inthlan hmasa ber a lo awm khan Zuchhip khuaah pawh Mizo Union Party mite vek thlan chhuah an ni. Rambuai avangin Village Council hi inthlan that theih tåk loh avangin Village Council term ding lai chu pawh sei a ni. Amaherawhchu, Pu Hausiama VCP chu a pem tåk avangin Pu Darletan VCP mawhphurhna a chelh chho a. He mawhphurhna hi Khawzawla khâwm luh kan nih thleng khân a chelh a; Khawzawlah pawh hian Khawzawl Village Council President hmasa ber a ni zui ta zél a ni.

Zuchhipah Motor a lut: Lal ban hnuah pawh Zuchhip khua hian khawtlang hruaitu tha tak tak a nei zui zél a. Khawchhak lamah hian Aizawl leh Champhai inkâr Jeep road bâk chu khaw dangah Motor luhna a la awm mumal loh lai khân District Council sawrkar atanga tanpuina Rs 5000 an hmuh hmangin Chalttheikawn atanga Zuchhip thleng 4.8 km-a thui chu Jeep road lai thlang a ni a. Kum 1964 khân khatih laia Bawrsap (DC) Pu Saigal-a khân ropui takin a hawng a ni.

Sakhuana lam: Zuchhip khuaah hian engtiklai chiahin nge Kristianna hi a lo luh tih hriat theih ni tawh lo mah se, Zuchhip tlangval German ral rûna Feren ram kal rawn hawngte rawn put luh kha a ni mai âwm e. France ram atang hian ringtu niin an lo hawng a, an Bakkilh, Hairpin leh Nawhalh rawn hawnte pawh ring tharte hnénah an sem thin a ni. Pi Hauzingi (kum 91) sawi dinin 'apa Pu Laia te, Pu Hautawna te, Pu Pachhuna te, Pu Kawlsavunga te, Pu Rawihsanga (Pamawia) te, leh Pu Hrangdinga te kha a bul tumtute an ni,' a ti a. Kan pi pute Kangbung kawna an awm lai hi mumal takin Kohhran hi chu a ding tawh ngei tih hriat a ni. He hmuna an awm lai pawh hian ringtute chu veng hranah 'Pathian veng' an tihah a hrangin an awm tawh a. Biak in pawh an nei tawh a ni. Pu Pachhuna (Pu Lalbawiha pa) kha Kohhran upa hmasa ber a ni a. Pu Pachhuna thlânlung ziaik (A tupa Pahlira'n Aizawlah a kawl tha) atanga a lan dânin kum 1929-ah Kohhran Upaa thlan a ni. Kum 3 chhûng upa hna a thawh hnuin Zuchhip Kohhran Upa min ber Pu Pachhuna chu kum 80 mi niin September ni 13, 1959 khân a thi a, Zuchhip Biak in tualah phûm a ni.

Tlawmngai pawl dinhmun: Zuchhip khuaah hian tlawmngai pawl hrang hrang, YMA, Thanglai pawl, Games & Sport, Boys Scout leh Signal pawl (Signalling Corps) te ä ding ve a. Tun tumah hi chuan a huhâng nei zual chauh han tarlang ila :

Thanglai pawl: Kum 1946-1947 chho vel khan Pu Hauliana te khan Zuchhipah hian 'Thanglai pawl' an din a. He pawlah hian Zuchhip nula leh tlangval zawng zawngte kha member an ni vek ti ila kan sawi sual awm lo ve. He pawl hian tanpui ngaite tanpuina kawngah te, khawtlang nun siam thatna kawngahte hna a thawk nasa hle thin a ni. Thanglai pawl member-te hi hnathawka an feh chhuaha mi 5-te an feh khawm chuan mi

pakhat chawfun chu ei lovin khawchhünga mi harsa, chhumchhiate an pe thin. Mi harsa leh damlo tanpui ngaite tân an feh hawn pahin thing an phurh hawnsak bawk thin a ni.

Khawtlang hmasawna tür kawngah pawh nasa takin hna an thawk thin a. Thalaiten nun kawng dik an zawh theih nana kaihhruai leh zirtir kha an hmalâkna lian ber pakhat a ni. Tünlai hun anga puipun ni khuaa thingpui inna no-te hi a la awm ve hma pawh khân Thanglai pawlte hian Raw-no (Raw tan bun) chu vantlang hman turin an lo siam tawh a ni. Khawtlang nun pawh nasa takin an chawikâng a, kum 1954 thleng vel khan nung takin a kal a. Pu Hauliana te, Pu Kâiangliana te kha hruaitu chanchang berte an ni.

Games & Sports lam: Kum 1946 vél atang daih tawh khân Zuchhip thalaite hian kawn zawla Hockey khelh an uar tan a. Hmanraw tha la awm hek lo, Hockey stick (Khelkawm) atân khawmhma bul kawi leh Raw bulkawite lain an suih ve mai a, khelhlâm atân raw bul mum rep ro an hmang mai thin. Tichuan, Football lam an uar chho leh a. Football pet tur la nei hek lo le, pawnche thui mûm (Pawnche ball) leh hngah tah mûmte an pét thin a.

Zuchhip tlangvalten football an siam dan hi a ngaihnam hle. Football tha leh tlo zawk neih duhna an nei a. Hngah mûmah hian thelrét tât ila, Football atân a tha ang tih an ngaihtuah ta a. Tichuan, Zuchhip ram Ngendal kawr kama thelrét chu hnatlangin an zu hnai a. An thelrét hnai chu hngah mûmah chuan an tat chhuak vek a, malpui tia lai a ni an ti. An football siam chu a ritin a tîng duh hle a, ball tha nei taah an inngai a, an hlimpui hle a ni âwm e. Amaherawhchu, an thelrét ball siam chu a rit lutuk a, pêr rual a ni ta lo a ni. Hun a lo kal zêl a, khelmual tha duhna a lian zêl a. Kum 1956-'60 chhovah khân vânnethlâk takin District Council atangin RS 500 an hmu hlauh mai a. He sum hmang hian Zuchhip dil hnar kawr ruam chu field atân an siam ta a ni.

Football competition hmasa ber chu: Khelmual an nei ta bawk a, an phûr hle a, Cup chhuah zai an rel ta a. Vânnethlâk takin Pu Thachhunga'n a Istiri lianpui, sa rei thei meuh lo chu Game hruaitute a pe a. Hemi hmang hian Zuchhip khuaa competition hmasa ber chu an buatsaih ta a ni. Khaw thenawm atangin Chawngtlai leh Arro khuate an rawn chhuak a, Chawngtlai khuah hi pakhatna an ni a, an lâwmman lâk Istiri chu Khiangkawi ipte beng peh phungin an ak haw a ni an ti. Pu Hmingthanga, Pu Manthianga leh Pu Rengchhuana te thianho hian Jocker Party an din a, RS 20 theuh an thawkhawm hmangin Belpui khap kua RS 45 in an lei a. Belpui chu competition lâwmman atân Game hruaitute hnênah an pe ta a. He competition-ah hian Biate, Lungdar, Chalrang, Khawhai, Zaingen, Arro leh Vankal khuate an rawn tel. Zuchhip pawh 'Khawivanrial Team' invuahn an chhuak bawk. He mi tum hian Zuchhip an champion a, an lâwmman lâk Jocker Belpui hi tûn thlengin kawl that a la ni.

Tualte khuaa football competition hmingthang takah khân Zuchhip hi tum 2 ngawt an champion a. Kum 1963-a Kawlkulha ' Khuangpuichhinga Memorial-a Shield an zu lak tum phei chuan Pu Hausiama, VCP khân Lawichalin a lawm sak hial a ni. Rambuai avanga Khawzawla khâwm luh kan nih hnu zelah pawh Zuchhip hi football-ah na nâ nâ chuan Khawzawl leh a chhehvêlah hun rei tak chhüng chu kan vawk lal lén ve hial. Lâwmman thahnem tak kan la a, Zuchhip chu football thiam khuah tia hriat zui kan ni ta zel a ni.

YMA: Mizorama YMA a din atanga kum lo pawh a tlin hma, kum 1944 kum tir lamah Zuchhip khuua YMA a lo ding hman tlat hi a mak hle. Hei hian kan hruaitu hmasate khawhawi lo zauzia leh an hma thlir thui zia kha a hmuh theih a, an chhuanawm takzet a ni. Kum 1954 hma lam kha chuan Zuchhipah hian Thanglai pawl chak tak a awm avang khân YMA hi chak takin a kal bik mai lo va, zawi zawia hma sawn zélin vawinah chuan kum 75 hmél kan lo hmu thei ta hi a ropui ngawt mai. Kum 75 chhünga Zuchhip khawtlang tâna YMA hnathawh ropui tak takte hi sawi sên pawh a ni tawh lo hial ang. (Hmun dangah YMA chanchin kimchang zawk tarlan tho a nih avangin kan sawi thui lo mai ang)

Zirna lam: Kan pi leh pute Kangbur kawn (Hmunhlui)-a an awm lai hian Kristian-ho in sikul hi an lo din tawh a ni âwm e. Ringtu hmasate khân Pu Thanghrima ruaiin rei vak lo chu Zirna bul hi an lo tan tawh a ni. Tumtui hmun(Zuchhip)-a an kai chhoh hnuah Pu Pamuma hovin Primary School an din leh a, kum hnih khat chauh an kal hman tihin Pu Pamuma chu hmun danga sawn a ni leh ta a, Hemi hnu hian khawtlangin Pu Thachhunga rualin a naute Khuangthiauva leh Thangvukaten puiin Zirna chu an chhonzawm ve khaihlak a awm zauh zauh âwm e. Zuchhipah hian mumal taka zirna an kalpui tâkna chu kum 1948-a Pu Remsiam a ziltirtua a awm atang hian a ni a. Pu Remsiam a hi British Air force sipai hlui niin Sap tawng pawh thiam tak a ni a. Mahni hnaa inpe zo tak leh mite ngainat rawn a ni a. Zuchhip Primary School pawhin nasa takin hma a sawn phah a. Pu Remsiam a ho hian hun rei tak an awm hnuah, kum 1960 atangin Pu V. Lalsanga chu zirtirtu atan lak a ni ve leh a. Pu Remsiam a chu 'Hotupa hlui' tih a ni a, Pu V. Lalsanga hi 'Hotupa thar' tih a ni. (Zuchhip sikul chanchin hi midang an rawn ziah tho avangin kan zia k thui lo ang). Middle School hi a hming chuan an din ve a, kum 1966 khân din a ni a. Headmaster atân Pu Lalsangzuala, Aizawl chu lâk a ni a. Zirtirtu atân Pu Thanhliira, Pu Patlaia leh Pu Hmingthanga te hman an ni. Amaherawhchu, rei loah rambuain a nang zui a, sikul pawh tihtâwp a ni zui leh ta a ni.

Rambuai leh khaw khawm: Kum 1966-a ram a lo buai khân Mizoram khaw dangte ang bawkin Zuchhip khuah hian a tuar ve hle a. Khawtlang hruaitute ngat pheih kha chu tuboh leh dolung inkârah awmin, thih leh dam kârah léng hi an ni ngawt mai. Rambuai lai khân Zuchhip Biak in pawh inkhawm theih lovin India sipaite khân an luah lui ngat a ni. Zuchhip khuah atang hian thalai thahnem tak chu ram leh hnam tân an rammu ve a. Zuchhip khuah atang hian Rambuai avâng khân hriat theih chinah heng mi sawmte hian nunna an chân :

- 1) Thanghlira s/o Thachhunga
- 2) Satinlala (Patlaia) s/o Vanhnuailinga
- 3) Lampianga h/o Thangchhungi
- 4) Lalsiam a s/o Zokaia
- 5) Lalnghaka s/o Thanzama
- 6) Taivela s/o Ngunduma
- 7) Vanlawma s/o Darleta
- 8) Rengchhuana h/o Engliani
- 9) Hranghnuna h/o Chalhuni
- 10) Thantluanga h/o Rotluangi

Zuchhip khuah hian vânnihna tak a nei a, Pathian vénhimna leh kan khawtlang hruaitute fel vâng pawh a ni ang e. Khaw tam tak hâl an nih lai pawh khân Zuchhip khuah hi hâl a ni ve lo va, India sipaite hian an ngenna angin kum 1968 Krismas leh Kumthar hman

pawh an phalsak thlap a ni. Tichuan, January ni 4, 1969 atang chuan Zuchhip khua chu Khawzawlah hian khawm luh kan ni ta a. Tichuan, kan pi leh pu, kan nu leh paten lenlai an lo chenna, kan ngaih Zuchhip khaw mei chu a mit ta ruai ruai mai a ni.

Zuchhip Veng hi kum 1969-a Sipaiin Khawzawl khuaa an sawikhawm zinga mi a ni a. Kum 1969 kum thar chu Zuchhip khua chuan hlim takin an lawm a. Khawzawlah an chhohsan tawh dawn tih an hriatin am takin Krismas 1968 leh 1969 kum thar uhu an lawm a. Kum 1969 January thlaah chuan Khawzawla chho turin an inbuatsaih ta mup mup mai a ni. Khawzawla khawm khaw thenkhatte mittui nena an luh laiin Zuchhip khua erawh chu an lawm zawk emaw tih tur hialin aw rawl nen an haw haw chho mup mup mai a, Khawzawla lo lut tawh khaw dang ho chuan mak an ti hle a ni. Zuchhip khua hi (grouping) khawm zingah chuan Khawzawl lut hnuhnung ber an ni.

Khawzawlah hian tam an tuar nasa ve hle mai a. Mi engemaw zatin nunna an chan a ni. Hun a kal ve bek bek zel a, he veng hi football ngaina tak an ni a. Khawzawl khawm a, football tournament a awm atangin Khawzawl khuaa champiom ngun ber an ni hial a ni. Kum 1993-ah Khawzawl khawm atanga a kum 25-na an lawm tum pawh khan; a lawmna zinga pakhat football-ah chuan mipa leh hmeichhe football team Zuchhip FC-te an champion ve ve a ni. Khaw hrang hrangahte kalin an champion fo mai. Chawngtlaiah te, Biateah te, Rabungah te, Champhaiah te, Kawlkulhah te, Aizawlah te pawh an champion tawh a ni. Khawzawl khaw chhungah phei chuan Champion no mawi la hnem ber an ni awm e. Zuchhip Veng hi khawm zinga lut hnuhnung ber an ni bawka. A veng hmawr berah an awm a; hei vang hian hun a lo kal zel a, khua a lo lian ta deuh deuh a, A lo thang ve zel a. Zuchhip atang hian tuna vengthar kan tih hi YMA chuan an zuk enkawl a. Kum 1974 ah chuan Zuchhip Veng atangin Khawzawl Vengthar Branch YMA chu a lo indang ve ta a ni.

Khawzawl Vengthar ang bawkin Champhaikawngpui bawhin tuna Kawnzar Veng hi Khawzawl Vengchhak lam atangin an tlathla a. Chung hun lai chuan 'Tampeng' tih ten an sawi thin a ni. Kum 1978 ah Zuchhip veng atangin Kawnzar Veng pawh chu an lo indang ve leh ta bawka ni. Tuna Khawzawl Dinthar Veng lo ni ta pawh hi Sasaw thelh veng tih a ni thin a. Sipaite kha puan in kaihin an awm thin a. Pioneer-te pawh an awm ve bawka. Rambuai a lo ziaawm chho va, Sipaiho an han awm loh tak hnuah chuan mi thenkhat chu an awm phei ta hlawm a. Chhiat that leh khawtlang thil, YMA thilahte a veng hmawr ber ni ta chuan an va enkawl a. Hun alo kal zel a, mi an lo pun ve zel takah chuan veng chhunga awmte chuan in dan chu an lo duh ve ta a. Kum 1980-ah chuan Zuchhip Branch YMA-in an la ui vawng vawng na chungin, loh theih lohin an in dang ve leh ta a ni.

ZUCHHIP VENG MUP DIN CHHOH DAN TLANGPUI: Zuchhip veng a MUP lo din chho h dan chu, ni 28 March, 1985 khaw zanriah ei khamah Pu Khualthangnghina inah din tan a ni a, chutah chuan hruiatu atan heng mite thlan an ni:-

President	: Pu Khualthangnghina
Vice President	: Pu Darleta
Secretary	: Pu Thachhunga
Asst. Secretary	: Pu Biakthuama
Treasurer	: Pu Thanzama
Fin. Secretary	: Pu Hrangruma

Committee atân mi panga an ruat baw k a, chungte chu:-

Pu Ngunduma
Pu Thangseia
Pu Biakluanga
Pu Thangkawia
Pu Lalbuaia

te an ni. Heng mite hi Zuchhip MUP lo din hmasatu te an ni. Kum hnih chung heng mite hian MUP kaihhrui hna an thawk a ni. Ni 25 June, 1989 khan heng mite thlan leh an ni :-

President	: Pu I-Iranguma
Vice President	: Pu Thachhunga
Secretary	: Pu Darleta
Asst. Secretary	: Pu Lalbuaia
Treasurer	: Pu Biakthuama
Financial Secretary	: Pu Thangseia

Committee member pali an inruat a, heng mite hian Zuchhip MUP kaihhrui hna an lo thawk a ni. Kum 1991 khan hruaitu thlanna neih leh a ni a, hetiangin:

President	: Pu Darleta
Vice President	: Pu Hranyuma
Treasurer	: Pu Biakthuama

Hetah hian OB dang chu ruat an ni tawh a ni. President atâna thlan Pu Darleta hian kum 2003 thlang khân hruai hna hi a lo thawk a, hemi kuma an inthlan leh hian President Pu Darleta thlan tlin leh niin, Vice President-ah Pu Tlangsela a ni a, Treasurer-ah Pu Biakthuama thlan tlin a ni leh baw k a ni. Héng mi thlan chhuahte hian Secretary hrang hrangte ruatin kum 2 chhüing thahnemngai takin upa pawl hruai hna an thawk a, hun engemaw chen an hruai hnuah ni 15 January 2007 khân inthlanna neih leh a ni a, President ah Pu Darleta thlan leh niin, Vice President-ah Pu Khawlliana a ni a, Treasurer-ah Pu Khuanghnuna thlan a ni baw k a, Secretary-ah Pu B. Zaliana ruat a ni a. January 31, 2010 khân inthlanna neih leh a ni a, Vice President-ah Pu B. Zaliana thlan niin, Treasurer-ah Pu Thangseia thlan a ni. Hemi kum atan hian Secretary-ah Pu K Zaliana ruat a ni a, Assistant Secretary-ah Pu H. Thanpara a ni a, Financial Secretary-ah Pu K Sangliana a ni.

Kum 2013-2015 chung atan, ni 26 January 2013 khân inthlanna neih leh a ni a, President atân Pu B Zaliana, Vice President-ah Pu Kawlliana, Treasurer-ah Pu K Zaliana, Secretary atân Pu Fameihkulha, Asst. Sect-ah Pu Hmingdailova, Finance Secretary-ah Pu Tawnlima te thlan tlin an niin ruat chhuah an ni a. Héng kan hruaitute hian tûna kan 'Upa Rûn' sakna hi Pu Sakawla leh Pu Khuanghnuna-ten an inkar ram hi min pe a, chu chu OB ten en felin he lai hmunah hian nichhip 'MUP RUN' sak tan a lo ni ta. Hemi hun chhüing hian kan Upa Rûn sakna hmanrua tarte la khâwmin lung trip te lei a ni a. Rawra tur chhuin Upa Pawl ten thahnem ngai taka hnatlang neih thin a ni a, kum 2015-2016 khan hruaitu thlanna neih leh a ni a, hemi kumah hian Presidentah Pu B Zaliana, Vice President-ah PU R. Lalnilawma, Treasurer-ah Pu K. Zaliana, héng thlan chhuahte hian OB dangte ruat an ni a, Secretary atân, Pu Tawnliana, Asst Sect Finance Secretary-ah Pu Zamliana-te an ni.

Hun a lo kal zél a, kum 2017-2018 a lo inherchhuak leh a. Ni 16 January, 2017-2018 MUP Branch hruaitu thlanna Zuchhip Branch YMA Hall-ah neih a ni leh a, chutah chuan President atân Pu K. Zaliana thlan a ni a, Vice President ah Pu B. Zaliana, Treasurer atân Pu Rengkhuma te thlan niin heng thlan chhuahte hian OB dangte ruat an ni a, Secretary-ah Pu K Lalenga, Asst sect atan Pu Tawnliana, Finance atan Pu Rokhuma te ruat an ni a, Pu Tawnlian chatuan ram min pansan tâk avangin a aiah Pu R Chhuanawma ruat a ni a, committee member engemaw zât ruat an ni bawk. Hmalâkna lam chu kan hotu kal hmasaten Upa Rûn an lo sak chhunzawm a ni tlangpui a, MPLADS fund atangin kan Upa Run a chhuat slab te chhungin rawra te chhuin hnatlan thin a ni a, Slab chhun ni phei chuan Zuchhip Branch YMA ten min chhûnpui a kan lawm hle a ni.

Hun lo inher zélah keini Zuchhip MUP Branch pawh inthlan a lo hun leh a, kum 2019-2020 hruaitu tur thlan alo hun leh ta a. Ni 12 January 2019 (Saturday) 1:30 pm hian Zuchhip YMA hall ah inthlanna neih a ni a. Mizoram Upa Pawl Headquarters, Aizawl atangin OB zawng zawng thlanchhuah thin ni tawh se an tih angin inthlanna hi buatsaih niin Zuchhip veng VC ten kan inthlanna hi min buaipui a, heng mite hi kum 2019 - 2020 thleng a hruaitu atana thlanchhuah an ni :-

President	: Pu B Zaliana
Vice President	: Pu K Zaliana
Secretary	: Pu R Rengkhuma
Asst Secretary	: Pu K Lalenga
Treasurer	: Pu Khuanghnuna
Fin. Secretary	: Pu R Chhuanawma

te thlan tlin niin, committee member tur mi thahnemngai tak ruat an ni bawk a ni. Hmalâkna tlängpuiah chu kan member-te an boral chuan Rs 1000 in kan inrâl ve thin a, chhiat tawh niin upa pawlten thusawina hun leh ralna hunte kan hman thin a. Tin, ram leh khawtlangah a tul leh pawimawhah theih tawp chhuahin hma lâk a ni bawk thin. Tin, kan dinhmun mëkah pawh Upa RUN kan sak lai te chhunzawm zel niin, a ban leh a liang (beam) chhun zawh niin rawra trip 1 chhut zawh a ni bawk a, kan beam chhunnaah hian YMA ten min pui bawk a, an chungah lawmthu kan sawi mawlh mawlh bawk. Tin, rawra kan chhut hian mi thahnemngai ten pawisa leh thingpui inna tur min pe hlawm a, Zuchhip MUP te kan lâwm tak meuh meuh a ni.

Zuchhip MUP lo din tan dân leh hruaitute kan han tarlanah hian tih sual palh pawh tam tak a awm ang tih pawh a rinawm a. Minute Bu hlui kan hmuh theih ang ang atanga lâkkhawm a ni a, tihsual palhah ngaidam kan dil a, heng kan veng chhung MUP member leh hruaitu ten phur tak leh thahnemngai taka ram leh khawtlang an lo kaihhraina, an thawhrimna zawng zawng a zârah vawiin ni hi thlengin, keini Zuchhip Branch MUP te kan la ding ve hram hram hi Pathian hruaina lâwmawm tak kan chan a ni tih kan hriatin ropui kan va ti em!

Mizoram Upa Pawl Zuchhip Branch hi tun dinhmunah mipa hi member 45 kan ni a, hmeichhia hi 70 an ni bawk a, kan vaiin 115 kan ni. Hun leh kum te lo kal chho zelin kan hruaitu duhawm tak tak ten mual min liamsan zelin hruaitute pawh inthlak chho zelin, tunah hian hengte hi kum 2024 a Zuchhip veng a MUP Branch hruaitute an ni.

President	: R Rengkhuma
Vice President	: B Zaliana
Secretary	: Vanlaltluanga
Asst Secretary	: K Lalenga
Treasurer	: K Zaliana
Fin. Secretary	: R Lalnilawma

MHIP: Mizo Hmeichhe Insuihkhawm Pawl hi khuaah hian kum 1976 khân din tan a ni a, (minute hmuh theih chinah). Kum 1985 kumah khân Branch pahni Khawzawl North Branch leh South Branch-ah inthen a ni. North Branch hian Zuchhip veng, Zaingen veng, Darngawn veng leh Arro veng a huam a ni. Khawzawl North Branch hrulaitu turte hi April ni 21, 1985 khân Zaingen Branch YMA Hall-ah thlan a ni. Kum 1990 khân North Branch leh South Branch tih thin chu Vengchhak leh Vengthlang Branch tiin thlak a lo ni ta a ni. Tichuan, May ni 9, 1991-ah Khawzawl North Branch atangin Vengsang Branch a in dang a, Vengsang Branch-ah hian Arro veng leh Darngawn veng te an awm. Vengsang Branch a lo indan tåk hnu chuan Vengchhak Branch-ah hian Zaingen leh Zuchhip chu an la awm dün ta zél a ni. Hun lo kal zélah veng lian pahni Branch khat a awm khawm reng chu duh angin a chak thei lo va. Kum 2003 khân in dang zawk awm lovin Zaingen leh Zuchhip chu felfai takin Branch hran ni türin kan inthen ve leh ta a ni.

MHIP Motto chu 'Mite tanpui' a ni a. Kan Motto ang hian keini MHIP te hian damlo te, chhüngkaw harsa te, hnuchham te kan tanpui thin a. Tin, kan thawh theih tåk, tuikhur leh khawlai tifi tein kan hnatlang thin a ni. Kan Member boral an awmin an thlan nghah niah kan ral thin baw. Veng chhunga mitthi an awmin an ruang kan khuh a, kuang chungah pangpar kan khawi thin baw a ni. Tin, Veng chhung atanga ruang chhuak a awmin pangpar dahin kan thlah liam thin baw a ni. Keini Zuchhip Branch MHIP-te hian veng chhüng a lo thianghlim zawk a, ruihhlo leh ruk ruk te a lo rem theih nan kan theih ang tawkin hma kan la ve thin a. A tül ang zélin VC leh YMA-te bākah tlawmngai pawl dangte nén hma kan la ho thin a ni.

...oooOooo...

KHUALEN CHANCHIN

Zoramchhana Pautu

KHAW AWMNA HMUN: Khualen khua hi Khawzawl District headquarters atanga hmar lam Khawzawl to Sinzawl, Thanlon Road a awm niin, District headquarters atangin 23 km a hlaa awm a ni a, mihring 285 an cheng mek a ni. A awmna GPS co-ordinates chu $23^{\circ}37'59''N$ $93^{\circ}11'33''E$ a ni a, a awmna san zawng hi 3484 ft a ni. Khaw hmun hmasa hi a zoin a thengthaw nuam hle a. Khaw thlir pawh a nuam hle. Malaria a awm lo an ti hial thin. Tunah hian thala kal theihin motor kawng a lut ve tawh a. A awmna hmun GPS co-ordinates chu $23^{\circ}39'18''N$ $93^{\circ}11'14''E$ a ni thung.

KHAW DINTU LEH A CHAN CHIN: Khualen khua hi lal Kaihranga khua a ni a. Lal Kaihranga hi a pian leh murna lamah chuan Sailo a ni a. Lallula, lal hming thang tak thlah kal zel kha a ni a, Lallula'n Lalsavunga a hring a, Lalsavunga'n Vanhnuailiana a hring a, Vanhnuailiana'n Dothiauva a hring a, Dothiauva chuan Kaihranga a hring ve leh a ni. Kaihranga hian a rorel chhungin khaw thar 13 lai a sat a, chungte chu: Khawhreng (Hmuntha bul) Bungmun, Kawihthuang, Khualen (Hmundam), Khualen (Kanhmun), Thiak, Hnahlan, Murlen (Lungpuizawl), Sairuhkawn, Zaingen (Thlanpui hmun), Zaingen (Kanhmun), Khualen (Hripui veina) te hi an ni a, tun thlengin Hnahlan, Murlen leh Khualen kuate hi a la ding ta reng a ni. Khualen leh Zaingen hi khaw khat anga awmin Kaihranga a hian a awp kawp a, a hnuah Khualenah awm nghetin; Zaingenah a fapa Lalmakthanga a thu nghet ta a ni.

KHUALEN HMING PUT CHHAN: Tun hmain Khualen ah hian nula hmeltha deuh mai a awm a, a hmelthat zia chuan Zoram dung leh vang a fan chhuak a. Chu nula hmeltha hmuh chak chuan khaw thenawm atang te leh hmun hla tak tak atang tein a en turin an rawn kal huai huai thin a. A en apiangin hahipin a thatzia hlir an sawi zel mai si a, a la hmu ve lote pawhin hmuh ve ngei tumin khual hla leh hnai pawh an kal tak huai huai avang chuan "KHUALEN" tih hming a lo pu ta a ni.

KHAW LUAH LEH KRISTIANNA: Kum 1912-ah Zaingen Likkawn atangin Khualen Hripui veina hmunah kai a ni. Hetih hun lai hian Zoramah Kristianna in bu a khuar nasa tawh hle a. Khualen a an kai kum 2-na 1915-ah pawh Kristian an thahnem hle tawh a, an Lal Kaihranga remtihna in kum 1915-ah hian Kristian Biak In a ding a. Mizorama Biak In ding hmasa ber pawl a ni. Lal Kaihranga fanu Sairengpuii hi Kristiana inpe hmasa a nih avangin Lal hian Kristianna hi a do ve ta lo va, Pathian thu awih hmasate pawhin nuam an ti hle a ni. Lalberin a do lem loh avangin a fate, Saiziki, Saithuama, Saichhungi te pawh Kristian hmasaah an inpe a, an rual hian Piangthuama, Saitlaia, Dobanga, Hrangthuama leh Hrangthawma te pawh kristianah an inpe ve leh a ni. Kum 1915-ah hmarchhak Presbytery in Kohhran puitlingah a dah a. Sunday Sikul te an nei a, A-AW-B te an zir a, Pathian thute an inzirtir thin a ni. He hmuna an awm lai hian HRIPUI rapthlak tak a leng a, naupang rual khat chu an mang deuh thak a ni awm e.

Kum 1920-ah hian Khualen hripui lenna atang hian Thiak khaw hnuaiah kai leh a ni a, kum thum vel an awm hnuah Thiak khaw chungah an kai chho leh a ni. Kum 1932-ah Khualen Hmundamah an kai leh a, Kum 6 chhung an awm a. Kum 1937 kum hian Khualen

ram, Ramkhek an nei a, buh leh bal a tha hle a ni ang; buh thar an han seng chu a lo hlawk em em mai a. A khaw pumin buh an hausa em em a, buh kawt 6 (tin 8) hi Re 1/- in an hralh thei hial a ni. Kum 1938-ah Zaingenah an kai leh ta a ni. Zaingen atangin kum 1943-ah Khualen kai chhoh leh a ni a, hemi tuma Khualena kai hi in 36 niin an sawi. Kum 1946 January 14-ah Kaihranga hi kum 82 mi niin Khualen ah a thi a, Zaingen Thlanpui (An chhungkaw ro) ah phum turin Khualen atangin zawn a ni a. A fate khaw 3 leh thenawm Aiduzawla a farnute khua nen khaw 5 mipuiin an zui a, kawng tluanin Darkhuang leh Siallam Dar an vua in an tum a. Zaingenah hian ropui taka vui liamin, Kaihranga an phumna Thlanpui hi hawn leh theih tawh loh turin an chhilh hlen ta a ni.

Lal Kaihranga chu a boral tak avangin Khualen khua chu a nupui Darpuiin a awp a, a fapa Laltuman a tawiawm bawk a. Lal ban a nih kum 1954 thleng hian anni hian Khualenah ro an rel ta a ni.

SAI KAH THU: Kum 1922 Thiak khaw hnuai an awm lai hian Khualen ram te, Zawlnghak ram te, Aiduzawl ramah te Sai pachal lian tak, ngho pawh sei tak mai ram tla an hmu a, tichuan Aizawl Bawrsap hnenah Sai kah phalna lain Arro pasaltha Thangchhuma chahin tuna Khualen ram, Saikahmual hmunah hian pasalthaten an kaphlum ta a ni. He an sai kah ngho hi 7 feet zeta sei a ni.

FRANCE RAM KAL: Kum 1917 khan France ram kal tur lak a nih khan Khualen atangin heng mite hi an kal ve a ni : 1. Phirbawra, 2. Dokunga, 3. Surawia, 4. Kaiphunga, 5. Kapdaia, 6. Thlahleia, 7. Thatbuta, 8. Khumkuala, 9. Liana, 10. Rotlaia, 11. Mangkhaia leh 12. Buktaia. Heng tlangval 12 lai mai German run tura kalte hi kum 1918 – 1919 ah an rawn haw leh a, lal Kaihrangan Sialin a lo lawm a, a theih anga ropuiin a lo chawimawi nghe nghe a ni.

MIZO SIGNALLING CORP (MSC) DIN: Kum 1943 atangin Khualenah hian Mizo Signalling Corp (MSC) din a ni a, nula leh tlangval a huap kim tha hle. Pawl chak tak leh lungual tak niin khawtlang tan hna tam tak an thawk a; mi harsa an tanpui a, khawtlang pawhin an thlamuanpui hle. An pawl din chhan ber “Eng hmanga inbiak pawh” chu a hlawhtling hle a. Kum 1944 June thlaah zir tanin, zualko kal hah ngai lova lam hla tak pawh inbiak pawh theihna a nih avangin an phur hle a ni.

Hetih lai hian Khualen pa thenkhat chuan eng hmang maia inbiak chu an ring meuh lo va, “In inbiak theih chuan ka kut zungchal ka tan ang,” ti te pawh an awm hial a ni awm e. Tlangvalte chuan phur takin an zir zel a, a bul an tan atanga thla thum lek, September 9, 1944-ah chuan Zaingen leh Khualen chu eng hmangin an inbe thei ta a ni.

SIALLAM DAR: Kaihranga hian apa Dothiauva hnen atangin Siallam Dar a rochun a, he Siallam Dar ang hi Mizoramah a dang a awm tawh loh avangin an rohlu tak a ni. (*Lalsavunga atanga an inrochun Siallam Dar chu Kaihranga fa tlum ber Lalrengpuia, Chanmari West, Aizawl in tunah a kaw!*) He Siallam Dar an neih tan hun hi 1800 AD vela Zadeng Lal, Lalchungnunga’n Lalsavunga hnen atanga a fapa Ngura tlan nana a pek a ni.

LAL BAN LEH VILLAGE COUNCIL DIN: Kum 1954 Lal ban a nih hnuah Village Council thlan nghal a ni a, Khualen VC term hmasa ber chelhtute chu heng mite hi an ni:

Term khatna :-

President	: Pu B Rozama
Vice President	: Pu Liandawla
Secretary	: Pu Biakmawia
Member	: Pu Thangbawia

Zoram buai hmain Villlage Council hi term 4 (1954 – 1968) tluang takin a kal hman a ni.

RAM BUAI LEH KHAW KHAWM: Kum 1968 Zoram buaia hruai khawm a nih khan Kawlkulh a kal turin order an pe a. Kawlkulh chu a hlat deuh avangin Aiduzawlah pawh a theih mai lawm ni tiin hetih laia VC ten sawrkar an dawr a, sawrkar lam pawhin rem an ti a. Mahse, Aiduzawl VC lamin rem an lo tih loh avangin kum 1968 December thlaah Kawlkulhah khawm an ni ta a ni. Kawlkulhah hian kum 1968-1972 chung an awm a, rambuai a lo ziaawm deuh ta a, Sawrkar in mahni khaw lama kir leh phalna a chhuah tak avangin 1973 kumah Khualen hmunah kir chhoh leh a ni ta a ni. Ram buai avanga in luah lai hal leh rapthlak taka mihring sawisak tawh Khualenah an awm lo.

BAWK COMMITTEE: Kum 1973-1982 chung chu bawh Chairman kaihhruaina hnuaiah Bawh Committee ten khawtlang an kaihrui a, heng mite hi 1973-'82 chhunga Bawh Committee Chairman hna lo chelh tawhte an ni.

Pu Laltluanga	1973
Pu Liandawla	1974 – 1976
Pu Zachhunga	1977 – 1979
Pu K. Thanchungnunga	1980 – 1981
Pu R. Lalhawia	1982

Kum 1983 February 24-ah sawrkarin VC thlanna a buatsaih leh a. Heta tang hian Village Council pawh buaina awm lovin neih chhoh char char a ni ta a ni.

YMA: Mizo Signalling Corp hian khawtlang nula leh tlangvalte kaihhruai hna leh tlawmngaihna thil pawh a khawih tel vek avangin YMA hi a ding mai lo va. Kum 1962-ah MSC tih chu YMA hminga thlakin din a ni ta chauh a ni. Hruaitu pawh thlang thar lovin MSC hruaitu te rin nghal an ni.

MHIP: Khualen Branch MHIP hi ni 5 March 1978-ah din a ni a, din tirh atang hian Pathian hruaina zarah vawiin thlengin tluang takin a la kal chho ve char char a ni. Branch MHIP din a nih tirha hruaitute chu:

President	: Lalkungi
Vice President	: Lalremthangi
Secretary	: Biakkungi
Asst. Secretary	: Thankungi
Treasurer	: Lalzuithangi
Fin. Secretary	: Rokungi
Ex-Officio	: K. Thanchungnunga, R. Lalhawia, Lianchhinga

UPA PAWL: Mizoram Upa Pawl, Khualen Branch hi kum 2000 August 13 tlai lam dar 3:30-ah Pu R Biakmawia (L) kaihhruaina in Pu R. Ngurkunga Inah din a ni a, hemi hma hian hruaitu mumal vak lo in din a lo ni tawh awm e. Kum 2000 atang hian Mizoram Upa Pawl, Khualen Branch chu mei mit lovin vawiin thleng hian a la kal ve zel a, hruaitu hmasa te chu heng mite hi an ni: -

President	:	Pu P Lalrinthanga
Vice President	:	Pu R. Zakhara
Secretary	:	Pu C. Roliana
Treasurer	:	Pu R. Ngurkunga

ZIRNA: Kum 1948 velah Sikul neih tan a ni a, zirtirtu hmasate chu Pu Thanpara Tualpui; Pu Ch Lalsanga Khualen; Pu Lalenga Chhawrtui leh Pu Thangkunga Khualen te an ni a. Rambuaiin a nan zui tak avangin Kawlkulha khawm an nih angin Khualen Sikul pawh a kal ve zel a. Kum 1973 kuma Khualen a Bawh chhoh leh a nih hian Sikul hi din nghal a ni lo va. 1974 kumah khawtlangin sikul neih a tha an ti a. Tlawmngaia zirtirna hna thawk turin Tv Pc Nundanga chu sawm a ni a, ani ho hian Middle School leh Primary School chu private a neih a ni a, hemi kum hian Pu Laltluanga inah sikul kal a ni a, Pc Chuauliana chauh Middle zirlai awmin a bak zawng chu Primary School naupang vek an ni. Kum 1975 kumah Sikul building neih a ni a, a hnuaia mite hi zirtirtu indawt dan a ni.

- 1) Sawikunga (Sentea), Aiduzawl
- 2) Lalnuntawma, Khawzawl
- 3) Saitluanga, Vankal
- 4) Lalphalova, Aizawl Ramthar.

Kum 1979 atangin mumal takin Sikul pawh kal chhoh a ni a, hemi kum atang hian Pu C. Roliana s/o Lalkima Aiduzawl chu a rawn thawk a, 1980-ah Sawrkar atangin phalna hmuh a ni a. 1981-ah recognition hmuin mumal takin Primary School chu kalpui chhoh a ni ta a ni. Kum 1999-ah Private in Middle school din a ni a, Headmaster atan Tv Sapliana, Hliappui lak a ni a. Zirtirtu atan NI Roluahpuii, Aizawl leh Pi Lalmani, Khawzawl te lak an ni bawh a, rokhawlhna avangin hemi kum bak hi chu chhunzawm a ni ta lo a ni. Kum 2004-ah SSA Mission hmalakna hnuaiah EGS din a ni leh a, Pu BT Zorammuana leh Pi Vanlalhruii te nupa, Champhai atangin an rawn awm a. Kum 2006-ah Upper Primary School ah hlan kai a ni a. Vawiin thlengin mumal takin kalpui a ni ta a ni.

KOHRAN: Khualen ah hian Kohran 3 awmin, an din kum chu a hnuaia tarlan ang hi a ni.

Presbyterian Kohran	– Kum 1912
United Pentecostal Church; North East India	– Kum 1953
Mizoram UPC	– 7 th July, 1995

KHAW HMUN SAWN: Kum 1980 atangin Khawzawl to Sinzawl Road laih tan a ni a, he kawng hian Khualen ram (Mualkhang ram) a pal tlang a, a pal tlangna tir lam tlangdung zam nuam tak maiah chuan eizawna awlsam zawk beiseiin 1988 kumah insawn thlak a ni a. Insawn thlak lai hian in 17 chauh an insawn thla a, insawn ve duh lote chu Khawzawl,

Rabung, Kawlkulh leh Aizawlah te an pem darh a ni. Hun a lo kal zel a, indang tharte leh khaw dang atanga lo pem lute nen tunah hian in 60 lai Khualen ah hian a lo ding ve ta a ni.

ANGANWADI CENTRE: Anganwadi Centre pakhat awmin kum 1985-ah din a ni a, tunah hian Worker pakhat leh Helper pakhat in an enkawl mek a ni.

HEALTH CLINIC CENTRE: Kum 2009 ah din tan a ni a, thawktu awm mumal lova kum 13 a awm hnuah kum 2022 atangin Health Worker in a thutchilh ta a ni.

TUI DINHMUN: PHE Department & JJM hmalaknain Khangte kawr, Daikawn Kawr leh Zawngatui lak a ni a, Khualen khua hi Mizoramah chuan tui hnianghnar ber te zinga mi a ni awm e. Thalvaekcharah lo chuan nitin tui sem thin a ni. JJM hmalakna hnuaiah in tinah tui connection pek vek a ni tawh bawk a ni.

LAWMMAN DAWN: Khualen khua hian faina kawngah tan an la nasa hle a. Kum 2022 khan Khawzawl District chhunga thingtlang khaw fai lawmman 2-na lain; kum 2023 khan fai lawmman 1-na an la hial a. Kum 2024-ah Khawzawl District chhunga WATSAN Committee, tuihna humhalh thaah lawmman 1 na an la leh bawk.

...oooOooo...

LUNGTAN CHANCHIN

A TOBUL: Lungtan khaw din hun hi a kum felfai tak hriat a harsa hle a, a mi chengte atanga kum chhinchhiah theih hla ber chu PT Lamzama hi a nih hmel a. Pu PT Lamzama(L) hi Pu Veithanga(L) Bawlpu thin fapa niin kum 1861-ah Lungtan khuaah a lo piang a, Zawhzazo pa niin a hunlai chuan 'mitha kumhlun' tia hriat thin a ni. Kum 1934-ah a boral ta a ni. Hemi hmalam hi kum zat chhinchhiah felfai tak hriat a har tawh hle a. Kum zat felfai tak hriat theih leh chu Kum 1901-ah Lal Zataia hian Chalrang atangin Lungtan khua a thut a, Lal Zataia'n Lungtan khua a thut lai hian Lungtan khua hi In 206 an ni. Kum 1903-ah Primary School din a ni a, Zirtirtu hmasa ber hi Lalhut a ni. Zirtirtu hmasa ber Lalhuta hian a Zirlai mi 5 lai mai Kristianah a luh tir nghe nghe a ni. Kum 1908-ah Khawhaiah an kai chho leh a, Kum 1929-ah Pu Zataia fa hming koh Pu Lalhmingliana Sailo hoin Lungtan khua hi kai leh a ni a, hetih lai hian Lalhmingliana hi kum 19 chauh a nih avangin, Lal Zataia hian Pu Lalhmingliana hi lal a ni ang a, Pu Lianthuama Sailo (Tuna Pu Lalrinliana Sailo Ex- Minister & Speaker pu) in ro a rel ang tiin thu a thlah hial reng a ni. Lungtan khua an sah that leh pawh hian Lal Zataia hian a mi chhuan tak takte Lal Hmingliana hi a chhawmtir a, chungte chu, Pu Chalthanga Bawlpu (tuna Khawhai South a khawsa mek Pi Council-Thangi pu) Lal Upa Hrangkunga, Darzoa Sadawt, Patawia tlangau, te bakah a mi tha tak takte lal Hmingliana hian a chhawm a ni.

Khaw hming put chhan: Lungtan khaw hming put chhan hi chi hnihin an sawi thin a. Pakhat zawk chu Lungtan khua hi Hmar hnam peng pakhat, Lungtan hnamten an luah thin ni a sawi a awm a. A dang lehah chuan Lungtan ram chhungah hian Lungtan tlang, tlangchhipa lung intan sa sawm leh pakhat (11) inphahna hmun a awm a, hemi hming chawi hian Lungtan khaw hming hi sak a ni tia ring an awm bawk a ni.

Tun dinhmun: Tunah hian Lungtan khuaah hian In ding za sawmhnih leh paruk (126) a awm mek a, mihring 767 vel khawsa mek ni a hriat a ni. Zirna in hi Anganwadi Centre pahnih a awm a, Govt Primary School (1903 kuma din), Govt. Middle School (Kum 1982 a din) leh Sailothanga Memorial High School (Kum 2009 a din) te a awm mek a. Kohhran pathum Presbyterian, Roman Catholic leh United Pentecostal Church (Mizoram) te an awm bawk.

Hmun hmingthang: Lungtan khawdai khawthlang lamah hian Mizoram Upa Pawl (MUP) enkawl Sahlam a awm a. Tin, ram hmingthang leh chanchin ngah tak Intechhip ram a awm bawk, he ram chhungah hian pi leh pute sulhnu bakah hmun hmingthang leh nuam tak tak a awm nual a, tun hma huna huai chettlatna hrang hrang ni a ngaihte pawh he hmunah hian hmuh tur a la awm a ni.

...oooOooo...

NEIHDAWN CHANCHIN

Kum 1894-ah Nikuala Pasaltha Thanherha'n Neihdawn khua a rawn kai hian a tlang hming hian Neihdawn tih hi alo pu tawh sa a, Thanherha'n Neihdawn tlang a rawn luah hma khan luah hmasa tu an lo awm hmasa ngei tih a Chiang a ni. Neihdawn hming lo chhuah chhan hi Mizo thlang tla hmasa HMAR hnam zingah khan NEIHDAWN hnam Lal ropui tak Liana a awm a, a ni chuan tuna Neihdawn tlang hming hi a hunlai atanga lo piang ngei a ni tih a rin theih a, Neihdawn khaw lo chhuah chhan a ni. Kum 2024 (1894-2024) hian mei mit lovin kum 130 chu Neihdawn khua a lo ding ve a, khaw upa pawl tak a lo ni reng mai a ni.

SAKHUANA: Neihdawn Awmpuiah hian kum 1912 —ah Pu Sina (Thangdailova) ho in Kohhran hi din a ni a, Biak In hmasa ber chu naupang kham chung zawl (tuna Thlanmual mawng sir) ah hian sak a ni a, a hnuah Pu H. Thankhuma leh Pu Lalngaizuala in inkarah sak a ni leh in Primary School bulah sawn a ni leh a, chumi hnuah Pu Hauchianga in hmunah hian insawn phei lehin kum 1972-ah tuna a dinna hmunah hian sak leh a lo ni ta a ni. Kum 2012-ah khan Neihdawn Presbyterian Kohhran chuan kum 100-na (Centenary) tlin lawmna pawh neih a lo ni tawh a ni. Kohhran hi Neihdawn khuaah hian pa (4) li kan awm a, chungte chu -

Presbyterian Kohhran: Tunah hian member 600 vel bawr an awm a. Dan zawh kim hi 40 an awm mek a, Kohhran Upa 7 leh Tual Upa pa ten Kohhran hi an enkawl mek a ni.

Mizoram UPC: Kum 1991 September thlaah lo ding in member 100 vel neiin Kohhran Upa 4 leh Tual Upa 3 Tual Upa Senior pa 2 an nei a, Biak In hi Concrete building tha tak an nei.

Kohhran thianghlum: Kum 1989- ah din a ni a. Kohhran member 14 neiin Kohhran puipa pa 2 ten an enkawl mek a ni.

Roman Catholic: Kum 2007-ah din a ni a, a tirah chuan Kohhran member 16 lai neiin Biak In tha tak an din a, hun a lo kal zel a tunah hian In 1 an la awm a ni.

Neihdawn khua hi Pathian malsawmna dawng khua tak kan ni a, Ram buai lai khaw khawm hun lai pawh a Pathian humhimna dawng in khaw khawm loah a tang a, tun dinmun hi kan lo thleng ta a ni.

POLITICS: Kum 1952-ah Mizoramah Lal ban a lo ni a, khawtlang rorelna hran lo piang in kum 1954-1957-ah Village Council/Court hmasa ber chu kan lo nei ve ta a, Mizo Union Party lo ding in kum 17 chhung VC in ro an rel a ni. Kum 1972 hnu lamah Congress lo ding ve leh in kum 33 chhung VC in ro an rel ve leh a. Kum 1980-1981 hian Pu H. Lalchhuanawma CA in min awp a. Kum 1989-1990 hian Pu Hritluanga CA in min awp vele a. Kum 1982- 1984 ah hian PC Party lo ding in VC in ro a rel baw a ni. Tichuan, MNF lo ding in kum 14 chhung VC in ro a rel baw.

EI LEH BAR ZAWNNA KAWNG: Neihdawn khua hi pi leh pu hunlai atang tawh a tlangram lo nei a eizawng kan ni a, tun thleng hian tlangram lo neih hi kan la bansan thei lova. Buh hmun/Sawhthing hmun neih hi kan eizawna bulpui a ni a, Phai lo nei hi tun hma chuan Tuipui Luikam leh Tuimuk Luikamah Neihdawn khaw pa deuh vek in an nei a, a

hmunhmate a lo hlat deuh avang hian khaw dangah hralh a ni deuh vek tawh a, in li nga vel chauh Phai leilet nei kan awm tawh a ni. Tun kum 3 kum 4 vel atang khan Buh hmun neih bansanin a tam zawk chuan thlai chin kan uar ta a. Fur/thal/thlasik thlai hrang hrang chingin khaw thenawm Champhai leh Khawzawlah te kan bazar pui thin a, Serchhip lam atangte pawh hian kan Tomato thar te pawh minrawn dawr ta a ni.

Buh hmun hi in 20 atanga 30 velin kan la nei tlangpui a, Sawrkar hnathawk hi kan ngah lova, Government Primary School/Government Middle School/Health Department/Electricity leh a dangte atangin Sawrkar atanga hlawh nei 10 atanga 15 vel kan awm ve.

ZIRNA LAM: Govt. PS hi Neihdawn khuaah kum 1957 khan din a lo ni tawh a, kum 67 zet a upa alo ni ve ta. Tun dinhmunah hian zirlai naupang 35 neiin Zirtirtu 3 ten an enkawl mek a, School Building tha tak leh Kitchen Shed changtlung tak awm bawh kan nei a ni. Govt. MS Neihdawn Middle School hi kum 1973-ah din a ni a, hun rei tak Deficit Middle School in a awm a, kum 2003 khan Govt. ah hlankai a ni a, tunah hian zirlai 52 awmin Zirtirtu 4 in an enkawl mek a, School Building changtlung tak kan nei a ni. High School hi kum 2012-ah Private in din a ni a. Mipuiten Zirtirtu hlawh hi tum sak a ni a, Kum 2018 khan Lump sum Grand In Aid ah hlankai a ni a, Zirtirtu hlawh hi sawrkarin tlem azawng min han puih takah chuan Zirtirtu 4 kan chhawr thei a, an hlawh hi a then azar mipuiin kan tumsak bawh a ni. Tun dinhmunah hian Zirlai naupang 24 kan nei mek a, School Building hi kan la nei tha tawh lova, School bungrua Science Kit/ Computer/ Combo/T.T etc. hi 2023-ah sawrkar atangin dawn a ni. Science Room tur Assam Type hi kum 2023 July thla khan sak zawh a ni bawh. School Building sak lamah hmabak erawh kan ngah rih hle a ni.

Heng bakah hian Anganwadi Centre kan nei bawh a. Anganwadi Centre - I hi kum 1986-ah din a ni a, tun dinhmunah Centre-I ah hian naupang 40 vel an nei a, Worker 1 leh Helper 1 ten an enkawl a, Building tha tak an nei a ni. Anganwadi Centre-II hi 2011-ah din a ni a, naupang 45 vel neiin Worker 1 leh Helper 1 in an enkawl a, Building tha taka sak zawh tawh a ni bawh.

HRISELNA: Neihdawn khua hian Kum 1982 ah Health Sub Centre kan nei a, tunah hian Staff Quarters 3 leh thawk tu 3 kan nei mek a ni. Centre Quarters Building tha tak 2023 khan sak zawh a ni a, tunah hian Nurse pa 1, Health Worker 1 leh Chowkidar 1 ten an enkawl mek a ni. Neihdawn Health Sub Centre hi khawtlang mipuiten kan chhawr tangkai hle a, tlang hrileng leh damlohna lian tham lo neiten kan panin Sawrkar atanga Damdawi sanction awm angte ringin Nurse leh Health Worker ten tul leh pawimawh an tih angah an tih theih chin chin a hma lain, khawtlang mipui ten kan chhawr tangkai hle a, an tih theih bak erawh chu Hospital lamah an refer mai thin a ni.

Hriselna kawngah mipuiten thei tawpin hma kan la a, kan lo hrisel zawk nan inthiarna changkang commode Septic tank khur kan hman tlangpui a, thosi piang lo turin thosi pian theihna tui tling lo tura hma lak a ni a, Septic tank pawh a chhin kan siam tlangpui a. Daipawn a inthiar hi kan nei tawh lo a ni. Tin, WATSAN Committee hmalaknain khaw chung hnawm hi dumping ground-ah paih a ni a, tawih thei leh thei lote thliar hranna hmun pawh siam a ni. Khawchhung hmun lun lai hmun engemaw zatah hnawm paihna bawm dah a ni. Khawtlang hi hriselna leh faina kawngah hma kan sawn ve ta hle.

NGO HRANG HRANG:

Young Mizo Association (YMA): YMA hi Kum 1948-ah din tan a ni a, tunah hian kum 76 zet a upa a lo ni ve ta a ni. YMA Day hi kan khawtlang hian kan hlutin kan uar thei hle a, kan phur kum hi chuan khawtlang huap a ruai nena lawm kan ching hle a. Tin, kan Branch din champha hi lawm chang kan nei baw. YMA ina a thil tum tanpui ngaite tanpui leh tlawmngaihna hi kan kalpui tha rih hle a ni.

Mizo Hmeichhhe Insuihkhawm Pawl (MHIP): Kum 1971-ah Neihdawn khua Mahila Samiti din a ni a, kum 1974 atang hian Mahila Samiti tih chu MHIP tia thlak a ni. MHIP hian chhiat ni that niah khawtlang tan an phak tawkin hma la a, penchhuakin theihtawp an chhuah thin a, khawtlang an timawiin an tiphuisui hle a ni.

Mizoram Upa Pawl (MUP): Mizoram Upa Pawl hi Kum 1983 March ni 7 khan Neihdawn khuaah din tan a lo ni a, kum 41 zet MUP hi a lo ding ta. MUP hian faina an ngai pawimawh hle a, thlanmual thenfai hna leh khawchhung bawllhlawh thianfaiin hnattlang an nei reng a, khawtlang kan mawi phahin hriselna lamah leh thianghlamna/faina lamah an thawh hlawk hle a, khawtlang min timawitu pawl zahawm tak an ni.

NEIHDAWN HISTORY: Neihdawn khaw History hi a kimchang chuan ziah sen a ni lo va, a zualpui chauhrawn tarlan tum ila a tha ang e. A chanchin tobul tlangpui han zep ila, a kum zat chiah hriat theih tawh lohah Neihdawn khua hi alo awm reng tawh a, Kum 1894 hma lam daih tawh khan thlangtla hmasa HMAR hnam zingah khan NEIHDAWN hnam lal ropui LIANA a awm a, hemi hming chawi hian Neihdawn tlang a lo pu hlen ta a ni.

Lal Liana hun lai hian pipute sawi dan in tuna Neihdawn khaw bul Liana hmun tlang (Far huan) hmunen tlang/ mel-hmun tlang kan tihah hian Lal Lianan khua a din a, an sulhnu pawh tunah hian hmuh theihin a la awm a, an khawsak hun lai tak hi a kum hriat ni lo mah se, kum 1700-1800 inkar a nih rin a ni. Liana hmun tlang tuna Far huan tlangah hian an bel keh them vaibel/tuibur lu/no/khuhhriang leia siam hnuhma chi hrang hrang hmuh tur ala awm a, an lungphun hrang hrang leh lungrem hrang hrang ala awm nual baw. Lungphun la ding zingah hian a sang ber hi feet 11.3 a ni a, a sang ber a tlu bung tawh a, tuna a tlukna hmunah hian hmuh theihin ala awm thung a ni.

Lal Liana hun lai hian hmunhma sulhnu hrang hrang a nei a, a khaw hmun tlang chhip zawl zau tak a nei a, MI LU PUK hi hmun (2)hniha a awm a, an hun lai hian kham kuaah hian mithi ruangte hi an dahtha mai thin a, Mi lu pukah hian ruhro pawh a awm ngei a, kum 1982 khan School naupang Excursion neih a ni a, pipu sulhnu hrang hrang fanna neih niin mi lu puk chhunga ruhro pawh eng emaw zat lakchhuah a ni. Chung ruhro chu Middle School Science Room-ah dahthat a ni a, a bo riral dan hriat a ni ta lo a, pawh hle a ni. Mi lu puk hi uluk zawka dap leh ni se, Ruhro dang pawh hmuh tur ala awm mah na.

HMAR KAWNG: Hmar kawng hi Tuimuk leh Tuipui infinna atangin Hmun-entlang thlang an hunlai hian kawng lian tha taka laih a ni. Hmun thenkhatah chuan Hmar kawng riruang hi hmuh theihin ala awm a ni.

SEVEN PUK: Seven puk hi Lungding kham bul hmar thlang hawiin a awm a, kham puk niin Mihring thutna nuam tawk velin a puk hi a awm a, mi 5 atanga 10 vel leng a ni. Hmar thlang hawiah a tukverh awng volleyball leng velin a kua a ni. Lal Liana hunlai hian Sialte lo vulh thin niin hetilai hmun atang hian Sial hi an veng thin tih piputen an sawi thin a ni.

RO PHUM RUK: Hmar lal Liana hian ro phum ruk engemaw zat nei ngei a ngaih a ni a, Lungrem hrang hrang leh lungphun hrang hrang a tam si a, khawiah emaw ber hi chuan a ro hi an phum ruk kha la awm ngeia rin a ni.

NEIHDAWN KHAW DIN TAN DAN LEH TUN DINHMUN CHANCHIN TLANGPUI: Kumpinu sawrkar chuan khawchhak lam Chawngtlai khua Lal Nikuala man tur leh a khua hal turin sipai hmunpui Fort White Burma atangin Vailian a rawn tir a, Lal Nikuala khua Chawngtlai chu April 25 1892-ah an lo thleng a, Lal Nikuala an man a, a tukah a khua pawh an hal a, mipui tlandarh in khua chu luah ngam lovin an rauhsan zui ta a. Nikuala nupui leh fapa Dokhama hoin Hmawngmualah an kai a, chuta tangin Tualte ram lo ni ta Mualkhangah an inbawk leh a, Neihdawn ram pharh duai maia Chehzum ram, Hausak ram, Darkhuang ram, Bukzau ram, Melliam ram leh Khuaimual ram te zing ni chhuak leh tlai nitla in a a chhun cham duai chu an han thlir a, sa leh buh bal tamna hmun tur ngei a ngaiin an awt em em mai a, Thlahmunga chuan a fapa Thanherha hnenah chuan Mualkhang leh Artlang atang chuan ka khua atang hian i duh duh in 30 thlang chhuak la, Neihdawn ram saw vat rawh a ti ta a ni.

Kan sawi tak ang khan Nikuala hunlai pawh khan NEIHDAWN tlang hi alo awm daih tawh a nih chu! Mualkhang leh Artlang atang chuan Thanherha chuan in 30 hruaiin a kal ta a. Nikuala pasaltha Thanherha'n Neihdawn tlang a thut hun hi kum 1894-ah niin upate chuan an sawi.

Kumpinu Lal ram chuan Mizoram chu a awp nghet ta a, Khaw kar kawng rem lai apiangah Bangla a dah zel a, kum 1898 velah Neihdawn Bangla hi sak a ni a, kum 1907-1908-ah Bangla hi sak that leh niin Bangla hmun hi tuna Vai Veng kan tih tak Bangla hmun Lamkhuang awmna leh a chhak Thelret kung dinna bul tuna Pu K. Malsawma ram bawr vel hi a ni.

Thanherha hian 1894-1908 (kum 14) chhung Neihdawn tlang hi a awp a, 1908-ah Neihdawn atangin Tualpui ram Hmar Hmunah a insawn pheii ta a ni. Hetih chhung hian Bangla awmpui hote kha an la awm reng a, Thanherha fapa Domana chu Hmaiphiih kawnah indan tirin Neihdawn khua chu a awp tir a, hun a lo kal a. Thanherha chu a lo tarin a chak lo ta a, Domana chu ko haw lehin duh a thlan tir a. Thanherha hian fapa 2 Domana leh Khenchhuma a nei a, Domana hian Tualpui tlang a thlang a, a fapa naupang zawk Khenchhuma chu Ngaizawl Tuikhur bul tuna Playground a an hman takah sawn awm hmun a khuar a, Neihdawn leh Ngaizawl hi a awp ta a ni, hei hi kum 1935 kha a ni. Ngaizawl hmun atang chuan lo pheii zelin Lal Khenchhuma chuan Neihdawn Zopui kan tihah hian a inbengbel a, Lal ban 1952 thlengin a awm ta a ni. Lal ban 181ib aw kum 2-naah Champhaiah a pem leh ta a ni.

Neihdawnah hian Mizo hnam peng hrang 20 vel an khawsa mek a. Neihdawn khua hi ram nei tha pawl tak kan ni ve a, tunah hian Khawzawl District-ah awmin MLA inthlanah

chuan 23 Champhai North Assembly Constituency hnuaiah kan bet rih a. Kum 2020 VC inthlanah khan MNF Ticket-a dingte solid in VC kan nei a ni. Neihdawn ram hi khawchhak lamah Khawchhak tuipui lui km 5.5 a ni a, Chhim lamah Tuimuk lui km 4 a ni a, khawthlang lamah Tuimuk lui tho km 3 chin niin, hmar lamah Lungtlanghing lui km 2.5 leh Sedai kawn bul Thingthupui ngaw kawr km 2.5 chin Ngaizawl Lui sut in a ni.

Neihdawnah hian Community Hall pa 1, Zirna School Anganwadi Centre 1 & 2, Govt. PS, Govt MS, Private HS leh PES te a awm. Ni 100 In, VC House leh Health Sub Centre te awmin VO House sak mek a 182ib awk. Post Office 1 a awm a, Dak runner pakhat a awm. Kum 1956-ah Playground hmun din tan a ni a, tunah hian field puitling 11 player khelh theihna a ni. Kum 2013-ah PYYKA atangin Rs 1 lakh dawn a ni a, field laihna atan hman a ni. Volleyball Court hmun kan nei a. YMA Park zau tha tak kan nei a, hei bakah hian Zothai huan zau tha tak kan nei baw a ni.

Tui hi 1986-ah sawrkarin min laksak a, Damdai hnar leh Sersih hnar Gravity in kan la a, PHE Department hnuaia JJM hmalaknain kum 2023 khan Dampui lui hnar hi Solar Pump hmanga laksak kan ni tawh baw. Tuihna nei tuikhur hi khawchhungah pal dai bulah pakhat kan nei baw a, Gravity a kan lak leh solar pump a that chuan Tui hi thalah pawh kan ren thiam dan a zirin kan buai lutuk tawh lo turah kan ingai a ni. Electric hi kum 1986 atangin Sawrkarin min pe a, kum 1987-ah Director Pu Dengchhuana hoin khawtlangin a hawnna hun ruai nen kan hmang a ni. Jugali pakhatin min enkawl a, Current hi line a chhia a nih loh chuan kan eng tha thin hle a ni.

Tin, tun dinhmunah Neihdawn khuaah Di in a awm tawh lo a, Assam type in 130 vel leh Cement Concrete in 15 vel a ding a, mihring khawsa hi 700 bawr vel kan ni. Huan lo ram nghet neih kan intihhmuh tan a, thlai kumhlun chin kan uar tan ta baw a, tlang ram lo neih Buh hmun bik hi a nei an tlem sawt ta hle a, hei hi hmasawna ropui tak pakhat niin kan hria. Tunah hian thlasik thlai leh thal tlai chin kan uar tan a, sum chang thei apiang a hnah leh rah te chingin khaw dangah kan thawchhuak ve thei tawh a ni.

Khawchhung kawng peng hrang hrang hi LAD hna leh MGNREGA sum hmangin motor kal theihna chin ang chu PCC flooring a chhun vek a ni. Neihdawn to Khawzawl inkar kawng hi PMGSY Atanga laih niin PCC a chhun chhuah vek a ni. Khawzawl to Neihdawn hi 15.5 km lai a thui a ni. Neihdawn to Ngaizawl kawng 6 km hi Bialtu MLA hmasa Dr Zr. Thiamsanga'n kum 2023 September-November khan motor kal theihin min laihsak a, Neihdawn khua leh Ngaizawl kuate a chungah kan lawm hle a ni. Agriculture leh Horticulture link road hi Far huan Liana hmun tlangah laih a ni a, Lungding ram pawh Far huan atang hian a panna tur kawng laih a a ni tawh baw. Approach road hi Banglakawn to Tuipui, Playground panna, Damdai panna leh khaw zauhna kawng te hi a then a zar laih niin chhonzawm zel tura ruahman a ni.

Neihdawn khua hian Sangha dil neih kan uarin kan tuipui hle a, Sangha dil nei hi in 45 lai kan awm a. Amaherawhchu, Sanghaah kan la intodelh taw lo a, a note leh a chaw hi kan inlei chawp deuh vek zel a ni. Ranvulh kan uar tan a, Bawng vulh hi in 5 vel awmin Bawng 150 vel tunah a awm mek. Vawng vulh kan uar viau baw a, ASF(pul hri) in min luhchilh ve a, Ar pawh a pul hri in min luhchilh baw avangin Vawksa leh Arsaah kan la

intodelh tawk lo hle, tun aia uar zawka ranvulh hi awareness nei a, hmalak kan tum zel bawk a ni.

Neihdawn khua hi Thingtlang khua e ti loin Lirthei neih lamah hma kan sawn ve ta hle a, khual kalna leh khawi lo vahchhuahna fehna chenin lirthei kan lek lam hlwm a, hei hi changkanna tha tak pakhat a ni awm e. Television (TV) hi CCN Champhai cable line kan pawt thin a, tunah hian internet Wifi leh cable lakluh leh kan tum leh mek a ni. In tin deuhthaw in Gas Connection kan nei tawh a, Thing hmanga eirawngbawl min chhawk zangkhai phah hle a ni. Tin, supply ration Buhfai hi thla tinin retailer hnen atangin kan khul a, Card tlawm BPL leh Card to hmangtein kan la tlangpui. Kan ration quota hi thingtlang mi chawfuna chhuak thin kan nih vangin kan tla lo hle. National Highway-06 in kan ram mawng Tuimuk kamah 5 km vela thuiin a paltlang a, chhawr tangkai tumin khawtlang mipuiten theihtawpa hmalak kan tum a ni.

Neihdawn khua hi District Headquarters pahnih Champhai leh Khawzawl in min karcheh a, kan khawsak zia leh thil man rate pawh a sang tlangpui a, Thingtlangah chuan engkim rate (man) sanna khua tak kan ni awm e.

...oooOooo...

NEW CHALRANG CHANCHIN

Kum 1980 bawr lai khan Mizoram sawrkar Pu Thenphunga kaihhruai People Conference Party a awm a. Khawhai, Chalrang, Vangtlang, Lungtan khaw 4 hi Khawhai ram leh Chalrang ramah hian kan dah ang che u a, khawlian ve tak in ni ang a, sawrkar in in mamawh chu a hria a, kan tihsak zel ang che u an ti a. A tirah chuan kan duh tlang vek a, Lungtan leh Vangtlang in an duh leh lo a, keini Chalrang khua chu kan inhnûkdawk ta lova, Khawhai nen a kan ramriah in hmun number pawh a ni ta a, Khawhai nen number pawh a ni ta a. Keini Chalrang lam chuan in te chu kan sa ta a. Ni 29 January 1984-ah chuan in hnihin mei an khûk tan a, hemi kum vêk hian in 75 a ding hman tawh a ni.

Kan pung chho zel a. Kum 1997-ah chuan Village Council sawrkar in min pe ta a, kan khaw mamawh chu min pe ta zel a, Dâk in, Primary School, Middle School, Sub-Centre, Anganwadi leh NGO hrang hrang, Kohhran : Presbyterian Kohhran, UPC (North East), Isua Krista Kohhran (IKK) te a lo awm a. Tunah hian in 145 kan tling tawh a ni.

...oooOooo...

NGAIZAWL CHANCHIN

NGAIZAWL KHAW HMING PUT CHHAN: Ngaizawl khua din tirh lai hian tuna Ngaizawl khaw hmunah hian 'Ngai kung' (A rah chu la khuhi nan an hmang thin) hi a awm avangin Ngaikung awmna zawl 'Ngaizawl' tih a ni a, kan pi leh pute chuan Ngaizawl hmunah hian khua an lo din a, khaw hming atan a pu hlen ta a ni.

NGAIZAWL KHUA LO DIN TAN DAN: Kum 1890 chho vel lai khan Tuitawh khuaah hian Pu Paukhawvunga Sukte a lal a, kang hunlai khan khum khatah chhiah in tinah Rs 2 zel khawn a ni a. Tuitawh khua chhiahkhawntu chu Pu Zuanviala a ni. Tuitawh khua In 90 chhiah tling khawm Rs 180 turah Rs 70 chauh a theh lut thin a, chuvang chuan sawrkar a lungawi lova, Tuitawh khuaah chuan Sipai a tir ta a. Tuitawh khua an thlen chuan Pu Lutsona chu an leihkapuiah kawr sen hain a lo thu a, Sipaiten an han hmuh chuan chhiahkhawn pa Pu Zuanviala ngei a nih ringin Pu Lutsona in chu an thiahsak a, an hawsan leh mai a. Rei rial lovin Sipaiho chu an lo kal leh a, Pu Lutsona chuan a in a lo sak that hman avangin chhiahkhawntu pa ngei a nih an ring lehzuah a, a in chu an thiahsak leh ta a, Zawnga tuar ai Ngauvin a tuar a nih chu. Hetiang hlir hian Sipaiten a in hi vawi thum lai mai an thiahsak a, Pu Lutsona chuan hetiang reng reng a awm ai chuan tiin Phaiza khuaah a pem ta a ni.

Hun a lo kal zel a, kum 1925 khan sawrkarin Phatzang khaw kawng lai tur thupek a chhuah a, kawng hi hlawh nei lovin mahni inchawma riahchilh a thawh tur a ni a, thawk duh lo khua an awm chuan Rs 50 chawitir tur a ni. Tuitawh khua Lal leh Upate chuan kawng lai ai chuan inhlawh a Rs 50 pek kha an duh zawk avangin kawng lai hnatlang chu an thawk ta lo a ni. Chutia Tuitawh khua in kawng lai hnatlang an thawh loh avangin sawrkar thin a rim a, Rs 50 an chawitir bakah kawng lai hna chu an thawh luih tir ta tho va, chu mai bakah Tuitawh khua chu kum 3 chhung Hauchinkhupa Tonzang Lal an awptir ta a ni.

Chutianga Tuitawh khua chu mahni pawh in awp thei tawh lo. Khawdang Lal awpna hnuaia an awm tak avang chuan an inlungual thei ta lova, Hauchinkhupa awp duh lo pawl an lo awm a, Pu Vunghzadala leh a thuihhruaite chu Pu Hauchinkhupa awp duh loh lam an ni a, Pu Lianzadala leh a hote chuan sawrkar thu awihin Pu Hauchinkhupa awp chu an hnial ta lo a ni.

Pu Hauchinkhupa chuan Tuitawh khua chu Tonzang khua atang chuan a awp ta a, Tedim khua a an in sakna tur Leirawhchan thiar turin Tuitawh khuaah chuan tihluh hnatlang a kova, Pu Lianzadala leh a thuihhruaite In 20 chuan thupek awihin an thawk nghal a. Pu Vunghzadala thuihhruai in 70 chuan an thawk duh ta lo a ni. Chuvangin, Pu Hauchinkhupa chuan kum 1926 khan Pu Vunghzadala leh a thuihhruai in 70 te chu sawrkar thuneitute hnenah Rangoon ah a va hek ta a, chumi hnu chuan Pu Vunghzadala leh Pu Hangkhawchina chu Rangoon-ah chuan an va kal ve leh a, Sawrkar thuneitute chuan "Pu Vunghzadala fapa Kamkhankhupa tha takin lehkhah zir zawh hnu tun atangin kum thumah nangmahni in in awp leh thei ang " tiin an lo chhang a, Pu Vunghzadala leh Pu Hangkhawchina an haw hnu chuan ro an rel a, Kamkhankhupa lehkhah zir zawh a, a lo puitlin hun ngah chu thil ni thei loah ngaiin Lusei ram lama pem an rawt ta a ni.

Chutia Pu Vunghzadala leh a pawlten Lusei ram lama pem an rawt hnu chuan kum 1926-ah chuan Pu Vunghzadala chuan Pu Sontuana hnenah “Nang chuan pawisa i ngah a, Lusei ram lama pem zawngte eitur lei nan cheng za thawh la, hruaituah kan hmang ang che” a ti a, chu thu chu Pu Hangkhawchina’n a lo hria a. Pu Vunghzadala hnenah chuan “Ka Darkhuang hian pur chaw ula, ka Sepui hi kan talh ang a, a sa chu In 70 ten kan insem ang a, Lusei ramah kan pem ang. Thutiama ding nghet lo an awm chuan cheng sawmnga an chawi ang” tiin thu an thlung a. Tichuan, Pu Sontuana hruaitu a hmang lovin Pu Hangkhawchina chu hruaitu atan an hmang ta zawk a ni.

Pu Hangkhawchina chuan “Tualpui khuaah ka Pu Thanherha a Lal a, chu chu i be hmasa ang u” a ti a, tha an ti tlang a, tichuan, Tualpui Lal be tur chuan Pu Hangkhawchina lam tlem te chu an kal ta a, Tualpui khua chu an va thleng a, Pu Thanherha chuan tha takin a lo dawngsawng a, Pu Hangkhawchina chuan a sawi tan ta a, tun hma atanga lo inhre tawh an nih avanga an harsatna thlen ngamna ber an nih thu leh an harsatna tawhte hrilhin a ram chhung, a awpna hnuaia chen ve a dil ta a ni.

Pu Thanherha chuan an harsatna zawng zawng a hriatin a khawngaih a, a ram chhunga chen chu a lo remtihsak ta a ni. Tichuan, Pu Hangkhawchina chuan lawmthu sawi pahin zawhna a siam nghal a, “Ka pu, i khua leh tui kan lo ni dawn ta a, kan hnam nunphung kan tih dan pangngai hi rawn chhawm luh rem min tihsak ang em”? tiin a zawt a, Pu Thanherha chuan engmah harsatna a awm loh tur thu in a lo chhang a, Tichuan, Pu Hangkhawchina leh a hote chu Tuitawh khuaah hlawhtling inti takin an haw leh ta a.

Khua an thlen hnu chuan Pu Hangkhawchina Sepui chu an talh a. Amaherawhchu, Pu Henhauva leh a thiante In 40 chuan an lo thulhsan avangin In 30 chauh chuan Se sa chu an insem ta a ni. Chuti chuan, an thutiam thil engkim an tihfel hnu chuan Tualpui ramah Lo vat turin an kal ta hlawm a, Tualpui ram chhung Ngaizawl Zopuiah awm hmun khuarin lo chu an vat ta a ni. Pu Hangkhawchina in tur leh Pu Sonkhanenga in tur an sa nghal a, tichuan, lo an vah zawh chuan Tuitawhah an haw chho leh ta rih a, chu chu 1926 kum tawp lam a. Kum 1927 January thla atang chuan Ngaizawlah chuan an pem tan ta a, a hmasa leh hnahnung awmin an indawt zut ta a ni. Hemi kuma Ngaizawl pemte chu:-

Chhungkaw hotu	Hnam hming	Nihna
Pu Hangkhawchina	Sukte	Leader
Pu Sonkhan enga	Nekgen	Khawchhiar
Pu Ginsuaka	Hatlang	Tawng lettu
Pu Vialsuta	Malneu	Tlangau
Pu Dongkhupa	Tunglut	Upa
Pu Khaikhenthanga	Siamphu	Upa
Pu Khamtuala	Zuisang	Upa
Pu Genchina	Nekgen	Upa (Khandala Pa)
Pu Zelgoiha	Malneu	Upa
Pu Vialgina	Tangpua	Upa
Pu Ginthanga	Zuisang	Upa
Pu Kamtuanga	Guite	Upa (Japan ral len hnu)
Pu Gintungtuanga	Suankhup	Upa darkhai

Pu Awnkhawzama	Akgal	Puithiam
Pu Ginsuana	Tangpua	Puithiam
Pu Dongkhawzama	Suankhup	Puithiam
Pu Thangchinpauva	Sukte	Thirdeng
Pu Khaizananga	Zahlang	Lohual
Pu Vialzama	Tunglut	Lohual
Pu Dohuata	Nekgen	Lohual
Pu Luankhawpauva	Hatlang	Lohual
Pu Khawthanga	Tangpua	
Pu Nengthanga	Malneu	
Pu Hangzachina	Sukte	
Pu Thangdonanga	Malneu	
Pu Nengkhawthanga	Malneu	
Pu Henkhoia	Tangpua	
Pu Songtuana	Tunglut	
Pu Nengdaia	Nekgen	
Pu Khampauva	Zuisang	
Pu Tualchina	Suankhup	
Pu Tualzakapa	Akgal	
Pu Sutluana	Tunglut	

Heng hi Ngaizawl khua din tirh a lut hmasa te an ni.

Kum 1927-ah Ngaizawl khua an din fel chauh tihah Pu Hangkhawchina chu Police in anrawn man a, Halkha ah thla thum an tan tir a, Ngaizawl khua an din atanga thla kuanaah sawrkar in khawper a awm a phal lova, Tualpui khuaah veng hran neiin an insuan lut ta a ni. Hetianga Ngaizawl khua in harsatna a tawh leh Pu Hangkhawchina an man chhan chu Pu Hauchinkhupa vang a ni a, a awp khua Tuitawha awm duh lova a pemsan avangin a umzuiin a tibuai zel a ni.

Tualpui Lal Pu Thanherha thih hnuin a fapa upa zawk Pu Domana'n Tualpui a thut a, a nau Pu Khenchhuma chu Ngaizawl ah a in dang a, kum 1931-ah heng a hnuia mite hi Ngaizawla an indanpuite a ni.

Pu Khenchhuma Lal, Pu Hrangvela, Pu Taihranga, Pu Neihluta, Pu Bawktea, Pu Aitlaia, Pu Zakhuma, Pu Thatthuama, Pu Khenhleia, Pu Thanghleia, Pu Hranghleia, Pu Chhunchhuanga, Pu Thangluaia, Pu Renga, Pu Kawha, Pu Hangkhawchina Sukte, Pu Sonkhanenga Nekgen, Pu Vialsuta Malneu, Pu Dongkhupa Tunglut, Pu Donghkama Suankhup, Pu Khamkhena Zahtlang, Pu Awnkhawzama Akgal, Pu Khampauva Zuisang, Pu Ginsuaka Hatlang, Pu Zelgoiha Malneu, Pu Luankhawpauva Hatlang, Pu Khaizananga Zahtlang, Pu Demgina Tangpua, Pu Kimsuana Tangpua, Pu Khoikhupa Siamphu, Pu Khaikhenthanga Siamphu, Pu Khupkhena Zahlang, Pu Khawmthanga Tangpua, Pu Hangzachina Sukte, Pu Henkhoia Tangpua, Pu Genchina Suankhup, Pu Ginthanga Zuisang, Pu Nengthanga Malneu, Pu Nengkhawthanga Tangpua, Pu Ngulgina Zahlang, Pu Dohuata Nekgen, Pu Songtuana Tunglut, Pu Telkhata Tunglut, Pu Tunchina Suankhup, Pu Thangchinpauva Sukte te an ni.

Kum 1935-ah Pu Khenchhuma chu Neihdawn Zopuah a kai pheï a, Pu Hangkhawchina hote In 30 chuan Pu Khenchhuma remtihñain Ngaizawl hi an luah zui a, Pu Khenchhuma'n Neihdawn atangin Ngaizawl hi a awp ta a ni.

Kum 1947 hma lam hian Ngaizawlah Kristian an la awm lova, kan pi leh pute tih dan zuiin zu leh sa chenin, an chawngin an lam a, ral leh sa aiin damlai lungte an phun a, an thih pawhin ral aih hla leh sa aih hlate an sa a, Sakei kap chu an thihin an inah flag sen an zar a, Sa ai chu flag var, Samak ai chu flag dum Buh za ai chuan hñangtah diar an khai bawk a, engmah ai ve lo chuan engmah an zar lo mai a, an lunglen leh khawharna hlate sain khawhar an inlenpui ve thin a. Ladam, Lakaih leh Zola te an sa thin a ni. Khuangchawi hi in sawmhñih chuang an awm hman a, kum1947-ah a ni. Sa ai hñuhñung ber chu Pu Chinnanga a ni a, kum 1948-ah a ai a ni.

Tichuan, kum 1927 January thla atang chuan Ngaizawlah an pem tan ta a, hemi kum hian chhungkaw 33 an pem lut a. Hun a lo kal zel a, kum 1931-ah Pu Thanherha fapa naupang zawk Pu Khenchhuana chu Ngaizawlah a in dang a, a in danpui Lusei chhungkaw 15 leh Ngaizawla lo awm sate nen chhungkaw 45 chu Ngaizawlah an cheng ta a ni. Kum 1935-ah Pu Khenchhuma chu Neihdawnah a kai pheï a, Pu Hangkhawchina hote erawh chu Pu Khenchhuma remtihñain Ngaizawlah an awm zui a, Neihdawn atangin Pu Khenchhuma hian Ngaizawl hi a awp chhünzawm zel a, a aiawha Ngaizawl awp turin Pu Hangkhawchina a dah a. Sa chhiah leh Lal buh chhun engkim chu Ngaizawla awmte chuan Pu Khenchhuma chu an pe pheï thin a ni.

KUT: Kan pi leh pute atangin kut chi hñih hman thin a ni a, chungte chu Sialsawm kut leh Khawdo kut te an ni. Sialsawm kut hi kum tin April thlaah hman thin a ni a, hemi thla chhung a sa kap an awm chuan "Sawng man" an inti a, vannei an inti em em thin a ni.

Kan pi leh pute Kawlphaia an awm laiin Ramsial, Sele, Tumpang kap turin ramchhuah an tum a, an chhuah hmain malsawmna dilin an inthawi thin a, ni tinin hlumin Se lem pakhat theuh an siam a, chu chu an dahkhawm a, Puithiamin a lo chham pual a, Lal leh upa leh Puithiam ten vawk an talh a, a thin leh a lung leh a sa thenkhat leh hlum hmanga Se lem an siamte nen daipawnah an phum a ni. Hei hian vanduinah leh chhiatna, lungñaihna zawng zawng phum paih bo taah an inñgai a ni. Chhungtin ten sa ei ve ngei an tum a, chhungkhat lainate nen Vawk talhin an eikhawm ve ngei thin a ni. He kut hian a tlangpuiin ni thum a awh thin a ni.

Kut hman zawh chuan sapel tur chuan an ramchhuak a, ramchhuak lo haw chu kawtchhuahah hlado chhamin tlang an tñir a, khaw mipuiin an lo hmuak a, ropui takin khua an lut thin. Ralthat, sa kapte chuan Ar chang emaw Vapual hmul emaw, Chhawñkai emaw an tawn a, an ñgai ropui em em thin a ni.

Kut dang pakhat leh chu Khawdo kut a ni a. Khawdo kut awmzia chu khua leh sakhua hrim hrim kha an do a ni. A chhan_chu kum tinin sik leh sa lum leh vawt inthlak lai September leh October thla chho velah hian khawsik leh tlang hrileng natna a tam thin a, chung natnate chu ramhuai tihñatah ñgaiin a tinatu chu an dova, chu chu Khawdo kut lo chhuahna bul chu a ni.

Khawdo kut hman dawn zanah khua chhuahsanin meichher nen tumphit tuma intlarin khua an do thu an puang a, an ankhum chiam a, chu chuan khua leh sakhua chu an do tih a entir a ni. A tuk atangin Khawdo kut chu an hmang tan ta a, he kut pawh hian ni thum chhung a awh tlangpui a ni. Tin, he kut hi kum hlui thlahna leh kum thar hmuahna angah an ngai baw. Kum thar lama lo neihna tur ram te an theh a, lo an vat tan ta baw a, tin, nungcha chi hrang hrangte pawh an chet dan a lo danglam a, Lailen te, chip te pawh an lo lang tan a, thereng, rengchal leh ngirtlingte pawh an lo kir a, boruak a thiingin khua a lo thal tan ta baw a, kum hlui thlah leh kum thar hmuahna hun a ni baw a ni.

KRISTIANNA LO LUH DAN

Presbyterian: Kum 1947 hma lam kha chuan Ngaizawlah hian Kristian an la awm lova, chhehvel khua- Darngawn, Neihdawn leh Tualpui atangin Pathian thu sawi an lo kal thin a, a chang chuan kar khat lai te an cham thin a, thlenna tur hmuh zawh loh chang pawh an ngah awm e. Chung mite rawngbawlina atang chuan tlangval sawm leh nula paruk chu Kristianah an inpe a, Ngaizawlah Kohhran a lo ding ta a. Ni 11.01.1947 khan Ngaizawl Presbyterian Kohhran chu dah ngheh a lo ni ta a ni. Ngaizawl Presbyterian Kohhran chu Khawzawlah kum thum (1969-1971) chhung a ding a, 1972-ah Ngaizawlah a ding chhunzawm zel a, kum 1997-ah Golden Jubilee an lawm a, 2007-ah Diamond Jubilee an lawm leh a, 2022-ah Platinum Jubilee an lawm leh a. souvenir bu pawh mawi hnai tak an siam a ni. Kum 2024 hian Kohhran chhungkua 67, Upa - 7, Kohhran member 417 an awm.

Roman Catholic: Ngaizawlah Roman Catholic Kohhran hi 14.07.1949 kum khan an ding tan a, ram buai lai 1968 kum atanga 1985 thleng khan Ngaizawlah Roman Catholic an awm lova, ni 10.01.1979 atangin Biak in an nei leh tan a, Catholic Kohhran atang hian Brother, Catechist, Sister, Father etc engemaw zat an chhuak tawh a, tunah hian Kohhran chhungkua 48 member 300 chuang an awm mek a ni.

Zomi Baptist Church: Ngaizawlah Zomi Baptist Church (ZBC) ni 03.09.1992 khan a ding tan a, tunah hian kohhran chhungkua 30 member 250 vel an awm.

Assembly of God Church: Ngaizawlah hian Assembly of God Church ni 27.02.1997 khan a ding tan a, tunah hian Kohhran chhungkua 35 member 210 an awm

United Pentecostal Church (NEI): Ngaizawlah hian United Pentecostal Church(NEI) hi ni 10.07.2010 khan a ding tan a, Kohhran chhungkua 5 Kohhran member 30 vel an awm.

POLITICS LAM

Mizo District Council hun lai 1946 khan Ngaizawlah Mizo Union Party a ding ve nghal a, hruaitu hmasate chu:

President	: Pu Ginzananga
Vice President	: Pu Nengkhandala
Secretary	: Pu Thuamkhandala

Village Council inthlan hmasak ber chu ni 24.07.1954-ah neih a ni a, thlan tlinte chu:

President	: Pu Nengkhanda (Mizo Union)
Vice President	: Pu Suandohauva (Mizo Union)
Secretary	: Pu Suakzachina (Mizo Union)
Member	: Pu Ginzananga

Village Council inthlan vawi hnihna chu ni 16.08.1957-ah neih a ni a, thlan tlinte chu:

President	: Pu Ginzananga (Mizo Union)
Vice President	: Pu Ngulhenthanga (Mizo Union)
Secretary	: Pu Thuamkhanda (Mizo Union)
Member	: Pu Lianzakama
Nominated	: Pu Suakzachina

Village Council inthlan vawi thumna chu ni 19.08.1960-ah neih a ni a, thlan tlinte chu:

President	: Pu Kamzasia (Mizo Union)
Vice President	: Pu Nengkhanda (Mizo Union)
Secretary	: Pu Thuamkhanda (Mizo Union)
Member	: Pu Luaikamchina
Nominated	: Pu Chinkhawkaia

Village Council inthlan vawi lina chu ni 20.10.1963-ah neih a ni a, thlan tlinte chu:

President	: Pu Kamzasia (Mizo Union)
Vice President	: Pu Chinkhawkaia (Mizo Union)
Secretary	: Pu Thuamkhanda (Mizo Union)
Member	: Pu Thangkhanliana
Nominated	: Pu Chindopauva

Ni 01.03.1966 khan Mizoram a buai a, VC inthlan a awm thei tawh lova, inruat chawp chho zel a ni a, heng a hnuia mite hian hun engemaw chen VC charge an la a ni.

President	: Pu Ngulhenthanga
Vice President	: Pu Thangkhanaka
Secretary	: Pu Khoidolanga
Member	: Pu Tuansawmpauva
Nominated	: Pu Chindopauva

Kum 1969 February thlaah Ngaizawl chu Khawzawl Grouping Centre-ah khawm luh a ni a, Ngaizawl khua In 80 vel atangin In 16 chauh chu Khawzawlah lut in midang zawng chu hmun hrang hrangah an pem darh zo ta a ni.

Khawzawl Grouping Centre-a lutte:

- 1) Pu Tualkhankama te chhungkua

- 2) Pu R. Theusuanthanga te chhungkua
- 3) Tv. G. Thangdoliana te chhungkua
- 4) Tv. Tualzachina te chhungkua
- 5) Pu Songkhandongh te chhungkua
- 6) Pu Sutkhankhai te chhungkua
- 7) Pu Zelliankhama te chhungkua
- 8) Pu Sulkhanpauva te chhungkua
- 9) Tv. Chindokhupa te chhungkua
- 10) Pu Tuankama te chhungkua
- 11) Pu Khupkhawzama te chhungkua
- 12) Pu Nangkhankama te chhungkua
- 13) Pu Thangzadala te chhungkua
- 14) Pu Lamdopauva te chhungkua
- 15) Pu Nangkhanlela te chhungkua
- 16) Pu Thangdonanga te chhungkua

Khawzawlah eizawna a harsat avang leh mahni khua ngaih avangin kum 1972-ah Ngaizawlah bawkte khawhin awm chilh a ni a, hemi kum hian chhungkaw paruk chauhvin khawhar takin Ngaizawl khua hi an luah a ni. Chungte chu:

- 1) Tv. G. Thangdoliana te chung
- 2) Pu Sutkhankhaia te chung
- 3) Pu Zelliankhama te chung
- 4) Pu Tuankama te chung
- 5) Tv. Tualzachina te chung
- 6) Tv. Chindokhupa te chung

Ngaizawl thlawh baw committee din a ni a, kum tin thlan thar thin an ni. Chungte chu :-

	<u>1972</u>	<u>1973</u>		
Chairman	:Tv. G Thangdolian	Tv. G Thangdolian		
Vice Chairman	:Tv. Tualzachin	Tv. Tualzachin		
Secretary	: Pu Sutkhankhai	Pu Sutkhankhai		
Asst. Secy	:Tv. Chindokhup	Tv. Chindokhup		
Treasurer	:Pu Khupgothang	Pu Khupgothang		
	<u>1974</u>	<u>1975</u>	<u>1976</u>	
Chairman	: Pu Huatzabia	Pu Huatzabia	Pu Huatzabia	
Vice Chairman	: Pu Tualzachina	Pu Tualzachina	Pu Tualzachina	
Secretary	: Pu Sutkhankhaia	Pu Sutkhankhaia	Pu Sutkhankhaia	
Asst. Secy	: Pu Ginzathanga	Tv. Chindokhup	Pu Ginzathanga	
Treasurer	: Pu Khupgothang	Pu Ginzathanga	Pu Khupgothang	
Finanace Secy	: Tv. Chindokhupa	Tv. Kamkhawchina	Tv. Chindokhup	
	<u>1977</u>	<u>1978</u>	<u>1979</u>	
Chairman	: Pu Huatzabia	Pu Huatzabia	Pu Huatzabia	
Vice Chairman	: Pu Tualzachina	Pu Ginzathanga	Pu Tualkhankama	

Secretary	: Pu Sutkhankhaia	Pu Sutkhankhaia	Pu Sutkhankhaia
Asst. Secy	: Pu M. Thangkhantuala	Tv. Chindokhup	Pu Chindokhupa
Treasurer	: Pu Sutkhanpauva	Pu Sutkhanpauva	Pu Ginzathanga
Finanace Secy	: Tv. Chindokhupa	Tv.Kamkhawchina	Pu M. Thangkhantuala

	<u>1980</u>	<u>1981</u>	<u>1982</u>
Chairman	: Pu Huatzabia	Pu Pumkhandala	Pu Pumkhandala
Vice Chairman	: Pu Tualkhankama	Pu Ginzathanga	Pu Zamkhawliana
Secretary	: Pu Sutkhankhaia	Pu Sutkhankhaia	Pu Sutkhankhaia
Asst. Secy	: Pu Thangkhantuala	Pu J Thangngaihliana	Pu Tualdothanga
Treasurer	: Pu Ginzathanga	Pu Sutkhanpauva	Pu Khupgothang
Finanace Secy	: Pu Pumkhandala	Pu Zamkhawliana	Pu Ginzathang

Ni 24.02.1983-ah Village Council hmuh leh a ni a, Ni 14.04.1983-ah Village Council inthlanna neih a ni. Thlan tlinte chu (1983-1985):

President	: Pu Pumkhandala	PC
Vice President	: Pu Zamklhawliana	PC
Secretary	: Pu J Thangngaihliana	
Member	: Pu Ginzathanga	PC
Nominated	: Pu Khupgothang	

Ni 31.10.1985-ah Village Council inthlanna neih a ni. Thlan tlinte chu

President	: Pu Tualkhankama	PC
Vice President	: Pu Pumkhandala	PC
Secretary	: Pu J Thangngaihliana	
Member	: Pu Ngulhenthanga	PC
Nominated	: Pu Tualdothanga	

Ni 16.11.1988-ah Village Council inthlanna neih a ni. Thlan tlinte chu

President	: Pu Zamkhawliana	INC
Vice President	: Pu Huatzabia	INC
Secretary	: Pu J Thangngaihliana	
Member	: Pu Pumkhandala	PC
Nominated	: Pu Ginzathanga	

VCP Pu Zamkhawliana chu Bukphir khuaah a pem avangin ni 23.02.1989-ah LAD Champhai chuan hetiang hian arawn siam rem:

President	: Pu Huatzabia
Vice President	: Pu Ginzathang
Secretary	: Pu Sutkhankhai
Member	: Pu Pumkhandal

Ni 20.01.1991-ah Village Council inthlanna neih a ni. Thlan tlinte chu

President	: Pu Huatzabia	INC
Vice President	: Pu Ginzathang	INC
Secretary	: Pu Sutkhankhai	
Member	: Pu Suandohang	INC
Nominated	: Pu Dalchinthang	

Ni 04.05.1994-ah Village Council inthlanna neih a ni. Thlan tlinte chu

President	: Pu Tualkhankama	JD
Vice President	: Pu Pumkhandala	MNF
Secretary	: Pu Sutkhankhai	
Member	: Pu Suandohang	JD
Nominated	: Pu Ginkhankama	

Ni 18.09.1995-ah VC dissolve a ni a, Pu MC Lalliana Champhai CA in min awp a ni.

Ni 24.04.1996-ah Village Council inthlanna neih a ni. Thlan tlinte chu

President	: Pu A. Thangsuanpau	INC
Vice President	: Pu Huatzabia	INC
Secretary	: Pu Sawmlianhang	
Member	: Pu Sutkhankhai	JD
Nominated	: Pu Nangsianpau	

Ni 16.12.1999-ah Village Council inthlanna neih a ni. Thlan tlinte chu

President	: Pu Pumkhandal	MNF
Vice President	: Pu J. Thangngaihlian	MNF
Secretary	: Pu Sawmlianhang	
Member	: Pu Thangdeihpau	MNF

Ni 04.11.2002-ah Village Council inthlanna neih a ni. Thlan tlinte chu

President	: Pu Pumkhandal	MNF
Vice President	: Pu Sawmlianhang	MNF
Secretary	: Pu Luandehpiang	
Member	: Pu A. Thangsuanpau	ZNP

Ni 14.05.2005-ah VCP Pu Pumkhandala a thih avangin Pu Sawmlianhang'a'n VCP charge a la.

Ni 24.02.2006-ah Village Council inthlanna neih a ni. Thlan tlinte chu

President	: Pu Paudokhup	MNF
Vice President	: Pu Michael DL Thang	MNF
Secretary	: Pu Sawmlianhang	
Member	: Pu J. Thangngaihlian	MNF

Ni 24.02.2012-ah Village Council inthlanna neih a ni. Thlan tlinte chu

President	:	Pu Zamdeihkap	MNF
Vice President	:	Pu Thangkhandal	MNF
Secretary	:	Pu Langsiankham	
Member	:	Pu Luandehpiang	MNF

Ni 30.04.2015-ah Village Council inthlanna neih a ni. Thlan tlinte chu

President	:	Pu Nangzamung	INC
Vice President	:	Pu Zamdeihkap	MNF
Secretary	:	Pu Kamkhawtuang	INC
Treasurer	:	Pi Chinsianvung	

Ni 27.08.2020-ah Village Council inthlanna neih a ni. Thlan tlinte chu

President	:	Pi Chin-gokim	MNF
Vice President	:	Pu Kamkhawtuang	INC
Secretary	:	Pu Anthony Thangkhanthawng	
Treasurer	:	Pu Langsiankham	

POLITICAL PARTIES: Ngaizawl khuaah hian a hun lai mil zel hian Political Party pawh an ding ve zel a, kum 1946- ah Mizo Union, kum 1973-ah Indian National Congress (INC), kum 1978-ah PC, kum 1988- ah MNF, kum 2022-ah ZPM an ding.

EIZAWNNA LAM: Ngaizawl khua eizawna ber chu thingtlang lo neih a ni a, Ngaizawl ramah hian buh a that duh loh avangin vaimim, sawhthing leh chawhmeh lam chi Antam leh thlai dang dangte chin a ni a, ranvulh a ei zawng an awm bawk.

ZIRNA LAM: Ngaizawl khua hi eizawna lamah kan hnufual hle a, lehkha ziak leh chhiar thiam hmasa te chu Pu Nanghawkama te, Pu Khamsuanthanga te, Pu Tualchinthanga te an ni a. Japan ral len hma a Tualpui khua a zir an ni. Kum 1945-a Indopui a lo tawp khan khaw hrang hrangah Presbyterian Kohhranin Mission School a hawng a, Neihdawn khuaah pawh Primary school an hawng a, chutah chuan Pu Theusuanthanga, Pu Thuamkhandala leh Pu Chinkhawkai ten PSLC hi an zir chhuak a ni.

Ngaizawl khua MSLC zir chhuak hmasate chu- Pu R. Theusuanthanga leh Pu Thuamkhandala te an ni a, HSLC pass hmasate chu Pu Donatus Engzananga te. Bro. Robert Thangkhanlanga te, Bro. Sutzakhana te, Pu Paul TK Donga te, Tv. Zamdokapa te an ni. Tv. Zamdokapa hi vanduaithlak takin a tlangval laiin a thi. Graduate hmasate chu Pu Donatus Engzananga (B.sc), Pu Paul TK Donga (BA), Bro. Robert Thangkhanlanga leh Bro. Dominic Sutzakhana te an ni. Anni hian Mizoram buai hma khan an zir chhuak a ni.

Kum 1964-ah Primary School din a ni a, zirtirtu atan Pu R. Theusuanthanga an la a, a hnu deuhah Pu Thuamkhandala leh Tv. Huatzananga an la leh a, Mizoram buai vangin Pu Thuamkhandala leh Tv. Huatzananga te chu kum 1968 kum tawp lam khan Burma-ah an pem a, Pu R. Theusuanthanga erawh a pension thlengin a thawk ta a ni.

Kum 1975 January ni 16-ah Ngaizawl thlawhbawkah Primary School din a ni a, zirtirtu atan Tv. Kamkhawchina lak a ni. Hemi kum hian class A, B, I, II, III thlengin zirlai 12 an awm. Ni 01.02.19810-ah Pu Kamkhawchina chu Aided Teacher atan Sorkarin a la a, Sorkar School a lo ni chho ta zel a ni. Kum 1988 khan Middle School din a ni a, Zirtirtu hmasa ber chu Tv. Sawmlianhang a ni. Kum 1991 March ni 19-ah Pu PC. Lallawma (BA) Neihdawn khua chu Headmaster atan lak a ni a, Ni 01.02.1993 khan Ngaizawl Middle School chu Sorkarin Deficit School-ah a hlang kai a, Primary School nen infinin Comprehensive Middle School a lo ni ta a, kum 1999 thleng comprehensive a ni a, kum 2000 atangin Middle School chu Kanan Veng Pu Tualzachina in cheng sangli a lein an insawn ta a ni. Miiddle School hi Ni 20.09.2003 khan Sorkarin a Provincialise ta a, Govt. Middle School a lo ni ta a ni. Kum 2009-ah High School din a ni a, Headmaster hmasa ber chu Pu Suansianhang (MA) a ni. Kum 2010 atangin Matric Candidate an nei tan a, Nil kum awm lovin kum tin result tha tak an nei zel a, a lawmawm em em a ni.

Kum 2013-ah Roman Catholic Kohhranin St. Joseph School an din a, Nursery-Class viii thleng an hawng a, kum 2017-ah Presbyterian Kohhranin Presbyterian English School an hawng ve leh a, Nursery- class viii thleng bawka a ni.

Tunah hian Ngaizawl khuaah Post Graduate-10, Graduate-35, HSLC chin chung lam zawng zawng 80 vel an awm.

HRISELNA LAM: Ngaizawl khua hian thlawhbawka awm lai 1972 atang khan hriselna hi kan ngai pawimawh a, in tinin ek in kan nei nghal vek a, vawka kan chhuah lo bawka. Kum atangin sorkarin Health Sub-Centre min pe a, Health worker fel tak tak ten hriselna lamah min kaihuai a, kan vannei hle. Doctor leh Nurse khawzawl leh champhai a mi ten sikulah leh khawtlangah Health check-up an rawn nei thin bawka a, kan lawm hle a ni.

NGO HRANG HRANG

YMA : YMA hi Ni 15.06.1981 khan a ding tan a, President hmasa ber chu Pu Tualkhankama a ni. Khawtlang tan an tangkaiin chhiat ni that ni-a kan chhuan ber an ni.

MHIP: MHIP hi Ni 10.03.1991 khan an ding tan a, President hmasa ber chu Pi Ginkhanchingi a ni. Khawtlang tan an tangkai em em a, kut ke ber berte an ni.

Games and Sports Association: GSA hi ni khan din a ni a, President hmasa ber chu a ni. GSA hi zoram buai hma pawh khan a ding tawh a, khawdang atangin Shield leh Cup (Nomawi) pawh an la ve fo va, Pu Lalgohana Shield pawh an la kawla tha reng a ni.

MUP: MUP hi kum 1990 khan din a ni a, minute bu hlui en tur a awm mumal loh avangin a ni leh a thla hriatchian a ni lo. President hmasa ber chu Pu Ngulhenthanga a ni.

MZP: Mizo Zirlai Pawl hi Ngaizawlah kum 2011 khan din a ni a, President hmasa ber chu Pu Paudongmanga a ni. Tun thleng hian nung takin an la kal zel a, kum tin Teacher's Day-ah zirtirtute an chawimawi thin a ni.

PAMCHUNG CHANCHIN

Rorelliana Chhangte

Pamchung khua hi ZawInghak lal fapa Thankhuma Sailo lal hian leng khua atangin kum 1862-ah a sat a, tichuan, Tualcheng khua hi kum 1872-ah han sat leh in chuta tangin Khuanglâmah a kai a, Khuanglâm atang hian Lungphunlianah a kai leh a, Lungphunlian atangin Pamchungah a chhukthla leh a ni. Heta Pamchung a an awm lai hian Thankhuma Sailo lal hi Ni 28.8.1938 hian a boral a, Pamchung atang hian Vaidaiah kum 1945-ah an kai pheih leh a, Vaidaiah hian thangkhat lian zet an awm hnuin kum 1961-ah Pamchung khuaah hian an let leh ta a ni. Pamchung a an let leh hian in 50 bawr vel an ni a, tichuan, Pamchung khuaah hian inbengbel nghetin an awm zui ta a ni.

Kum 1966-ah Mizoram alo buai khan Tualcheng khuaah kum 1968 khan an hruai khawm a, kum 1968 vêk hian Tualcheng khua nen Hnahlanah an khawm chho leh a, Hnahlan khuaah hian mi tam zawk inbengbelin an awm hlen ta a ni. Tichuan, Pamchung khuaah hian kum 1974-ah in 5 velin thlawhbawkin an awm thla leh a, chuta tang chuan tun thleng hian Pamchung khua hi chhuahsan awm tawh lovin an luahlum ta a ni.

Tichuan, kum 1976 atangin thlawh bawv village chairman kaihhruaina hnuaiah an awm a, kum 1985-ah village council neiin an awm tan ta a ni. Pamchung khua hi hmarchhakah awmin Sialkal tlangdungin a hual a, a khaw awmna lai hi tlang thengthaw nuam tak niin a mihring chengte pawh an hriselin Pathian zarah kumtluaana khawtlanga boral awm lovin an awm zeuh zeuh thin a ni. Lui lamah hian Tuiphal, Tuivai leh Zawngkek lui ten a hual a, Luidungah hian sangha, chengkawl, chakai te ala tamin a bîkin sangha hi humhalh tlat a ni.

Pamchung ram hi a thain buh leh balah pawh Pathian malsawmna kan dawng nasa a, khaw intodelh tak kan ni bawv a ni. Ram a thangin eizawna awlsam zawk beiseina avangin a mi chengte pawh an pemchhuak ve nasa a, tunah hian in 80 awmin mihring hi 380 kan cheng mek a ni. A tlangpuiin a mi cheng tam zawk hian eizawna atana thingtlang lo nei mi kan ni hlawm a ni.

Pamchung khaw ramah hian ramhmul damdawi heng kaihzawlte, thingkhawi lu, chhawntual etc. te a tamin a mamawh tan pawh kan thawn chhuak thin. Tin, Mizoram hmun danga awm tam lem lo Lungthi te, Baibing te, a bikin tinreng damdawi tia Mizoten kan hriat Zema-thingthupui (Asparagus) pawh hi tin 50 hmun vel kan nei a, sum lâkluhna hnarah hei hi kan hmang mek a ni.

...oooOooo...

PUILO CHANCHIN

Puilo khaw lal hi Khawtikaia a ni a. Kum 1920-ah Puilo hi awp tanin kum 65 a nih in kum 1941-ah a boral ta a ni. Puilo khua hian koh dan hrang hlir tum thum a nei a, a tum thumna Puilo tih hi a lo alo pu hlen ta a ni. Koh dan hrang hrangte chu lo sawi ila.

A HMING PAKHATNA: A hming kohna hmasa ber chu SADAWT awm hmun a ni a, Sadawtah hian Hauhnar an hmang deuh ber a. Sailo Lal dawttu ber an ni. Sadawt hmunah hian Sailo Lal chu Khawtikaia a ni. Ani hi PUILO ram Chhumlianawm atangin Sadawt hmunah a kai a, hemi hma hian Dulte hmunah hian a awm a, Dulte chu Melveng in a awm avangin Aizawl Bawrsap khan Melveng awmna ringawtah tlang chang Lal a awm tur a ni lo tiin Kawlkulh khaw hnuai Bawkmualah an chho a, heta a an awm lai hian ei leh bara an intodelh theih nan tiin hnathawk thei zawng zawng chu ram tha zuanin Vankal hmunah a kai tir a. Vankal atangin kum 1920-ah Sadawt hmunah hian a rawn kai leh ta a ni. Heta tang hian Khawtikaian lal ram zau tak a nei a, hmar lam chauh sawi ila, tuna Gate kawm lamah hian Sipai lui a zawhthla a, Tuimarulah Vankal ram zawng leh Gate kawm atanga tlak lamah Sesih zawhthlain chhimluangah Serlui a zawhthla a ni. Hei hi SADAWT hun lai a ni.

A HMING PAHNIHNA KAWLKULH: Kawlkulh lo chhuah dan leh Kawlkulh hming kan put chhan chu, Khawtikaia ram enkawl chung hmun hrang hrangah Kawlho inkulhna sawi tur a awm a ni awm e. An sawi lar ber erawh chu Saihum kawm hi a ni. Chumi hming chu chawiin Kawlkulh tih chu khaw hmingah a lo pu ta a, Kawlkulh khua kan lo ni ta a ni.

A HMING PATHUMNA PUILO: Puilo khaw hming lo chhuah dan hi sawi dan chi hnih mimal hming chawia puttir a awm a. Hnam hming chawia puttir a awm baw a. Chungte chu han tarlang ila: (1) Hmunte awm laiin loneitute zinga mi Puii hian lo atan a nei a, a neitu hming chawiin Puii lo tiin sawi ta a ni. (2) Kawlkulh kan nih laiin Lal Dolura hi kum 1930 velah Tawitawkawna awm a ni a. Kawlkulh a rawn kai hma hian hmanraw tlem te zawrh a nei a, chu dawr chu vengtu tlem a awmtir a, chu chu Dawrveng an ti. Kawlkulh khua kan nih laiin an ni chu Dawrveng khua an nih chu.

Kum 1933/1934 velah Dawrveng hmunah alo kai pheih a, Aizawl Bawrsap McCall awm laiin Kawlkulh hming a rawn pu ve ta ngawt mai a, Bawrsap hnenah hian thingtlang khua atang hian report tur chi hrang hrang a tam thin a, silai hmuh chungchangah leh thil tuldangahte report tul leh lehkha kal velah thil buaithlak a lo tam a.

Aizawl Bawrsap in thingtlang khua kel daidan lekah khaw hming inang a awm tur a ni lo, in in siamrem tur a ni a ti a. Khawtikaia hnenah i khaw hming Kawlkulh hi keinin kan pu ang a, nangnin Chhawrtui rama Hmar hnam chi khat PUILO awmna hming saw in pu dawn nia a ti a. Chu chu Khawtikaia Sailo Lal leh Upa ten pawmin PUILO hming chu khaw hming atan an pawm ta a, tun thleng hian kan pu ta a ni. He Hmar hnam hmingchawia phuah hi Puilo khawchhuak kum upa mual liam ta tam tak ten an pawm tlan ber a ni. Tin, Puilo khua leh tui tlangchang Lal hnahnung ber chu LT Khuma Sailo a ni. Kum 1941 atangin LT Khuma chuan rorelna a chelh a, kum 1954 August thlaa Mizoram Sailo Lal ban a nih thleng a chelh a ni. Kum 1969 ah a thi a, kum 14 rorelna a chelh a ni.

Puiloah hian tun dinhmunah in 124 awmin mihring 637 kan khawsa mek a ni.

RABUNG CHANCHIN

THUHMA: Tlumtea thlir taka kan lo thlir leh nghah fan fan chu Khawzawl District a nih hun hi a ni a. Beisei a sâng bawk a, Champhai pek a nih khan Khawzawl mipui rilru a na hle mai a. Mahse, chutianga awm reng thu chu a awm bik lo va, a hun takah District-ah hlan kai a ni a; an natna chu tihdamin a awm leh ta a, a lawmawm hle a ni. Khawzawl District puan a nih hlima Khawzawlah ka kalin tlangvâl pakhat chuan a bike-a in hlâng pahin, "District Capital tlangvâl ka ni ta" a ti a, lawm takin a tlân par par a! Thuam famkim la bel lo mah se sawrkar Office dawr tur leh chungkaw sekrek lam turin tukthuan ei khamah hmanhmawh lutuk lo va Khawzawl kan kal thei ta ringawt pawh hi a lawmawm thawkhat ta hle. Chu bâkah, District chung chanchin thang leh thar zêlte rawn chhiar tur lehkhabu hlu tak tur buatsaihna hun a rawn her chhuak hlawl mai hi a lawmawm lehzual. Khawzawla chin chhim lam chu pi pute thlang tlâk kawng leh khawsakna a nih deuh bik avângin hmun hlui tlawh châkawm tak tak a tam a. Hmar lam khuate erawh chu hetiang thilah hian kan hausa lo deuh. Chung kârah chuan Rabung lam pawhin chanchin neih ang tâwk chu District chanchin tihausatu pakhat atân kan han phochhuak ve dâwn a ni.

KHAW HMING: Khaw tam tak hi chu a luahtu hmasate hnam hming an pu hlen mai a. Rabung khu a erawh chu chutianga zâwng chuan chiang taka sawi tur a awm hauh lo. Mizo chanchin ziaktu Rev. Liangkhaia chuan "Lalphunga (Vanhnuailiana nau) chu Kawlkulh atangin Rabungah a kai a, a khuate sai kah theih avângin an hmingthang hle" tiin a sawi a. He thu atang hi chuan hming a lo nei sa tawh a ang hle. Lalphunga kai hun hi 1845 vêl a ni âwm e. A hming put dan hi titi deuha sawi dân chi hnih a awm a. Pakhat chu, Zawlnghak sangkhuaa Liankhama a boral hnuah kum 1893 lai vêl khân a nupui Rochhingpuii hovin Rabung khaw lo km 3 vêla hla, Thingrial tlângah an kai a. Heta an awm laiin an tâm hle a, Fangra hi chaw atân an ring hial a; chawa siam tur chu an bun vûm rui lhin a, 'Rabun' tih chu a hnu deuhah 'Rabung' tih ni taa sawi a ni. Sawi dân dang leh chu, Zoroma lo chêng hmasa Hmâr hnamte lo phuah nia sawi a awm a. Mahse, han um zui chuan a fiah thei chuang lo. Hetiang hi thil awm dân a nih avângin Rabung hming hi engtik laia mi nge hriat fiah a har a ni. Thuhriltu chuan, 'Thil lo awm apiang hi hming vuah tawh a ni a ti a (Thuhriltu 6:10). Chuvângin, Maurakêka khuangchawi hun laia mi daih pawh a lo ni mah nâ!

RABUNG AWMNA: Rabung khu a hi Mizoram hmâr chhak lama awm niin, 19-Ngopa (ST) Assembly Constituency hnuaiah a awm ngar ngar a. Tunah hian Khawzawl District chungah awmin 23-Champhai North (ST) Assembly Constituency chungah a awm thung. Khawzawl hmâr lam km 40-a hlâah awmin, Khawzawl to Singzawl Road-in a pal tlang a. Aizawl atanga a hlat zâwng hi Khawzawl lama kal chuan km 192 a ni a, Saichal leh Hliappui leh Pawlrâng paltlang chuan Km 160 vêla hlâ a ni thung. Tin, Hliappui atanga Aiduzawl paltlang chuan km140 vêla hlâ niin, hei hi Rabung to Aizawl kawng hnai ber a ni a, thâl lai kawng a la ni rih.

A khaw thenawmte: Aiduzawl, Tualpui, Murlen, Pamchung, Lâmwawl, Pawlrâng, Hliappui, Khualen leh Vânkai khuate an ni. A khu a hi khaw chhak lam atanga hmâr thlang zâwnga tlâng dung zuia awm niin, zo boruak leh phai boruak a tem ve ve a. Khaw chung sei zâwng hi kawngpui dung ang zêlin Km 2 vêla sei a ni a. A vâng lam erawh chu km 1 pawh a tling lo thung. Khaw chung hmun laili takah kum 1916-a phun, Bung lianpui 'Pu Bika Bung' tia hriat a ding luah a, chu lai vêl chu Bung Veng tih a ni.

A khaw chhehvel zingah ram a nei zau ber a. A ram hmul zingah thing lam ni lo tlêm han sawi ila. Mau leh châ a awm a, mau pangngai aia pan, rawtê a awm bawk. Raw chi hrang hrang awmte chu- Thing, Nâl, Chângdam leh Rawngâl te an ni. Nât leh Lik a awm bawk. Hruì-hnâng atâna hman chi hruipui, thiltê, mâwt, sairil, mitperh leh kawrtâi te a awm bawk. Changêl a tam hle a, ram a bua tâk êm avangin nungchâ an tlêm ta hle.

RABUNG LUAH NGHEH LEH LAL: Hriat chian theih china Rabung luah vawi khatna chu Lalphunga hoa an awm kha a ni a, an awm rei zâwng erawh hriat a ni lo. Hemi hnua Rabung luah dan chu hetiang hi a ni: Kum 1891-ah Liankhama chu kum 45 mi niin a thi a. A fapa Hrangchhuana a la naupan deuh avangin lalnu Rochhingpuii kaihhruainain kum 1893 vêlah Rabung khaw chung Thingrial tlâng an zuan a. Rei awm lovin, Rabung atanga hmâr lam km 7 vêla hla Hmâwngzâwlah an pheì a. Heta an awm lai hian an fapa Hrangchhuanan Thiltlâng lal Hrangphunga fanu Lalbiaki nupuiah neiin Hmawngzâwl atanga hmâr lam Khúmzâwlah khaw thar a sat a, rei lovah Ngopa lamah a pheì a. Anu Rochhingpuii ho chu Lamzâwlah an kai bawk a. Kum tam awm lovin Hmawngzâwlah bawk a lêt leh a, chutah chuan kum 1908-ah a thi a, an fapa Hrangkima chu kum 24 mi niin lalna a chang zui a; nupui atân Hrangliani a nei. Tichuan, kum 1912 vêlah Rabung an kai a. He hunah hian Saphihrik tlâng hual vêlin an awm a, in 300 khua an ni.

Hei hi Rabung awm vawi hnihna niin kum sarìh vêl zet hnua Hmawngzâwlah bawk an pheì leh a. Hmawngzâwla an awm laiin Hrangkima fapa Thanzualan nupui a nei a, Hmawngzâwl a thut a, apa Hrangkima chu Lamzâwlah a pheì thung a. Kum 1926 vêlah Thanzuala chu Zawlnghakah kaiin 1932 thleng a awm a. Apa Hrangkima chu kum 1930-ah Hmawngzâwlah a lêt leh a. Tichuan Thanzuala ho chu kum 1933 vêlah Hmawngzâwlah chhuk lehin apa Hrangkima ho nêin infinin 1936-ah a nâwlpuiin Rabungah an kai a. Chutihlai chuan tuna Presbyterian Biak In gate bul kâwn atanga Govt. Rabung High School thleng hi an awmna a ni. Hei hi Rabung awm vawi thumna a ni. Hetih lai hian khawtlâng chu engkimah zai khatin an luang a, chhiat-ni-leh-that niah nula leh tlangvâl tlâwmngaihna a sâng hle. Retheì leh hausa inkâr a zîm a, politics tui nû in a la chiah lo va, zû in awm mah se, an hnawksak lo a, khawtlang nun a nuam hle a ni.

PASALTHA ZAI THIAM: Rabung awm hmasak laia pasaltha, zai thiam ni bawk hmingthang ber chu Thâla a ni. Kum 1916-ah a piang a. Challiankunga leh Rohnuni te fa pali zinga upa ber niin Bawitlung hnam a ni. Chhungkaw inkawm ngeih leh hlim thei tak, thenrual kawm thiam leh mi pawì sawi ngai lo an ni. Tlangvâl mawng zâng tak, zaidam leh nunnêm tak, Kristian niin, zû chu in ve tho mah se tlâwmngaih kawngah mite entawntlâk leh tlangvâlthe hmahruaitu a ni. A aw (voice) a thain zai a thiam hle a. Hei vang hian Hrangkima pawhin a duhsak êm êm a, Lo pawh ram tha lai ngat a pe thin. Tin, 'B' Pawl Pasaltha, Frontier Force a ni. Kum 1935-ah a thiante nêin Aizawl-ah Police Bahrik sain an kal a. Bahrik an sak lai chuan thawk mawlh mawlh chungin a hla duhzâwng hi thiam takin a sa thin a. Bahrik hotupa chuan a lo ngaithla reng a, thiam a tih êm avângin a hnênah, "Tlangval, i aw a thain i va zai thiam ve le, hna hi lo thawk ve lo la, helaia hnathawkte hriat phâk hian lo zai mai thin zawk ta che" a ti thlâwt mai a ni.

Tumkhat chu Sakei nghal, ranvulh seh hmang tak hi khaw bulah a tâp tlat mai a. A ke pakhat a sir zâwnga a hê tlûn avângin 'Hniakhèra' an ti mai thin. Pasalthaten an kap mai thei lo va. Tumkhat chu khaw bul lawk, Chalthèi lui kamah Bawng pangâ lai a keuh thlu a.

A ei hmain mipuiin an chhuhsak hman a. A chimawm êm avângin lal leh upahoten thah dân tur an rêl a. 'Sapui bei turin mipa puitling chin zawng chhuah vek tûr' tiin an au va. Tichuan, an chhuak khawm a. Hemi ni hian khua a thiàng vûk a. Sapui bei tûr an kal liam hnu lawkah chuan ruah fang lian pui pui a tla phuar phuar a. Lalnu Hrângliani ngaihtha lo chuan "Hetiang hi upa duh loh a ni e, va ko lêt leh rawh se" tiin a pasal chu naupang fel deuh tir turin a hrilh a. Lal mi tirhten thu an va thlen chuan chân khânah an lo thu fel vek tawh si a, "Eng êm kan ti lo'ng e" an ti a, an kir duh ta lo va.

Thâla leh a thianpa Lalhmingthangate chuan Sakei chu a khânpuiah an lo châng a. Val upa Fehkhama chuan him tawh lo deuhva a hriat avângin hmun him deuh zawka thu tûrin a ti a. An insawn hmain hualtute thâwmah Dârnâm rama kai tumin Sakei chu a khânah chuan a lo chhuak ta mai a. An lo kâp a, a sahuatah an fuh lo a ni ang, Thâla chu sakei chuan bawh nghalin a nghawngah sehin a vawrh lawp a, Chalthei lui tuiah a tla thla a, Sakei chuan a kalsan a. Sa chângho an inau khawm a, Hlângpui siamin an zâwn haw a. Lalnu pawhin paw ti takin, "Ka thu zawm ni ula, hetiang hi kan tawng lo tur a sin maw" tiin a tawng chhuak hial a ni. Nula leh tiangvalin an tlaivarpui a. Chhel taka ni khat leh zan khat a tawrh hnuah Pialrai lamtluang a zawh ta a, ama in bulah phum a ni. Amah sehtu sakei chuan Rabung ram a chhuahsan hnuah Zaingén ramah "Kar a pal puak a, a thi ve ta a, an teh vélin sum ruk a ni, an ti.

Thala hian 1941-ah nupui Rokfingi a nei a, a boral hian a nupui chuan nau a lo pai tawh a, a lo pian chuan a hmingah apa Sakei kah chawiin Kaprûmi an sa ta a ni. Amah hriat rengna lungphun chu Rabung bul Pamchung kawng sirah a la ding. A hla duhzâwng chu 'Ral tawh mai se lei ninawm hi' tih a ni.

BOYS SCOUT & GIRL GUIDE: Rabung awm vawi thumna 1936-1942 laiin tlawmngai pawl, Boys Scout leh Girl Guide a ding a. Ram leh khawtlang tana inpe, chhiat ni that nia khawtlang tana pawl tangkai tak a nih avangin sawrkar pawhin chhawr chang a nei thin. Boys Scout-ah mi 125 leh Girl Guide mi 100 an awm a. Pu Hawnglaia leh Pi Haudali Tlau te chuan ni 21.3.1939 khan he pawl chawimawi nân hian sial pahnih-in lung an phun a. Hei hi Mizoram UPC Pastor Quarter bulah a awm. Rabungah kum sarih an awm hnuin kum 1943-ah Aiduzawlah an chhuk leh a. Lamzâwl chu Aiduzawl khawper anga awmin Thanzualan a awp a. Hrangkima hi a pa Liankhama ho Hliappaia an awm laia kum 1884, Arsi tlâk zâna piang a ni. Aiduzawl a thut laiin kum 1950 khân a fapa Thanzuala hnénah lal nihna a hlân a. Thanzuala chuan Aiduzawl leh Lamzawl chu a awp kawp ta a. Kum 1954 August ni 16-ah lal an bang a, Village Council-in khawtlang a awp zui ta a ni. Hrângkimate nupa chu Aiduzawlah an thi ve ve in Hrângliani chu ni 11.6.1957-ah a boral a, Hrângkima chu ni 5.10.1957-ah a boral ve leh ta a ni. An boral hian kum 73 mi ve ve an ni. Thanzuala chu kum 1967-ah Saitualah a chhuk a, a thih thlengin chutah chuan a awm.

Rabung kai vawi li-na turin Rabung Village Planning Committee din a ni a, Chung mite ruahman angin kum 1979-ah Bâwkté khawh nghal a ni a. Tichuan, kum 1980 atangin mi tam zawk chu an kai a. Hetihlai hian AO Ralkhuma kutah VC mawhphurhna dah a ni a, Ni 2.3.1982-a VC thlan thar, PC Party-in Village Council hna a thawk ta a ni.

EIZAWNNA: Rabung khuah hi chanchin buatsaih lai hian mihring chenna, Job Card nei chin chu in 345 an ni. Tlângram Lo neia ei zawng deuh vek niin leilet nei tléma zâwng an

awm a; Serthlum Huan neia eizawna buatsaih chho mék an awm bawk. Loneituten buh hi an chin pui ber a ni. Sawhthing chinga hma lam pan an awm a, Balhla huan siam te, Tomato ching te an awm bawk a, lirthei hmanga eizawng an awm bawk. Rabung hi tehfung dik tak hmanga enfiah a nih hnuah BPL awm lohna (BPL Free Village) khuah puan a ni a. Chuvang chuan sawrkar atangin tanpuina cheng nuai 40 a dawng nghe nghe a ni.

Rabung khaw chanchin sawi chuan a ram chhunga ram danglam bik chanchin sawi tel ngei ngei ngai a awm a, chu chu ZAWLINGHAK a ni a, a tawi thei angin sawi ila.

He ram hi lui pali hual chhunga awm tih theih a ni. Rabung khaw thlang lam km 9 vélah khănkawn a awm a. Chu chu Zawlinghak ram chin intanna a ni a. He lai ram zim té tih lohah chuan lui dai kai lovin Zawlinghak a kal theih loh. He kawn hmâr lama Dari Khuailuiin Aiduzawl khaw hnuah Tuimarul lui a fin a. Tuimarul chu khawthlang zawn ga luang Zélin Hliappui ram Dullai luiin a fin hnuah chhim thlang hawiin a luang ta a. Tin, Khankawn chhim lama Mualzén luiin Hnahkhâr lui, khawthlang hawia luang a fin bawk a. Tichuan, Tuimarul lui leh Hnahkhâr lui Chu Zawlinghak ram tawpah infinin, Tuimarul hming pu zélin km 1 vél hnuah Kawlkulh leh Khawzawl inkâra Tuichang lui a fin leh ta a ni.

Kum 1886 vél khân Liankhama ho Hliappui atangin Zawlinghak kai an tum a. Mahse, a lo chéng hmasa Saikawmhoin thlawhmma an lak fuh hleih meuh loh thu leh, rei pawh an awm lo tih thu te an hriat avângin kai an phur tlâng lo a; Liankhama khua chu tiavai türâh an ngai hial a ni. Chung hun lai chuan Zawlinghak lei hi ruh leh khal tak a ni awm a. Mahse, Liankhaman, 'Zawlinghak lei chu Siallam dârin a nghawr düp dâwn a lawm' tiin kai ngei a tum a. Kai hreh zual deuhte pawh an phür thar leh ta a. Thlawhmma an la a, an kai zui ta a, kum sarih vél an awm a. Thil mak tak chu hei hi a ni: Liankhama ho an awm atanga vawiin thleng hian Zawlinghak ram hi loa neih réng réngin hâwpkhawp thar loh hi a awm ngai lo. Siallam dârin a nghawr düp ngei a ni ang! Liankhama hun lai phei chuan pawisa chéng khatin buh tin 30 lai a lei theih niin an sawi. Tunah erawh ram parh tha lai zawn AH & Vety Department-in Sial vulh nân an hman tak avângin lo atân neih theih a ni ta lo.

Zawlinghak ram parh zau tak hnuaiah lungpher a inphah duai niin a hriat a. Hmun khat laiah chuan a pawn lăng hle a, a zau bawk a, kal vel a nuam hle. Tin, Zawlinghak ram chhungah hian hming bik nei lui panga a awm a, chung luite chu lungpher chunga luang deuh vek an ni a, lungsum thük tak tak a tam hle. Ram hming hrang hrang nei 12 a awm a, mual hlawm lian pali, Khămkhuai kaina thin paruk; Pik pahnih; Băwk hming nghet nei pathum; mihring chén tawhna hmun pathum a awm. Tin, he ram hmun sang lai ber chu lalnu khawthlir tlâng tih a ni a, hawi vél a nuam hle, heta lalnu tih hi Hrangkima nupui a ni.

Tin, Chhüra Talhtum leh Chhüra Chi rawt lung tia vuah, a dawmna lai té bik, a lehlam mum tung lam deuh hmuh a nih avângin tun hmain lung hriamhrei hmangtute an lo chéng tawh a ni mai thei. A nih loh pawhin Mirawnggho an ni mial thei bawk. Zawlinghak ram piah lawk Vankal ramah chuan Mirawng sulhnu lungphun a awm niin Pu Liangkhaia chuan a sawi.

Zawlinghakah hian kum 1891 -ah Liankhama a thi a, a lungah engmah ziaik a nih loh avangin a fapa Hrangkiman, 'lal thlan ni si engmah ziaik loh chu a tha lo ve' tiin Lamzawl atangin lung an zawn phei a, a phun belh a, tah chuan heti hian ziaik a ni:

LUSEI RAM LALBER,
Liankhama. kum 1846-ah a piang a kum 1891-ah a thi.
He khuaa a awm laiin in 1116 an ni. Zawlnghak,
10.9.1927.
Hrangkima

tiin. A tlar hmasa thu hian Hrangkima finzia leh apa a chawimawi thiamzia a tilang.

Tin, he hmuna an awm lai bawkin Vanapa pawh a thi a, an duhsak êm avângin Liankhama thlân bulah an phum a. A lung (original) a bo tawh avângin ni 17.3.2007-ah Rabung leh Aiduzawl YMA in lung an phun thar leh ta a ni. Tin, Vanhnuailiana hova Tualtea an awm laia Vanapa kaihhruai pasaltha, Zoram hmun hrang hranga thi, an hming hriat chhuah theih chin mi 16 chu - 1. Chawngduma Tlau, 2. Chhunkeuva Khiangte, 3. Chalkhenga Fanai, 4. Darbuta Chhakchhuak, 5. Dokuala Tlau, 6. Darruma Khawlhing, 7. Doruma Vangchhia, 8. Darphawka Kawlni, 9. Darkuala Kawlni, 10. Keikawla Khiangte, 11. Pakhara Vanchhawng, 12. Tawkthiala Khawlhing, 13. Thatburha Khawlhing, 14. Zampuimanga Chhakchhuak, 15. Zabiaka Fanai, 16. Zaphunga Pautu te hriat rengna lung leh Vanapa nupui leh fanau Zawlnghak sangkhuaa thi Chhawnthangi (Vanapa nupui), Chawngthangi (Vanchiauva nupui), Ralduha, (Vanapa fapa naupang ber) te hriat rengna lung nên Vanapa thlân lungphun laitatin phun a ni.

Tin, Vanapa thih hnu kumah a nupui Chhawnthangi chu a thi a. A thih ni-ah lo an hâl a, Pâwihi pa a kan hlum avângin mi thenkhat thinrim chuan, "Engahnge kum khuaa Kumpinu bera kan neih thih ni tea Lo hâl in tih rêng rêng, kânghlum rem rum âwm pawh in nia lawm, nikum lawkah a pasal a thi a, a thlarau pawh in zah lawm ni" tiin an âng bawrh bawrh nghe nghe a, Vanapa nupui hi an lo ngaisângin an lo dah chungnung hle a ni. Heng lungphun hi ni 14.6.2023 (Nilaini) ah Minister Pu R, Lalzirlian a hawng a ni.

Tin, kum 1903-a Mizoram hmâr biala thawk tur tirhko h panga lak zinga mi Chhungleka chu Thanzuala ho Zawlnghaka an awm laiin a thi a, a lungphun pawh a la ding a, chutah chuan, LUSEI TIRHKO HMASA BER tia zia a ni baw.

TLAWMNGAI PAWL : Heng hi Rabung awm ngheh hnua tlawmngai pawl lian awmte an ni:

MUP: Kum 1984-a din a ni a, kum 2023 hian member 143 an ni. Heng zinga 25 chu kum 80 chin chung lam an ni: an zinga upa ber chu Pu Challiana, kum 95 a ni. Khaw chung lailiah RUN neiin an luahlum hle.

YMA: Kum 1963-ah Aiduzawlah din a ni a, Rabung kaiin a chhawm zél a ni. Section hi-Vanapa section, Taitesenna section, Khuangchera section leh Chawngbawla section tia then a ni a, chanchin ziah lai hian member zawng zawng 661 an ni. MUP RUN bulah office an nei. Ni 15.6.2023-ah ruai nen Diamond Jubilee an hmang.

MHIP: Kum 1981-a din a ni. Chanchin ziah lai hian Group li - Lianchhiari group, Saikuti group, Ropuiliani group leh Pi Hmuaki group-ah te an insiam a, member hi 475 an ni. YMA Office bulah run an nei.

THI HLÜM LUNG: Hei hi Rabung atanga hmâr lam km 12 véla hla, Khümwawl ram tlâng dungah a awm a. A chanchin an sawi thin dân chu hetiang hi a ni : Paihte nu pakhat hian feh kawngah nau a chhiat a, puan pawha tuam lovin an paih a. An ngaih a tha thei leh chuang si lo va. Chutia ngaihtha lo taka an awm lai chuan naute hringtu chuan mumang a nei ta a. A mumangah naute chuan, "Ka nu, puan in min tuam lova, phum pawh min phum lova, min paih mai mai a, min hmangaih lo ém mai. Ka thlân hi sialin in dawh ngei ngei tur a ni' a ti a. "Ka thlân lung tur pawh Tuiphal luia Hauvungi Li mawngah lung mâm tha tak a awm a, hrui lian pui puiin in hling ang a, mahse, a dawl lo ang, a chat zel ang. Latluak, thlür-zâi ngeiin hling ula, awlsam téin in hnük chhuak mai ang' a ti a. (Hauvungi Li hi Rabung leh Lamzawl inkâr kawng (footpath) in a paltlang a. Thihlüm Lung dinna atang chuan km 5 véla hla a ni) Thihlüm nau sawi ang chiah chuan hrui lian pui pui chuan an han hling a, an hnük chhuak thei lo va. Latluak thlür-zâi chuan an han hling a, awlsam takin an hnük chhuak a, an phun ta a. Thlân lung vantlâng tak niin a bung tawh nghe nghe a, lui atanga lak chhuah ngei chu niin a lang.

LUNG ZIAK: Hei hi Hmawngzawl, tunhma lama Rabung khuate lo chén tawhna hmun tlâng pakhat a ni. Rabung atanga km 10 chhungah, kawngpui (Blacktop) kawng chung tlâng dung pakhat lung pangah thil lem chi hrang hrang ker a awm a. A then chu Emping lem ni awm tak te, Dâr lem ang te, Selu lem ang deuh te, mihring lem te, thil lem chi hrang hrang a awm a, an rahbi tuk thlengin a la lang Chiang hlawm hle. Héng thil ziak vang hian 'Lungziak tlâng' tih a ni. Tute sulhnu nge ni tih hriat a har deuh a, Meiteiho sulhnu a ni mai thei, Aiduzawl khaw chung chu Meitei tlâng tih a ni.

CHI TUI: Rabung ram Mumsih leh Belzâwl ramah Chitui a awm ve ve a. Bêlzâwl rama mi chu a âl bik a. Rabung leh Pamchung inrina Tuiphal lui chung ram palailéngah Sih ang lek lekin Tui al deuh pûal hi a awm a. A then laiah chuan lei hnuai atangin anrawn puar chhuak pép pép a, chutihlai tak chuan Nawalhin emaw, Lighter-in emaw lo hliau ila, a alh phet phet thei. Thâl khawro laiin tui hi a tlém a, a âl zual bik. Tuithawlin an la a, Bélin rei deuh an chhuang so a, a daih hnuah taksa zût nân an hmang a, an in thin baw. Rei tawh deuhah kha chuan nau chak lo zût nâna hmang thenkhat chuan thatpui niin an in sawi.

HRISELNA LAM: Damdawi In (PHC) building hmasa ber, Saphihrik tlânga sak chu kum 1986 khân Dr. H. Thansanga, Minister-in a hawng a. Hun lo kal zélâh a panna hi chho hlir a nih avângin kawng nuam zawk tur, Dârnâm hmunah sawn a ni a, tunah chuan building tha tak awmin Doctor leh thawktu dangten an thütchilh mék a, damlo tam takin dam nân an hmang. Khuaah hian PWD IB te, Forest Department IB te leh Vety Quarter-te a awm a, kawlpheha Power -32 KV Sub-Station awmin, chu chuan khaw thenawmte nén a chawm. Tin, tui thianghlim tak, Murlen Zopui tui lak a ni a, Thâl-va-ék-chârlai tak leh tui kawng chhiat palh lai tih lovah chuan tui a hnianghnâr hle.

SAKHAW LAM: Rabungah hian Kohhran hrang hrang an awm a, chungte chu: (1) Presbyterian Kohhran. Anni hi Biak In hnihah an lawi a. Pastor pakhat Rev. R Lalnunénga s/o Rozika an vawrh chhuak a. (2) Mizoram UPC chu chanchin ziah lai hian Biak In pahnihna tur an sa mek a. Pastor 12 an thar tawh. (3) NEI UPC hi Biak In hnihah an lawi a, Pastor pakhat an thawn chhuak. (4) Seventh day in Biak In an nei. (5) Sipai Pawl (Salvation) in Hall an nei. (6) Mizo RC Kohhran in Biak In an nei. A dang chu Lalchhungkua, Israel, Sabath leh Pawl lo te an ni.

SUMDAWNNA LAM: Rabung khaw chhuak, sumdawnna lama mi langsår hmasate chu: Buangthanga, Zangéna, Suakchhunga, Hrångbåna, Thasiama, Zalianchhunga, PC Sapnéla, LP Thangzika (Lunglei), Lalzåma (Manipur), Lalkhuma (Manipur), Aithuama (Myanmar) te an ni.

POLITICS LAM: Rabung khaw chhuak, politics lama mite hriat hlawh hmasate chu:

- 1) PC Săpnéla (L) s/o Chawngkhuma, MDC(EM) 1969-1972
- 2) PB Nikhuma (L) s/o Chhunbura, MLA(Minister) 1972-1977
- 3) PL Thangzika s/o Lianzinga, MLA 1972-1977, 1989-1993 (Dy. Speaker)
- 4) PB Rosanga s/o Chhunbura, MLA, Cabinet Minister, 1978-1984
- 5) PC Lalhmingthanga s/o Vanmawia, Mayor, AMC (2016-2020)
- 6) R Thanglura s/o Saithangvunga, AMC Deputy Mayor. 2021 till date

ZIRNA LAM: Primary Sikul pahnih, Middle Sikul pakhat, High Sikul pakhat leh Higher Secondary Sikul a awm. Khaw thenawm hnai ber ho Aiduzawl, Pamchung, Murlen, Khualen leh Vankalte hian High Sikul an neih loh avangin Govt. Khawzawl High Sikul-ah HSLC exam thin a ni. Tin, Rabung khaw chhuak, zirna lam leh hna thawh nei mi hlawhtling, langsår zualte chauh han sawi ila:

- 1) Dr C Lalnunpuia MBBS s/o C Rolianchhunga
- 2) Dr Ramhluna MBBS s/o Ngoliana
- 3) Dr Lalnunsanga NBBS s/o Lanthangliana Wo Vanlalvéni
- 4) Dr Vanlalhruaia BVSc. s/o Ch Lalsånga, Chief Vety. Officer
- 5) Dr Lalchhanhima MSc., PhD s/o Thangthuami
- 6) Laldingpuui MA(Eco) s/o Vankhawpuimawia(L), Topper MZU(2016). Manual Assistant, Legal Metrology
- 7) Hmingthanzauva s/o Thanzåma, Associate Professor Govt Champhai College (Rtd)
- 8) Lalhmingmaka s/o Saithangvunga, Under Secretary (Rtd)
- 9) PC Lalzårliana, Livestock Superintendent
- 10) Lalhmingliana Sailo, MAP Commandant (Rtd). Rabungah a khawsa
- 11) PC Lalthlamuana s/o Lalhmingthanga, Jt. Director, LAD (Rtd). Aizawl Dawrpui Véngtharah a inbengbel
- 12) K. Sapthlengliana, SDO (PWD)

HLA LAM: Kristian hla leh hla lénglawng phuhtute:

1. Taivéla Mangkhéng: (1884-1946) Hla a phuah nual nia sawi a ni a. A then erawh mi dang phuah anga sawi a awm a. A dik leh dik loh hriat chian a har a, a hralh nge, a pe tih a hriat theih tawh loh. Chuvangin, Hla bua a hming lanna chauh hlate tarlang ila:
 - 1) Ka tan Ni leh Thla réng a eng tawh lo.
 - 2) A lungngaihna hmun i thlir ang.
 - 3) Chu zăn lungngaihthlăkah, tih te an ni.
2. Chhaimawia Pachuau: (1907-1959) A hla phuah chu 'Van inlarna lehhrilhlawkna (Zaipawl sak mi Hla pui bu-ah dah a ni).

3. Lalhmingthanga Chawngthu: (1919-1989), A hla phuahte:

*Turnipui leh Thâl favâng lo thleng tur hi,
Kei zawng saisén nau ang ka tahna.*

tih leh,

*Bung tlângpui chhuahtlâng Bing lii liai,
Par chhing chheng.*

4. Döliana Huha (1919-2002) hla phuahte:

- i) Aw, ka Di lungrunpui sakhmel tha sensiari,
- ii) Thapui suihlung lénin khua hawi vel teh, Kan tuanna tlâng a lang lawm ni?
- iii) Vangkhoa a zau zaléng an tam, Min tum reng ka tawng lo.
- iv) Aitenâwn pâr sawi lai mi u,
- v) Sakhmel a chul zo ve, biahzai a thar leh e, tih te an ni.

Doliana hla pahnihna khi 'Ka hmaah lui ral khaw mawi chu a awm' thlûk a ni.

5. Rodénga Renthlei (1913-1978) : 'Engah nge Parte Valném a riang hi lém ang min der' tih a phuah a. Zoram buai tih lai khân a lâr hle. Siampuii Sailo in a sa a, chu chuan a tilâr zual hle a ni.

Tlangkawmna: Aw le, heti hian thu hi khar dawn ila. Liankhama nupui Rochhingpuii hova Zawlnghak an chhuahtsan hnu khân an fapa Hrangchhuana zuitute chu Ngopa leh Khawdungseiah an cheng ber a. Hrangkima beltute erawh chu Rabung, Aiduzawl leh Lamzâwl khuate hi an ni. Khaw hrang hrang hian mahni lalte Zia an la deuh zel a. Hrangkima kha mi zaidam leh taima, lal ngilnei tak a nih avangin a mi zia chu a khuaten a zui zél a ni. Tin, kan chénna in chu tha tak pawh ni lo mah se 'Hei hi ka in, ka ram, ka ta a ni' kan tih awmna hmun nghet, thlamuang taka mutmu kan tuah theihna hmun leh ram hi a nuam ber ti ila a sual âwm lo ve. Chutihruah chuan khua chu a lian emaw, a té emaw, khawtlâng fai leh thianghlim, dan leh thupekin awmzia a neihna, chhiat ni leh that nia intawiâwm thatna leh mihring inzahtawn thiamnate hian khua a tinuamin a tizahawm baw. A hnukung ber atân chuan Kristian kan ni a, dawn sawi leh hlemhlétna lakah inthiar fihlim ila, khua leh tui rinawm, midang tâna malsawmna ni thei turin kan thiamna leh finnatte hi i hmang ang u.

...oooOooo...

RIANGTLEI CHANCHIN

Riangtlei khua hi Mizoram khaw chhak lam, Khawzawl District chhunga awm a ni a. Aizawl aṭanga 200 km vela hlaa awm a ni. Chhim lamah Biate, thlang lamah Sialhawk, hmar thlangah Khawhai, hmar lamah Chalrang leh Vangtlang, chhak lamah Zawngtetui leh Bungzung, chhim chhakah Khawbung khua ten an hual a ni. Riangtlei ram chhungah hian chhim lamah Sirte tlâng 4230 ft a sâng a awm a, khua aṭanga 2 km vela hlaa tlang pharh nuam tak mai a ni a. He tlâng bul ṭhut kâwn zau takah hian Hmar hnam Riangtlei leh Biate ho an cheng tawh ṭhin a, an Sunhlu kung phun awmze nei taka tlarte pawh hmuh tur a awm. Hmar chhak lamah Chhinlung tlâng dung 4130 ft vela sang a awm a. Chhinlung tlângah hian hmanlaia Mizo pi leh pute thlangtlâk tirha an chênna pûk a awm a, ‘Chhinlung pûk’ tih a ni. Tin, Chhinlung tlângah hian pi leh pute thlang tlâk tirh (AD 1650) vela an sulhnu, lei laihzawl te, lungphun te, lungrem zawl te, bel kehte hmuh tur a awm bawh a ni.

Hmar thlang lama Sialhawk nen an in ramrinaah Lungpum lui a luang a, chhim lamah luang zelin Raifan lui a fin a. Raifan lui chu Biate ram nena a inrinaah a luang zelin khawchhak lama Bungzung nena ramri atana hman khawchhak tuipui chu a fin a. Tin, Riangtlei leh Chalrang inrinaah Elva lui a luang a, chu lui chu khawchhak lamah luang zelin Vangtlang ram nena inrinaah luang tlangin khawchhak tuipui a fin leh a ni.

KHAW HMING PUT CHHAN: Riangtlei khaw hming put chhan hi chiang taka hriatna awm lo mah se upate sawi chu- Hmarho zingah nula leh tlangval inhmangaih deuh an awm a, an nu leh pa ten inneih an phal si lova, anni lah an inṭhen thei bîk si lova, an lo chêtusual tâkah chuan an lo tlângthang ta a, tihngaihna dang hre ta hek lo, an tlânbo dûn a. Hnim hnah leh thei rahte ringin ramhnuaiah an vâkvai a, nakinah chuan lui pakhat an zawh a, chu lui chu râipuar chunga an zawh a nih avangin ‘Râifân’ an ti ta a. Râifân lui chu a mawng lamah zawh thla zelin khawchhak tuipui kam an zuk thleng a, chuta an awm laiin a naupai chu a hrin a lo hun ta a, a nau nei hlim tuihâl chuan ‘tui aw’ a ti a. Chulai ram chuan ‘Tui aw’ hming a put phah ta a ni. Chuta ṭang chuan lêt chho lehin Sirte tlângah an chuang chhuak a, chutah chuan an inbêngbel a. ‘Tûnah chuan rethei leh riangvai taka kan vahvaihna chu a lo tâwp ta a, kan lo tlei ve ta e,’ tiin an awmna chu ‘Riangtlei’ an ti ta a ni.

A dang leh chu Riangtlei ramah hian eng hun laia lo chêng nge an nih chiah hriat chian loh Hmarho chu Sirte tlâng (Riangtlei hmun hming putu tak zâwk) ah an lo chêng tawh a. An Sûnhlu phun tlar pawh tûn thlengin ala ding hlawm a. Chûng Hmarho zingah chuan ‘Riang hnam’ (Hmar hnam pêng pakhat) ho an tel ve a, an hnam hming chawiin ‘Riangtlei’ an ti a nih ring an awm.

Sawi dan dang leh chu tûn hma aṭangin Riangtlei ram hi buh ei tlinna, buh ṭhat duhna ram a nih avangin khaw ṭhenawmte pawhin ei leh bara inhnangfâk nana an lo hman ṭhin a. He khuaah hian mi rethei leh harsa zâwkte pawh an pêm luhin buh a ṭhat duh avangin an intungnung thuai ṭhin a. Chutianga mi rethei leh harsa zâwk te pawh an lo ‘tleina’ a nih avangin Riangvaite tleina- ‘Riangtlei’ an ti ta a ni.

KHAW DIN A NIH DAN: Hun hmasa lamah Riangtlei ramah hian eng hnam hnam emaw lo awm fo tawh mah se an chanchin han chhui chian a, han chhui thuina em em a awm

hran lova. An sùlnu leh an pêm sawn tur vel aţang mai lo chuan sawi chian fak tur a awm meuh lo a ni. Sialhawk lal Liankanglova Sailo pawhin hun engemaw chen chu Riangleiah khua a han dinin a lal a, Sialhawkah a lêt leh a. Tin, Khawhai lal Zataia pawhin Rianglei rama Chhinlung tlâng (Fuhmun tlâng pang) ah hun rei vak lo chu khua dinin a lal ngei tih chu hriat a ni.

Kum 1925-ah Sialhawk lal Liankanglova Sailo (1906-1926) fapa upa ber dawttu Lallula Sailo hoin In 30 vel chuan Rianglei khua din a ni a. Chuta ţangin mei mit lovin Mizoram buai avanga khaw khâwm kum 1969 thleng awmin, kum 1969 March ni 7-ah Sialhawkah a tam zâwk leh Biate ah a ţhen khâwm an ni a. Ni 7 May, 1969-ah khua an hâl a. Kum 1972-ah Sialhawk aţangin Riangleiah lêt chho lehin vawiin thlengin mei mit lovin a awm ta a ni.

Rianglei khuaah hian Sailo lalten kum 1925-1954 thleng ro an rêl a. Hetiang hi an rorêl indawt dan a ni:

1. LALLULA SAILO (1925 - 1937) : Rianglei lal hmasa ber niin kum 1925-ah In 30 vel nen khua a din a. Kum 12 chung ro a rêl. Lal ţa tak a ni a, Kristian hmasate zinga mi a ni.
2. RINPUII SAILO (1938 - 1946) : Rinpuii Sailo hi Lallula Sailo nupui a ni a, a pasal a thihin an fapa Tlangliana Sailo chu ala naupan em avangin rorêl thei ala nih loh avangin ro a rêl ta a. Kum 1946 thleng ro a rêl a, lal ţa tak a ni.
3. TLANGLIANA SAILO (1946 - 1954) : Pu Tlangliana Sailo hi Lallula Sailo leh Rinpuii Sailo fapa niin, apa thih aţanga kum 9-naah tlangvâl niin ro a rêl ţan a. Nupui atan Chalrang lal Thangkima Sailo fanu Thanhengi Sailo nen an innei a. Mizoramin District Council a neih hnu, VC neih hmasak ber kum 1954 thleng ro a rêl a. Lal ţa tak a ni.

Rianglei khuaah hian YMA, MUP, MHIP leh G&SA a awm a, zirna lamah Anganwadi Centre-I, II, leh III awmin Govt. Primary School, Govt. Middle School leh High School te a awm a. Kohhran 3 Presbyterian Kohhran, UPC (NEI) leh UPC (Mizoram) an awm bawk.

Rianglei khua hi khaw thleng rem leh hmun hma rem tak a ni a, in leh lo dinna hmun ţa tak tak awmna a ni. A khuaa cheng tam zawkte hi lo neia eizawng an ni a, ranvulh leh huan 207hali siama eizawngte pawh an awm. In 100 khuaa in chhâl niin in luah lai tak erawh chu 95 a awm mêk a, mihring hi 517 an chêng mêk a ni. Ruihhlo zuar awm lohna khua niin mikhualte tlangnêl leh zalên tak a, nuam taka an awm theihna khua, chhiat ni that niah pawh intanpui leh inggaihsak tak khua niin chhiat tawkte tan a thlamuanthlak thin hle. Khaw inlungual, ei leh bara intodelh khua an ni.

...oooOooo...

SIALHAWK CHANCHIN

Lallawmsanga Zote, Sialhawk
Contact No : 9774853159

Zoram khawpui ber Aizawl a\anga 200km vel zet a hla Tuichangral tlangdunga awm Khawzawl District huam chhung khaw 28 zinga khaw pakhat, Sialhawkah i lo zin dawn a nih chuan i bangbo lutuk loh nan hengte hi i hriat hmasak atan ka han hrih ang che.

Sialhawk hi chhuah chhawng khaw kuam deuh, a dung 2km leh a chanve, 1km vel a zau a ni a. A khaw \hut hmun hi Zo thengthaw nuam tak niin a chhunga mihring chengte pawh harh vang tak a ni. Chhiarpui hnunung ber (2011) a a lan danin Sialhawkah mihring 2279 chengin tun dinmun (2021) -ah hian mihring 2491 (Mipa 1204 leh hmeichhia 1287) an cheng mek a. Chhungkua 487 an awm mek a ni.

Khaw chanchin leh indin chhoh dan: Sialhawk khua hi Sailo Lal ropui tak, Lallula fapa Vuttaia nupui Neihpuithangi hovin Kum 1895-ah din a ni a. District khawpui ber Khawzawl atanga chhim lam Tuichangral tlangdung 45km a hla a awm a ni. A khaw hming hi mizo phuah a ni lo va, Sialhawk ram khuaihnuai hmuna Hmarho an awm laiin khaw thar kaina tur an en a, chutilai chuan tuna Biak In kawtzawl ah hian Sial an lo tla a, an lo chen fai vek mai a, khaw thar kaina tur en tute chuan *‘E hei!! Sialin an lo hawk vek tawh a lawm, SIALHAWK a nih hi’* an ti a, Sialhawk tih hi a hming atan a pu hlen ta a ni. ‘Hawk’ tih hi Hmar \awng a ni a, *‘tichhia, tifai, chenphulh’* tihna a ni a, tichuan Sialhawk tih chu *Sial chenphulh emaw Sial tihfai emaw* tihna emaw a ni.

Lal leh an thlahte chanchin: Sialhawk hian lal 4 an nei tawh a, Sialhawk khaw dintu Neihpuithangi chu Lal hmasa ber a ni. Neihpuithangi hian kum 1895 atangin kum 1913 chhung lal niin kum 1920-ah kum 105 mi niin a boral a ni.

Liankanglova hi Kairuma fapa a ni a, kum 1894-ah a pi Neihpuithangi ro relpui turin a pa Kairuma’n Khawlerh atangin Sialhawkah a tir chho a. A nupui hming chu Thangpuilali a ni a, rorel tan tirh hian kum 18 mi a ni. Liankanglova hian kum 32 chhung ro a rel a. Sialhawka Kristianna lo luh lai hi Lal Liankanglova rorel lai a ni a, a dodal lo. A dodal loh avangin a khaw mipui ten an fak hle. Kum 1926-ah kum 50 mi niin Sialhawkah boral a ni.

Ngurliana hi Sialhawkah kum 1910-ah piang a, kum 16 mi a nihin a pa Liankanglova’n a boral san a, a pa boral atang hian ro a rel tan a ni. Kum 1925-ah Lower Primary a pass a, kum 1926ah ro a rel tan. A nupui hming chu Thuamkungi a ni. Lal Ngurliana hi zai ngaina mi a ni a, nula leh tlangvalte zai dan leh *‘aw’* hman dante a zirtir thin a. Kut hnathawk ngaisang tak mai a ni a. A khua leh tuite entwain atan thingpui huan zau tak mai khaw mawngah kum 1934 khan a siam duai mai a ni. Lal fing leh them thiam a ni a, a taimain khawchhung rorel a duh uluk em em a, ram kang leh sa tla umahte hian tlan hmasa berah a tang thei zel a. Chuvangin a Upaho leh mipuite pawhin an zuilo ngam thin lo a ni. Khawchhung insak dan pawh a duh fel em em a, kawtthler te ngil takin a rem a, in sa reng reng en fel pui loh a nei ngai lo. Kum 1940-ah kum 40 mi niin a boral a ni.

Lalthima hi Liankanglova fa upa ber niin a pain Tlangpuiah a laltir a, Ngurliana boral hnuah kum 1940-ah Sialhawkah a lal tan a. A nupui chu Laltinchhing a ni. Lalthima hi

Sialhawk lal hnuhnung ber a ni a, kum 1954 VC thlan thleng a lal a ni. Kum 1962-ah Aizawlah a pem a, chumi hnuah Kolasib-ah pem lehin hetah hian a boral ta a ni.

Pasalthate leh an chanchin - *Rualmura* - *Rualmura* hi kum 1927-ah Sialhawk khuaah a lo piang a, a pa chu Chhunchungnunga niin a nu chu Zakungi a ni. Rualmura hi mi chak leh infiamna tuimi leh mi tlawmngai tak a ni a. a naupan tet atangin nu leh pa zirtirna pawm mi a ni a, mi huat zawng sawi hlau tak, tlawmngai lo nih hlau reng reng a hun hmang mi a ni. Rualmura hi sapela ram vak tuimi a ni baw. Vawi khat pawh Riangtlei leh Sialhawk inkar Riangtlei kawngah nghalchang sual deuh mai hi a awm a, an thlawhhma thlai chin tam tak tihchhiat a neih bakah an thlawhhma kal tur han dan chang a nei fo mai a. He nghalchang sual tak mai hi tihhlum theih dan tur khawtlang chuan an ngaihtuah ta a. Chutia mipuiin an zim chuan Riangtlei kai raifan lui ruamah an zim thla a, mihringin an tam hneh em avangin an hual bet a. Rualmura chuan chu sanghal chu umin a lu tak maiah a han vaw ta vak mai a. Thi ta mai lo chuan nghalchang chu Riangtlei kai leilawn hnuaiah chuan a tawm ta tlat mai a. Rualmura chu a letling zawnga inkhaiin sanghal tawm tlat mai chu a zuk chhun ta chiam mai a, a chhun hlum ta a, a len zawng an han teh chuan sum sarh zet a lo ni nghe nghe a ni.

Vawi khat pawh Pi Thangheli (Manbawih nu) chu fur khawchhiat laiin a ram kal chu a lo haw ta tlat lo mai a, ruah a sur tamin khua lah chu a thim nasa mai si a. A zan a zana zawng turin ruahpui vanawn leh khawthim karah chuan an chhuak ta a. Rualmura chuan au chung zawng zelin nakin deuhah chuan kawrh ruam chhengchhe tak karah pawnfen pakhat chu a han hmu ta a. Chuta tanga thlang deuhah chuan Pi Thangheli chu kham kar chhengchhe takah zawi vek a lo muin khawvawt chuan thi ang maiin a lo hmet chau hle a, Pi Thangheli hi tek den a nih ngei ring an awm a. Amah chauh chuan Rualmura hian kham chhengchhe tak karah paw bahlatin in thlengin a hawnpui ta a ni.

Vawi khat pawh Aizawl AR Lammualah Lianhluma chak leh lar tak nen inbuan tura tihfel an ni tawh a, AR Lammualah chuan Zoram mipui inbuan en tur chuan an rawn pungkhawm nasa mai a. Rualmura chu kawr hlipin inbuan peih atin a awm tawh a, mahse Lianhluma chuan a duh leh ta tlat lo mai a. A buan duh leh loh chhan an zawh chuan “A inphelh ka en hian Sakei pian a ang em mai a, ka buan duh loh zawng tak a ni” a ti ta tawp mai a. Inbuan pawh en ta lo chua mipui an tin ta tawp mai a ni.

Tum khat pawh Aizawlah inbuan chak intihsiaak buatsaih a ni leh ta a. Rualmura pawh palaihawlah a chhuak ve a, lawmman pakhatna a la nghe nghe. Hemi tuma lawmman pahnihna dawngtu chu Rodinga tuna Champhai Vengsang-a awm khi a ni. Hemi tum hian zoram puma champion nih tumin eng anga lian pawh ni se buan a tum tlat a, mahse hotu lam ten paliana tel chu an remti lo a. Rualmura chuan hotute hnenah chuan “Paliana ka tel inphal lo a, palaihawla champion ka nih chuan palianah champion chu min buan tir thei angem?” tiin a zawt ta a, an ni chuan an phal thuin an chhang a. Chutia palaihawla a champion takah chuan palian inbuan chak chu a cho chho ta a. Palian chak inti leh champion ngei pawh chuan Rualmura chu a buan duh ta tlat lo mai a. Rualmura chuan a chakzia han tilang tur pawhin hun a nei ta lo chu hreawm a ti lehling hle a, lungawi takin palaihawla champion niin a haw ta a.

Mizoramah Mizo Union a lo din phat khan lal ban a lo ni chho ta a. VC -te inthlan a lo ngai a, VC inthlan hmasa berah chuan VC atan thlan tlin a ni a, hemi tum hian VC naupang ber record a ni nghe nghe a, tum (term) hnih Sialhawk VCP-ah atang chho hial a ni. Sialhawk GSA President hmasa ber niin YMA Adviser hlun a ni baw a. A tel lo chuan YMA hi a kal thei meuh lo an tih thin pa tlawmngai leh khawhar hla hria; khuangpu hlun a ni. Sialhawk Branch YMA pawhin vawi 3 ngawt chawimawina a hlan tawh nghe nghe a ni.

Rualmura hi hmeithai leh pachhiate tana a tha leh zung sen nuam ti em em, mi tlawmngai leh khawtlangin a an thlamuanpui a ni. Mizoram Upa Pawl General Headquarters pawhin April ni 18, 2004-ah kawng chi hrang hranga teh a mi chungchuang bikte hnena a hlan thin chawimawina sang Mizo Tangkapui, Vanapa Hall-ah a hlan tawh nghe nghe. He Tangkapui hian Certificate leh Rs 5,000/- a keng tel baw. Heti hun lai hian LPS Skylink leh Doordarshan-ah te Rualmura an kawmna hi an tichhuak nasa hle.

Rualmura hian fa 13, mipa 5 leh hmeichhia 8 a nei a. A fateah hian 9 la damin mipa pathum leh hmeichhe pakhat an boral tawh a, Rualmura hi march ni 4, 2017 khan kum 91 mi niin a boral a ni.

Indona/inbeihna hmun hmingthang: - *Pasaltha Ralbilha Puk* - Ralbilha Puk hi Sialhawk leh Biate inramrina bul Sialhawk ram lama awm a ni a. Khawzawl - E.Lungdar PWD Road atanga hla lote a awm a ni. A awmna hi kawng chung kham bul biru tak mai a awm a ni. A zau viau a, a san lam erawh chu 5ft. vel, thian zaho khat tan chuan inkulhna tham a ni. Mei chhem pawhin khawdang atangin a lang thei vak lo a, ral bei tur ten chuan han tawm nan a remchang hle a ni. Biate leh Sialhawk inramrina lui Lungchang/Phawtun hnar Sialhawk ram lama awm a ni.

A hming put chhan chu kum 1880-1885 hun laiin Sailo Lal Vuta faten Pawi Lal Nikuala, Chawngtlaia awm chu tanrualpuiah an sawm a, Pawi Lalin Sailo Lal a tanrualpui tur chu Halkha paw hovin Nikuala Chawngtlaia lal chu thah tumin an pasaltha huaisen Ralbilha hovin an rawn thawk chhuak a. Biateah an inkulh phawt a, chuta an awm lai chuan Nikuala chu an han hrih a. Ralbilha ho chu Biate atang chuan an rawn chhuak a, he pukah hian an inkulh ta a. Chuta tang chuan Ralbilha Puk tih hming a lo pu ta a ni.

Ralbilha ho chu Nikuala hote chuan (Tuna paw thah kawn) an tih hmunah sawn an lo cheng a, an pasaltha huaisen ber chuan kawnglaia chhawl insawh hliahin silai kau sain a lo cheng a. A thiante a hmalam kawngsir tuakah an awm baw a, Ralbilha hote chu an lo kal ta ngei a, kawnglaia chhawl chu a hmasa ber chuan a han keu a, an pasaltha chuan a han kap ta thuai a. An mahni zawn theuh a mi an lo kap a, tleirawl pakhat a tlanche hman a an um a “I hming chhal rawh le” an ti a, “Keimah Ralbilhsihsinga” a ti a. Mahse, Ralbilha tak a nih an ring lo a, a hmasa bera an kahlum tak kha a nih an ring thung.

SIALHAWKA MI CHAK BIKTE

Vaichaka (Mi chak) - Sialhawk khaw chak ber nia sawi thin chu Vaichaka a ni. A chak dan chu Zawlbuka mikhual lo kalte nen an inbuan te hian bawhtah chhuat te hi a kezungpui hian a phiat tawm tawk thei a ni. Tin, thlam chakte hi vawi khatah a pu zo vek mai thin a, raw hmun a rua a sahte hian a hung ami a duhzawng a sahte hian hnueh thlak zawh loh a

nei ngai lo va, a chung zawl leh zawl loh pawh a en thei vek a ni. A daikal pahte hian thing lukham turte hi a thliak a a pu haw zel mai a ni. Pathian thu a lo awi ta a, Kohhran upa atan an thlang a, Biak In saknaah pawh ban tur sei deuh mai pa hovin an zawn a, kawrh kamah an kal thei lo va, "*Khawi maw, keiman ka pu mai ang*" a ti a, kawrh kam awih lai zawng chu a pu ta mai a, hmun nuam chinah an zawn leh a. Mi chapo lo tak niin miin a chakzia an hriat hi a hlau hle a ni.

Hranghrima (Mi chak) - Inbuanah chuan Hranghrima hi chak hmingthang hmasa ber a ni. Kum 1929-ah Mizoram Bawrsap G.G. Helme (Hem sap-in) Mizoram Lal zawng zawng a ko khawm a, an khaw chakte theuh hruai turin a ti baw a, Sialhawk Lal Ngurliana chuan a upa min ber chak baw si Hranghrima chu a hruai a, lai 60 laiin an khaw chak an hruai hlawm a. Sipai lammualah Mizoram inbuan chak zawnna an nei ta a. Mahni tum an hneh loh chuan an tla zel a. Hranghrima chuan a tum hneh loh reng reng a nei lova, a tawpah (Final) Haubuanga Piler khua nen an inbuan a. Hranghrima chuan a lu chungah a kengkawh ta reng mai a, a tang hman lo reng reng a ni. Mipui chu an au dur dur a, Mizoram inbuan chak ber a lo ni ta a ni. Hemi hma hian chak ber zawnna a la awm ngai lo va, Hranghrima hi a khingpui ten vawi khat mah an la kang ve lo a ni. Amah hi lai upa min niin Sialhawk VCP hmasa ber a ni a, December ni 25, 1997 khan a boral a, Sialhawk thlanmualah vui liam a ni.

Hranghmingliana Fanai (Hrangpuia) - Hranghmingliana hi February ni 23, 1953 khan Sialhawk khuaah a lo piang a, a nu hi Thanmawii niin a pa chu Pu Kawla a ni. An unau hi mipa 8 leh hmeichhia 4 an ni a, Hranghmingliana hi a upa lam atanga chhiar a 5 a ni. Hrangpuia hian chak lamah chuan chhun tur a nei duai lo viau hlawm a, a pa lamah chuan Vawmruma hi tlangval lai pawh a inbuan chak leh mizawn inchuh pawh a mi panga velina an bawrrawn thin a ni a. A nu lamah pawh a nu pa Hranghrima (A pu) hi Mizoram palian inchai chak ber nihna lawmman lo dawng tawh tawhtu a ni baw. Hrangpuia hi mizopaah chuan pa te lo tak a ni reng reng a, a san lam 5.10ft. leh a awm len zawng 43 inches a ni a, a kawng len zawng hi 37 Inches a ni baw a. 90 kg lai a rit a ni baw.

A chak lanna chi hrang hrangte - Kum 1983-ah a pa Kawla lungphunna tur Sial lei turin Biateah an kal a, khawchhak Sechal an va lei ta a. Biate khawdai 1 km vel lek an han kal chu sial chu a kal duh ta lo va, a phurh nan Biate motor (TMB) an va dil ta ringawt a. Anau kum 12 mi leh a thianpa chu a nghawng hruiah leh a meiah TMB atang chuan a pawh tir a, amahin Sechal chu a han pawm kang a, a hlang ta mai a. Driver chuan mak a ti hle a, Khuaah an phur haw ta a ni.

Kum 1994 Mizoram Gospel Centenary lungphun tur Sialhawk South Kohhranin a hnuh nan hruipui an chhat a, zawm a ngai ta tlat a. Tlangval panga lai chuan an herhsawp zo lo va, Pu Hrangpuia va kal ve chuan a herhsawp a a zawm ta mai a ni.

Kum 2001 March thlaah PHC Quarters pakhat a sa ve a, a ban concrete an phun zawh vek tawh chu J.E. duh dan a nih loh avangin sawn leh turin a ti a. Tihchhiat leh ai chuan tiin 3ft. laia hlaah chuan concrete ban 9ft. a sei 9 Inches a lian chu a pawm sawn phei ta mai, J.E. pawh chuan mak a ti hle a ni.

Kum 2006 a Govt Middle School Diamond Jubilee lawmna tur Sial an lei chu a ki pahnihah vuanin a elhthlu bawk a ni. Video clip-a dah niin tunah hian Youtube lamah hmuh theihin a awm a ni.

Skylink Cable-in kum 2007-a Mizoram pum Talent Hunt (Intihsiakna) a siam a, mi 325 lai telnaah thiam zawng chi hrang hrang entir a ni a. Hrangpuia chuan chakna lam a entir a, hetah hian Iron Rod sut 7 a banah a vet zawt zawt a, Parachute hrui thar ramsa awhna tur atan thanghruia an hman thin pawh a kerekah hlingin a pal chat thei a. Mizo thleng kum (Aluminium thleng) pahnih chu awlsam tein a zial thei a ni. Gas bur paruk khat vek a taksaah phuar betin a dinpui zo bawk. Coconut rah chu a chhip a kawm kaw pawp a a kut lawngin a kheh hmiah thei bawk a. Buhfai 50kg a rit chu a ke ding leh veiah phuar betin bag thum phur bawkin a kalpui thei bawk a ni. Hemi tum hian Mizoram pumah lawmman pakhatna a la a ni. Tunah hian kum 68 mi niin Sialhawkah a la dam.

Capt. L.Z. Sailo (Padma Bushan Awardee) - Capt. LZ Sailo (Lalzuala Sailo) hi November ni 21, 1924-ah Sialhawk khuaah a lo piang a. Apa hi Sialhawk lal Lianhanglova a ni a, a nu hi Sapthangi a ni. Nupui atan Ngurthanzuali a nei a, fapa pathum leh fanu pathum a nei a ni. Capt. LZ Sailo hian Indopui pahnihna hun lai November ni 21, 1941-ah Indian Army a zawm a ,kum tling lo ni mahse lal fapa a nih avangin ngaihnhathiam a ni a. Sipai a tan hnuin Kithener's College, Knowgong Central India-ah Intermediate of Science a zir a tha takin a pass a. Intermediate of Science degree a lak hnu hian Viceroy Commission Officer-ah a kaisang a, an College-ah French Subject a lak avangin UNO Peace Keeping Force zawm tura thlan a ni a. Kongo, Africa-ah a thawk a, sipai a a tan chung hian khawvel ram tam tak a tlawh kual a, Geneva khawpuiah Red-Cross Society-ah a thawk tawh bawk a ni.

Capt. LZ Sailo hi thu leh hla lama tuimi a ni a, lehkhabu pawh 12 lai ziakin la chhuah loh thahnem tak a nei bawk a, a lehkhabu ziahte chu - *Runlum nuthai, Mizo Academy of Letter in Book of the tear 2002, Hmangaihna tluantling (1978), Thanghniangi leh Rualkhuma (1991), Mizo hnam din leh thu leh hla (1991), Awi karei Lucknow (1997), Awmkhawhar suihlunglen (1998), Thilmak chhui sen loh (1999), Suihlunglen hlahril (2001), Hmanlai an chang zo ta (2002), Awi karei Lucknow -II (2003), Nghilhloh par (2004), Rose-par vul ve ta rih lo chu (2005)*. Heng bakah hian lehkhahua chhuah loh thahnem tak a nei bawk. A hla phuah zingah Insuihkhawm leh zai i rel ang u tih chu a larpui hle. Capt. LZ Sailo hi Northest Poet's Meet, 2005-ah a bika hun pek zingah a tel pha bawk. Kum 2004-ah Mizo Academy of Letters-in Vanapa Hall-ah Meet the Authors, 2004 a buatsaihah sawm bik pathum zingah a tel bawk. Capt. LZ Sailo hian hla 400 chuang leh hla chhammi 2000 chuang phuahin chanchinbu hrang hrangah article thahnem tak a zia bawk.

Kum 2002 kum atangin ruihtheihthil a buai thinte enkawlina hmun Gamnuam, Kristian Home, Churachanpur chuan *Home Father* nihna a pe a, Nupi lal Aniversary vawi 61-na, Churachanpur-a an lawm tumin khuallian a ni a. Heng bakah hian Zohnahtlak hnam peng Zirlai Pawl hrang hrang; Hmar, Lai, Bawm, Mara, Ranglong, Siamsimpawlp, Thado Zirlai Pawlte hian khuallian atan an sawm thin bawk. Kum 1981-1999 chung khan Manipur-ah Zo Re-Unification Organisation President a ni a. Chhinlung chhuak zofate insuihkhawm theihna tura theihtawp chhuaha sum leh pai, tha leh zung senga kum 18 teh meuh a thawh avangin kum 2000 khan ZORO Headquarters chuan Gaidinlu Award a hlan.

Kum 2000 khan Lelte Magazine chuan Lifetime Achievement Award a hlan a, September ni 12, 2002, Thu leh Hla Kutpuiah Mizo Writers Association leh Art & Culture Department-in Certificate of Appreciation an hlan bawk. Kum 2000 khan India Republic Day lawmna New Delhi-a neihah India mite chawimawina sang Padma Award dawng zingah telin Civil mite chawimawina sang Padma Bushan chu hlan a ni a, mizo zinga dawng hmasa ber leh dawng awmchhun niin April ni 5, 2007 khan India Presidentin a hlan. Capt. LZ Sailo, mizo pa ropui chu June ni 25, 2008 khan a boral a, Mission Veng thlanmualah mi bikte an phumnaah ropui taka zalh a ni.

Zai thiam leh hla phuah thiamte

Pu Lalsangluaia Renthlei - Lalsangluaia Renthlei hi Pu Zoliana (L) leh Pi Kapmawii te fapa naupang ber a ni a, kum 1972 March ni 2-ah Sialhawk khuaah a piang a, an unau hi 9 niin mipa 5 leh hmeichhia 4 an ni. Sialhawk Primary School-ah zirna bul tanin Govt Middle School Sialhawk atangin pawl 7 a pass a, kum 1991 khan Sialhawk Govt High School atangin HSLC a zo.

Pu Lalsangluaia Renthlei hian Sialhawka a thiante nen Music group (BCML) dinin zai lamah an theih tawkin hma an la a, mahse an thianpa Maitawka'n a thihsan tak avangin an *band* hi a tawp leh ta a. Hemi hnu hian mal zai lamah inhmang chhovin hla tha tak tak a phuah thin. Kum 1999-a YMA General Conference Champhaia neih a nih tum khan a hla phuah 'Zohnahthlak Lanu' tih chu sain heta tang hian Lalsangluaia Renthlei hi Mizoram mipuite chuan an hmelhriat tan a, Aizawl Local Cable TV leh DDK-ah te zaiin mite hriat a hlawh lehzual a. Kum 2000 khan a Single Album 'Zohnahthlak Lanu' chu a release a, heta a hla sakte hi a irawm chhuak vek a ni a, a hun laia cassette hralh kal ber tezing a mi a ni. Lalsangluaia Renthlei rawn lar chhuah hun lai hi YMA-in 'Ram leh hnam humhalh' kum puana a neih lai a ni a, Mizo zai mite zingah ram leh hnam humhalhna lam hawi hla sa an awm loh lai tak a nih bawk avangin 'Zohnahthlak Lanu' tih hla hian Mizote rilru chu ram leh hnam humhalh kawngah nasa takin a kaiharh a ni. Pu Lalsangluaia Renthlei hi zai leh hla phuah lama a tui mai bakah thu zia leh drama thleng a sulhnu nei a ni a, a thu zia thenkhat chu Mizoram pum chanchinbu chhuakahte a chhuah ve hial thin a ni. A theih ang tawh a mizo tawng dik lo lai nia a hriatte thu leh hla hmanga tihdik tum tlat mi a ni a, dik lo nia a hriat paih a, dik nia hriatah chuan ding tlat mi a ni. Hla phuahu dangte aia a danglam ve riauna chu hla thu midangte hman rim loh tuai hnam a, mizo tawng kauchheh mawi tak tak hla thua chantir hi a thiam em em hi a ni. A hla phuah mite hirat hlawh zualte chu - *Zohnahthlak Lanu, Suihlung dam nan, Thaitlawm lungmawl, Khawnge Zonunmawi?* tih leh a dangte a ni a. Audio Album pakhat tichhuak ve tawhin a hla phuah vek hmanga Album a puitlin thei hi a ngaihsanawm zualna a ni.

Kum 2001-ah C. Ramropuii nen Aibaw Presbyterian Kohhran Biak Inah inneiin fanu pakhat an nei a ni. Pu Lalsangluaia Renthlei hi January ni 8, 2020 khan pum nuam lovin a luak vak mai a, a tukah Falkawn Damdawiin panpui niin Investigation hrang hrangte tih nghal a ni a. A dam lohna khirh tak mai damdawiina thawkte pawhin chhan tum hle mahse a natna hian a hneh em avangin chelh rual a ni ta lo va, January ni 19, 2020 khan chatuan ram a lo pan ta a. Aibaw thlanmualah mi bikte phumnaah ropui taka zalh a ni.

K. Vanlallawmi - Pu K. Remsiamah leh Pi Sikulsangi te fa pasarih zinga a palina, Zaithiam K. Vanlallawmi hi kum 1974, March ni 25 khan Sialhawkah a lo piang a, Sialhawk Primary School, Sialhawk middle School leh Sialhawk High School-ah te kal chhovin kum 1990-ah HSLC a zo.

K. Vanlallawmi hi Pathian fakna satu lar tak R. Lalbiaksanga nen an zai dun atanga mite hriat hlawn tan a ni a. Kum 2001 khan Lalngaihzuah leh Ngurliantluangi te nen “Ka ta i ni” tih Album an tichhuak a. Kum 2002 khan a Single Album hmasa ber ‘Tuarna pawh hlawn’ tih chu tlangzarh leh Zoram dung leh vangah mite hriat hlawn lehzuah a Album pawh hralh a tla hle a ni. All india Radio chuan Artist atan an la nghal nghe nghe. Kum 2004 khan ‘Tuarna phena malsawmna’ Album tichhuak leh kum 2006-ah ‘Min tlan sak’ tih Album a tichhuak leh bawh a ni. Gospel Collection Album hrang hrang pasarih velah a zai tawh bawh a, All india Radio ah hla 36 khung tawhin DDK-ah hla 4 a khung tawh bawh. Rimawi Khawvel Music Award Best Gospel Female Artist 2004 khan a lo dawng tawh a ni. Kum 2003 khan R. Lalzidinga nen innein fanu pathum leh fapa pakhat an nei tawh a, tunah hian eizawna avangin Saitualah an chhungkuain an khawsa mek.

Upa Chawngbuaia - Upa Chawngbuaia hi kum 1893-ah Sialhawk khuaah a piang a, a pa chu Thianga a ni. Kum 1917-ah German ral runin a feh chhuak a, kum 1921-ah nula hmetha tak mai Kapchhungi nen innein fa 9, mipa 3 leh hmeichhia 6 an nei. Sialhawk atanga Lallula’n Riangthlei khaw thar a kai tum hian chhangchhe tak chungin a zui chho a. Riangthlei a awm lai hian Kohhran Upa atan thlan a ni. A pum lam hrisel lohna avangin Sialhawkah pi leh pute bel turin an rawn let leh a, amah hi ha var rual tha tak leh sam dum hlep hlawn, palian vak lo a ni a, mi lungleng thei tak a ni bawh. Khawhar hla 5 lai a phuah a, chung zingah chuan heng hla - *Hringhniang nau ang a tap, Eden huana pi leh pu ten, Dawn ve teh u, khawvel ram ropuah* tih hlate hi tun thlenga zoram dung leh vanga khawhar lusunte hnemna hla atana zofa ten kan la sak rim em em hla te an ni.

Upa Chawngbuaia hi Pathian thua tuimi leh Kohhran rawngbawlna ngai pawimawh mi a ni a, a nu leh pate Kristian an nih hma pawh a Kristian ni tang tang a ni. Hei vangte pawh hi a ni mahna a tu leh fate zingah pawh Kohhran Upa leh Kohhrana rawngbawltu pawimawh tak tak tun thlengin an awm chhoh zel ni. Amah hi hrisel vak lo a nih avangin kum naupangte kum 49 mi chauh niin March ni 18, 1947 khan a boral ta a ni.

Sialhawk rama history hmun luah thei thilte:

Zialung: Zialung hi lung mak tak leh hmingthang tak a ni a, ‘Zia’ tih chu hla thua an hman danin ‘ziak’ tihna a ni a, Zialung tih chu *lunga diak* tihna a ni. Zialungah hian thil lem chi hrang hrang Darkhuang, Darbu, sial, feipui, naupang lem, puitling lem, puan rin leh tuiburte a ni a, hei vang hian Zialung tih vuah a ni. A san zawng hi ft.5 a sang 4ft. a hlai, 5inches laia chhah a ni.

He lung hi Sialhawk Lal, Liankanglova’n Sialhawk leh Khawhai inkar, Sialhawk atanga 5km ami chu phun a duh a, a khaw mipa ral kai chin zawng zawng a thawn chhuahtir a, Pi Neihpuithangi kawtah a phun tir ta a ni. A phun nan hian ui tuai an phun hnan a, hetiang hi hmanlai lung hming nei deuh an phun thin dan a ni. Zialung siamtute leh ziaktute hi hriat theih an ni tawh lova, Mizo ten thlang kan tlak hmaa Mizorama lo awm

tawhte sulhnu nia rin a ni. Zialung awmna hmunah hian tunhma chuan khua alo awm tawh tih hriat a ni a, a lui hming pawh tun thlengin Zialung lui tih a ni.

Mura Puk: Hmanlai Zialung hmuna an awm laiin Mura lian deuh a awm a, naupang khawlai lengte hi a la thin a, an hlau em em niin an sawi. Chuvangin puitling feh hlana naupang dah khawmna tur puk panga lai an siam a, a len zawng chu 6x5x6 ft. a ni deuh vek a ni. A hmingah Mura Puk an ti a, a pangah 2ft. vel bialin kawngka an hawng vek a, pathum chu a chhe tawh a, pahnih erawh hmuh theihin an la awm. Lunga sak vek a ni a, a chung pawh lungpher hlai tak a khuh vek a ni. A chhungah pawh a lung chherna hnuhma hmuh theihin a la awm. A awmna hi P.W.D., K.E.L Road kawng kam maia awm a nih avangin khualzin mite tan pawh awlsam taka en theih a ni.

Lungpum: Lungpum hi lung lian pui pui chher a ni a, a awmna ram hming pawh hian a put phah a ni. A awmna hmun hi Chalrang, Khawhai leh Riangtlei hual vel tlang hlawn lian tak a awm a ni a, heng lungte hi a sei lam 18 ft., a len zawng 96 Inches vet chhuak a ni. He lung chhertute hi tute nge hriat theih a ni tawh lova, khawi lai ami nge an chher tih pawh hriat theih a ni tawh lo. A awmna velah hian lung dang a awm si lova, rin danah chuan a awmna a\anga fing hnih velah kham deuh hi a awm a, chuta mi chu a nih an ring deuh ber. He lung chher hian hmanlai pum thing kawrawng pahnih ar fep tih buaka an zah \hin a an em avangin a hmingah *Lungpum* tiin an vuah a, a mu thiang rual mai a, Mizo History ziaktu Pu V.L Siama lehkhahu ah pawh hmuh theiha awmin High School zirlaiahte pawh a lo lang tawh thin a ni.

Lungpum ram tlang chip zam pheiah khian khaw hmun hluite leh an thlanmual hluite pawh tun thleng hian hmuh theihin a la awm a. Hemi hmunah hian mihring lo cheng hmasa an awm ngei a ni tih heng atangte hian a hriat theih a. Tun hma kan pi leh pute hun laiah phei chuan mizo pasaltha ten an kah chak em em thin saite pawh a lo awm tawh \hin a ni tih hriat theihna turin tun thleng khian sai tluangdung te pawh hmuh theihin a la awm. He lai ram hi thlawhhma atana theh kum a nih hian buh leh balah Sialhawk chuan an hausak kum a la ni ziah a ni.

Lallula lungdawh: Lallula, Sailo Lal hi Mizoramah chuan lal ropui leh lal hmingthang ber a ni a. A thlah kal zelah Sialhawk lal Lalngurliana chuan Sailo lal dana a luruk Neihpuithangi vawn that chu phum a vawn that a rawt a, kum 1993 buh seng zawh chuan Sialhawk khuaah Sailo lal thlahtu Lallula lungphun tur chu lak a ni ta a. He lungphun atan hian hmar lam Khawhai kawng, khuai tlang kawngpui thlang ruam a mi chu zawn a tul ta a, Sialhawk tlangval chauh chuan an zawn zo lova, Lallula fate zing a mi lal ropui Vuttaia thlahte chu an inchah khawm ta mup mup mai a. Lung zawn tur chuan Biate lal Thangchuanga Sailo te, Lungdar lal Thangburha Sailo te, Khawbung lal Lalbika Sailo te, Riangtlei lal Lallula Sailo te, Tlangpui lal Lalthima Sailo te chu an khawnbawl upate hruaiin an khaw silai awm zawng zawng nen an thleng khawm ta rup mai a. Lal ho chu an sakawr nalh tak tak chungah chuangin an upa ten silai puin an rawn zui duah duah mai a. Tlangvalho nen Sialhawkah chuan an rawn lut ta zung zung mai a. A hunlai theuhvah he thil thleng hi Sialhawka thil thlengah chuan a aia ropui a la awm lo hial awm e. Kum 1933 December thla tir chuan lung zawn tur chuan an thawk chhuak ta a, a zawnna hlang ngawt pawh hlam ruk bialin an phan a, thingtlawn an kham kawkalh rup mai a. An han zawn chu a rit bawka, haw haw an la a, an ri hup hup mai a. Sialhawk tlangval bakah Biate tlangval

zawng zawng, Riangtlei tlangval zawng zawng, Tlangpui tlangval zawng zawng nen khaw pali tlangval intawkhawm an ni bawkhawm an ni ropui tak meuh a ni. A ni khat niin an thlen hman lo reng a, ni hnihnaah chuan Bungzung lal Laltawna chu lung chungah chuan an chuan tir a, silai an kap ulh ulh mai bawkhawm an ni. An han zawn chu an thawm a na ngei mai. Ni hnihna tlaiah chuan an thlen thei ta a, a phunna atan pawh Sial tam tak a tlu nghe nghe a ni. A lungphunah chuan heti hian a in ziaak -

SAILO LAL THLAHTU LALLULA HRIATRENGNA

Hreichuk khuaah a thi a, Sailo danin a luruh vawn a ni. A fa Vuta Rullamah a thi a, Vuta lu nen May 5, 1920-ah hemi hmunah hian phum a ni.

A fate	A lung latute	
Lalpuiliana	Lalbika	Lalthima
Lallianvunga	Thangburha	Lallula
Manga	Laltawna	Ngurliana, Vuta, Thangchuanga

A lung lak ni - 20.12.1993

tiin. Sialhawk khua hi kuthnathawh uar khua, mahni tawka khaw intodelh tak nih tum ran kan ni a. Chhungkua za zela 80 vel hi kuthnathawka ei zawng kan ni. Kuthnathawh kan zahpui ngai lova, tun dinhmunah hian kan kuthnathawh thlai thar hmangin a kum telin chhungkua leh khawtlang pawhin hmasawna rahbi thar kan kai mek zel a. Tun dinhmunah hian huan nghet hmanga eizawng chhungkua pawh thahnem tak kan awm tawh a, serthlum atang pawhin kumtin ₹50,00,000/- vel zet kan la lut tawh a chhut a ni. Mizorama an hming chherna leh hmun hla tak atanga an kuthnathawh avanga an lo hmingthanpui ve thin chu lakhuihthei hi a ni a, thenkhat phei chuan *lakhuihthei khua* tia sawite pawh an awm. Mizoram pumah lakhuihthei thar chhuak hnem ber khua niin he khuaah vek hian chhungkaw mala thar hnem ber pawh kan awm a. Lakhuihthei atang hian ₹60,00,000/- vel kumtin la lut thin anga chhut a ni bawkhawm an ni. Hemi bakah hian sawhthing, hmarcha leh thlai chi hrang hrang kan chingin kan thar nasa hle bawkhawm an ni, intodelh kan inzirtir nasa hle a hnathawh kawngah hian khawtlang hruiatute leh thalai rual ten theih tawpin hma kan la bawkhawm an ni.

A bul lama kan sawi tawh ang khian Sialhawk khua hi Zo thengthaw nuam tak leh chhuah chhawng khua niin a khawthleng pawh rem tak mai leh len veivahna atan pawha nuam tak mai hmunhma kan nei tha em em a. A khawchhung atanga hmun hla tak pan buai ngai lo hian pipute sulhnu tam tam hmuh theihin a awm. Chung zingah chuan - Zialung, Lallungdawh leh Lallula thlanrawn rawtna chempui leh Vuta thangchhuahpuan leh muallam puan te pawh hmuh mai theihin a awm a, kan lo kawhhamuh dawn che a ni. Hmun hla tak atanga lo kal tur i nih avangin Chiang lo leh vai riai a i haw leh kan phal dawn lova, hre lote hnena fiah taka i hrilh chhawn leh theih nan Chiangkuang leh zualin kan han hrilh ang che.

Sialhawkah ilo zin a nih chuan veng lai lum taka mual eng zau deuh hlek lo awm kha Bus Stand a ni a, Sialhawkah rau rau chuan kan vengpui lai leh kan hmun hulung ve ber a ni tih kan sawi hmasa ang e. Chuta tanga hla vak lovah hmar lam hawi zawngin va kal ta la, kawng peng thum a lo awm leh ang, chu chu Pengpui kan ti a, pengpui atanga kawng chung lama i kal zel chuan Pastor Quarters leh Lal Lungdawhte pawh i va hmu thei

ang. Chuta atang chuan khaw lu lam panin her chho zel la, thing phun ngaw thelh nuam takina a chawi vel karah Govt' High School pawh i han thleng zel ang a, a piah leh chiah a mi kha P.W.D. I.B. a ni tih i han hmu ang. A piah leh tlangchhipah chuan han lawn leh la, khua han chuan la, i zawn chhim lam hla deuh tak kha i thlir phei chuan Mizorama Middle School hmasa i hmu thei ang. Saw lai hmun atang sawn Mizoram tana mi ropui tak tak an lo inzir chhuak tawh a, sakhaw rawngbawltu tha tak takte pawh an lo inzir chhuak tawh bawh a ni. Khawchhak lam hawiin han hawi chho leh la, Sialhawk Higher Secondary School leh Primary Health Centre (PHC) te pawh i hmu thei vek ang a. Chu mai a la ni lo, i mit kha han len kual leh la, khaw mawng lama zawl zau tak i hmuh khu Sialhawk Playground a ni tih hai rual lovin i hre nghal thei bawh ang. Khu Playground khu tlawm hle mahse Mizoram Premeare League hmasa ber (2012-2013 Season) Best Player lo chher chhuaktu. Chu mai a la ni lo cheu, I-League-ah Player of the Year (2018-2019) atana thlan ngam, vawi duai lo I-League Hero of the Match ni tura an lo thlan chhuah Sialhawk tlangval R. Laldanmawia lo chher chhuaktu a nih khu!! I ring han fan det la, Tuipuiral tlangdung-Khuangleng, Vanzau, Bungzung, Hruaikawn leh Kelkangte i hmu thei ang a, i mit han len leh det la, tiau ral pipute thlang rawn tlang hmaa an lo khawsak tawhna hmun Lentlang dung lo inkham zur te pawh i hmu thei ang. Leh lam hawiin han inher leh la, tikhan ni tlakna tur lam khawthlang lam i hawi mek tihna a ni. I mit han len kual leh la, tlang chung zawl duai Tawi tlang lo inkham zur maite leh Serchhip tlangdungte a lo lang leh ang a, Lungpho, Ngentiang, Thinglian leh Hmunzawlte pawh hmuh hmaih rual lovin an lo lang dawn a ni.

Khawchhung lam rawn hawi leh la, nangmah rawn ep zawng taka Biak In lo lang larh i hmuh khu Sialhawk South Kohhran Biak In a ni a. Chuta tang chuan nangma awmna lamah khan i mit han len hnai leh la mual zawl zau tak i zuk hmu ang, khu khu Lal mualzawl niin Sialhawk hming putu tak chu a ni. A sir thlang lama mi khu kan Lal In hmun a ni a, tunah khuan an tu leh fate an la khawsa mek. A chhak lawka concrete in lian lo to vuah khu Sialhawk Community Hall a ni a. Hmar lam hawiin i mit han len hnai hret la, Biak In pahnih inhnaih deuh tak i hmu leh ang. Nangmah hnaih zawktu Biak In khu Sialhawk Kohhran Biak In a ni a, a kawt sir thlang lam tlang bawh zawla awm khu Salvation Army Corps a ni.

Heng kan sawi bakah hian Sialhawk khua atang hian Mizoram pa langsar tak tak rorelna khawl sang bera a fawng lo vuan a MLA leh Assembly Speaker hial lo ni tawh R. Lalawia te, MPS Senior Officer Lalhuliana Fanai (conferred IPS) te, Mizoram Public Service Commission (MPSC) in Exam (2016) a buatsaiha chungnung ber nihna luah pha Lalrinsanga Hnamte te leh sakhaw rawngbawltu chhuanawm Pastor Lalhluma Sailo te, mithiam tak takte leh dan hremi LLB (Ukil) thlengin he khua hian a lo hring ve tawh a. Sialhawkah hian hnamdang mi in leh lo neia khawsa chhungkua hmuh i tum a nih chuan thingchang hmuna rawtuai hawn tum ang tlat a vang a ni ang. Chuvang chu a ni mah na, kan tawngkau chheh pawh hi a la chiangin tawng thar Mizo tawng hman dan fel lo leh dik lo kan rawlh khat hle a, an tawngkam chhuak pawh hriam palh chang mikhual bengah a awm a nih pawhin an huat vang che ni lovin MIZO hlang hlak kan nih avangin hriatthiamna bengdar vuah chung leh enremna tarmit vuah chungin *Sialhawkah lo zin ve ta che*.

...oooOooo...

TLANGMAWI CHANCHIN

Tlangmawi hi khawhai Lal (Zataia) ram chhunga awm a ni a. Kum 1935-ah Bawrhsap hnenah khaw thar sah phalna hmuh a ni a, Lal Zataia fapa zinga mi khua tura tih a ni a, Lal in tur pawh 1944-ah sak a ni a. Amaherawhchu, Lal fapa hian lehkha a zir a, Sawrkar hna a thawh tak avangin rei erawh a awp ta lo a ni. Kum 1954 August 16 atang chuan VC hrang neiin alo awm ta a, kum 1966 a rambuai khan Khawhaiah khawm leh a ni a. Kum 1971 thleng khan khua chu a ram leh ta rih a ni. Kum 1972-ah mi tlem te an let leh a, kum 1974-ah pheih chuan khua a chhiar leh niin in 30 vel lai an awm leh ta a. Sawrkarin khua a ala pawm leh loh avangin Bawk Committee din a ni a, chu committee chuan rorelna a kengkawh rih ta a ni.

Tichuan, kum 1984 November 5-ah chuan VC hrang neiin a awm leh ta a ni. Biate Pastor Bialah a awm thin a, Pastor Pasena bial fang chuan khaw hming hi a phuah ta a, 'Tlangpui tiah phuah a ni. Hun a lo kal zel a, a bul lawkah Tlangpui khua a awm a, Sawrkar atanga lehkha kal sual a awm tak fo avangin Ni 13.7.2007 atangin tuna khaw hming 'Tlangmawi' tih hi a pu ta a ni. Kohhran hi Presbyterian Kohhran Biak In chauh a awm a. Zirna lamah hian Aganwadi, Primary School leh Middie School te a awm a. Hriselna lama inenkawl na hi Health Clinic Centre a awm bawk a ni.

Tlangmawi ram chhungah hian pipu sulhnu hmuh tur a awm a. tunhmain Hmarho an lo awm tawh a, tunah pawh thlan sang pui pui 2 (pahnih) hmuh tur a awm a, an Khuhhriang hlui kehte pawh hmuh tur ala awm a ni. Ramngaw tha tak tak hmuh tur ala awm nual. Tin, Tlang pheih ramah ngiau lian tak a awm a, a leiseh chin atanga tehkuah hian 14ft hawlh tlang vel a lian a ni a, North East-ah hian a lian ber ni hial tura ngaih a ni.

Tui lam hi PHE Department atangin solar pumping scheme kalpui mek a ni a, hna pawh zawhfel tep a ni tawh. Tui hi chu Department hmalakna zarah Tlangmawi khuain kan hnianghnar rih hle a ni. Inkalpawhna kawng hi a tha lo a, furah chuan khua hi tlawh pawh a harsa thin hle a ni. Tunah hian Tlangmawi hi in luah lai 48 a ni a, mihring 275 kan awm mek a ni.

...oooOooo...

TLANGPUI CHANCHIN

Tlangpui hi Aizawl atanga chhim chhak lama awm, boruak mela mel 47 vela hla a ni. Chhak lamah Lungva luiah Sialhawk nen a inri a, thlang lamah Thinglian leh Lungpho tlangdung nen Tuichang luiah a inri a. Chhim lamah Lungdar leh Mualcheng te nen a inri a. Hmar lamah Tlangmawi nen a inri baw. A ram zau zawng hi a dung km 17.6 niin a vang hi km 9.6 vel a ni. Tlangpui ram chhungah hian mei mit lova khaw awm hun chhung hi kum 160 vel ni ngeia rin a ni. Amaherawhchu, khaw hmun khata awm reng lovin, hmun hran hranah awm hmun an lo khwar tawh a ni. Tuna khaw luah mek hi 1945 kuma luah tan a ni.

Kum 1861 vel khan Lalvunga hoin Sialhmur an luah a, in 300 vel niin an sawi thin. Lalvunga hi Vuta fapa upa ber dawttu a ni a, a fapa chu Khawhai Lal Zataia a ni. Lalvunga hi he hmunah hian kum 7 emaw vel chu a awm ngeia hriat a ni. He Sialhmur hmuna an awm lai hian Mizo History a dai tawh lo tur, Chhim leh hmar Indo chu a thleng a, Chhim pasaltha Chawngbawla hoten Sialhmur (Tlangpui) an run a, Sialhmur pasaltha Nghatebaka (Chawngzika Chawngthu) chuan um letin a nunna a chan phah hial a ni.

Heng hun hnua Tlangpui rawn luah lehtu chu Kairumate nufa an ni. Kairuma hi Vuta leh Neihpuithangi te fapa naupang zawk a ni. Kum 1879-ah Ngentiang atangin Tlangpui ramah kai chhoin an kaina hmun chu tun tlengin Kairuma Tlangpui hmun tih a la ni reng a. Heta tang hian Khawhaiah leh Sialhawkah a kai chho ta zel a ni. Kairuma nu Neihpuithangi hi Tlangpui, Sialhawk leh Rianglei khaw neitu ber a ni a, Sialhawk ram, Karmual atangin kum 1889 vel khan Neihpuithangi hi Tlangpui rama Khawlerhah a kai a. Hetah hian kum 6 vel an awm a, in 200 chuang an ni. Heta tang hian Sialhawkah khaw thar a sat a, kum 8 vel a awm hnuin kum 1903 khan Sialhmurah a kaithla leh a. Hetah hian kum 7 vel awmin Kum 1911-ah Riangleiah a kai leh ta a ni. Neihpuithangi hi Vuta nupui 3-na nia hriat a ni.

Neihpuithangi Sialhmur atanga Rianglei a kai kum hian, Kairuma Tlangpui hmunah CI Palianan khua a din a, Tlangpui tia lo vuah chu Sialhmur bul lawk, Tuitlin hmun (Tuna Tlangpui khaw awmna hi) ah hian an rawn insawn phei leh a, chumi awp tur chuan Pi Neihi hian a tupa, Liankanglova fapa upa ber Lalthima chu Tlangpui awp turin kum 1913 khan a tir thla a. Tun thlengin Tlangpui tih hming hi a pu hlen ta a ni. Tuna Tlangpui khaw hmun a luah tan hi 1945 niin, buai kuma Khawhai leh Sialhawk a an khawm tih loh chu hmun dangah insawn tawh lovin an luah tlang ta zel a. Tlangpui khua kan tih hian hmun hrang hrangah insawn kual thin mah se a ram hian khaw dang, Tlangdung dang zawmpui a neih loh avangin Kum 1879 vela Neihpuithangi leh a fapa Kairuma ten he ram chhunga Tlangpui khua an din atanga tun thlengin he ram hi Tlangpui ram tih a ni a, khua pawh Tlangpui khua kan ti ta zel a ni. Kum 2000 khan anniversary lawm a ni nghe nghe a. YMA te pawn kum 1996 khan Golden Jubilee ropui takin an lo lawm tawh a ni.

Khaw sawikhawm hnu, tuna Tlangpui hmuna let leh hnu kum 1972-ah Primary School din a ni a, kum 1976-ah Middle School neih leh niin, 1994-ah High School din a ni leh ta a ni. Biak in ding hmasa ber chu Presbyterian Kohhran Biak in niin kum 1919 vela sak a ni a, he hi 1920-ah tihngheh a ni. Tunah hian In 170 awm mekin mihring hi mipa 472, hmeichhia 428, a vaiin mihring 900 kan cheng mek. Tlangpui khaw eizawna ber chu Tlangram lo neih niin, tun hnaiah Lakhuithei leh Serthlum chinga eizawng chhungkaw engemaw zat an awm leh baw a ni.

TUALPUI CHANCHIN

Tualpui khua hi Kum 1906 February-ah Zuchhip Lal fapa Thanhera ho a din a ni a, Tualpui Lal hmasa ber a ni ta a ni. Tualpui khua hi Khawzawl District a awm niin, Khawzawl aṭanga km 25 a hla awm a ni. Tualpui khaw hming put chhan hi sawi dan chi hnih a awm a. Chungte chu, Thangtualpuia hote lo awm tawhna a nih avang a ni ti an awm a, ṭhenkhat erawh chuan hnam hming chawia phuah a ni, Tualpui hnamho lo awm tawhna a nih avang a ni an ti bawk.

Tualpui khaw ṭhenawmte chu, Khawzawl, Khualen, Rabung, Murlen, N. Khawbung leh Ngaizawl te an ni. Tualpui Lal Thanhera hian a fapa Domana chu German ral bei tura kal ve phal loin Lalah a siam a, Ngaizawl tlang awptirin khua a sahtir ta a, hei hi Ngaizawl khua lo pianchhuahna a ni. Tualpui Lal Thanhera chu 1928-ah a thi a, Domana chu lo letin Tualpui Lal alo ni ta a ni.

Kum 1966-ah rambuai inṭanin, Ni 16 December 1968-ah Tualpui khua chu Khawzawlah khawmthlak a ni a, kum 62 lai mei mit loa luahlum chu rauhsan a lo ni ta. Kum 1928 Presbytery Nisapuiah Tualpui Upa hmasa berte pahnih Upa Ralzema leh Upa Chalphunga te chu nemngheh an ni. Upa Ralzema hi mi tlawmngai, German ral runa kal zofate zinga eirawngbawl tluan chhuak parh thei awm chhun ni a sawi kha a ni.

Kum 2024-ah hian Tualpuiah in 145 awmin, mihring 720 kan cheng mek a ni.

...oooOooo...

TUALTE CHANCHIN

C.LALFAKMAWIA
Secretary, Village Council
Tualte, Phone No : 8575708226

Tualte khaw awmna hmun Tualte khua hi Khawzawl District chhung a awm a ni a, Khawzawl atanga km 20 a hla niin, Khawzawl atang hian Biate Road a kalin, Chawngtlai Phaiveng atanga pen lehin, Chawngtlai Phaiveng atang hian km 9 a hla a ni. Tualte khua hi Khawchhak tuipei hnaih te a awm leh Zo boruak nuam tak mai a ni a, Khaw lum lai berin Celcius degree 28° bawr niin khaw vawh lai hian Celcius degree 7° bawr vela vawt a ni tlangpui a, Longitude 93.20-66° E leh Latitude 23.41-24°E lai vel a awm niin, sea level atanga a san zawng chu 1390 metre a ni.

Tualte khua awmna hmun hi hmun thaw veng leh ualau a nih avang hian Mizoram khaw hrang hrang pawh 25 vel zet a lang thei a, Tualte khua atang hian Mizoram tlang lar deuh deuh - Phawngpui tlang, Lurh tlang, Tan tlang, Purun tlang, Hrangturzo tlang, Tawi tlang te pawh a lang thei a, Mizo History a lang awl lo Myanmar ram chhunga hmun hmingthang Halkha ram chhunga dawn tlang te, Len tlang te bakah Lungdup tlang dung te pawh fiah takin a lang thei a, khua han chuan vel nana hmun nuam tak a ni.

Tualte hming vuah a nih chhan: 'Tualte' tih hming vuah chhan leh a hun hi chiang taka sawi theih ni lo mah se pipute chuan hetiang hian an sawi thin. Tualte tlang hlawm hi Mizo hnam thlangtla hmasa, Hmar hnam peng pakhat Thiak (Thiak hi hmar hnam chi khat an ni a, thiak hnam peng pakhat zinga mi an ni) te chuan an lo luah tawh niin sawi a ni a. Chung hnam peng zingah Tualte hnam awmna niin an sawi. Hmarho hi AD 1750 vela awm an ni a, Tualte hnam hovin an chhuahsan hnuah Tualte tia hriat a ni ta ber a, Hmarho chhuah hnuah he lai tlang rawn luah leh hmasa bertu chu Lal Vanhnuailiana kha a ni.

Tualte vanglai: Mizo lal zinga ropui bera an sawi thin Sailo lal Vanhnuailiana chuan Saitual, Puilo atanga rawn chho zelin, Awnnu (Chalrang ram) atangin kum 1857 vel khan Tualte a rawn kai a, in 1000 lai a rawn kai pui a ni. Tualte a thut hmun a rawn rem fel hian a hming a thang tanin pasaltha a neih that vang te, rorel a thiam vang tein Vanhnuailiana khawpui Tualteah chuan hmun hla taka tang pawhin an rawn pem lut sup sup a, Tualte chuan a vanglai a hming tan der mai a, hetih lai hian zawlbuk pawh pasarih lai a awm nia sawi a ni a, Tualte Vanglai hunah hian in 1700 vel lai a awm niin an sawi a, Mizo Lal hmingthang Vanhnuailiana a dam chhunga a ropui berna hmun niin, fel takin khua a rem a, Tualte Vanglai hun hi Mizo history a khawpui pawimawh ber zinga sawi reng tawh tur niin, chanchin tam tak a nei a ni a, Vanhnuailiana pasaltha zingah Vanapa, Chawngduma leh Zampuimanga te pawh an hmingthang hle a nih kha. Lal Vanhnuailiana a fin em avang hian tun thlengin Tualte khua pawh hian midang khaw dang chuh pui theih miah loh, ram zau leh tha em em, lui ramriin a hung fel vek ni bawk si kan nei a, Tualte ram chhungah hian Mizo Lal hrang hrang pali laiin hmun satin ro an lo rel tawh a ni.

Tun dinhmun: Tualte khuaah hian tun dinhmunah chhungkua 250 awmin mihring 1470 vel an cheng mek a, Kohhran hrang hrang panga -Presbyterian, Salvation Army, UPC(NEI), UPC(MZ), Seventh day Adventist te an awm a, Presbyterian Kohhran member an tam ber. NGO pawl hrang hrang - YMA, MHIP, MUP te mumal taka an din bakah Association hrang

hrang awmte inngeih tak leh phei khai rual takin an kal za a, Tualte hi tun hma atangin pem khawm khua an nih loh avangin in chung khat laina kual deuh vek an ni a, 'Mikhual tan rel sual an awl' an lo ti thin a ni.

Eizawna lam: Tualte khua hian mi nawlpuiin kan eizawna ber chu Thingtlang lo neih, kut hnathawka eizawn a ni deuh ber a, VC ten kum tinin ram theh thin niin, buh hi eizawna ki pui ber a ni thin. Amaherawhchu, hun lo kal zelah kum 2019 chho atang khan Tomato ching chho tanin mi nawlpui eizawna a ni chho tan a. Nikum 2023 lamah khan Tomato hi Qtl. 10000 (Singkhat) chuang tharin Mizoramah a thar hnem ber khua kan ni mek a ni. Tomato bakah hian thlai chi hrang hrangte uar chho zelin, Aizawl, Lunglei, Serchhip, Champhai District chung a thlai Commission thin ten kar tin a rawn la thinin, Mizoram hmun hrang hrangah te sem kual thin a ni a, State pawn Silchar leh Myanmar-Rangoon-ah te pawh Tualte tomato tharte thawn chhuah tawh niin tunah hian sawrkar chakna nen a tangkawpin thlai thar kawnga hma la nasa zual turin beih mek a ni a, Economic hmasawna kawngah Tualte Vanglai din thar leh turin theihpatawpin tan lak mek a ni a, Hemi kawngah hian khawtlang mipuite pawh kan inlungual hle a ni.

Tualte khuaa hmun hlui thenkhatte: Tualte khua hi Mizo history a khawpui pawimawh tak a nih avangin thangtharten pipu sulhnu pawimawh tak tak vawnhim nachang kan hriat loh boral ta engemaw zat a awm rualin, vawn that leh hmuh theih engemaw zat a awm baw a. Chung zinga thenkhat lar zual han tarlang ila - 1) Sapin zawl. 2) Lalruanga lung kah keh. 3) Lalruanga lung chhuan. 4) Dar thuhruk. 5) Vanhnuaailiana in hmun 6) Vanhnuaailiana Tuikhur. 7) Vanhnuaailiana hruih 8) Vanhnuaailiana khaw thlir. 9) Vanapa in hmun. 10) Vanapa ui phumna 11) Vanapa Tuikhur. 12) Lutua hmun 13) Manglala hmun 14) Nikuala hmun 15) Chawngluta khaw thlir. 16) Lal Dokhama Thlan .17) Hla phuah thiam Patea in hmun hlui, 18) Pathian Tlang. 19) Seki lui. Heng hmunhma hrang hrangte hian chanchin ngaihnaawm tak tak an neih bakah, hmun hlui ziah lan loh engemaw zat a la awm baw a ni. Heng zinga Seki Lui hi Mizoram sawrkar hnuaia Art and Culture department in state protected monument-a a puan a ni a, humhalh tlat a ni.

Tualte ram chungah hian Mizoram State bird Vavu a awm mai bakah State Animal Saza pawh tam tak an awm mek a, Sazuk pawh hun engemaw ti atang khan rawn lutin hengte hi uluk taka humhalh mek an ni. Lal Vanhnuaailiana khua 'Tualte Vanglai' i lo kal chuan heng kan hmun hma neihte hi i lo tlawh ve ngei dawn nia.

...oooOooo...

TUISEN KHAW CHANCHIN

A LO INDIN CHHOH DAN: Kum 1910 velah Bunghmun (Puilo leh Chhawrtui inkarah khua) atangin Tuisen khua din tur leh Leilet te eizawna atana nei turin Pu Lalnipuia leh a thiante chu ram en turin an rawn thawk chhova, tuna Tuisen Phai (leilet) ni ta kamah hian Bawkte khawhin awm hmun an rawn khuar ta a. Chuta tang chuan BAWKPUI (tuna Pu Taivela(L) leilet chhakah) hun rei lote an khawsak hnuah 'BUKTHAR' ah chuan kum 1911 – 1921 vel bawrah an kai chho leh ta a ni. Buktharah hian hun rei lote kum lo emaw vel chauh an awm hman tihin 'HRICHHIA' an tih mai – Mi rei pawh damlo hman lo khawpa an tih puk pukna natna tihbaiawm tak mai chuan a rawn nuai ta a. Chu hripuia chuan Pu Saihnuna fanute pathum lai pawh a rual deuh thawin an boral nghe nghe a ni. Chu hrichhia hlauhawm taka avang chuan awm hmun sawn leh vat an duh ta a. Zaingen khaw LAL Pu Kaihranga hnenah tuna Tuisen khaw hmun ni ta hmuna awm chhoh an dil ta ringawt mai a. Ani chuan alo phal i-khaw lo mai a, Pu Lalnipuia ngaihdan a nih bik loh avangin Tuisen hmun kan tih tak hmunah chuan kum 1922-ah an kai chho ta a ni. Chutia Pu Kaihranga phal lo chung kai chho an nih avang chuan Pu Lalnipuia fapa lo piang chu a hming atan 'Lalkailuia' an phuah ta nghe nghe a ni.

TUISEN HMING LO PIAN DAN: Tuisen hming lo put chhan hi hetiangin an sawi – Pu Siamkunga phai sir, Pu Sairuma (tuna Pu Chawntuaha (L) fateho phai ni ta Vaivengphai) phai mawngah hian 'DUM LI' lian ve tak a awm thin a. Chu Li chu pat-ek hian a bawh sen luk thin a, chu Li ah chuan Sangha lianpui mai chalkem vuk mai hi a awm a, chu sangha lian an man avang chuan CHALKEM LI an ti nghe nghe. Tichuan, chu Chalkem Li pat-ek chu a sen hlur thin avangin 'TUISEN' tih hming hi a lo piang ta a ni. Tichuan, tun hnu hian 'Tuisen Phai' Tuisen Bangla, Tuisen khua leh Tuisen dung tih hming a lo pu ta zel a ni. Tin, Tuisenphai mawng (tuna Pi Dosiami leilet mawng) ah hian tunhma chuan NGAWI an dawh thin a, chu NGAWI an dawhna Li chu 'Saihnuna Ngawi Li' an ti nghe nghe a ni.

BUK THAR AWM LAI: He Bukthar hmunah hian Japan ral len lai an tih mai (second world war) hun lai 1943 – 45 bawr vel khan sap sipai V-Force a mi Colonel hovin awm hmun an rawn khuar ve leh a, kum 2 emaw kum 3 emaw lai an khawsa leh a ni. 1911 – 21 (kum 10 bawr vel) helai hmuna an khawsak laia chengte chu chhungkaw 17 lai an ni. Bukthar hmuna awm laia chengte chu Saihnuna, Lalnipuia, Tawnga, Vanthanga, Chengchuana, Bawkleha, Kapsawka f/o Lianghawra, Lutbawnga, Phira, Uicheka, Hranghnuaia, Saptawna, Taikuna f/o Patlaia, Lawksena s/o Taivawka, Hauliana, Pautuliana, Chhawnbuka te.

TUISEN LUAH HMASATUTE: Tuisen hmun an kai chhoh laia Pu Lalnipuia zuitu khaw sattu leh luah hmasatute chu Vangthanga f/o Tlangliana, Bawkleha, Saihnuna f/o Ralhnuna, Thanghleia, Chengchuana, Lungchhiaa, Hranghnuna, Sumthuka, Zika, Chawngchhetea, Tawngthuala, Taivawka, Lutbawnga te.

Tichuan, Tuisen hmunah chuan awm hmun an bengbel leh ta a. Pu Lalnipuia chu Tuisen khaw LAL niin hlim takin an khawsa ho ta a. Pu Lalnipuia hi lal rorel thiam tak leh a khua leh tuite tana mi zaidam leh ngilnei tak a nih thin avangin khawdang atang pawhin an rawn pem lut ve fo thin a ni. Kum 1930 bawr vela Tuisen khuaa cheng hriat theihte chu Pi Rolianpuii (Pu Lalnipuia pi), Pu Lalnipuia, Pu Zapuka f/o Zahnuaii, Pu Lawksena f/o

Thiatruma, Pu Thangkunga, Pu Siamkunga, Pu Vanthanga, Pu Suakchhunga f/o Tlanglana, Pu Zathiauva, Pu Zahleia f/o Lalkara, Pi Laiquikhawli, Pu Buangkela, Pu Chhiarauva, Pu Senluaia, Pi lianchani, Pu Teberha, Pu Hrangmuka, Pu Bawizinga, Pu Tawnga, Pu Seibawia, Pu Savawma, Pu Chengchhuana, Pu Saptawna f/o Thanghleia, Pu Bawkleha, Pi Darpuivungi, Pu Vaihinga, Pu Rochhunga, Pi Hrangkungi, Pu Tekhawka, Pu Lalthawma, Pu Saihnuna te.

Hmanlai kan pi leh pute hi khaw hmun nghet nei anga sawi theih phe chu an ni na a, an lalte sual vang pawh ni lem lova pem kual ching tak an ni a. Chutiang chuan Tuisen khuaa chengte pawh hi a then an pem a, a then an rawn pem lut ve baw a. Ami chengte pawh an danglam ve fo thin a ni. Tlai khawhnu deuhva rawn pmlut thar ve lehte chu Pu Thang luaia, Pu Manga, Pu Chala, Pu Hangmuka, Pu Nahaia, Pi Nupui w/o Rualkhuma, Pu Thatbuta f/o Chalmawii, Pi Saidengi m/o Thangruma, Pu Hmuia f/o Rozika & Lalringlana (Teacher), Pu Kaiphunga, Pu Lalauva te an ni. Kan sawi tak ang khan Tuisen khaw lal Pu Lalnipuia hian hun rei tak ro a rel a. A lo upat hnuah a fapa Lalliana'n lalna a rochung a, lal banin a zui ta nghal a ni.

A KHAW HMUNHMA LEH BORUAK: Tuisen khua awmna hmun hi Aizawl to Champhai road, Aizawl atanga 158 km a hla, Khawzawl hmar lam 7 km vela hlaa awm a ni. Mizoram khaw awmna thin zinga tlangsang pawl tak a nih a rinawm. Tuisen khaw awmna tlang atanga han thlir vel hian Mizoram khua hi a lang tam thei hle a ni. Tin, Tuisen khaw tlang chhipa Bung leh Thelret kung phe hi chu Aizawl atang pawhin a hmun theih hial a ni. Tunlai finna hmanga teha eng ang 'sea-level' ah nge a awm tih leh metre engzata sang nge tih phe chu hre lo mah ila, tlangsang thengthaw nuam tak a ni a, tlangdung pharh nuam tak, khaw awmna awm renga khuanu ruat sa hi a ni ringawt mai. Boruak a thain a nuam hle mai a, a mi chengte pawh an hrisel a, 'Tuisen khaw nula chu an sen siah mai a, an hmeltha' an lo ti ve fo thin reng a ni. Amaherawhchu, a awmna tlangsan deuh vang nge ni 'TUI' erawh an hnianghnar lo hle. Thal lai phe chu an tuikang nghah a ngai ve fo thin a ni. Tunhma chuan Mizoram khua reng reng hi mihring kan la tlem avangin ramvah phulh ala awm ve lo va, khaw tin mai hi khawdai vel zau tak tak hi 'ramngaw' dur pui (reserved forest) a ni vek thin a, chutiang bawkin, Tuisen khua pawh hi a dai vel reng reng hi ramngaw thelh nuam tak vek hi a ni mai a, boruak a nuam hle a ni.

TUISEN KHAWPER: Tuisen khawper chu 'Awmpui Veng' tih a ni a. Chu chu tuna Pu Sawmvela, Khawzawl Kawnzar veng, terrace bul, Aizawl to Champhai road, Tuisen phai mawng, lamlian kawngpui chhak 'Lungin Lui' kamah hian an awm thin a. Engkim hnatlang leh thildangh pawh Tuisen lal Pu Lalnipuia hnuia awm an ni. Awmpui veng a awm hun hi kum 1915 -20 vel ni a hriat a ni. Mi chengte chu Hangmuka, Buanga, Thatkima, Laltawna, Ranga, Thangkunga, Laihnuna, Suakchhunga, Thangzika, Vanhnuaithanga te an ni. Hemi 'Awmpui Veng' ho hi an awmna chhak bul hmun rem 'Kawihthuanga' an awm chho leh a (Kawihthuanga awm lai 1920 – 1930). Chuta awmte chu Seleta, Dohnawka, Tlangbawia, Dangtea, Lalngeni, Kuala f/o Thangsavunga, Thangkhuma, Laibuanga, Liankiaua, Saihanga f/o Chhunglawmi, Saizema te an ni.

Heta cheng hote hi 'Tuisen Bangalow' enkawltu hmasaah an tang hlawm a, Tuisen lal awp hnuai veka awm an ni. Tichuan, heng ho hi a khaw thenawm Arro, Kawlkulh leh Tuisenah te an pendarh leh ta a ni.

LUNG IN LUI HMING PUT CHHAN: Awmpui veng awm hnu hian Lung in lui kamah vai Gurkhali pakhat Telmaii pa an tih mai hi a awm thin a. A in bang hi lung veka sak a nih avangin Lung in Lui tih hming put chhanah alo tang ta a ni. Tin, amah Telmaii pa chu 'Tuisen Bangla' enkawltu hmasa niin an sawi bawk a, Jog Bahadur kha a nih hmel..

TUISEN BUNG: Tuisen Bung hi a awmna hmunin a zir avang hian Tuisen khua pawh hian a hming than phah hle a. Tuisen Bung bulah hian (insi deuhthawin) Thelret kung lian tak a awm ve bawk a, ralkhat atang phei chuan bung lian tak emaw tih mai awl a ni. Kum 1925-ah Tuisen lal Pu Lalnipuia'n Pu Thangkima a phun tir a ni a. Pu Tlangliana'n thingler a mi harsa taka a lak a ni nghe nghe. He Bungpui phun ni hian tun hnu ala hmingthan dan tur lo hre lawk ang hrimin an urhsun a, ruaite buatsaihin hlim takin an zaikhawm a, hla thar ruahtam lohte pawh alo pianchhuah phah reng a ni. He Bungpui dinna vel hi hmun rem tak mai a nih avangin 'Thlanmual' atan hman zui a ni a, lal chhungte pawh helai hmunah hian phum an ni nghe nghe. Tin, Indopui II-na lai vel leh Mizoram buai lai pawh khan Sipai lam leh Civil lam pawhin 'Signal' hmun atan an hmang tangkai hle a ni.

TUISEN BANGLA: Kum 1907-1908 khan Tuisen Bangla hi sak a ni a. Champhai panna kawnga awm a nih avangin sarkar mi leh sa vakvel tan a tangkai thin hle a. A enkawl turin sawrkarin Jog Bahadur a dah a. A awmna hmun hi Tuisen phai leh Vaiveng phai inkar tlangdung pharh nuam lai taka awm a ni. A hmunhma hi a remchangin a nuam hle a, a bul vel hi ramngaw thelh nuam deuh mai a ni thin a, tun hnu deuh phei chuan Bangla bulah hian Bung, Far thingte leh Theihai, Serthlum leh thei chi hrang hrang an phun belh ta zel a. Bung zar duai mai te leh Far thing ding thelh thulh mai te chuan an ti nuam thin hle nghe nghe a ni. Tunhma chuan kawngpui tha a la awm loh bakah lirthei kal velna tha a awm lova, sap leh mi lian khualzin chawlhna In Bangla hi Aizawl leh Champhai inkarah pariat lai a awm a. Chungte chu Bung Bangla, Seling Bangla, Lumtui Bangla, Khawthlir Bangla, Kawlkulh Bangla, Tuisen Bangla, Neihdawn Bangla leh Champhai Bangla an ni. Tuisen Bangla lo enkawltu Chowkidar-te chu Telmaii pa, Chala (rei lo te), Seleta, Lianchhunga, Thanghuta (1947-50), Chakthanga leh Hrangchhuana (1966 thleng) te an ni.

Tuisen Bangla hi a lar ve hle a, a Tuisen khua tak ai pawh hian a lar ta zawk mai awm e tih awl a ni. Mizoram dung leh vangah sawi a hlawh a, titi a ti tam ve hle thin a. Tuisen khua tilartu berte zing a mi a ni ta zel a ni. Tuisen Bangla enkawltu fanu Darrikhumi chu Tuisen Khawchhiar fapa Ngurchhawntluanga'n nupuiah a nei a, Tuisen Bangla enkawltu Seleta fanu Lalbiai chu lal fapa Lalliana'n nupuiah a nei.

TUISEN PHAI: Tuisen khua tihmingthangtu pawimawh tak pakhat leh chu 'Tuisen Phai' hi a ni. He leilet hi ami chengte eizawna leh inngahna ber pakhat a ni a. He phai hi kum 1922 vela siam ni a hriat a ni. Vawiin thlengin a neitute hmingpuin leilet chu 'fing' tam takah insem darh a ni. He leilet hi Tuisen khaw hovin an neih hma hian siamtu (hmasa) an lo awm tawh ni awmin sulhnu a awm nghe nghe. A neitu hmasate hian engvanga chhuahsan leh ta nge an nih phei chu hriat a har tawh hle a ni. Tichuan, phai siam tawh chei thar leh te, siambelh tak zel te an awm reng a, leilet naupang (siam hnunhun ber) nia hriat tak Pu Manga leilet (a hnar bera mi chu) kum 1950 vela siam/din a ni awm e.

Tuisen phai hian chanchin ngaihnaawm tak tak a ngah ve hle a, sawi vek sen erawh a ni lo. Leilet upa ve tawh tak, kum 80 dawn nia ngaih a ni. A tira siamtu/neitu tam tak ten

mual min liamsan tawh a, a thente erawh chuan min la dampui a, Aizawl lamah leh Khawzawl hmunah te an khawsa zui ta zel a ni.

A hming hmasa nia an sawi chu 'Khuangbeuva Leilet' tih a ni. An phuah chhan leh phuah hun hriat theih a nih tawh loh bakah tuna a hming 'Tuisen Phai' hi engtik hun atang chiaha lo pu ta nge a nih hriat theih tawh loh a. A zau zawng hi a dung mel khat vel, a vang ¼ miles vel a ni. A kumkhat Buh thar hi tin 10,600 vel a ni. He Leilet hi a kam tawn tawnah Chalthai leh Sasaw thingin a hual vel a, "Chalthai par thingvul mawi ten a bawm" tih hla Pu Rokunga phuah pawh hi he Tuisen leilet phai hi a phuah chhan ngei niin a lang.

Tuisen leilet phai hi Tuisen khua atangin mel khat leh a chanve emaw mel hnih emaw laia hla a ni a. Tunhma chuan an buh thar te pawh Bawng hmang leh chhip (head load) hmanga phurh thlen a ni thin. Tuisen leilet hi tunhma chuan Pumphir leh Rairuang/phairuang hmun a ni thin a. A kam vel ram zawng zawng hi ngaw thelh nuam tak a nih thin avangin sa chi hrang hrang pawh a tam thin hle a ni. Amah hlaphuah thiam tawngkam takin 'Buannel ram dai' tih ve maia mawi a ni. Tuisen leilet siam hmasatu la hriat theih (1911 bawr vel a nih hmel) chu Pu Saihnuna, Pu Bawkleha, Pu Tawnga, Pu Tlangliana, Pu Chengchhuana, Pu Taikawna, Pu Uicheka, Pu Pahlira, Pu Chhawnbika, Pu Mualkunga f/o Hawla, Pu Thangkunga te an ni.

HMUN HMINGTHANG DANG: Hmun dang leh midangin min hriatpui tehchiam ni si loh, Tuisen khawchhuakte tana theihngilh theih ni hauh si lo hmun leh ram hmingthang kan nei ve nual a, chungte chu :- Buanvaikawn, Mo hmuah mual, Zo ting hmun, Raw zawl, Sumsuih zawl, Thangte dawh Lalzawmi nu kawng, Darnawm leh Tuivamit.

NI LEH THLA PAWIMAWH BIK : Ni 22 May 1966-ah Tuisen khua chu India sipaiten an hal. Ni 22 & 23 November 1968-ah Tuisen atangin Khawzawlah khawm thlak (grouping) a ni.

KHAWTLANG INRELBAWLNA LAM: Tuisen khaw lal Pu Lalnipuia hian Tuisen luahtirh atangin 'Lal ban' hun thlengin ro a rel tih theih a ni. A fapa Lalliana'n rei lo te lalna a chang. Tuisen khuua nihna pawimawh chelhtute - khawchhiar Pu Taivela, zirtirtu Pu Lalringliana, tlangau Pu Zathanga (Zapuka) leh thirdeng Pu Thanghuta te an ni.

Village Council a lo din takah khan Zaingen khua nen khaw khat hnuaia awm a ni a. Chung hun laia VC-te - Pu Lalliana (VCM), Pu Liansiama (VCM), Pu Lalkailuia (VCM), Pu Rochhunga (VCM), Pu T Hiatruma (VCM), Pu Taivela (VCM). Rambuai avanga Khawzawl hmuna khawm kan nih tak hnuaia VC-te - Pu B. Zaliana (VCM & VCP), Tv Malsawmdawngliana (VCM & VCP), Pu Lalruata (VCM), Pu PC Lalthlamuana (VCM).

KOHRAN DINHMUN: Tuisen khuaah hian Presbyterian Kohhran chauh lo chu Kohhran pawl dang a awm ve hriat a ni lo. Kohhran hnarkaitu leh hmahruaitute chu Upa Savawma, Upa Liansiama, Upa Taivela, Upa Lalkailuia, Pu Teberha leh Pu Manga te an ni.

KOHRAN HMEICHHE LAM: Kohhran Hmeichhe lama hnarkaitu leh hmahruaitu mi thahnemngai, Pathian leh a Kohhrante tana mi tangkai kan nei a, chungte chu Pi Darliani, Pi Sapzingi, Pi Ziki, Pi Chawngchhungi, Pi Rengchhawni, Pi Remliani, Pi Darzami te an ni.

KRISTIAN THALAI PAWL LAM: Kristian Thalai Pawl pawh tha takin a ding ve a, Leader lo ni tawhte indawt dan hetiang a ni. Pu Lalkailuia, Pu Ralkhuma, Pu Lalruata, Pu Ralhnuna.

SANDE SIKUL LAM: Sande Sikul lam pawh a nih tur ang thlapin kalpui a ni a, Kohhran ten an hlawkpui hle a ni. Sande Sikul Superintendent a tang tawhte - Pu Liansiama, Pu Ralhnuna, Pu Taivela, Pu Lalkailuia. Secretary a tang tawhte - Pu Ngurchhawnttuanga, Pu Lalruata, Pu Ralkhuma. Sande Sikul Zirtirtua tang tawhte - Pu Vanruma, NI. Zosiama, NI. Lalbiakthangi, NIA Nuchhungi, Thanbuangi, Lalruata, Hmingthangi, Malsawma, Lalengmawia, Khawlliana, Lalringliana, Ngurchhawntluanga, Lalbuaia.

ZIRNA LAM: Tuisen khuaah hian Lower Primary School thleng zirna a awm a, mumal taka sikul neih chu kum 1951 bawr vel kha a ni, Hemi hma hian Pu Lalkhuma Khawzawl khua in Tuisen Dak Inah zirna a rawn buatsaih a, rei lo teah tawpsan leh a ni. Zirna lama sulsutu hmasate chu - Pu Lailiana Sailo, Pu Liansiama, Pu Rochhunga te an ni. Zirtirtua lo tang tawhte chu - Pu Lalkhuma, Pu Lalringliana (1951—1966). Pu Lalringliana Training chhunga substitute teacher atan Pu Rochhungnunga Vanzau leh Pu Lalbuaia Kelkang lak an ni.

TUISEN KHUA ZIRNA LAMA HLAHWTLING LEH AN HNATHAWHTE

Lalenga Sailo (RIP), Officer MMGS 111 State Bank
Ngurremmawia Sailo, Officer JMGS I State Bank
Lalthankima Sailo, Jailer Central Jail Aizawl
Saitluangi Sailo, UDC Accounts & Treasury
Vanhnuailiana Sailo, Driver PHE Deptt.
Saikungi Sailo, UDC Lottery Deptt.
Hmingthanga, PIED Khawzawl
C Lalrothanga, Head Asst, PHE Khawzawl
Vanlalzawma, Teacher ME, School, Khawzawl
Laltanpuia, Accountant MCAB Aizawl
TBC Lairinawma, Teacher Modern ME School Khawzawl
Vanlaldika, LDC Rev. Deptt, Champhai
Lalhmunsanga, IV Grade L.F. School
C Lalbiakmawia, Teacher Dinthar M/S
Thanseij, Teacher P/S Kawnzar
Thanbanglovi, Teacher P/S Kawnzar
Lalduhawmi, LDC PHE Deptt. Khawzawl
B Ralkhuma, Craft Teacher M/S Khawzawl
Sawiluaia, Chowkidar M/S Khawzawl
Ba Thanzauva, JE (PWD) Mamit Division
PC Zoliana, SA (PWD) Khawzawl
Kapzauva, MRP Aizawl
Lalhruaia Sailo
Lalkailuia Cl. -VI s/o Lalnipuia Sailo
Ngurchhawntluanga Cl. V s/o Taivela
Ramthara BA S/o Sawithuama
PC Rohmingliana BA s/o P.C. Lalthlamuana
Malsawmdawngliana BCom s/o Khawlliana

Lalbulkiana BCom s/o Vanruma
Lalramdinthara BA
C Seikunga BSc. s/o Rochhunga
TC Lalthazuali MA d/o Chhuanvawra
TC Lalhriatpuii BPharm d/o Chhuanvawra

Pu Laikailuia, Class VI hi Lal fapa, lehkhah thiam hmasa a ni a, Indopui II-na laia sipai tawnglettu atana hman thin a ni.

SIPAI (FORCE) LAM: Tuisen awm lai leh tun hnua sipai lama tangte : Thangzuala (Burma sipai bel 2), Kapzauva (MRP bel 3), Zoliana (MRP), Vanlalsiama (MRP), Buktaia (Indopui II-na laiin Ambulance lamah), Sawithuama (Indopui II-na laiin sipaiah), Vanhnuaithanga (Vakliana) (Indopui II-na laiin Regiment, Biata sipaiah), Lalthanpara (Burma sipai, damdawi lamah), Laltlanzama (Assam Regiment-ah), C Seikunga (Custom Officer Burma-ah), Lawmliana (Engineer line, Burma Regiment), Rohmingthanga (Havildar, Burma Regiment).

BOY SCOUT/SIGNAL LAM: Indopui II-na (Japan ral len) kum 1942-45 bawr vela Sap sipai V-force ho Colonel sap hova Bukthar hmuna awm hmun khwar ho kha insem darhin Darthlangpu-ho kha Tuisen tlang Bung bulah an khawsa a, an hna ber chu Darthlang hmanga inbiak (indet) kha a ni. Tuisen tlang atang hian Champhai, North Vanlaiphai leh Aizawl etc. te an be thin. Tuisen tlang hi a san avangin signal a inbiakna lamah a pawimawh hle a. Chuvangin, Tuisen tlangvalho hi thu chhia/tha zualko thu thawng (signal) lamah an tangkaiin an hah thin hle a ni. Hmanlai deuh kha chuan tunlai anga inbiakpawhna (communication) a awm lo va, 'SIHDET' (Kawlphekhawnvar) hmanga inbiakna kha 'INBIAKPAWHNA' awm chhun a ni mai a. Chu pawh chu tlangsang deuh atang lo chuan tih theih a ni lo. Hmanlai hunah kha chuan Tuisen khua hi hmun pawimawh berte zinga mi a ni tih phat rual a ni lo, Boys Scout & Signal lama Tuisen pa leh thalai inhmang thinte chu – Thangzuala, Manhleia, Satliana, Sinanga, Vanhnuaithanga (Vakliana), Ngurchhawntluanga, Bawiliana, Lalenga Sailo, C Seikunga, Lalringliana, Malsawma, Khawlliana, Ralkhuma, Tlanglawma leh Lalruata te an ni.

INFIAMNA LAM (SPORTS): Tuisen khua hi khaw lian lo tak ni mah se, kawng hrang hrangah khan a awhkim ve hle a. Sports lamah a bik takin 'football' ah khan a khaw chhehvelah pawh an duai lo thin hle a ni. A khaw thenawm Khawzawl 'Pi Nithangi Cup' ah pheih chuan 'Semi final' hialte pawh an thleng ve thin a ni. Kawlkulh, Zaingen, Darngawn khuaah te pawh football khelin an kal ve fo a, a thiam pawl (team tha) ve tak an ni. Tin, Sunday chawhnu inkhawm banah te leh hun remchang apiangah an inkhel ve thin a, nuam an tiin an hlim pui ve thin hle a ni. Heng tlangval football khel thin ho hian 'NUIHIAU LEH NUI IANG' party-te insiam/ invuahin an inkhel ve thin a, an hlim thin hle. Chung football khel thin tlangvalho chu Satliana, Manhleia, Bawiliana, Sinanga, Ralkhuma, Ngurchhawntluanga, Khawlliana, Malsawma, Seikunga, Lalringliana, Lalliana, Lalkara, Roliana, Thanseia (Sete-a), Lalenga, Lalengmawia, Lalbuaia, Hmingthanga leh Lalruata te an ni.

TUISEN LAL NIPUIA THLAHTE

Nipuia leh Hranghrimi fate chu Thansangi, Lalliana, Thangluaia (sen lai thi), Vanlalmawii (sen laia thi), Kailuia, Sangliani, Lalthangzuala, Lalthangliani, Lalbuangi, Thangmawii, Sainguri, Lalhmingthangi te an ni. Nipuia leh Zokhumi fate chu Lalkhawthangi, Laltula te.

KA NUTEI LEH TUISEN KHUA

Lalzuia Colney

Tuisen khua hi hmuh ka chak em em thin a. A chhan chu ka Nutei awmna a nih vang a ni. A hmel hmuh chu sawi loh a awmna khua pawh khawi lam nge tih ka hre ngai lova. Kum 1960 khan Champhaiah High School zawm ve turin ka kal a, Champhai thlangah 'Tuisen Bangla a awm' tih thu hmana Primary School zirlaia mi kha ka hre chhuak a. Mahse, ka Nutei te khua kha Leisen zawk em ni kha aw, tih thuah ka la buai tho mai. Tichuan, ka Nutei te khua chu Tuisen ngei a ni tih chu mi ka atangin ka hre Chiang thei ta a. Ka Nute-i hi a hming chu Rengchhawntluangi a ni. A pasal Lalbiakliana pawh pasaltha, hmanlai ang ni se Thangchhuahna tura sa kap kim a ni.

Hemi kum Good Friday a lo thlen hian ka Nutei hnenah chuan kal ka tum ta a. Hetih lai hian Kohhran pawhin Good Friday ni hi Chawlhni ang pawhin khaw tam takah chuan an la hmang lem lova. Kei pawh ka thian Rozama, Khawzawl khua nen chuan inthuralin Khawzawl lam pan chuan kan hawng dun ta a. Khawzawl kan thlen chuan Tuisen chu mel 3 vel emaw chauhva hla a ni tawh a, keimahin ka kal ta a. Khawzawl atang chuan Tuisen khaw awmna chu min kawhhmuh a, tlang chhip sang lai takah a ni a, thil dang zawng aia langsar chu a tlang chhipa Bung leh Thelret kung ding chu a ni. In erawh chu hmuh tur a awm meuh lo. Tlang chip ka han thlen chuan a hming chuan in chu a lo awm nial a, ka hriat sual loh chuan hetih lai hian in 18 niin ka hria. Ka Nutei te in chu khawi lai nge tih ka'n zawh chuan, an kawmthlang kawngah ka lo ding reng tawh a lo ni a.

Ka Nutei te inah chuan luh ka tum a, a tualah chuan ka han hawi vel a, "Hei hi maw Tuisen an tih chu? Khawiah nge Bangla pawh chu a awm ang aw?" ka ti a. Ka Nutei te in chu dithlifarfem hniam tak, Kaiten dawh pawh pelh pheng phawng tawh, hlui rap mai hi a ni a. Tui pawh a van em avang hian ruahtui a tlak chuan an dithlifarfem atanga ruah far chu an rinpui ber a ni mai. Sumhmun thingphel chu thingzainaa zai pawh niin ka hre lo, hreipua tei pheik thing an hmang mai niin ka hria. Chutah chuan hmeichhe naupang, tleirawl lek lek tawh, an khua hi a te ema nula hmuh pawhin anni chuan an hmu mahna, hemi hian buh a lo thap sauh sauh va. Min be lova, kei pawhin ka be bik lo. In chhungah chuan ka lut a, tuman min hre lova kei lahin tumah ka hre bawk si lo. In chhungah chuan ka nutei te, a pasal te, a pasal nu leh pate chu an lo awm a. Ka nutei pasal pa hi pa ropui tak, mikhual chhia tha zawng zawng pawh dawl vek thei a ni a, a hming chu Lusibawiha a ni a, 'Seibawia Hmar' tih hi a lar dan zawk tak chu a ni. Sakawr chhawr lai pawh sawm (10) an nei a. Hetih laia Sakawr heti zozai nei chu an namai lo tih a hriat theih mai awm e. Leilet pawh khamkhawp thar theihna an nei bawk a. French ram kal lai khan kal ve tur zinga mi chu a ni na in, a pha thiam deuh nge ni a kal ve ta lo a ni.

Tichuan, Eng ang khual nge ka nih tih pawh an hriat loh avangin kan han inzawt vel a, "Chalmawii fapa ka ni a, a naupang ber ka ni," ka'n tih chuan ka nutei chuan, "Awi karei Bawhte! a va mak em!" a ti a, ka kokiah a dawm a. Ka nu (a u) chuan kum kal ta 1959-ah min boralsan a. Ka nutei chu a mittui a hru a hru a, ka khawngaih hle. Ka nu pawh chu a U ni mah se, kum 50 dawn lai an inhmu tawh bik lo a ni. Hetianga kan inbiakna thawm velah hian sumhmuna tleirawl buh thap pawh kha a lo lut ve a, "Hei hi ka U maw?" a rawn ti a, chibàite min han buk ve hial a. A pianzia chu a pianzia rengah mi tawi lam deuh, ngo tak,

nghawng tawi deuh a ni a. A duh mi tur tan chuan a ngaihawm ve viau mai thei. Tichuan, a hna pangngai bawk chhunzawmin pawnah chuan buh a va thap leh ta a.

Tichuan, kan chhungkawho chu kan titi ta zel a, engtia an khuaa kal nge ka nihte min zawt a. Champhai High School-ah ka kal ve a, Sikul chawlh hun remchang chuhin ka tlawh a ni tihte ka sawi ve bawk a. Tlaiah chuan khawlai kan leng a, an lalpa in velahte chuan kan kal a. 'Tuisen Bung' an tih fo pawh hi an lalpa Pu Nipuia nu (Pu Zualthauva, Aizawl a awm nu) phun hi a ni. Kum 1922 lai vela phun tawh kha a ni a. He tlang hi te hle mah se hlut ve riauna a nei a. Tuisen Bangla an tih fo pawh hi a hming putu chu he Tuisen khua hi a ni a, a Bangla tak chu Tuisen khaw hnuai hian a ni, Tuisen tlang atang hian khua a lang thui thei hle a, fur khawthiangah chuan Bay of Bengal tuiquite pawh a lang thei a ni awm e. Tuisen leilet pawh an khaw hnuai lawkah bawk hian a awm a, He khua hi te hle mah se a hun laiah chuan Tuisen Bangla hre lovin Lower Primary School-a pass theih bik loh a ni ber mai. A khua hi tein, a tlang hi te mah se, a hrechiantu "Tlang dang zawng zawng aiin, Kei zawng ka ngaina hle," an ti fo awm a nia!

Aizawl leh Champhai lamlinan, 'Sapsakeia lamlan' an tih fo khan he Tuisen khaw Leilet hmun hi a tantlang ve avangin, Champhai atanga Aizawl zin tur emaw Aizawl atanga Champhaia kal tur emaw chuan an hmu ve ngei ngei thin. Aizawl lam atanga Tuisen leilet han kal pelh dawn lai hian Chalthei Kawn a awm a, Chutah chuan Chalthei a awm nual a, a par hun laiah chuan a par vul nasa thei hlc a, a kal apiangin, "A mawi mang e" tih hi tumah in zawt lo mah se an sawi chhuak reng reng thin. Chuvangin, Tuisen leilet vel leh Chalthei Kawn vel hi, USA rama Prairies leh Australia rama Darling Downs te la hmu ve lo tan chuan khawvela hmuh nawm ber thlirin an thlir ve tho a ni, Pu Rokunga pawh khan hemi hmun hi a han thlen meun chuan, a thinlung chhunga hla thu bawm a lo puak keh ta hial a, a han hawi vel a,

*Damten a sirah chuan Sentui a luang e,
Chalthei par thing bawm a,
Lung min len tawn leh ni awm tak ang maw?*

tiin hmuh leh hlan thlahlel takin Chalthei Kawn hi a bye bye liam ve ta a ni. He khua hi ka tan pawh hmun pawimawh tak a ni ve reng mai. Tun hnu ka ngaihtuah phei chuan he khua hi ka tlawh vawi khatnaa ka Nuteii te sumhmuna buh lo thlei lap laptu khan, i-he lovin, ka fa hi 'Ka fa' a ti ve ta zel mai a ni. Kan inzawm nghet viau a lo ni. Mahni chanchin han sawi takah chuan, Pathiana kan pianthar hlim hian 1963 Krismas lai khan Tuisen khua hian mual inkhawm min neihpui a. Mi kan tam lo; mahse, beisei tur dang a awm loh avangin kan lungawi tlang a, kan hlim hle tho. Chuta ka chang thlan chu, "Tunah Bethlehem khaw thlengin kal ila, Lalpan thu min hrilh lo thleng chu i en ang u," tih hi a ni. Ka sawi tui hle. Tichuan, ka sawi zawh chuan hlim takin mual-inkhawm chu kan tin ta a ni.

He khuaah hian Kohhran Upa pakhat chauh, Upa Taivela(RIP) a awm a, a puibawmtu chu awm ve bawk mah se, Upa ang tak tak chuan hma lak a har fo thin a. A chang chuan Kohhran Upa hna leh, Chowkidar hna leh, Chairman hna leh Khuangpu hna a kawp vek chang a awm, Inkhawm zanah dar a vua a, khawnvar a chhi a, khuang hi a vei lamah khuangte, a ding lamah khuangpui, tichuan a pahnihin a kawp fo thin. Inkhawm tan a lo hun chuan Chairman thutna a pan a, inkhawm hruai hna a thawk a. A chang

chuan thusawitu a nih leh changte pawh a awm. Pu Kailuia chu Pathian thu thiam tak a ni a, Kohhran Upa ang maia tangkai leh hmanrua ber a ni baw. Heta ka thian la dam te, Pu Engmawia leh Pu Ralhnuna pawh an insit thei hle nain, an tangkai em em a ni. Tuisena kan inkhawm tum hi chuan, inkhawm aiin inkhawm lo hi an langsar zawk deuh zel. "Ani hi engtizia nge?" kan ti deuh reng mai.

Kum 1966 a lo thleng a, March 1-ah chuan MNF-in movement an siam a, ram buai kan ni ta reng mai a. Kan bul lawka Khawzawl Camp pawh MNF sipaiin an hual bet a. Keini Tuisen khua chu engtin tak awm ang i maw, tiin kan rilru chu a buai ru hle a. Inrinni zanah kan han inkhawm leh a, Upa Taivelan inkhawm a kaihrui a, Bible chang chhiara a din laiin Khawzawl Camp-ah chuan silai a ri leh ta zawt zawt mai. Pi Darzami chu Chairman thlang lawkah chuan a thu a, Upa Taivela chuan a Bible chhiar chhunzawm pah chuan, "Chu! Chu! Ngai rawh Darzam, chuti chu a ni mai a sin, Engtinge ni dawn?" a ti. Inkhawm pawh chuan rilru dang vak kan puh lei thei lova, silai rikna lam ngawt chu kan ngaihtuah a ni ber mai. Buai a lo zual zel a, khawbu pawh luah hlei thei lova kan awm chang a awm ta a ni.

Hetiang hi Tuisen khuaa ka awm laia thil thleng thenkhat a ni a. Kawng tam takah chhungkaw khat anga a thlum a al eiza kan nih avangin he khua hi te mah se, khawtlang nunphung a nuam hle. "Khawte lungual" tih pawh hi an nihna dik tak niin ka hria.

MEI KAN HLUM: Tukverhah ka dak a, ka thlang kawngpui a ruang let reng chu ka thlir a, kawngpuiah mi an zi nak nak a, mahse, tumahin chu ruang let reng chu an ngaihsak lo. Ka mitin chu ruang bawihawm tur ka melh reng a. Kohhran Upa min, fel zet leh inpezo thin tak a lo kal a. Tuma ngaihsak loh ruang let reng chu a bawihawm ka beisei hle a, mahse, a hmu lo nge maimitchhingin a kal zawk; hmu awm pawhin a lang lova, a kal liam ta mai a, A liam tur chu han auh din a, ruang let reng chu ngaihsak a bawihawm tura han auh vak ka duh a, mahse, ka auzui ta lo. Ka thlir reng a, nakinah chuan kan veng YMA hruaitu duhawm leh inpezo tak tak tlawmngaihnaa tu el phak lohte an lo lang a, ka thla a muang huai a, anni tal chuan ruang chu an hlawm a, an bawihawm ka ring a ni. Mahse anni pawhin an ngaihsak lo, pakhat phei chuan an rap hram lehngal a, ka lainat hle a.

Khawlaia ruang let reng ta mai chu tumah lahin ka Ui ka Ar ti an awm lova, amah hre duh reng tumah an awm lo. A bula mi vei velte pawhin an hmu lo nge an meng lo, an liam zel mai si a, a mak ka ti hle mai a. Amah hi kan naupan lai, zirna tura bul kan tanna PS atang daih tawhin ka hre tawh a. Tihpalh thilthu tak meuh leh awmhlei vangin ka tawngin ka hre ve a ni. Chutih lai chuan tha awm pawhin ka hmu lova, a zun nat tur zia pawh ka hre phak lo. Mahse nikhua a lo rei a, kan inhriat dan a thuk tulh tulh a, rawlthar tih ngam kan han nih meuh chuan a duhawmna leh a hmelthatna, a zun chuan min lo phuar hneh hle tawh mai. Rilru luahtu ber a ni chho ta ngar ngar a, a tel lova tlaini len ka zuam thin lo, amah then tumin han insawh vel thin mah ila, ka zep lo, ka thei lo a ni. Hetiang hi kan inkar a lo nih tawh vang pawh a ni ang, kawngpuia a ruang let reng ka hmuh pawha lainat leh duat taka bawihawmtu awm se ka tih ni. Kei, amah hrechiantu inti ve lah chuan a ruang hlawmtu han nih a han bawihawm chu ka ngam si lo. Hiha! Ava han rapthlak em!! Ka dawihzep vang a ni!! A thih chhan lah chu mei kan hlum tih a lang reng mai si a. A thihna a rei tawh avangin a rim pawh a chhe tawh a, a hmel mawina leh duhawmna amahah hmuh tur a lang tawh lova, mawina reng reng amahah hmuh tur a awm lo a. A dukin a duk kual vel vek tawh mai a ni.

Bawih sawmtu nei lova chutia kawngpuia hmelhriat (Hmelhriat tih piah lam rak thlenga lo chulnelte) ruang let reng mai chu ka en thei lo. Ka huaisenna leh mipatna zawng zawng sawmkhawmin a ruang hlawm turin ka pen chhuak ta a. Tumah pun buai tulin ka hre tawh lo, ka zuk chhuk a, a bulah chuan ka ding a, ngawi rengin rei tawh ka thli a, kan intawn dan leh kan tun hnu chanchin ka ngaihtuah a, lung a chhe hle a, mahse, tah ka tum lo. Kan inkawp danah mi sawisel hlawh thin mah ila, a lepchiah vang a ni bik lo ti tein ka ngaihtuahna a vak vel a, ka kun hniam a, a ruang tual daia let reng chu ka han kai thal a. Karei! A rim a chhe nasa tawh mai, Uih rim pawh a ni lo, sawi thiam theih loh rim mak tak mai a ni. Ngaihtuah a va thui duh em! Hei hi maw lungsi taka ka lo fawh thin! A ni thei lo, a ni loving...Mahse a ni tlat si, khami kha a ni lungsi taka ka lo fawh thin ni!!

A ruang chu kan inah ka la chhova, ka pindan a hmunawl laiah a ruang chu ka zalh a (Dawhkan chungah a ni a) puan pawhin a ruang chu ka khuh buangbar lo, a rim a chhe tawh em a! Kha leh chen lo inzuiin lo inkawp tawh mah ila, ka mittui a them pawhin a parawl lo, a thih dan a rapawm em a, mittui pawh ka seng hman lo a niang! Tam tak chuan min dem mai thei, Mahse, min dem suh u, a mak a ni, a dam laia a var tuihnai theih teh reng nen a awmdan dik ta khan hmuh chuan, a mak em a ni.

Dawhkan chungah ka ruang zalh chu ka thli reng a, amah ka lainatna leh mak ka tihna chu a inchen thuak ang. Rei tawh ka en hnu chuan rang takin ka chhuak a. Doctor in lam ka pan vang vang a, Doctor chu ka...ruang post mortem a endik tura pun ka tum a ni. Ka hmanhmawh bawh a, kan let rang fu, Doctor in a han thet a, a thih chhan mai piah lam thlengin an hai ruak mai chu maw – karei!! Ava lo makin ava lo rapthlak ngai em! Doctor Post mortem result chu ka chhiar thuak a. Hetiang deuh hian a lo inziak a:

Thihchhan : Meiin a lu lam atanga kangin, a awm leh kawngbawh vel thleng a kang a, mei kan hlum a ni. A thil paite_ : Mihring tihhlumna leh tihchhiatnan a tha ber chi TUR hlauhawm 500 chuang a pai a. Heng zinga 15 phei chu tinther tia lek pawh ei ila, vawi sang sawm a thih nawn theih hial ang. Hei lo pawh hmel tiduk leh hahni tidum thei, Aw ti hnawh thei hnang ban leh Lu tihnatna a la pai tel bawh. A rilru_ : A tha lo hle, mihringte neihsum tih hek a, an neih eiral sak hiau hiau hi a tum a, an hriselna leh hmel mawina, chakna thahrui leh duhawmna zawng zawng ruk zawh sak vek hi a hnial lova, tualthah a tih lo. Amah ngaitu apiang nunna kum 15 zetin a tihtawi sak zel thin.

Karei! Hetiang hrep hi maw a lo nih le!! Hei pawh chhiar thuak atanga ka hmuh mai theih chauh a ni lehngal. A chanchin tobul lam ka han chhui chiang a, a pianna pawh a lo duhawm hrep lo a nih hi tiin ka insawh ka insawh a. A rilru turte ka ngaihtuah belh zel a, a rilru chhungmu a lo chhiat dan turte ka ngaihtuah a. Amah avanga kei tlangval thalaiin namen lova ka tawrh dante, ka hmel leh taksa mawina leh duhawmna min lo rukbosak nasat tawh dante ka chhut a. A aia ka thi hnahnung chu ka lawm ta hle a, a ruang chu ka thli a, lainatna rilru ka pu thei tawh lo. Amah ka huatna leh ka tenna chuan min ur so but but a ni ber e. Hetiang hrep hi engvang mahin ka hmelhriat leh thian a ni thei lovang, ka lakah engmah a ni tawh lo, ka thian a ni ngai tawh lo vang, tenawm mai ilo ni e tiin ka dawhkan chungah zial bung chu ka la lawk a, ka thlang kawngpui sirah chuan ka paihthla leh ta a. ka paih rual chuan 'Mei kan hlum' ka ti a, ka nui sak a, ka ngaihtuahna atang pawhin ka paihchhuak ve ta a. Vawikhat mah ka fawp leh ngai tawh lo vang.

VANGTLANG CHANCHIN

Hmakhawsang atanga Vangtlang ram lo luah tawhtute zawng zawng leh a hunlai ziaak hmuh tur a awm loh avangin hriat vek theih a ni tawh lo. Amaherawhchu pipu sulhnu leh hmunhma heng-Rovawnginu hmun tlang parh zawl nuam tak leh a lungphun te, Sialapa mual tlang thengthaw nuam tak leh lungphun te, Hmarbawk tlanga Hmar-ho sulhnu lung phun te leh Ralte kawlni-ho sulhnu nia ngaih Kawlni tuikhur te hmuh tur a la awm a, Tin, Upa-ho chuan tunhmain Thanseia pawh In 300 khuain a lo lal tawh niin an sawi baw. Mahse, chu'ng ho chuan khaw hmun hi an chhuahsan leh ta hlawm a. Tunhmaa he tlang lo luah hmasatute kha Lal dang leh khaw lian zawk awt bik lova rual pawl tak an nih avanga Vangtlang tih hming hi lo pu niin an sawi.

Ralthiauva Sailo kha Lal hmingthang Vuttaia tupa a ni a, apa chu Lalvunga a ni. Thlahtu bul Nova (Bible a mi ni lo) atanga chhuan sawm pasarihna (Nova, Dongula, Ningultea, Bawklua, Sehsinga, Ralnaa, Chhuahlawma, Zahmuaka, Thangura, Thangmanga, Sailova, Chungnunga, Rohnaa, Lallula, Vuttaia, Lalvunga, Ralthiauva) niin Arbawm khua (tuna Thinglian leh Hmunzawl khaw inkar) a kum 1862 a piang a ni. Apate hi a pu Vuttaia hnungzuiin hmun hrang hrang – Kharzawl, Karmual, Sialhmur, Siallukawt leh Ngentianga te an awm thin a, Kum 1872 vel khan kum 10 emaw lek a nihin a pa Lalvungan Ngentianga a lalna thlazar hnuaiah veng mawng lamah a lal tir ve a, hetihlai hian Ngentiang hi in 500 khua niin Zawlbuk pawh pathum (3) a awm a, Lalvunga hian a fate hi naupang te tein Liandawr vengtu lamah Zalala veng laiah a lal tir hlawm a ni. Kum 1895 kumtirah Vangtlangah a kai ta a, a upa rawn kaipui kan hriat theihthe chu – Lalkhawsiam, H. Lalbawnga, Sawhpaiha, Lalkhama, Lianhawla, Patuma, Lianngura, Hena Hmar, Vanthawma, Phunchiara te an ni a. In 60 vel a rawn kai pui a, hei hi vawiin ni thlenga meimit lova luah tanna Vangtlang khaw kum bul a ni ta a ni.

Vangtlang Lal Ralthiauva ramri kal dan hetiang hi a ni - Khawthlang lamah Elva lui hnar kawn hi Chalrang nena inrina Ramri kawn niin lung phun a ni a, chutatang chuan Elva lui zawh thlain Chhim lamah Elva lui zelah Riangtlei ram a ri thla zel a, khawchhak tuipui a pawh a. Tuipui kanin khawchhak lamah kawr zelah Bungzung nen inri chhovin ramri kawnah a chhuak chho a, kawnah hian ramri lung phun a ni a, kawn atangin kawr zelah liam thlain Thlikva lui a pawh leh a, Thlikva lui dung zelah Buang ram nen inri thlain Tuipui a rawn pawh leh a, Tuipui rawn kanin Tualte luidung zelah Tualte a ri chho a, Chalrang luiin Tualte lui a rawn finna atanga Chalrang luidung zelah Chalrang ri chho lehin Ramri kawnah a chhuak chho leh a ni.

Vangtlang hi Khawzawl District-a awm niin Khawzawl atangin km 40 a hla a ni. Champhai District a nih lai pawhin khawfai ber lawmman Belpui pawh lo dawng tawh a ni. Tin, Khawzawl District-ah pawh khawfai ber lawmman 2-na pawh a lo la tawh baw.

Vangtlang khuaah hian mipa 303 leh hmeichhia 284, an vaiin 587 vel an awm a, tunah hian In 103 vel an awm mek a ni. Vangtlang khuaah hian Kohhran pathum UPC(Mz), UPC NEI leh Presbyterian Church te an awm. Tunah hian Sub- centre pakhat awmin Health & Wellness Officer in a thut chilh mek a ni. Vangtlang khaw luh dawnah YMA Park nuam tak a awm a, he park hi hmun thengthaw nuam tak a nih avangin tualchhung mite leh khaw thenawm atang pawhin tlawhtu kan nei ve fo thin a ni.

VANCHENGPUI CHANCHIN

VL Hmangaihzuala

A AWMNA : Vanchengpui hi leilung teh thiamte chhutnaah chuan, khawvel hmar lama Ni kan thlen thui ber chhinchhiahna rin (Tropic of Cancer) chhim lam hret, Chhawrtui leh Lungpho inkara awm a ni a. Khawzawl District huam chhung, Lengteng Assembly Constituency chhunga awm a ni. A ram hi khawchhak lamah Tuichang in, chhim hawiin a luan kual a. Khawthlang lamah Nghalrawh luiin chhim hawi zawng bawkin a kual leh a. Hmar lamah chuan Uilungzo tlang feet 3000 dawn laia sangin a khuap zui mai bawk a ni. A khaw hmun hi a ram tlang chhip hmun rem tak maiah, Tlang hniam te te pathum thutin a awm a. Khawdung leh vang a inbial tawk a, khaw ualau tha tak a ni a, zawl dap ni loin, tlema hmun awihtlan a ni a, a lawilen a nuam em em a, sik leh sa pawh a nuam tawk hle. Thlasik laiin vur a tla thin a, Nipuiah pawh khawlum lutuk a awm ngai lo. Tunah tak hian Vanchengpuiah hian in 180 awmin, mihring hi 1100 vel an cheng mek a ni.

A HMING PUT CHHAN : Vanchengpui khaw hming putu tak chu tuna khaw awmna ni lo, Vancheng hmun ti a, an sawi thinah a ni a. Chuta an awm hma, Vaipheiho awm laiin, Vancheng tih hi alo pu tawh niin a lang. Vanramah pawh awm se, chu aia a nawm zawk chu an ring reng reng lo a. Tichuan, nuam an tihzia leh a nawmzia sawi nan, Vancheng tih hming putu khawdung alo awm si avangin, Vanchengpui an ti ta a ni. A hmun a nuam em em a. Tlang hniam te te, a kara tui tha tak awm vek, veng thler nuam bawk si, ral laka venhim awl tak, han hawi vela khaw hawina dal theitu engmah awm lo a, van hawng zau em em mai hi a ni a. Chhim leh hmar indo lai pawhin ralin an run thei lo niin an sawi.

KHAW INDIN DAN LEH INSAWN KUAL DAN : Vanchengpui khaw ram chhungah hian tute nge cheng hmasa tih hriat a har tawh hle a. Chanchin hriat theih hla ber chu Vaipheiho awm lai kum 1820-1860 bawr vel a ni. Vanhnuailiana alo lal a, Vaipheiho chu ral daido tura dah nghalin, khawchhak lamah Ngendal hnam a dah a, Hmar lamah khawlhing hnam, vawiin thlengin hmun hmingah an pu ta hlawm a ni. Chhim leh hmar indo a reh a, Vanhnuailiana chu Awnnu leh Tualteah te a kai ta a ni.

Kum 1894, Mizoram chanchin tha thlen kum chiah khan Lalburha, Vanchengpui khawthlang ngaina rum rut mai chuan Arro atangin Vanchengpui ram Bawksang an tihah a rawn kai a, a kum lehah apa sulhnu ngei Vanchengpui khaw hmun ngaiah an awm leh a ni. Kum 1917-ah Lal chuan Chhawrtui kai a rawt a. Amaherawhchu, German raldo turin Vanchengpui pa 23 ngawt mai kal a tul ta si a. Khawthar kai chu an thulh leh ta a ni. Kum 1922-ah Chhawrtuih an kai phei a, Kum 7 dawn an va awm hnuah 1929-ah an lo let leh ta a ni. Kum 1933-ah Lalburha fapa Thangchungnunga a lal tan a, 1939-ah Chhawrtuih an kai leh a. Hemi tum hian kai ve duh lo in 23 an awm a, Lal leh sawrkar in chhuak tura an tih pawhin an chhuak duh lo a, hrem nan lei man cheng 2 chu cheng 4-ah tihsan sak an ni a, rit an ti hle.

Mizoram hun tawng (Rambuai) chuan nang vein, India sipai leh Mizo sipai inveh reng karah khawthlang a kun a, kum 1968 February -ah phei chuan Mizo sipai T. Battalion leh CH Battalion infin leh India sipai te chu Vanchengpuiah an inkap chiam a. Mizoram buai chhunga inkah rei ber zinga mi a ni. Kum 1968, April ni 13-ah chuan Vanchengpui chu Lungpho hmunah khawm tura tur chhuah an ni ta a ni. Chhuahsan chauh ni loin

sipaiin khua an hal vek a, meivapah a chang ta a ni. Kum 1972 ah Lungpho atangin Vanchengpui ram Suanghlum an tihah an kai pheih leh a, 1973-ah khawhmun chu luah ngheh a ni leh ta a ni. Khaw hrang hrang a pem tawhte pawh an lo let leh a, khaw ngheh tak a ni chho ta a. Tun kum 2024-ah hian in 180 leh mihring 1100 vel an awm a ni.

VANCHENGPUI KHUA LO AWP TAWHTUTE : Vanchengpui lo thut tawhtu lalte chu:-

VANHNUAILIANA: Lalsavunga fa paruk zinga a upa ber a ni. Mi nun nem, zaidam, huaisen ngilnei, mi khawngaihna ngah tak a ni. Chhim leh Hmar indo lai khan Vanchengpuiah a awm a, Vanapa, Tawkthiala, Keikawla leh Chawngduma te kha he khaw pasalthate an ni.

LALBURHA: Vanhnuailiana fa 5 zinga a tlum ber a ni. Lal hmingthang tak a ni bawh. Pa rorum tak, zu leh fiamthu duhtak, tawngkam maksak pui pui a mi fiam hrat tak a ni. Vanchengpui khawtlang ngaina rum rut a ni. Sap in a awm duhna an thlan tir pawhin, Serchhipah awm rawh aw, a ti a, “ka leng lo vang” Lumtuiah awm rawh a ti leh a, “A leh koh e mai” a ti bawh si. Vanchengpuiah awm rawh aw, a han tih meuh chuan “Lal awmna awm reng a ni, i ti har ka ti reng a ni” a ti hmiah mai a ni. Kum 1894-1933 chung Vanchengpuiah ro a rel a ni.

THANGCHUNGNUNGA: Lalburha fa pali zinga a tlum ber dawttu a ni. Kum 1933-45 chung Vanchengpuiah a lal.

CHAWNBIKA: Lalburha fa tlum ber a ni a, apa Lalburha a thih laiin kum 13 chauh a nih avangin rorel turin ala naupang a, McCall Sapin a u chu tlang chang turin a ruat a ni awm e. Kum 1945 vel atangin a lal a, Mizote Lalna a tawp thlengin ro a rel ta a ni.

PIPUTE SULHNU LEH THILMAK AWMTE

LALRUANGA LUNG KAH LEH TUI THUHRUK: Mizo thawnthua kan hriat lar tak Lalruanga, dawithiam khan, Mizoram hmun hrang hrangah sulhnu a nei tam hle a. Vanchengpui hmunah pawh a sulhnu hmuh tur alo awm ve zel a, Vanchengpui khua atanga chhim chhak lam 3 km vela hlaah hian ram parh tha tak thlawhhmaah pawh neih thin a awm a, chu ram chu “Lalruanga Lung Kah ram” tih a ni. Hemi hming an chawina chhan ber hi, he ram chungah hian lungpui lian tak mai, a sira teh kualin Feet 221 vel lai a lian a awm a. He lungpui lian tak mai hi a pang (Lei atang a sang lo te) ah hian 8 inches vela zauin a kaw pheih hul mai a, a kaw sir vel chu Silai zen puhna ni awm tak hian a chik hrup mai a. A kua chu mautlawn sei tak a an hawlh pawhin a tawp an hawlh thleng ngai lo a ni. Tin, he Lungpui awmna atanga hla vak lo, fing 2/3 lekah hian Lungpui lian tak dang a awm leh a, chu Lungpui sir pang leiseh chinah 10 inches bial vel a zau, feet 1 leh a chanve vel a thuk hian a kaw thla a, chutah chuan tui hi a khat tawh chiahin a tling reng mai a. Suak kang vek mah ila, a rawn tling khat leh mai thin. A liam ngai lo thung. Hemi hmun lo atana neite Bai chhuanna khawp chu a thling thei reng a ni. Chu chu Lalruanga tui thuhruk chu a ni.

ZAWLMANGI LUNG: He Lungpui hi khua atanga 3 km velah Ngentiang nena a inkar khamko a awm a ni. Lungpui sang tak, a chung zawl duai mai a ni a. Tunhmain Vaipheiho he lai hmunah hian an awm thin a. Tunah pawh Vaiphei ram tih a la ni. Vaipheiho an awm

lai a, an nula hmeltha Zawlmangi hian he Lungpui chung zawlah hian puan a tah thin a. A them tlang ban phunna te, a thutna te, a tlawh chhan leh a them tui hnawih bunna khuarte a la awm thlap a ni.

KHAMKEH: Zawlmangi lung awmna kham zawmtu kha a ni a, kham sang tak chu a ni lo nain, danglamna riau a nei a. A bulthut atanga chung lam chhuak vekin, a keh chho ruih mai a. A keh hi patlingin theihtawka kar tawh vel a ni.

LALBURHA THLAN: Yanchengpui khaw Lal, Lalburha Lung/Thlan hi khua atanga hmar lam dai kiang lawkah a awm a. A lungdawh sirah hian lung lian tak mai pahnih a inphun bawh. A Lung hi feet 7 vel a sang a ni.

LUNGKHAWDUR: Khua atanga chhim lam 1 km velah, Lungpher zau tak mai a awm a, chu Lungpherah chuan khawdur ni awm takin, a then laiah a khuar a, a then lai a pawng thung a, awmze nei tak, han en mai a, khawdur a an avangin Lungkhawdur tih hming a pu ta a ni. Lungkhawdur atanga hla lo teah hian puk zau tha tak mai a awm a, Lungkhawdur puk tih a ni a. He puk awmna ram Lo a neitu chuan thlamah an hmang mai thin.

DARTHIR : Khua atanga hmar lam km 5 velah a awm a. Kawrah hian pialtlep a awm a, chutah chuan lian vak loin kua a awm a, a hnuai /a chhung chu a kaw thla rul mai a ni. Chumi kuaah chuan thing bung leh mau tlawn te han thlak ila, Dar ri ang mai hian a ri rung rung mai a, Favai te an thlak thin a. Tuichangah a chhuak thin an ti. Adventure Club ho pawh he Dardhir kuaah hian an lut tawh a ni.

...oooOooo...

VANKAL CHANCHIN

K Zonunthara, Secretary
Village Council, Vankal

Vankal hi Khawzawl District chhunga awm a ni a, in 112 vel niin Khawzawl atanga hmar lam 37 km-ah a awm a, Aizawl atangin 147 km a hla a ni. Latitude 23.624801°, Longitude-93.127705° - a awm a ni. Vankal hi tuna a khaw thut mek hi khaw upa a la ni lo a, chutih rualin Vankal tia koh a nih tan atang hian khaw hmun hi hmun nga lai lo luah a nih tawh avangin a kum zat tak hre lo mah ila, khaw naupang lutuk chu a nih loh hmel. Tuna chhut dan leh hriat chian theih chinah chuan kum 2027 khian a kum 100 tlinna lawm tum a ni a, hei hi thangtharte chhut theih chin niin hemi hma lam hian a hming put chhan HMAR VANKAL tih hnamho hian hun engemaw chen chu an lo luah tawh bawk a ni.

Vankal khua hi Sailo Lal ropui tak Lalsavunga thlah kal zel lalna khua a ni a, Lalsavungan Lianphunga a hring a, Lianphungan Pawihbawiha a hring a, Pawihbawihan Lalruma a hring a, Lalruma fa Lamira lalna khua niin, Vankal khawchhungah hian Mizo hnahthlak hnam hrang hrang nnam 20 chuang zet chengin mipa 219 leh hmeichhia 183 awmin, kan vaiin tunah hian mihring 402 kan cheng mek a ni. A khaw awmna hmun hi hmun penhleleh leh Zo thlifim tamna niin boruak a thianga tha a, khaw lum leh vawh thuah pawh hmun nuam tawk tak a ni. Vankal ram zau zawng hi 112 sq. km vel a ni.

Vankalah hian Kohhran hrang hrang panga a awm a, chungte chu Pathian Kohhran, Isua Krista Kohhran, United Pentecostal Church (NEI), Church of God (Seventh Day) leh Presbyterian Church of India te an ni. Zirna sikul hi Middle School 1, Primary School 1 leh Anganwadi Centre 1 a awm bawk. Vantlang hmunhma leh in hi Community Hall, YMA Hall, BNRGSK Building, VC House, Health Clinic Centre leh YMA Library te a awm.

Vankal chanchin sawia lang tel lo thei lo chu a ramchhunga kan tui tlante hi an thianghlimin an tui em em vek a, heng kan tui tlan te leh Pathian malsawmna kan dawn avang tein Vankal khawchhuak pianphunga harsatna nei leh mi ang lo sawi tur kan awm meuh lo hi Vankal khawtlang lawmna pakhat a ni. Vankalah hian hmun hrang hrangah a lo luah hmasatute, pi leh pu te sulhnu tam tak hmuh tur a awm a, chung zinga a lar zualte chu Vankal Sial leh Dullai Sial insikna hmun, Chhura talhtum bung, Lungpui kul, Satinreng ziahna lung, Lungding, Pi Bum kawi leh Hmeithainu lemziahna lung te hi an ni.

Tin, Vankal khua hian rual u te atang pawhin football-ah hmingthanna a lo nei tawh a, Vankal Cup la ang tih tawngkam pawh a lo chhuah phah a, he mi kaihnawihah hian Petromax chhit chungchangah pawh fiamthu thiam deuhte fiamthu avangin an nih lohna ang deuhin an lo larpui tawh bawk a ni. Vankal khua hi thingtlang khua a nih angin a mi chengte pawhin hna an thawk nasa a, an taima tlang hle. Mizo tlawmngaihna in a ken tel zing a, mite tanpui kawngah pawh hian kum tam tak chhung chu tun thlengin YMA ten mitthi an awm in, khawhar chhungte pualin hnatlang an la nei thin a ni.

Eizawna kawngah thingtlang lo neih hi kan eizawna pui ber niin kut hnathawh kan uar hle a. Hmasawna hrang hrang nei vein tun dinhmunah phei chuan North East India-ah Solar Project lian ber awmna hmun kan ni a, hei hian eizawna kawngah nasa takin khawtlang hmasawna a thlen dawn niin kan hria a, kan lawm hle a ni.